

# في الحلال

بقلم : رقيه طه



ركزوا اوووي في اللي هتقرأوه هاه ^\_^

مش عاوزينها تكون مجرد روايه ، عاوزينها تكون إسلاموب حياة ♥

نبدأ بسم الله (:

## مقدمه بسيطه ^\_^

قعدت أفكر كثير في المقدمه وشكلها وكلماتها ومعرفش إيه ، ، وفي الآخر قولت نخلي البساط أحمدني وهقولكم علي اللي جوايا وبس .

مبدأيا كده انا كنت قاعده في أمان الله وفجأة حسيت إنني جوايا حاجات كثير حابه أتكلم فيها ،

حسيت إن ممكن حد يكون محتاج اللي هقوله ده ، مش ممكن ده أكيد D:

والأهم بقي إنني نفسي أخذ ثواب كثير اوووي فقولت أجرب أكتب وبإذن الله ربنا هيوافقتي ♥

الروايه بتتكلم عن حياتنا كلنا ، متهيألي مفيش شخص هيقراها إلا لما يلاقي نفسه جواها ،

كل واحد فيكم هيلاقني حد شبهه في الروايه ، هيلاقني مواقف هو فعلا بيعيشها ، هيلاقني الزقه اللي كان محتاجها من زمان علشان يبدأ حملة التغيير علي نفسه

بإذن الله بإذن الله كل حد حابب يعمل ثوره علي نفسه ويبدأ يعيشها صح بقي هيعرف إزاي من الروايه دي ^\_^

الموضوع مش هيكون مجرد " حب حلال " الموضوع هيكون " حياة حلال "

يارب أقدر أوصل كل اللي عاوزه أقوله

متأكدته إنكم هتحسوا كل كلمة في الروايه بإذن الله

كفاية كده بقي ومعلش لو طولت عليكم ..

لما تخلصوها إدعولي هاه ^\_^

ونبدأ مع :

## في الحلال

روايتي الأولى ^\_^

في كافيتريا كلية الهندسة يجلس إسلام ذلك الشاب طويل القامة خمري البشرة حسن المظهر مع صديقه محمد ذو الشعر الناعم والطول المتوسط والوجه الباسم دائما والقلب الحنون .

قال إسلام بهدوء :

- عرفتها من ع النت

زفر محمد بضيق وقال :

- نعم !! وهو إحنا من الناس دي برضو يا إسلام !!؟

تتحنح بإحراج وقال مفسرا :

- يا بني إصبر هفهمك ، انا بتكلم معاها عادي خالص والله ومش بنقول حاجه حرام ، كله كلام عام كـ  
تعارف يعني

طأطأ رأسه بحزن وقال لانما :

- بس مش إحنا اللي نلعب ببينات الناس يا إسلام !!

رفع حاجبه قائلًا بتعجب :

- وهو حد قالك إني بلعب بيها ، عييب يا محمد أخوك راجل برضو ، كل الحكاية بس إني لازم اتعرف  
عليها كويس قبل ما أتقدملها

محمد بتعجب :

- تتقدملها !!؟

أجابته علي الفور :

- أيووه يا بني اومال انا بقول إيه من الصبح ، البنبت اللي هتجوزها لازم أكون عارف دماغها  
وتفكيرها كويس ، علشان كده قلت اتعرف عليها الأول علي النت وأفهم دماغها بعدين أروح أتقدملها  
إن شاء الله

- طيب وانت عرفت إزاي بقي إن دي ممكن تكون مناسبة ليك !!؟

إبتسم إسلام قائلا :

- بصراحة كده هي كانت معانا ف جروب ( نقاشات حره ) وبين عليها دماغها حلوه وكمان باين عليها محترمه

نظر إليه قائلا بتعجب :

- باين عليها امممم طب وهي لو كانت محترمه كانت هترضي تتكلم معاك كده !!؟

إنتفض إسلام من مكانه وضرب الطاولة بقوه وقال غاضبا :

- محمد انا مسحكش ، يا تتكلم عنها عدل يأما تسكت ، فـاهم

محمد بضيق :

- خلاص يا عم إنت حر ، يلا علشان المحاضره قربت تبدأ.

---

وفي المبني المقابل أمام قاعه ٢٣ بكلية التربيه تجلس سلمي ذات القامه القصيره والوجه البرئ مع صديقاتيها هند وفاطمه ،

نظرت سلمي إلي صديقاتيها بضيق وقالت :

- يا جدعان انا مش فاهمه حاجه من البوتري ده هو انا بفهم شعر عربي لما هفهم شعر إنجليزي ، انا كان مالي ومال قسم إنجليزي بس ياربي ، ماكان قدامي أقسام تانيه كنت دخلتها وخلص

ضحكت هند ضحكة عاليه وقالت :

- يابنتي هو إنتي كل ما تطلعي من المحاضره دي بالذات تعلمي كده ، انا بصراحة مكنتش بحبها ف الاول بس الدكتور حبيني فيها

نظرت له بضيق وقالت متعجبه :

- الدكتور حبيبك فيها !! يا شيخه حرام عليكي ده عطلول يشتم ويهزأ فينا وكرهني في الماده وفي الجامعه كلها ، ربنا يعدينا منها علي خبيبيير





إسلام بإبتسامه مصطنعه :

- وعلیکم السلام

محمد بسعاده :

- وعلیکم السلام ورحمة الله وبركاته

نظر لهما فاروق للحظات ثم بدأ حديثه قائلا :

- ازيكم يا شباب عاملين إيه ؟ كويس إني شوفتكم والله ، كنت عاوز أقولكم علي الندوه اللي هتتعمل بكره ف الجامعه يمكن تحبوا تيجوا يعني

نظر له محمد بحماس وقال :

- ماشي قول

شرد إسلام عنهما قليلا وأخذ يحدث نفسه :

- هو كل ما يشوف خلقتنا الواد ده هيقولنا علي ندوه دينيه ، وأكد ندواته كلها بقي هتكون شيوخ كبار وهيقعدوا يتكلموا كالعاده وإحنا مش فاهمين حاجه وفي الآخر ننام زي كل مره !

قطع فاروق إسلام من شروده وقال متسائلا :

-هاه يا إسلام وإنت مقولتليش ، تحب تعرف أكثر عن الندوه ؟

إسلام بإبتسامه مصطنعه :

- إتفضل

بدأ فاروق حديثه عن الندوه قائلا بلباقه :

- إسم الندوه ( أحبك ولكن لن أصارحك ) وبتتكم عن ..

قاطعه إسلام متعجبا :

- إسمها إيه !!؟

قال فاروق بتلقائه :

- أحبك ولكن لن أصارحك

رفع إسلام حاجبه وقال بصوت ساخر :

- ندوه دينيه وإسمها كده إزاي يعني؟! إنت بتهرج صح؟

فاروق بإبتسامه هادنه :

- طيب بص انا مش هتكلم عنها ، إنت هتيجي تشوف بنفسك ينفع ولا لا ، مستنيكم بكره الساعه ٣٠:١١ في قاعه المناسبات ، يلا بقي هسيبكم علشان ألحق ابلغ باقي الناس

غادر فاروق بينما نظر إسلام إلي محمد بتعجب وقال مؤكدا :

- صاحبك بيضحك علينا يا عم !! بيقولنا أي حاجه وخلص علشان يجر رجلينا ونروح ، بس الحركات دي مش بتخيل عليا ، هو أكيد بيعمل كده علشان يبان قدام الناس انه شاطر بقي وبيعرف يقتع الناس بالحضور وحاجات كده!!

زفر محمد بضيق وقال :

- فاروق مش بيكدب ابدااااا يا إسلام ، هو صاحبي من زمان وانا عارفه كويس ، عموما نروح بكره ونشوف ، تمام؟

أوما برأسه موافقا وقال :

- ماشي مش هنخسر حاجه ، نروح وخلص ولو طلعت ممله هنمشي زي كل مره ، أصلا فاروق صاحبك ده انا مش بطيقه بصراحه وبحس إن أي حاجه من ناحيته ممله!!

نظر له بغضب وقال بصراخ :

- يابني لبيبيبيبي حرام عليك!!! ده محترم جدااااا ما شاء الله عليه ، بجد ياريت كل الشباب زيه

إسلام بضحكة ساخره :

- ياعم تحس إنه واد ملزق كده ومعقد وغريب





قال إسلام بتلقائييه :

- سلمى مين ؟

قالت ببراءة :

- سلمى جارتنا يا عم اللي معايا ف القسم

إسلام بضحكة عاليه :

- اااه القصيره دي اللي كانت بتلعب معانا في الشارع زمان صح ؟

هند بإبتسامه :

- أيوه هي دي

ثم نظرت للجانب الآخر وكأنها تذكرت شيئا ما وعادت إليه بنظرها وهي تقول بتعجب :

- ثانيه ثانيه ، إنت مالك أصلا؟! إنت سبيبت الندوه ومسكت ف سلمى!!?

- عادي ياهنود أدينا بندردش

جلست علي طرف فراشها ووضعت ساقا فوق الآخري وقالت بغرور:

-هاه عندك أسئله تاتي ولا تتفضل من غير مطرود يا باشمهندش ؟

إسلام بإبتسامه :

-خلاص يا ستي شكرا

وسرعان ما تحولت هذه الإبتسامه إلي ضحكة شريره وهو يدفعها للخلف ويقول بمرح :

- إتخمدى بقي ، وما تنسيش تشربي اللبن وتغسلي اسنانك قبل ما تنامي علشان السوسه الوحشه متجيش ف بؤك

ضربته هند علي كتفه وقالت بإبتسامه :



دائما ويحاول بقدر المستطاع ان يبتعد عن أي مكان به إختلاط حفاظا علي قلبه والعهد الذي اخذه علي نفسه ، وحتى إذا شعر بأي مشاعر تجاه الطرف الآخر رغما عنه ، فلا بد أن يوجه هذه المشاعر في طريقها الشرعي ، إما عن طريق التقدم للخطبه إذا كانت الظروف مناسبة لكل من الطرفين ، او عن طريق الدعاء بأن ييسر الله الأمور إذا كان الخير في هذه الزيجه ، وبالطبع لابد أن تظل هذه المشاعر في قلبه فقط ولا يحاول أبدااا إظهار أي شئ منها للطرف الآخر ، فهو من المفترض أن يحافظ عليها حتي من نفسه ويكون علي يقين إنه إذا كان بها الخير له سيجعلها الله من نصيبه ، والأفضل ان يدعو الله دائما أن يثبته ويحفظ له قلبه ولا يعلقه بأحد سواه

وإنتهت الندوه وخرج الجميع ، نظر محمد إلي إسلام وقال بضحكة واثقه :

-إيه رأيك بقي يا عم ؟ طلع مش كذاب أهو

أوما برأسه إيجابا وقال مؤيدا :

- لأ بصراحه الله ينور ، كلام جامد آخر حاجه ، يعني بصراحه عجبتي الفكره بتاع الندوه وحاجه جديده كده وعلي عكس ما كنت أتوقع تماما ، أي نعم انا مش هقدر أنفذ حاجه من اللي إتقال بس برضو حلوه

محمد بإبتسامه رضا :

- طيب الحمد لله ، لأ بصراحه الداعيه ده أسلوبه حلو كده ويخليك عاوز تفضل قاعد تسمعه طول اليوم ، وبصراحه بقي انا خلاص عجبني الكلام وقررت أنفذه

إسلام بتعجب :

- هتعمل إيه يعني ؟

تنهد محمد وهو يتذكر كلام الداعيه وقال بسعاده :

- حبيت فكرة ان زوجتي تبقي اول حب ف حياتي وبإذن الله هفضل محافظ علي قلبي لحد ما أقابلها لأن المشاعر وقتها هتكون طازة ومش مستهلكه ، مش حابب انا اني اتعرف علي دي ودي وفي الآخر ارواح أتجوز واحده تانيه خالص !!

وأكمل بإبتسامه كبيره :

- خليني كده مؤدب ومحترم علشان ربنا يرزقني بواحد مؤدبه زي





وعمالة تدخل كل الناس اللي عندها

ضغطت علي زر الفأره بلا مبالاه وقالت :

- لما نشوف مدخلاتي في إيه النهارده كمان ، جروب هنعيشها صح // اممم حلو الإسم ، لما ندخل نتفرج بقي

وبعد مرور ساعة أو أكثر نقرت ولاء علي باب الغرفه فقالت سلمى :

- ادخلي يا بنتي الباب مفتوح

- بتعملي إيه يا حجة

نظرت لها سلمى وقالت بسعاده :

- تعالي بصي كده ، واحده معرفهاش دخلتني في جروب جديد ، بس بجد حاجه فخيمه يعني

نظرت ولاء إلي شاشة الحاسوب ثم أعادت النظر إلي سلمى قائله بعدم فهم :

- فخيمه إزاي يعني !!؟

قالت بحماس :

- ناس كده يا بنتي تحسي إن عقلهم نضيف ماشاء الله وعاشين لهدف معين وبيساعدوا بعض يقربوا من ربنا ، عجبني الجو بصراحه ، وكمان الجروب كبير جداااا وفيه تفاعل ، ده انا قاعده من بدري ومش ملاحقه أقرأ إيه ولا إيه ؟

قالت ولاء بفضول :

- وريني كده..

نظرت إلي شاشه الحاسوب ، ولكن يبدو أنها رأت مالا يسرها ، فقالت بملل :

- ييبيبيببي لأ يا ست شكرا ، انا هروح أكمل اللي ورايا ، بلاش تقعدني معاهم كتير بدل ما يأتروا عليكى !

سلمى بضحكة مرتفعه :





ولا غلط لأن كل اللي حواليا زيي كده ، لكن دايمًا بحس ان ليا دور في الحياة ، بس مش عارفه إيه هو !!

يعني بحس اني مش بعمل كل اللي عليا ف الدنيا ، رغم اني بحاول بقدر الإمكان اجتهد ف كليتي اللي هي بالنسبالي الهدف الأساسي ف حياتي ،

عاوزاكي تقولي بقي : هل انا ليا دور في الحياة غير دراستي حاليا ؟ مع العلم اني في تانيه كلية تربيه انجلش ومش مخطوبه ولا أي حاجه ، يعني متفرغه للدراسه بس ، ف هل ده كافي ؟ ولا في حاجات تانيه لازم تتعمل ؟

معلش انا أسفه جداااااا لو طولت عليكي ، بس انا من ساعة ما دخلت الجروب وانا حسيت انكم ناس مختلفين عننا ، وحسيت براحه لما قعدت أقرأ فيه شويه ، بس لو كلامكم وبوستاتكم دي صح ، معني كده ان حيااااتي كلها غلط بقي ومعني كده برضو إني مش عندي أي هدف في الحياه غير دراستي وإن ده غلط !!؟

بصي مش عارفه بقي انا محتاره وكان لازم اكلمك ، انا عارفه اننا متكلمناش قبل كده ، بس ياريت بلاش تهملني الرساله

آخر سؤال بقي : هو إنتوا معقدين ولا عندكم إنسان زينا ؟

ههههههه او عي تعلمي بلوك ، ، انا قولت أهو \_ ٨

يلا هستني الرد ، مع السلامه

وأغلقت سلمني الحاسب وذهبت للنوم

وفي اليوم التالي كان إسلام جالسا مع محمد في كافيتريا الجامعه كالعاده ، تنهد إسلام بإحراج وقال :

- محمد انا هقولك علي حاجه بس خليك هادي ، ماشي ؟

نظر إليه نظرة عميقه وقال بترقب :

- طالما قولت خليك هادي يبقي إنت عامل مصيبه !! قول لما نشوف آخرتها معاك

بهت وجه إسلام وابتلع ريقه قائلا :

- انا كلمت ساره إمبراح

اعتدل في جلسته ونظر إليه بعدم فهم وقال :

- طيب وايه الجديد ؟

نظر إليه بحزن وظل يفرك يده بالآخري بتوتر وهو يقول بندم :

- انا طلبت منها صورتها وهي وافقت وشوفتها ، وبصراحه طلعت أحلي بكتتير مما كنت أتخيل ولاقيتني غصب عني بقولها كلام مكاش ينفع يتقال

إحمر وجه محمد وإتسعت عيناه ونظر إلي إسلام بغضب شديد ولم يتحدث ، إبتلع إسلام ريقه وقال محاولاً تهدئه الموقف :

- يا محمد ماهو مكش ينفع أبقي بكلمها بقالي ٦ شهور ولحد دلوقتي معرفش شكلها !!

نظر إليه بغضب شديد وقال بضيق :

- يا إسلام !!! وكمان بتكلمها من ٦ شهور !! الله الله !! وايه كمان !!؟

حاول الهرب من نظراته الحاده فنظر للأرض وقال بصوت خفيض :

-بص هو انا من ساعة ما بدأت أكلمها وانا عاوز أقولك لاني مش متعود أخبي عليك حاجه ، بس كنت عارف انك هتدايق لو عرفت...

قاطعته محمد بنفاد صبر وقال :

- اه ولما لقيت انك بدأت تتجرجر في الحرام قلت تقولي علشان أشوفك حل !! والله فيك الخير

نهض إسلام من مكانه وجلس بجوار ومحمد وقال بهدوء :

- يا محمد خلاص بقي إهدي طيب ، انا مش وحش كده وإنك عارف بس بقولك غصب عني ، وانا مش عاوز اللي حصل ده يتكرر تاني علشان كده بقولك تشوفلي حل

محمد بنظره غاضبه :

- ترضي علي اختك كده !!؟

قال إسلام بضجر:

- يا محمد خلاص بقي هو كل شويه تقولي اختك اختك!!

قال بنفس الصرامه :

- بسأل سؤال ، ترضي حد يعمل مع اختك كده؟!!!

نظر إليه بإستسلام وقال :

- بصراحه لأ ، بس الموضوع مختلف ، انا فعلا هتجوز ساره

ضحك محمد بسخريه وقال :

- وهتجوزها إمتي بقي ؟

إتسعت إبتسامته وهو يقول بحماس :

- بعد ما أخرج وأشتغل إن شاء الله

عاد للخلف قليلا وعقد ذراعيه أمام صدره وقال :

- ااه يعني علي الأقل بعد سنه ونص !! ده لو لقيت شغل أصلا بعد ما اتخرجت

نظر له بعدم فهم وقال :

- طب اعمل إيه يعني ؟

لم يهتم محمد لكلامه وقال مكمل حديثه :

- وطبعا هتفضل تتكلم معاها لحد ما تيجي تتقدم لها

أوما برأسه إيجابا وقال بتلقائيه :

- أكيبيد طبعا

ضحك ضحكة ساخره وقال :

- عاوز تكلمها سنتين بحالهم مش غير ما يحصل تجاوزات؟! تبقي بتضحك علي نفسك يا إسلام ، لما





بينما إقتربت منها فاطمه ووضعت يدها علي كتفها وقالت بمرح :

- يا بنتي المثل ده بقي صديقنا الصدوق ، عاادي يعني ده حال كل الناس

شعرت سلمى بالسعادة مما سمعته وقالت بحماس :

- طيب ما تيجوا نكسر الروتين ده ونغير حياتنا شويه ، يعني نخلي عندنا أهداف جديده ، ننظم يومنا شويه ، نعمل اااااي حاجه بقي .

إبتسمت هند وقالت :

- إيدينا علي كتفك ، عندك أفكار ؟

أومات برأسها نفيا وقالت بتفاؤل :

- حاليا لأ ، بس إستنوا عليا يوم ولا إثنين كده وهقولكم علي اللي ف دماغى ، بس أهم حاجه ان فكرة التغيير دي انتوا موافقين عليها صح ؟

أجابها بالتأييد فشعرت بالإنتصار وقالت بحماس شديد :

- قشششطه جدا ، أيون كده هما دول الأصحاب اللي بجد ، بحبكم يا عيال وربنا

---

غادرت سلمى الجامعة وإستلقت أول سيارة أمامها لتعود إلي المنزل ، وأثناء جلوسها أخذت تنظر للشارع بشرود وتفكر أخذت في كل ما حدث وتتساءل بحيره :

- إيه يا ست سلمى مالك إتحمستي كده ليه ؟ معقول كام بوست يأتروا فيكي اوي كده ؟

نظرت للجانب الآخر وإرتسمت إبتسامه تلقائيه علي شفيتها وقالت بأريحيه :

- لأ بس بصراحه كلامهم عقلاني اووي وإحساس الراحه اللي هما بيقولوا عليه ده باين عليه حلو وانا عاوزه أجربه

صمتت قليلا ثم تنهدت بحماس وقالت :

- طيب وفيها إيه لما أبدأ أغير من نفسي وأكون أحسن من كده ؟ مش انا دايمًا بقول اني لازم أكون مميزه عن كل البنات واني مش عاوزة أكون عايشه زي ما كل الناس عايشه وخلص !! أكيببيبيد انا



وفي المساء ظل إسلام يدور في غرفته لبعض الوقت وكأنه يبحث عن شيء ما ثم أمسك هاتفه  
بإستسلام وقام بالإتصال علي صديقه محمد وقال بيأس :

-إزيك يا محمد ؟ بقولك إيه إنت معاك المذكره بتاع دكتور عبد الرحمن ؟ أصلي تقريبا نسيت  
أصورها ومحتاجها الإسبوع ده ضروري

إبتسم بطيبه وقال :

- اه معايا ، خلاص بكره هجيبهالك إن شاء الله

- ماالشي شكراللى ، معلىش لو قلقتك من النوم ولا حاجه

ضحك محمد رغما عنه وقال :

- ياعم ما انت عنطول بتقلقتني ، يعني هي جات علي النهارده ، بس أصلا انا لسه منمتش ، قاعد  
بتفرج علي برنامج وبعدين هنام إن شاء الله

جلس علي طرف فراشه وقال بفضول :

- برنامج إيه ده ؟ يمكن آجي اتفرج معاك

أجابه بتلقانيه :

- برنامج ديني كده

ضحك إسلام بسخريه وقال :

-ما شاء الله ما شاء الله ربنا يهديك يابني

زفر بضيق ورفع حاجبه قانلا :

- عيل رخم وربنا ، ما تسيبني في حالي ياعم يمكن ربنا يهديني وأتغير بقي

- خلاص يا شيخ محمد كمل ياخويا كمل ، بس انا مستغرب يعني إشمعني النهارده ؟







أخذ إسلام يستمع إلي كلمات صديقه بفتور وقال :

- ماهي المشكله اني مش مقتنع أصلا !! بحب حياتي كده وراضي بيها ، وبعدين ياعم ربنا يطول  
عمرنا ونبقي أحسن مع الوقت

تنهد محمد بفقدان أمل ولم يتحدث فنظر إليه إسلام بإشفاق وأحب أن يضيف جوا من المرح حتي  
يزيل عنه حزنه فقال :

- طيب بقولك إيه ؟ ما تخلي احم الواد فاروق يشجعك

ثم قال مازحا :

- مش عارف إزاي هطيقك لو بقيت زيه

نظر محمد للجانب الآخر وقال بحزن :

- ماهي المشكله ان فاروق مش قريب مني زيك ، هو اه جاري وصاحبي وبحبه برضو ، بس  
علاقتي بيك انت أقوى وبحب أقضي معاك انت وقت أكثر  
إبتسم إسلام وقال بحب :

- حبيبي يابو صلاح

صمت محمد قليلا ثم رفع حاجبه فجأة ونظر لإسلام وقال بتحدي :

- بص يا إسلام يا أنا يا إنت ، وأكيببيد في يوم هقتعك ، وهتغير يعني هتتغير، تقريبا البرنامج اللي  
بكلّمك عنه دي جاي الأربعاء الجاي ، هبقي أكلّمك بقي في ميعاده وأخليك تشوف حلقة منه وبعدين  
تقرر

ثم نظر له بحسم وقال :

- الموضوع كده منتهي بالنسبالي !

---

وفي مساء هذا اليوم فتحت سلمي حساب الفيس بوك الخاص بها ونظرت نظره سريعه علي قائمة  
الأصدقاء المتصلين حاليا فوجدت حفصه من بينهم ف سرت كثيرا ، وبعثت لها رسالة :

- السلام عليكم ، إنتي موجوده ؟



































- محدش كلمني عندك حق !! بعد إنك يامحترم !!

أمسك إسلام بيده ليوقفه وقال بصرامه :

- إستني هنا مش تفهمني بتقول كده ليه ؟!! ولا انت جاي ترمي بلاك علي الناس وخلص !!

أفلت يده من إسلام بعصبيه وقال حاتقا :

- سيب إيدي واوعي من وشي ، إنسان مقرف !

تركة فاروق وغادر علي الفور بينما ظل إسلام متعجبا وأخذ يحدث نفسه قائلا :

- هوالواد ده مجنون ؟ وبعدين إزاي أسيبه يمشي كده بعد اللي قاله ده ؟ ماشي يا فاروق انا هوريك

وعلي الجانب الآخر بكلية التربية كانت سلمى تقفز أمام صديقاتيها كالأطفال وتقول بسعاده بالغه :

- أنا مبسووووطه اوووي يا عيال ، حاسه إنني طايره بجد

ابتسمت فاطمه وقالت :

- ما تفرحينا معاكي ياست

جلست بجوارهما وإحتضنت ذراع فاطمه بيديها وقالت بحماس :

- من ساعة ما عرفت الجروب ده يا بنتي وانا كل يوم أدخل وأفضل لازقه عليه لحد ما يزعقولي في البيت ، بجد ببقي فرحانه اوووي وانا بقرأ كلامهم ، عارفين إحساس اني ابقى مرتاحه وأحس أخبييرا إنني لقيت نفسي ؟

ثم نظرت إلي السماء وقالت :

- يارب قويني وقربني منك أكثر

إلتفتت لها هند وقالت متعجبه :

- كل ده علشان غيرتي صورة البروفایل ؟



ابتسمت سلمي بسعاده وقالت :

- كنت ببعث رسالة لحفصه

نظرت لها ولاء للحظات ثم قالت بتفكير :

- حفصه دي اللي هي بتاعة الجروب ؟

أومات برأسها إيجابا فقالت ولاء بتلقائيه :

- ليه بقي ؟

أطلقت سلمي ضحكة عاليه ثم رفعت حاجبها بمرح وأجابت :

- مالك في إيه يا بنتي ؟!! هو تحقيق ولا إيه ؟ وبعدين ده انا اختك الكبيره ، يعني المفروض انا اللي أعمل كده مش إنتي !!

نظرت لها ولاء بعدم إهتمام وقالت :

- يا ستي عادي مش تحقيق ولا حاجه ، خلاص مش مهم

ابتسمت سلمي وقالت :

- عادي يا بنتي هقولك ، وانا هخبي عليكى ليه يعني !! كنت بقولها آخر خطوات التغيير وإني قررت أبطل أغاني ومسلسلات وأي تعامل مع الشباب إلا لو في ضروره وكده يعني

زفرت ولاء بملل وقالت :

- إنتي متأكده من الطريق اللي انتي ماشيه فيه ده ؟!! انا حاسه انها بتعملك غسيل مخ !! هتبقي معقده زيهم ولا إيه ؟!!

مازالت سلمي محتفظه بابتسامتها وحاولت إقناع ولاء بوجهة نظرها قائله بهدوء :

- ولاء يا حبيبتي يا صغونه إنتي ، بلاش تصدري حكم علي حد غير لما تعرفي وجهة نظره كويس وتفهميها ، وبعدين قولي قرارك براحتك ، وطالما اللي انا بعمله ده هيقربنى من ربنا يبقى هو ده الصح بعينه ومش ممكن يكون تعقيد زي ما بتقولي ، وعموما يا ستي لو لاقيتيني إتغيرت

وبقيت معقده ساعتها هيكون ليكي كلام تاني ، قشششطه ؟

نظرت لها بفتور وقالت :

- إنتي حره ، ربنا يهديكي

نظرت لها سلمي بطرف عينيها وقالت مازحه :

- إدعي من قلبك بس هاه ، مش تريقه

إبتسمت ولاء وقالت بإستسلام :

- ماشي ربنا يهدينا جميعا ، هروح انا بقي أكمل المسلسل

غادرت ولاء وتابعتها سلمي بنظرها حتي إختفت من أمامها تماما وحدثت نفسها قائله :

- دورك لسه جاي معايا يا ولاء ، مش هسمح أبدا إن اختي الوحيديه تكون عايشه كده وخلص !!  
بس أبدأ مع نفسي الأول وبعدين أحاول معاكي ربنا يقدرني ، حاسه اني داخله علي مسنولييه كبيره  
، ربنا يستر

إستيقظ إسلام من نومه مساءا ونادي علي اخته فحضرت علي الفور فقال متسائلا :

- هي الساعه كام دلوقتي ؟

إبتسمت قائله :

- ٧ ونص تقريبا

أخذ يفرك في عينيه ليستطيع التركيز أكثر وقال :

- ده بليل ولا الصبح ؟

ضحكت بإشفاق وقالت :

- ركز يابني ، بليل طبعا

زفر بضيق وقال لانما :

- طيب ليه سبتيني نايم ده كله ؟

رفعت كتفيها ونظرت له بعدم فهم وقالت متعجبه :

- هو إنت قولتلي أصحيك أصلا !!؟

أزاح الغطاء من علي جسده وهم بالجلوس وقال مبتسما :

- خلاص مش مشكله

ثم إنتبه فجأة ونظر إليها وكأنه تذكر شيئا ما وقال متسائلا :

- صحيح هو محمد متصلش ؟

أومات برأسها نفيا فقال علي الفور :

- خلاص بقي انا هخطف رجلي لحد بيته أشوف ماله

وأردف متعجبا :

- مكنتش أعرف انه هيزعل اوي كده !!

---

إرتدي إسلام ملابسه وإستلقي أول سيارة ذاهبة إلي منزل محمد ، عندما وصل إلي بداية الشارع الذي يقطن به محمد ، نظر أمامه فإذا به يري شيئا غريبا جعله يفكر ماذا سيفعل الآن وأخذ يحدث نفسه قائلا :

- لا إله إلا الله ، طيب ده انا كده مش هعرف أعدي بقي ، خلاص ألف من الناحيه الثانيه وخلاص

وقبل أن يتحرك من مكانه زفر بضيق وقال :

- يبيييي دي الناحيه الثانيه دي عند بيت فاروق ، ااااوف بقي ، بس هو أصلا إيه اللي هيووقفه في الشارع يعني !! وانا لما أقابل محمد هخليه يتصرف مع صاحبه ده ويشوف اااايه اللي هو عمله معايا الصبح ده !!!





- ياعم في إيه؟! كل ده علشان برنامج ديني يعني!! خلاص تتعوض إيه المشكله؟!!!

- برنامج ديني؟! عامل نفسك مش فاهم هاه!!

ضحك إسلام بسخريه وقال :

- خلاص فهمني يا فكيك!!

هيا بنا لنعود ليوم الأربعاء ، الساعه الثامنه مساءا بالتحديد ولكن هذه المره في منزل محمد

إستيقظ محمد من نومه وأخذ يتنفس بصعوبه وصرخ بتعب قائلا :

- اااااااااااه ن ن نهى

حضرت نهى علي الفور وقالت بفرع :

- محمد مااااااالك

أغمض عينيه وابتلع ريقه وقال بضعف :

- م م مش قادر ا ا اخذ نفسي ، هاتي م مايه ب بس بسرعه اااااااه

غادرت الغرفه علي الفور وأحضرت كوبا من المياه وأعطتياه إياه فوجدته لم يتحسن فنادت علي والدتها مسرعه :

- إلحقيني يا ماما

فزعت الأم من صوت إبنتها وهرولت بإتجاه الغرقه وقال بخوف :

- ابيبيه يا بنتي في إيه ؟

نظرت لها برعب وقالت :

- محمد مش قادر ياخذ نفسه يا ماما ، انا خااااايفه اووووي ، أعمل إيه دلوقتي؟!!!

نظر لها بارهاق وأجابها قاتلا :

- ات ات اتصلي ب ب با س سلام

أمسكت بهاتفه وبحثت عن رقم صديقه إسلام وإتصلت عليه مره تلو الآخري ولكنه لم يجب فكادت أن تقذف الهاتف من يديها وقالت بعصبيه :

- اوووووف مش راضي يرد ، اعمل إيه دلوقتي؟! انا حاسه ان عقلي إتشل عن التفكيبيبيبيير !!

قال محمد بابتسامه متعبه :

- ت ت تلقاه ف فك فاكروني بك بكلمه ع ع علشان البر بر برنامج الد دي يني ، خ خ خل خلاص مت متح متحاوليش ت ت تاني

صرخت الأم بنهي قائله بلهفه :

- إتصلي بأوكي طيببيبيبي

ثم نظرت إلي السماء وقالت بصوت مرتفع :

- يـارب يـارب

أومأت برأسها رفضا وقالت بضيق :

- بابا علشان يجي مش أقل من ساعتبيبيين ، اعمل إيه ولا أتصل بمبيبيبيبيين ؟ انا مش عارفه أفكر في أي حاجه

تنفس محمد بصعوبه وقال مرهقا :

- ات ت تص لي ب ف فر فاروق طيب

بالفعل أمسكت نهي بهاتف أخيها مره آخري وبحثت عن رقم فاروق وإتصلت به علي الفور وقالت بلهفه :

- السلام عليكم ، أيوه يا استاذ فاروق ، انا اخت محمد ، بعد إذن حضرتك تعالي حالا

نظر حوله بتعجب وقال :

- خبيير في حابه يا فندم ؟

كادت أن تبكي ولكنها حاولت التماسك وقالت :

- محمد تعبان اوووي ومش قادر ياخذ نفسه ، بعد إذن حضرتك هات الإسعاف وتعالى بسرعه

إتسعت عيناه وقال بخوف :

- حاضر جاي حالا

وعلى الفور هرول فاروق باتجاه باب منزله وهبط الدرج على عجل وإتصل بالإسعاف أثناء سيره باتجاه منزل محمد وعندما وصل طرق الباب بشده فإرتدت نهي حجابها وفتحت مباشرة وقالت بحزن وهي تشير إلى غرفة أخيها :

- إتفضل هو جوه

إقترب فاروق منه وتعجب عندما رآه على هذه الحالة وذلك لأنه دائما يراه مشرق الوجه واسع الإبتسامه فقال بخوف :

- مالك يا محمد فيبيك إيه ؟

إبتلع ريقه بضعف وقال :

- م مش مش ق ق قد قادر ات ات ات اتنفس ي يا ف فر فاروق

مسح فاروق على رأسه بحنان وقال :

- طيب خلاص إرتاح دلوقتي ومتكلمش ، أنا خلاص إتصلت بالإسعاف وهما جايين حالا ، معلى إستحمل

لم تتحمل نهي أن تشاهد أخيها بهذا الشكل أكثر من ذلك فأخذت عينها تنهمر بالدموع فنظر إليها محمد بحزن وقال :

- متع متعي متعيطيش ي ن نهي ، ان انا هب هبقي ك ك كويس إن ش شاء الله

نظرت إليه بإبتسامه مصطنعه وقالت :



- حاضر حاضر والله ، كل اللي انت عاوزه هعمله ، بس إرتاح انت دلوقتي عقبال ما الإسعاف تيجي ، انا مش عارف أتأخروا ليه هما كمان

قال محمد هامسا :

- ا ا ا اش شهد ا ان لا إله ا الا الله واشهد ا ان م محمد رسول ا ال الله

مرت الدقائق وكأنها ساعات بل سنين وأخذ الجميع ينظر إلى السماء ويدعو الله ان تأتي الإسعاف بأقصى سرعه وبعد لحظات سمع فاروق صوتا في الشارع فنظر إلى والده محمد وقال :

- انا سامع صوت في الشارع ، بعد إذن حضرتك هبص من البلكونه يمكن الإسعاف تكون جات ولا حاجه

أومات برأسها موافقه فأسرع فاروق الخطي ونظر للشارع فإذا به يري عربيه الإسعاف قد وصلت أخيرا ، إبتسم إبتسامه صغيره وقال :

- الحمد لله

إتسعت إبتسامه فاروق وهو يعود إلي محمد ويقول بمنتهي الحماس :

- خلاص يا محمد عربيه الإسعاف جات الحمد لله ، معلى إستحمل ، ٥ دقائق ونكون في المستشفى إن شاء الله

أزاح عنه الغطاء وحاول أن يرفعه من مكانه ولكنه لم يستجب فقال فاروق بفرع :

- يا محمد معايا ، محمد !! يا محمد

أخذ يحرك يده بخوف وهو يقول :

- محمد رد عليا ، محمد الإسعاف جات ، محمد رد عليا ، محمد محمد

أمسك بذراعيه وأخذ يحرك جسده بشده وهو يصرخ قانلا :

- محمد يلا خلاص هنروح المستشفى ، إنت مش بترد ليبيبيبيبييه

خلاص والله جات برا أهي ، يا محمد رررررررررررر عليا بقي



حمل رجال الإسعاف محمد وأدخلوه إلي غرفة العمليات وجلس فاروق بالخارج يدعو الله ان ينجي صاحبه . بعدما يقرب من النصف ساعة خرجت الممرضة مسرعه نحو غرفة ما فنادي عليها فاروق قائلا بتوتر :

- يا استاذة لو سمحتي طميني عليه

وقبل ان تختفي من امام نظره أجابته بحزن :

- إديله

عادت الممرضة بسرعه أكبر من المرة السابقة ودخلت إلي غرفة العمليات مره اخري ولكن سرعان ماخرج الطبيب وتبدو علي وجهة ملامح الحزن والغضب معا ، لم يلتفت إلي فاروق ولكنه سار في طريقه فأمسك فاروق بيده من الخلف وقال بلهفه :

- يا دكتور بعد إنك طمني ، هو محدش عاوز يقولي حاجه ليه !!؟

أفلت يده بغضب ونظر إليه قائلا بحنق :

- جايين تجيبوه دلوقتي بعد إيه !!؟

نظر له بعدم فهم وقال :

- مش فاهم يا دكتور !

نظر لفاروق وملامح البغض تظهر علي وجهه وقال غاضبا :

- إزاي تسبب أخوك الفتره دي كلها بيعاني من ضيق التنفس ومحدش يفكر حتي إنه يوديه المستشفى يشوف ماله !!

تعجب من كلام الطبيب فهو لا يعلم شيئا عن هذا الأمل فقال بلهفه :

- يا دكتور الله يخليك فهمني انا مش فاهم حاجه ، وكمان انا صاحبه مش اخوه وهو والده راجل كبير في السن واخواته كلهم بنات وانا معرفش حاجه عن اللي حضرتك بتقوله ده

نظر الطبيب للأرض وقال بأسى :

- صاحبك جاله ضيق تنفس مفاجئ وكان لازم يتحط بسرعه تحت جهاز التنفس الصناعي لأن حالته كانت متأخره ، بس للأسف وصل هنا متأخر وإحنا عملنا كل اللي نقدر عليه بس دي إرادة ربنا

لم يكن يريد تصديق ما سمعه فقال بعدم إستيعاب :

- يعني إيه ؟

ربت علي كتفه وقال بهدوء :

- البقاء لله

وقعت الكلمة علي مسمع فاروق كالصاعقه ، ارتمي علي اول كرسي بجواره وهو لا يصدق ما سمعه بينما غادر الطبيب المكان ، إنحني للأسفل ودفن وجهه بين كفيه وظل يتأوه كثيرا ويدعو الله ويخبره بكل ما يشعر به ثم نهض من مكانه فجأة ذاهبا إلي غرفة الطبيب ، طرق الباب بخفه وفتحه ونظر للطبيب قائلا بجديه :

- ممكن حضرتك تقولي إيه الاجراءات اللي المفروض نعملها علشان نخرجه من هنا ؟

نظر إليه الطبيب بدهشه ، فمن دقائق كان يشعر بالإنتهيار ولكن ماذا حدث له الآن ومن أين اتى بكل هذه القوه؟! انتشله فاروق من شروده قائلا بصرامه :

- متستغربش يا دكتور ، انا لازم أبقي أقوى من كده كمان ، محمد والده راجل كبير في السن وانا لازم أقف جنبه في الوقت ده ، ممكن بقي حضرتك تقولي مطلوب مننا إيه دلوقتي بالضبط ؟

ظهرت ملامح الرعب والفرع علي وجه إسلام وقال بصوت حاد :

- إنت بتقول إيه ؟ إنت بتتكلم بجد؟!!

حاول فاروق الإحتفاظ بدموعه في عينيه ولكنه لم يستطع فقال بصراخ :

- بقولك محمد مات قدام عيني .. عارف يعني إيه مات قدام عيني ؟ عارف يعني إيه آخر حاجه يقولها لي تبقي خلي بالك من إسلام وخليه يقرب من ربنا ؟ عارف يعني إيه كان نفسه يكون أحسن من كده بس انت كنت دائما بتتريق عليه وكنت السبب في انه فضل واقف مكانه ومقدرش يتقدم خطوه من ساعة ما عرفك ؟ طيب عارف يعني إيه هو دلوقتي ميت ؟ يعني بيتحاسب هاه ؟ عارف يعني إيه بيتحاسب ؟ بجد انا مش متخيل إنت إزاي يجيلك عين تيجي هنا تاني بعد كل اللي حصل ده  
!! ؟



ثم نظر للجانب الآخر وقال هامسا :

- كان نفسي أكون قريب منه قبل ما يموت يمكن كنت أقدر اساعده يقرب من ربنا شويه ، يمكن كنت أكتشف مرضه واقنعه يروح للدكتور ويهتم بصحته شويه ، كان نفسي في حاجات كتير اووووي بس خلاص مبقاش ينفع . هو بس دلوقتي محتاج دعائنا وربنا يرحمه برحمته

ثم عاود النظر لإسلام وقال بعصبية :

- ممكن بقي مشوفش وشك قدامي تاني؟ ولا دي كمان صعبه؟ وعلي فكره عمري ما هسامحك ولا هعفيك من المسئولية .. لأنك أكيد كنت بتشوفه تعبان قدامك وعمرك ما فكرت تسأله مالك؟ وعمري ما هنسي انه كان ممكن يكون أفضل لولا إنه عنده صاحب زيك .. إتفضل من قدامي يا استاذ مش عاوزين نشوفك في الشارع هنا تاني

نظر له إسلام بألم وقال بصوت مختنق من كثرة البكاء :

- يا فاروق انا والله العظيم ما اعرف أي حاجه من اللي انت بتقوله ده؟ بالله عليك قولي انك بتكذب وان ده محصلش وانا اوعدك والله هعمل كل حاجه هو عاوزها..

ضحك بوجع وقال :

- يا ريت كنت بعرف اكدب يا إسلام .. يلا إتفضل من هنا بعد إذلك لاني تعبت ومبقيتش قادر استحمل ولا كلمه زياده وخصوصا منك أنت !

إلتفت إسلام خلفه وعاود النظر إلي فاروق قائلا بصوت متقطع :

- يعني إيه؟!!! يعني الصيوان اللي ورا ده بتاع محمد؟ يعني خلاص كده مش هشوفه تاني؟!!!

دفعه بنفاد صبر وقال :

- والله إنت ممكن تروح تتأكد بنفسك .. بعد إذلك يا استاذ

ثم تركه وذهب بعيدا .

وقف إسلام بضع دقائق يترجي قدماه ان تحملاه ليذهب إلي منتصف الشارع حيث يقف والد محمد ، مرت اللحظات من بين منزل فاروق إلي منزل محمد وكأنها ساعات بل سنين يحاول فيها إسلام إستيعاب كل ما حدث ، يحاول الإقتناع بأن محمد قد مات بالفعل وإنه لن يراه ثانية ، يحاول معرفة

كيف سيعيش بمرارة الذنب الذي وضعه فاروق علي عاتقه ، يحاول إستيعاب كل ما حدث ولكنه لا يستطيع .

أحس فجأة بأحد يلمس كفه وإذا به يري والد محمد غارقا في البكاء ويسلم عليه بحراره ويأخذه في حضنه .. ظل في حضنه بضع لحظات ومن ثم انتفض قائلا :  
- عمي هو محمد مات فعلا ؟

إرتمي الأب علي الكرسي خلفه وهو يقول بصوت متقطع :

- راح عند اللي أحسن مني ومنك يا بني

إمتلأت عيناه بالدموع وحاول التحدث ولكنه لم يستطيع . ظل جالسا بجوار والد محمد بعض الوقت قد يكون دقيقه او ساعه او عدة ساعات ، لا يعلم شيئا ، كل ما يعلمه هو أنه لا يشعر بشئ سوي المراره ، ظل هكذا طويلا حتي وجد شخصا ما يربت علي كتفه قائلا بإبتسامه متأثره :

- البقاء لله يا استاذ ، معلى بنستأذن حضرتك تطلع ترتاح علشان هنشيل الكراسي

نظر حوله فإذا به لايري احدا سواه فقام في هدوء وذهب بدون ان يتفوه بأي كلمة . عاد إلي منزله بعد منتصف الليل وفتح الباب بهدوء فإذا به يري والدته واخته في إنتظاره ، هرولت هند بإتجاهه وقالت بلهفه :

- إيه يا إسلام انت بتهزر !!؟ سهران ده كله بره بتعمل إيه !!؟

نظر لها بفتور وقال :

- خلاص جيت أهو

ثم ذهب إلي غرفته وأغلق الباب خلفه ، ولكن هند مازالت تريد أن تعرف لماذا تأخر كل هذا الوقت وخصوصا لأنه غير معتاد علي ذلك لانه يعرف انه المسئول الوحيد عن والدته وعنها لذلك لايجب ان يتركهما وحدهما ، ذهبت إلي غرفته وطرقت الباب ولكنه لم يفتح ، فتحت الباب وقالت بعصبيه :

- يعني إيه خلاص جيت أهو ؟ إحنا قلقنا عليك جدا يا إسلام خوفنا لاقدر الله يكون حصلك حاجة ؟ وقافل موبايكك ليه كمان ؟

وضع غطاء السرير فوق رأسه وقال بحده :

- إمشي يا هند

أزاحت الغطاء عن وجهه وقالت بغضب :

- لا مش همشي إلا لما تقولي إتأخرت لييه كده ؟ وبعدين انت بتكلمني بلا مبالاه إزاي كده ؟ حصل إيه يعني ؟ هو انا عملتك حاجه ؟  
نهض من مكانه وهو ثائر تماما وأخذ يصرخ قائلا :

- عاوزه تعرفي حصل إيه ؟ هـاه ؟ أقولك يا ستي .. محمد صاحبي مات وانا كنت السبب في موته ، فاكراه لما رن عليا وانا معبرتوش ؟ ساعتها كان يموت وانا اول واحد إتصل بيه ، أصله كان فاكروني صاحب بجد وهلقه !!

طيب عارفه ان باباه اول ماشافني اخذني بالحضن جامد ؟ أصله فاكروني زي ابنه وبيقولي انت من ريحة الغالي .. مسكين الراجل ميعرفش ان ابنه كان ممكن يكون أحسن من كده بكتير لو مكنش عنده صاحب ندل زيي ، ميعرفش ان ابنه دلوقتي بيتحاسب والله أعلم هو دلوقتي مرتاح ولا لا ؟  
ميعرفش اني لما كنت بشوف محمد تعبان كان اخري أقوله مالك وأجيبله مايه وعصير ، حتي مهائش عليا أضغط عليه وأقوله نروح لدكتور نشوف مالك !! كنت عارف انه طول عمره بيكره الدكاتره بس عمري ما فكرت انه ممكن يموت بسبب مرضه ، عمري ما فكرت ان صديق عمري يروح مني بسرعه كده وفي لمح البصر !! كان دايمًا يقولي عاوزين نلحق نقرب من ربنا قبل ما نموت وانا كنت بضحك عليه وأقوله ياعم إحنا لسه قدامنا العمر طويل ، مكنتش اعرف انه كان قدامه يوم واحد ويموت ..

إتسعت عينا هند وأخذت تحرك رأسها بعدم تصديق قائله :

-انت بتقول إي ..

قاطعها إسلام بحده وأردف قائلا :

- عارفه آخر حاجه قالها إيه قبل ما يموت ؟ قالهم خلوا بالكم من إسلام وخلوه يقرب من ربنا علشان مش عاوزه يموت زيي ؟ عارفه يعني إيه يوصيهم عليا قبل ما يوصيهم علي أهله ؟ دلوقتي بس عرفت قيمة انه كان دايمًا يقولي انه بيحبني أكثر من نفسه

أخذ يتنفس بصعوبة وهو يقول بصوت متقطع :

- اااااااااااااا أقول إيه ولا إيه بس ؟ إطلعي يا هند دلوقتي وسبييني في حالي ومحدش يدخل عليا  
تاني مفهوووووووم

حاولت هند تهدنته ولكنها لم تستطع فذهبت للخارج وأغلقت الباب خلفها والدموع في عينيها

أخذ إسلام ينظر إلي سقف الغرفة لساعات بدون أن يتفوه بأي حرف ، كانت دموعه تتساقط كالسيل ،  
رجع بذاكرته للخلف وأخذ يتذكر وفاة والده وكيف ساعده محمد علي اجتياز هذه المحنة

كان يري الموقف أمامه وكأنه حدث بالأمس .. عندنا علم إسلام بوفاة والده كان بالصف الثاني  
الثانوي ، لم يكن يعلم ماذا يجب أن يفعل وهو في مثل هذا السن الصغير فما كان منه إلا انه اتصل  
بأقرب صديق إليه وقال بصوت متقطع من كثرة البكاء :

- محمد الحقني يا محمد أبويا مات مات

إنتفض محمد من مكانه وقال بفرع :

- بتقول إيه يا إسلام !؟

أخذ يصرخ بشده :

- محمد انا حاسس إني همووت إالحقني بسرعه

حرك رأسه بتوتر وقال علي الفور :

- حاضر جاي حالا أهو ، خلي بالك من نفسك

تذكر عندما أخذه محمد في حضنه وأخذ يربت علي كتفه وهو يقول بجديه :

- إسلام إنت راجل البيت دلوقتي ولازم تكون أقوي من كده ، وانا جنبك أهو وعمري ما هسيبك

ثم أوما برأسه مؤكدا :

- انا من دلوقتي راجل البيت معاك ، ومفيش حاجه اختك ولا مامتك هتحتاجها إلا وهتكون موجوده  
بإذن الله ، يلا إمسح دموعك وروح هدي مامتك وأختك وحسسهم إن ليهم ظهر وسند

نظر له إسلام والدموع بين عينيه وقال بتعب :

- يا محمد أنا ثانوية عامه ومسئولية الدراسة لوحدها صعبه عليا ، هعمل إيه بس ولا هشيل  
مسئوليتهم إزاي ؟!! انا حاسس إني اتكسرت ومش هرجع تاني

نظر إليه بصرامه وقال بصوت قوي :

- هنعمل الإثنين يا إسلام بإذن الله ، هندخل هندسه زي ما بنحلم دايمًا وبرضو هنكون رجالة ونشيل أهلنا علي راسنا من فوق ، انا جنبك أهو متقلقش

تذكر عندما كان يتصل به يوميا ويسأله : هل تحتاجون شيئا ؟ تذكر عندما كان يخبره دائما أنه قادم ويقول ماذا أحضر معي ؟ تذكر عندما وقف بجانبه ولم يتركه للحزن والإحباط وأخذ يذاكر له كل ما فاته ويذكره دوما بحلمهما وبيان والده سيكون فخورا به إذا التحق بكلية الهندسه كما تمنى . تذكر كيف كان محمد الاب الثاني له وإنه لم يتركه لحظة ، وفي مقابل ذلك عندما شعر محمد بالتعب وفكر في الإتصال بأقرب صديق له لم يلق منه ردا وكان التأخير هو السبب في وفاته

أخذ يضرب الفراش بقوه رهيبه وهو نائم تماما ، أخذ يلوم نفسه بقوه علي ضياع صديقه منه ، أخذ يتذكر مواقف كثيره حدثت بينهما وكان بين الغضب والضحك والبكاء والألم حتي شعر بالتعب وذهب في النوم

استيقظ إسلام من نومه فوجد نفسه قد نام وهو جالس وبالفعل لم يدخل عليه أحد كما طلب ، فتح باب غرفته وذهب إلي الخارج فوجد والدته تجلس وتقرأ القرآن ، نظر لها بإبتسامه خفيفه فأحست بوجوده فحضرت مسرعه ومسحت علي شعره بحنان وقالت بهدوء :

- البقاء لله يا إسلام ، عامل إيه دلوقتي ؟

أجابها بإبتسامه خفيفه :

- الحمد لله يا أمي

إبتسمت بحماس وقالت :

- عارف كنت بعمل إيه دلوقتي ؟

نظر إلي المصحف ثم عاود النظر إلي والدته وقال متعجبا :

- اه بتقرأي قرآن !!

أومأت برأسها إيجابا وقالت بسعاده :

- أيوه منا قاعده بقرأ قرآن دلوقتي وهدعي لمحمد صاحبك كتير اوووي بإذن الله

إنشرح صدره وشعر بسعاده بالغه وقال بإهتمام :

- ربنا يخليكي يا أمي

ثم أردف متسانلا :

- هو انا ينفع أعمله حاجه تنفعه دلوقتي بعد ما مات ؟

ربتت علي كتفه وقالت بإبتسامه :

- أيوه طبعا يا حبيبي ، كان في حديث عن الرسول صلي الله عليه وسلم بيقول :

" إذا مات ابن آدم انقطع عمله إلا من ثلاث : صدقة جارية أو علم ينتفع به أو ولد صالح يدعو له "

رواة مسلم

يعني إنت ممكن تطلع صدقه عنه ، او لو كان بيقولك أي معلومه مفيده نفذها وفيد بيها الناس وكمان  
دايما خليك فاكركه بدعائك

نظر لها بإمتنان وقال :

- ماشي يا امي شكرا

ثم تركها وذهب إلي غرفته ، جلس علي حافة فراشه ولكنه سرعان ما تذكر إنه لم يصلي الفجر كعادة  
كل يوم ، أحس برغبه ملحه في أداء الصلاة ذلك اليوم بالتحديد فذهب وتوضأ وصلي ثم جلس علي  
فراشه مره آخري يردد :

تطلع صدقه عنه

معلومه مفيده نفذها

خليك فاكركه بدعائك

---

أمسكت سلمي بهاتفها ونظرت إليه بفرحه ثم ذهبت وأغلقت باب الغرفة وأخذت تغني بصوت مرتفع:

احساسك لما ايديك بتمد لخير .. اول ما تشوف الفرحة في عين الغير  
وكانك في السما طائر فوق اعلى من الطير .. وكفاية يكون ربنا عنك راضي وفرحان

وحلمنا فى قلبنا جوانا الخير يزيد .. حتى النجوم لو فى السما عمرها ما تكون بعيبيد

خليك زى ما ربنا عايزك يلافيك .. لو تسعد غيرك يكبر فيه الحب وفيك  
وتكون فوق زى نجوم السما اه ويعليك .. خلينا نكبر أجمل شئ جوا الانسان

أخذت تردد بحماس شديد حتي إرتفع صوتها فدخلت عليها ولاء وقالت بصراخ :

- إيه يا بنتي بتصووتى كده ليه ؟ صوتك واصل لآخر الشارع

إنتبهت سلمي وقالت بإحراج :

- معلىش مأخذتش بالي ، أصلي لسه منزلها جديد وعجبتني اوي

نظرت لها بعدم فهم وقالت :

- هي إيه دي ؟

نظرت للهاتف وضغطت علي زر الإغلاق ثم قالت بسعاده بالغه :

- دي انشوده جديده كده لقيتها علي النت لمنشد إسمه محمد عباس كانت حفصه قالتلي عليه ، بس  
تحفه اوووي يا بت يا ولاء بإذن الله هنزل كل الأناشيد بتاعته

ثم أردفت بإبتسامه كبيره :

- وكمان نزلتها من غير موسيقي

شعرت ولاء بالغضب وقالت بصوت ساخر :

- يعني تبطلي أغاني وتسمعي أناشيد ونقول ماشي ، لكن تقوليلي كمان من غير موسيقي وبتاع !!  
ليه يعني هو حرام !!؟ يعني حتي لو اغنيه دينيه وفيها موسيقي هتدخلك النار يعني !! إيه التفكير  
الغريب ده

تنهدت سلمي بعمق وقالت بهدوء :

- يا بنتي انا مقولتتش هتدخلوا النار ولا الكلام ده ، كل الحكاية إني سمعت حديث عن الرسول صلي  
الله عليه وسلم بيقول :

" ليكونن من أمتي أقوام يستحلون الحر والحرير والخمر والمعازف " رواة البخاري

وبصراحه خوفت بقي أكون من الناس دول فقررت أكون في السليم

ثم أردفت قائله بأريحيه :

- وبعدين يا ستي انا كده مرتاحه جداااا وحاسه اني مش بعمل حاجه غلط ، إدعيلي بقي ربنا يهديني  
ويقربني منه أكثر ، بجد حاسه الأيام دي براحه نفسيه غريبه

صمتت ولاء فنظرت لها سلمي للحظات ثم قالت بتساؤل :

- تفتكري يا بت يا ولاء يكون ربنا راضي عني وهداني للطريق الصح علشان كده انا مرتاحه ؟

إبتسمت قائله :

- مش عارفه ؟ يمكن !!

تههدت سلمي بحماس وقالت بضحكة مستنفة :  
:

- بت يا ولاء انا عارفه إنك اقتنعتي وخلص مش هتسمعي اغاني تاني ، هاه بقي تحبي أنزلك كام  
نشيد معايا ؟!!

أشاحت بيدها وغادرت الغرفة وهي تقول :

- دي لسعت باين !!

إبتسمت سلمي لفعل ولاء المتوقع ثم أغلقت باب الغرفة وأخذت تتشد كما كانت تفعل ، ولكن هذه  
المره بصوت أقل

---

قامت سلمي بتحميل بعض الأناشيد الدينيه ثم فتحت الحساب الخاص بها علي موقع الفيس بوك ، لم  
تكن حفصه موجوده في ذلك الوقت فأخذت تتصفح كعادتها حتي وصلتها رسالة مفاجئة :

- بتعملي إيه بقي من غيري ؟

أطلقت سلمي ضحكة عاليه وكتبت :

- إنتي جيتي إمتي يا بنتي ؟



ضحكت حفصه بثقه وكتبت :

- يا بنتي إحنا موجودين في كل وقت وكل مكان

- ليه يعني سوبر مان مثلا ؟

- هههههه أحسن طبعا ، إحم إحم اللهم زدني تواضعا ، المهم أخبارك إيه ؟

- أخباري حلوه جدا الحمد لله ، مبدأيا كده المسلسل خلص الحمد لله وهحاول مشوفش غيره تاني ، وحملت شوية أناشيد كده للناس اللي قولتيلي عليهم دول وأهي ماشيه بفضل ربنا

- أيوه بقي بقي هو ده الكلام ولا بلاش ، طب عارفه ؟ أنا حاسه إني هدخل الجنة بسببك

تعجبت سلمى قليلا وفكرت بضع لحظات وكتبت بتردد :

- بسببي أنا !! إزاي ؟

إبتسمت حفصه بسعاده بالغه وكتبت :

- أصل انا دايمًا ببعث جروبات دينيه للبنات اللي عندي وبنصحهم وبكتبلهم بوستات وكده ، لكن مكنتش بلاقي أي تفاعل معايا ، ساعات كتير كان بيجيلي إحباط وأقول خلاص بقي ماهما مش راضيين يقرأوا هعمل إيه يعني ، بس كنت بارجع أفكر الحديث عن الرسول صلي الله عليه وسلم اللي بيقول فيه :

" لأن يهدي الله بك رجلاً واحداً خير لك من حمر النعم " متفق عليه

" من دعا إلى هدى كان له من الأجر مثل أجر من تبعه لا ينقص ذلك من أجرهم شيئاً ومن دعا إلى ضلالة كان عليه من الإثم مثل آثام من تبعه لا ينقص ذلك من آثامهم شيئاً " أخرجه مسلم

وكمان أفنكر الآيه الكريمه " وَمَنْ أَحْسَنُ قَوْلًا مِّمَّنْ دَعَا إِلَى اللَّهِ وَعَمِلَ صَالِحًا وَقَالَ إِنَّنِي مِنَ الْمُسْلِمِينَ "

وأقعد أقول لنفسي اوعي تياسى ، مش يمكن بنت تكون محتاجه نصيحتك وبسبب كلمة منك حياتها كلها تتغير ، مش يمكن كلمة منك تقوليها لواحد فيهم تكون سبب في دخولك الجنة

لحد بقي يا ستي لما لقيتك بعثالي إنك عاوزة تتغيري وكده ففرحت اووووي بقي إن أخيرا تعبني جه

بفايده وبادن الله زي ما إتجمعنا في الدنيا علي طاعة ربنا نتجمع سوا في الجنه كمان

- ياه يا حفصه إنتي بجد جميله اوووي ، ربنا يجازيكي خير

- إنتي أجمل ، وإياكي يارب

- طيب بصي صحيح كنت عاوزة أسألك علي حاجه مهمه

- إتفضل أباشا

تنهدت بحيره وكتبت :

- هو انا دايمًا مش بصلي الظهر في الكلية بس لما بروح بصليه ، هو كده عادي ؟

ظهرت ملامح الحزن علي وجه حفصه وقالت متعجبه :

- طيب ومش بتصليه ليه؟!؟

أجابت بتلقانيه :

- ماهو انا مش هينفع أصلي ببنطلون

- بنطلون كمان ، لالالا أنا كده هضرب وربنا ، طيب قوليلي هو إنتي شايفه إيه ؟

نظرت للشاشه بعدم فهم وكتبت :

- يعني إيه ؟

إبتسمت وكتبت بإصرار :

- بصي علي السؤال اللي فوق ده وجاوبي إنتي ، يعني إنتي شايفه إنك لما تروحي عند ربنا هتقدري تقوليله يارب انا كنت بضيع الظهر عطول علشان لابسه بنطلون ؟ تفتكري دي هتبقي إجابته مقنعه ؟

تنهدت سلمي بحيره وكتبت :

- مش عارفه بقي

كتبت بعناد :

- لا عارفه

ابتلعت ريقها بإحراج وكتبت بتردد :

- طيب أعمل إيه ؟!

- عندك جيب ؟

أومات برأسها إيجابا وكتبت بفتور :

- اه عندي ٢ بس والباقي بنطلونات ، بس بصراحه مش بحبهم وبحس إنهم بيلخمونني

إبتسمت بحماس وكتبت :

- طيب ممكن علشان ربنا يرضي عننا نعمل تجربيه صغنه لإسبوع واحد بس ؟

- شو هاي التجربه ؟

ضحكت حفصه رغما عنها وكتبت بفرحه :

- كده تبقي موافقه ، بصي يا ستي إنتي الإسبوع الجاي في الجامعه إنزلي من بيتك متوضيه وإلبي طقم واسع كده وجيبه واسعه من الـ ٢ اللي عندك ، إنزلي وإنتي في نيتك إنك هترضي ربنا وإنك مش عاوزه حاجه من الدنيا غير رضاه عنك وإدعي إنه يثبتك ويحبك في اللبس ده ومترجيش للبنطلونات تاني .

نظرت سلمى لكلمات حفصه بتعجب ثم كتبت :

-إيه ده يا بنتي ، يعني هرمي كل اللبس اللي عندي وهروح الجامعه يوميا بالجيبتين دول بس ؟!!

ضحكت بثقه وكتبت :

- يا ستي وهو حد قالك إرميهم ، إعملي اللي بقولك عليه وبعدين هنشوف هنعمل إيه فيهم ؟ ماشي ؟

- ماشي

- وعد هاه ؟

أومات برأسها إيجابا وكتبت مؤكده :

- عيبيب ، سلمى مش بترجع فى كلمتها أبدا ، نجرب إسبوع مش هنخسر حاجه

- ماشى يابو صلاح همشى انا بقى ، عاوز حاجه يا حاج ؟

- شكرا يا رمضان ، إبقى سلمى على العيال

أغلقت حفصه الهاتف الخاص بها بينما جلست سلمى تفكر فيما دار بينهما ، تنهدت بعمق وقالت بعناد :

- نجرب .. وإحنا هنخسر إيه يعنى ، مش يمكن أرتاح ويروح تأنيب الضمير اللي عندي ده

فى المساء إرتدى إسلام ملابسها على عجل وهرول بإتجاه باب الشقه وقام بفتحه وكاد أن يخرج لولا سماعه صوت والدته تقول بتعجب :

- إسلام رايح فين ؟!!

إلتفت إليها قائلا بتلقائيه :

- رايح عند محمد

لمعت عيناها بالدموع وربتت على كتفه قائله بحزن :

- بس محمد مات يا إسلام !

زفر بضيق وقال :

- عارف يا أمى عارف متخافيش لسه متجننتش !! انا رايح عنده البيت أشوف لو محتاجين حاجه يعنى ، وما تنسيش هو وقف معايا أد إيه يوم وفاة بابا الله يرحمه

إبتسمت قائله :

- وهو حد ينسى برضو اللي عمله معنا ، ربنا يرحمه برحمته

- ماشي يا أمي عايزه حاجه أجيبها معايا ؟

- تيجي بالسلامه يا حبيبي

وصل إلي الشارع الذي يقطن به محمد ونظر إليه بحزن عميق ، تذكر كيف كان يأتي معه دائما إلي هنا ، تذكر صدمته عندما سمع بخبر الوفاة ، تذكر نظرات فاروق الغاضبه والساخطه عليه ، تذكر والده وهو يأخذه به حضنه لأنه أعز صديق لولده ، تذكر جلوسه لوقت طويل جدا وهو غير مستوعب ماحدث ، أخذ يتذكر الكثير من الأشياء ولكنه استفاق من شروده علي ملمس شئ صغير يمسه ببنطاله فنظر فإذا به يري طفلا صغيره يجذبه من البنطال ، نظر إليه إسلام متعجبا ، فتبسم الطفل قائلا :

- حمو ممكن تفتحي دي ؟

نظر إليه إسلام بإبتسامه وأمسك كيس المقرمشات وقام بفتحه قائلا :

- إتفضل يا حبيبي

نظر له الطفل بإمتنان وأطلق قبله في الهواء وذهب مسرعا وهو يقول :

- تكلن يا حمو

تبسم إسلام وأكمل طريقه .. صعد درجات الدرج بصعوبه شديد ووقف أمام الباب للحظات ثم وضع يده علي الباب وأخذ ينقر بهدوء ، فتح الأب الباب وقال بإبتسامه هادئه :

- إتفضل يا إسلام يابني

تنهد إسلام قائلا :

- ربنا يخليك يا عمي ، أسف إنني جيت من غير ميعاد بس حبيت أسألكم إذا كنتوا محتاجين حاجه انا موجود ، حضرتك عارف محمد كان بالنسبالي إيه وطبعاً انا زي إبنك برضو

ثم أردف بإبتسامه :

- صح ولا إيه ؟

إبتسم الاب قائلا :

- طبعاً يابني ربنا يبارك فيك ، بس الحقيقه فاروق مش مخليني محتاج حاجه ودايماً معايا الحمد لله  
وبيجيننا في اليوم أكثر من مره ربنا يبارك فيكم جميعاً

إبتلع إسلام ريقه بإحراج وقال :

- طيب يا عمي لو إحتجت أي حاجه كلمني وانا هاجي لحضرتك فوراً ، وإعتبرني برد أي حاجه من  
جمائل محمد علياً

- باذن الله يا بني ، إفضل ادخل طيب

- ربنا يبارك في عمر حضرتك ، بعد إذنك

---

هبط درجات الدرج والحزن يملأ قلبه ووقف أمام المنزل وهو يقول بضيق :

- حتى دي كمان عملتها يا فاروق ، أكثر وقت كانوا محتاجيني فيه لاقوك إنت بدالي ، حقيقي انا  
مستحقش اني أكون " صديق " أصلاً

نظر أمامه فإذا به يراه مره آخري ، إنتفت للجانب الآخر سريعاً وأخذ يفكر ماذا يفعل ؟ هل يذهب  
ويحدثه ام يرحل بهدوء ؟ ولكنه سرعان ما شعر بالحزن عندما تذكر كلمات فاروق الأخيره :

- ممكن بقي مشوفش وشك قدامي تاني ؟ ولا دي كمان صعبه ؟ وعلي فكره عمري ما هسامحك  
ولا هعفيك من المسئولية

تنهد بحزن وألقى علي فاروق نظره أخيره قبل الرحيل ومن سوء حظه ان فاروق شاهده بالفعل  
ولكنه لم يعره أي إهتمام وذهب بعيداً .. شعر إسلام بالإحراج وأسرع الخطي كي يختفي من هذا  
الشارع حتى لا يراه ثانيه ..

عاد إلي منزله في صمت ودخل غرفته وإستلقي علي فراشه ونظر للسقف كالعادة وأخذ يتذكر  
أيامه مع محمد

---

في صباح اليوم التالي ذهبت سلمى للجامعه وهي ترتدي الجيب كما وعدت حفصه وأيضاً كانت علي  
وضوء لكي تصلي الظهر هناك كما اتفقا ، تقدمت سلمى من صديقاتيها وقالت بفرحه :

- يا عيال إيه رأيكم في الطقم ده حلو ؟

اومات هند برأسها موافقه وقالت بإبتسامه :

- حلو يا سلمى الف مبروووك عليكى

ثم تابعت فاطمه :

- حلو أسلمى ، بس الجيبه دي مش بتشكلك !!؟

نظرت إليهما سلمى بسعاده وقالت :

- ده مش طقم جديد ، هو كان عندي بس مكنتش بلبسه يعنى

ثم نظرت لفاطمه وقالت بمزاح :

- لا مش بتشكلكنى ياختى

وكادت أن تخرج لسانها لولا تذكرها انها فى الجامعه ومن الممكن أن يلحظها أحد ، جلسن يتحدثن قليلا حتى أذن الظهر ، نهضت سلمى من مكانها وقالت بحماس :

- يا بنات أنا رايحه أصلى ، هتيجوا معايا ؟

قالت هند بإحراج وتردد :

- مش هينفع علشان مش متوضيه ، هصليه لما أروح بقى إن شاء الله

لم تنظر سلمى لـ فاطمه لأنها كانت تتوقع إجابتها فلم تهتم وذهبت بمفردها لأداء الصلاة وقبل أن تغادر قالت بسعاده :

- هصلى وأجى علطووول يا عيال ، اوعوا تتحركوا من هنا

أجابها بالموافقه فذهبت سلمى بينما جلسا هما للتحدث فقالت فاطمه بتعجب :

- إنتى مش حاسه إن سلمى متغيره شويه اليومين دول !!؟

نظرت لها بعدم إهتمام وقالت :

- عادى

شعرت فاطمه بالإنزعاج من الرد الغير مبالي وقالت بغضب :

- يعني إيه عادي يا هند؟! هي مش صحبتك برضو ولا إيه؟ يعني لازم تهتمى لأموورها

إعتدلت هند في جلستها ونظرت لفاطمه بتعجب وقالت :

- طيب وهو انا عملت إيه يدل علي إني مش مهمه بيه؟! البنت حبت تحسن من نفسها شويه إيه المشكله؟ ربنا يهديها

تنفست فاطمه مرارا وقالت بضيق :

- يعني إنتي مش حاسه انها بقت غريبه اليومين دول ومش قريبه مننا زي الاول؟

أومات رأسها نفيا وقالت موضحة :

- كل الحكاية يا ستي إنها بقي ليها إهتمامات تانيه وكل ما تكلمنا في الحاجات بتاعتها دي إحنا ناخذ الموضوع بهزار وتريقه ، فبقت تعمل اللي هي عاوزاه حتي لو إحنا مش موافقين

نظرت لها فاطمه بعدم إقتناع وقالت :

- يعني إنتي شايفه إن ده عادي؟

أجابتها علي الفور :

- اه طبعا عادي ، دي حياتها وهي حره فيها ، زي ما إحنا بنعمل اللي إحنا عاوزينه هي كمان من حقها تعيش حياتها براحتها ، وسواء انا مع التغيير ده او لأ برضو ميحقليش اني اتدخل في حياتها الشخصيه

كادت فاطمه أن تتحدث لولا ان قاطعتها هند وتابعت :

- كمان يا ستي متقلقيش سلمي بتحبنا جدا ومستحيل تتغير علينا

تنهدت فاطمه بعدم رضا وقالت :

- جايز!

وبعد عشرة دقائق تقريبا عادت سلمي وعلي وجهها ملامح السعاده وقالت لهما بحماس :



- جيت

أطلقت هند ضحكة عاليه وقالت ساخره :

- أراجل ! جيتي والله ؟ مش معقوووله

ضربتها سلمي علي كتفها وقالت بمزاح :

- بس يا به

ابتسمت فاطمه لمشاهدتها هذا المشهد وقالت بفضول :

-إيه سر السعاده دي كلها يا حجه سلمي ، فرحينا معاكي

تنهدت سلمي بـ راحه وقالت بسعاده :

- حاسه إنني مرتاحه وأنا مصليه الفرض اللي عليا في وقته كده ، دلوقتي بقي هعمل كل اللي انا عاوزاه في الجامعه من غير تأنيب ضمير

ابتسمت هند ولم تتحدث وكذلك فاطمه

---

مر إسبوع كامل وإسلام علي نفس الحاله ، لا يخرج من غرفته إلا إذا ذهب لشراء طلبات المنزل ويدخل مره آخري ويغلق الباب خلفه ، لم يذهب إلي الجامعه منذ وفاة صديقه محمد لانه لا يستطيع الذهاب هناك بدونه ، لا يستطيع تحمل مشاهدة كل الأماكن الذي كان يجلس بها محمد معه ، لا يستطيع رؤية الطاولة التي كان يفضلها محمد منذ أول يوم في الجامعه وكان يجلس بها كل يوم بلا إستثناء ، لا يستطيع رؤية صديق آخر يجلس بجواره في المدرج ، لا يستطيع تخيل أي شئ بدون محمد لذلك إكتفي بوجوده في المنزل مع أحلامه

كادت والدته أن ينفطر قلبها علي ولدها الوحيد وعلي الحاله التي تراه عليها منذ وفاة صديقه ولكنها لم تكن تستطع التحدث معه لأنها تعلم مكانة محمد في قلبه ، قررت أن تستجمع شجاعته وطرقت عليه الباب بخفه فسمعتة يقول بصوت خفيض :

- نعم ، عاوزه حاجه يا هند ؟

فتحت باب الغرفه وأظلت برأسها مبتسمه وقالت :

- دي انا يا حبيبي ، ينفع ادخل

نهض إسلام من فراشه وجلس علي حافته وقال محاولا تصنع الإبتسامه :

- طبعا يا أمي إتفضلي

جلست بجواره علي حافة الفراش ومسحت علي شعره بحنان ونظرت له بعينين لامعتين وقالت :

- هتفضل علي الحال ده كتير يا إسلام ؟

تنهد بحزن وقال بتأثر :

- مكنتش أعرف إنني بحبه اووووي كده يا امي ، عمري ما كنت اتخيل إنه ممكن يختفي من حياتي فجأة كده ، ده انا كنت حاسس انه كل حاجه ليا في الدنيا ، كان الأب والاخ والصديق وكل حاجه ، لحد دلوقتي مش مصدق اني مش هشوفه تاني ، خلاص مبقيتش حاسس إن حياتي لياها معني وبقيت كاره كل حاجه

ثم تنهد مره آخري قائلا :

- الحمد لله

تحركت دمعته في عينها ولكنها حاولت الإحتفاظ بها كي لا تزيد من ألم ابنتها وربتت علي كتفه قائله :

- لو الحزن ده يابني هيرجع اللي راح كنت هقولك احزن وعيط وكسر الدنيا كلها ، بس خلاص ده قدر ربنا وإحنا لازم نرضي بيه

ثم نظرت إليه بابتسامه رضا وقالت :

- فاكرا يا إسلام لما أبوك مات ؟ كنت إنت ساعتها في ٢ ثانوي وهند في ٣ إعدادي ، ساعتها انا حسيت اني اتكسرت بمعني الكلمة ومبقاش ليا ظهر ولا سند خلاص ، حسيت اني خايفه من مسئوليتكم واني مش هقدر أشيلها لوحدي خلاص ..

بس لما قعدت أفكر مع نفسي لقيت إن ربنا رحيم اووووي ومفيش حاجه بتحصلنا غير لما يكون لينا الخير فيها وكمان طالما ربنا كتب الحاجه دي يبقي إحنا لازم نرضي ونصبر ، ماهي الجنه مش ببلاش برضو

ثم مسحت علي شعره مره آخري وقالت بسعاده :



نظرت للشاشه بتعجب وكتبت :

-ده اللي هو إزاي يعني !؟

- إيه يا بنتي إنتي نسيتي ولا إيه ؟

إبتسمت حفصه بإحراج وكتبت :

- معلىش يا بنتي أبو العيال مطلع عيني ومبقيتش مركزه في حاجه

إتسعت عينا سلمى وكتبت بتعجب :

- إيه ده هو إنتي متجوزه وعندك عيال كمان ؟ صحيح انا إزاي متعرفتش عليكى ده كله

أطلقت حفصه ضحكه عاليه وكتبت :

- بهزر معاكى يا بنتى ، انا لسه مخطوبه ، المهم بقى إيه حكاية لبست واصلت دي ؟ معلىش نسيت  
انا اسفه

مطت سلمى شفتاها للأمام وكتبت بلوم :

- مش إنتي قولتيلي من إسبوع إني ألبس جيبات وأصلي الظهر في مسجد الكلية وانا وعدتك انى  
هحاول أعمل كده ؟ اهو جيت أقولك الأخبار بقى بس باين عليكى نسيتي

أحست حفصه بالإحراج فكتبت محاوله إمتصاص حزن سلمى :

- اااه صحيح ، قوليلي بقى عملتي إيه ؟ معلىش والله مشغوله شويه اليومين دول فنسيت ، معلىش  
بقى

- كنت بقولك يا ستي إني طول الإسبوع التزمت بالصلاة في مسجد الكلية وكمان ملبستش بنطلونات  
خالص ، أقولك كمان على سر خطير ؟

كتبت حفصه بحماس :

- قولي قولي





- طلعتي الهدوم دي كلها ليه كده ؟

نظرت إليها سلمي بثقه وقالت ببراعة مصطنعه :

- هرميهم

رفعت ولاء حاجبها وقالت حانقه :

-هترميهم إزاي يعني !!؟

نظرت لهم سلمي نظرة وداع وقالت براحه :

- يعني خلاص قررت مش هلبس ضيق تاني ، والهدوم دي كلها مترضيش ربنا وأنا مش هلبسها تاني

أمسكت ولاء بالملابس وأشارت بهم لسلمي وقالت بتأفف :

- وهو اللي يرضي ربنا يعني إنك ترمي الهدوم دي كلها وإحنا دافعين فيها فلوس

أمسكت منها الملابس ووضعتها علي الفراش مرة أخرى وقالت مطمئنه إياها :

- متخافيش يا ولاء مش هرميهم في الزباله أكيد !! أنا بس هلبسهم في مكانهم المناسب وبعدين خلاص أنا اخدت قراري هرجع فيه ، يأما تساعدينني يأما متعترضيش علي الحاجات الصح اللي بعملها

ثم ارتمت علي الفراش وقالت بضجر :

- مش كل ما أعمل حاجه صح تقعدوا تأنبوا فيا وتتريقوا عليا ، أنا زهقت

شعرت ولاء بالغضب من كلماتها فقالت وهي تغادر الغرفة :

-إنتي حره !

تنهدت سلمي بحزن وقالت هامسه :

- حتي إنتي يا ولاء ! يلا أمري لله هكمل طريقي لوحدي ، ربنا يخليكي ليا يا حفصه وتفضلي

جلس إسلام يفكر في كلام والدته لساعات حتي أخذ قرار ما ، بدل ملابسه وهبط من منزله متجها إلي منزل فاروق ، فور وصوله صعد الدرج بتوتر وما إن إقترب من باب الشقه حتي أحس بالخوف أكثر ، أخذت يده تقترب من الباب وتبتعد مره آخري وتكرر هذا الوضع أكثر من مره حتي إستجمع شجاعته وقام بطرق الباب طرقات خفيفه ، سمع فاروق يقترب من الباب شيئا فشيئا وهو يقول :

- مين ؟

تنحنح إسلام وإستجمع قواه وقال بصوت خفيض :

- أنا إسلام يا فاروق

ثم هبط من علي الدرج بضع درجات ، قام فاروق بفتح باب منزله ونظر لإسلام متعجبا ولم يتحدث بينما إبتلع إسلام ريقه وقال بصوت متقطع :

- إزيك يا فاروق ؟

لم يلتفت له فاروق وأجاب بسرعه :

- الحمد لله

ساد الصمت للحظات حتي قطعه إسلام مره آخري وقال بإحراج :

- كنت عاوز منك طلب يا فاروق

لم ينظر له فاروق ولم يتحدث فأكمل إسلام بتوتر :

- فاروق ممكن تساعدني أكون زي ما محمد كان عاوز ؟ عاوز أقرب من ربنا وأبقي عايش صح زي ما كان دائما بيقولي بس مش عارف أعمل إيه وأبدأ منين ؟

لم يتأثر فاروق بكلماته وأجابه بصلابه :

- إسلام هو أنا مش هقولتك إني مش عاوز أشوفك تاني ؟

صدم إسلام من هذا الرد القاسي وشعر وكأن شخص ما سكب عليه أكوابا من المياه المتلجه في ليالي الشتاء الباردة فما كان منه إلا أن ينظر إلي فاروق بذهول ولا يتحدث ، أحس فاروق بصعوبه كلماته



فقال مفسرا :

- بص يا إسلام ، انا مش قادر أنسي المنظر اللي أنا شوفته يوم وفاة محمد ومش قادر أسامحك ولا أنسي إنك كنت السبب الأساسي في بعده عن ربنا وموته علي الحاله دي علشان كده مش عايز أشوفك تاني وده أفضل ليا وليك  
كانت كلمات فاروق حاده للغايه مما جعل إسلام يرجع للخلف بضع خطوات مستعدا للهبوط وهو يقول بحزن عميق :

- ماشي يا فاروق شكرا

ثم نظر لعينيه بعمق وقال متأثرا :

- بس ما تنساش إني جيت في يوم وطلبت منك إنك تاخد بإيدي للجنه وإنت رفضت تساعدني ، يعني إنت دلوقتي عملت زي ما أنا عملت مع محمد بالظبط ، مش فارقه كتير

ألتف بوجهه إلي درجات الدرج وأخذ يهبطها ببطء وهو يقول :

- بعد إنك يا صاحب صاحبي

كان يتوقع أن يعود إليه فاروق ويعتذر ولكنه وجده دخل إلي منزلة وأغلق الباب وراءه وكأن شيئا لم يكن !

---

عاد إسلام إلي منزله والحزن يملأ قلبه ، دخل غرفته وجلس علي حافة الفراش لبعض الوقت ، لم يكن يتوقع هذا الرد القاسي من فاروق ، كان يعتقد أنه سيجد الحل عنده ، كان يتوقع أن يستطيع فاروق أن يريح قلبه ويساعده علي التخلص من مرارة الذنب التي تلاحقه ولكن حدث العكس تماما ، فحزنه قد زاد أكثر وأكثر .

نهض من فراشه محاولا تغيير حالته ، ذهب إلي الحاسب الخاص به وقام بفتح حسابه علي موقع الفيس بوك ، وجد العديد من رسائل ومنشورات التعزیه ، ووجد أيضا سبعة وثلاثون رساله من ساره ، لم يستطع أن يقرأهم لأن حالته لم تكن تسمح بذلك ، ولكن بعث لها رسالة لتطمئن عليه :

- ازيك يا ساره ؟ معلى مكنتش بفتح الأيام اللي فاتت دي علشان صديق عمري توفي ونفسي تي تعبانه شويه ومش قادر أكلم حد ، انا قولت أطمئنك بس ، متقلقش عليا وإدعيلي

كانت سارة تجلس علي حاسبها في هذا الوقت وعندما وجدت رسالة من إسلام كادت أن تففز من مكانها من الفرحه وكتبت بلهفه :

- أخبييرا يا إسلام رديت ، قلقنتني عليك اوووي ، ربنا يرحم صاحبك ، شد حيلك وطمني عليك  
تنهد بضيق عندما شاهد رسالتها وذلك لأن حالته لم تكن تسمح بالحديث مع أحد وكتب بتعب :  
- انا الحمد لله كويس ..

- طيب صاحبك ده مات إزاي وحصل إيه طمني ؟

شعر بالإختناق عندما شاهد جملتها الأخيره وأحس وكأن المشهد يحدث أمامه مرة آخري فكتب بضيق  
:  
- معلى مش قادر أتكلم دلوقتي خالص يا ساره ، انا قولت بس أطمئك عليا ، مع السلامه  
وقبل أن تتحدث مره آخري وجدته قد أغلق الموقع بالفعل ، تنهدت بغضب وأغلقت حاسبها أيضا

في صباح اليوم التالي طرقت والدة إسلام باب غرفته فلم يجيبها فقامت بفتح الباب بخفه ودخلت  
لتوقظه فوجدته مستيقظا بالفعل وينظر لها بوجه خالي من أي تعبير فتبسمت بحنان وقالت :

- مش ناوي تروح الجامعه برضو يا إسلام ؟

وضع الوساده فوق رأسه وقال بعدم إهتمام :

- مش مهم !

أزاحت الوساده عنه وجذبتة من قميصه بشده وقالت بحزم :

- لا هتروح

ثم أخذت تصرخ في وجهه قائله :

- فوق لنفسك كده وقوم يلا شوف مستقبلك الإمتحانات قربت ، هتضيع نفسك بإيديك وفي الآخر  
صاحبك مش هيستفاد حاجه برضو

ضحك إسلام بسخريه وقال :

- مستقبلي !! طيب ماهو كمان محمد مستقبليه ضاع !؟

إتسعت عيناها من الغضب وقالت بصوت حاد :

- صاحبك مستقبله مضاعش ولا حاجه ، ده قدر ومكتوب عند ربنا ، وأنا قولتك قبل كده لو عايز تساعده بجد تعمل إيه وانت مسمعتش الكلام ، يبقي بلاش بقي تعيش دور الحزين وتناملي في السرير بالإيام زي الولايا

شعر إسلام بالغضب الشديد ولكنه حاول إنتقاء كلماته لأنه يتحدث مع والدته وقال بضيق :

- يعني إنتي شايفه إني بعيش الدور ؟ شايفه إني فرحان في موته وعامل نفسي زعلان يعني ؟ ماشي يا أمي شكرا

تنفست بعمق وجلست علي طرف الفراش وقالت بهدوء :

- أنا عارفه إنك زعلان عليه فعلا وإن محمد مكانش زي أي صاحب ، محمد كان أخوك وكان إبني انا كمان ، بس اللي انت بتعمله في نفسك ده مش هيرجع حاجه يا إسلام !

ثم نظرت له بإبتسامه وقالت :

- طول عمركم كنتوا بتتمنوا تكونوا مهندسين أد الدنيا صح ؟ صاحبك مات بس إنت لسه عايش يبقي المفروض تحقله حلمه وتبقي إنت المهندس اللي بيشغل بضمير ويخدم بلده فعلا زي ما كنتوا بتتمنوا !!

ظهرت ملامح الحزن علي وجهه وقال بتأثر :

- وصاحبى برضو كان بيتمني إننا نكون أحسن من كده ، كان بيتمني إننا نقرب من ربنا شويه ونعيش عدل بدل الإستهتار اللي كنا فيه ده ، ومات قبل ما يلحق يعمل حاجه

ثم ضحك بسخريه وقال مستنكرا :

- أحقله حلمه ده كمان إزاي بقي !!؟

عقدت ذراعيها أمام صدرها وإبتسمت بثقه وقالت :

- تحقله حلمه إنك تكون إنسان بجد بيتقي ربنا ، تعمل بنصايحه اللي كان دايما بيقولهاك علشان الثواب يوصله ، تدعيه ، تطلع صدقه عنه ، تعمله أي حاجه تنفعه وهو ميت ، فهمت ؟

أوما برأسه إيجابا فأمسكته من كفيه وقالت بحماس :

- طيب يلا

نظر لما متعجبا وقال :

- يلا فين !!؟

قالت بإصرار :

- هتروح الجامعه دلوقتي

أفلت يديه منها بهدوء وقال بلا مبالاه :

- مش دلوقتي .. بعدين

إزداد إصرارها وصرخت به قائله :

- أنا قولت هتروح دلوقتي يعني هتروح دلوقتي ، مش هسمحك تضيع تعبى وتعب أبوك السنين دي كلها ، هتيجي علي آخر سنتين وتضيع ؟ لأ يا بابا إنسي ، يلا قوم فز

زفر بضيق وقال :

- يا أمي خلاص سيبيني في حالي دلوقتي طيب ، هبقي هروح الإسبوع الجاي إن شاء الله

أمسكته من ذراعيه وجذبتة للخارج بشده وقالت بصرامه :

- لأ دلوقتي ، إخلص

- لا حول ولا قوة إلا بالله ، يا أمي طيب بكره طيب ، أنا مش طابق نفسي والله

- قولت هتقوم دلوقتي يعني هتقوم دلوقتي ، إخلص بقولك !

نهض من مكانه مستسلما وفتح خزانته وقام بإرتداء ما رآه أمامه وذهب إلي الجامعه ، كانت الساعه الواحده ظهرا ولم يكن يعرف هل مازالت المحاضرات مستمره أم إنتهت في ذلك اليوم ، أخذ يتجول في كليته بلا هدف حتي وجد بعض من أصدقائه يأتون إليه من كل حذب وصبوب ويأخذونه بالأحضان ويقومون بمواساته ، أخذ يحدث نفسه بكره :

- آل وفاكرينك أعز صديق ليه وجايين يواسوك كمان؟! والله إنت ما تستاهل تكون صاحب أصلا

أخذ شادي صديقه يربت علي كتفه بحنان ويقول مطمئنا إياه :

- طبعا إنت عارف إن الإمتحانات قربت ، والإسبوع اللي فات ده أخذنا المقرر والملغي ، فأنا بإذن الله هقعد معاك في الوقت اللي يعجبك ونعلم سوا علي اللي هيجي في الإمتحانات ، وشد حيلك يا بطل وخليك قوي كده ، ربنا يريح قلبك

نظر له بإمتنان وقال :

- ربنا يخليك يا شادي ، ماشي بإذن الله بس بعدين بقي علشان دلوقتي مش قادر

إبتسم بتفهم وقال :

- اللي يريحك ، أنا موجود وفي الخدمه دايمًا

صمت للحظات ثم نظر له وقال متسائلا :

- هو في محاضرات النهارده تاني ؟

أوما برأسه نفيا وقال :

- لأ آخر محاضره لسه خارجين منها حالا ، تعالي بكره بقي علي السكشن بتاع ٩ الصبح علشان بعده هنطلع علي المكتبه نجيب منها شويه مذكرات مهمين كده

- ماشي يا شادي بإذن الله ، بعد إنك

تركه إسلام وسار بإتجاه باب الجامعه بسرعه كبيره ، خرج من الباب واتخذ أول وسيلة مواصلات وجدها أمامه وعاد إلي المنزل علي الفور ، دخل منزله فسألته والدته عما فعل فقص عليها ماحدث وذهب لغرفته لينام مرة أخرى

وعلي الجانب الآخر بكلية التربيه خرجت سلمي مع صديقاتيها من آخر محاضرة لهن في ذلك اليوم ، جلست تتحدث معهما قليلا بخصوص ماحدث هذا الإسبوع ومايجب أن يفعلونه للخروج بأفضل نتیجه من إمتحانات آخر العام فتهدت قائله :

- وبكده يا حلوه إنتي وهي عرفنا كل المقرر اللي علينا والمفروض بقي نذاكر ، السؤال هنا بقي :

هناك الحاجات الغريبة دي إزاي ؟

ابتسمت هند بمرح وقالت :

- زي ما عملنا السنه اللي فاتت بالظبط ، هنقعد نقرأ في الحاجات الغريبة دي ونحفظهم صم ونروح نكتبهم في الإمتحان وخلص

أخذت تحرك رأسها يمينا ويسارا بعدم رضا وقالت :

- بس انا مش مقتنعه بالحكاية دي يا هند ، يعني إحنا كده مش بنستفيد حاجه من كل اللي بناخده ده

نظرت لها هند بلا مبالاه وقالت :

- هو ده نظام التعليم في بلدنا يا سلمى ومفيش عندنا حل تاني

رفعت سلمى حاجبها وقالت بتفكير :

- لا أكيد في حل ، وأنا بإذن الله هوصله

ثم جذبتها من ذراعيها وقالت بحماس :  
-يلا نروح بقي يا عيال كده هنتأخر

---

قرر إسلام مواصلة دراسته في الجامعة كي يجتاز فترة الإمتحانات بسلام ، كان كالآله يذهب ويعود بلا روح ، يستيقظ من نومه في الصباح الباكر ويذهب إلي الجامعة لحضور المحاضرات ويجلس في فترة مابين المحاضرات وحيدا لا يريد التحدث مع أحد ولا يريد أن يراه أحد ، يجلس في مكان لم يجمعه بمحمد كي لا تزيد جراحه ، يعود لمنزلة فيذهب للنوم .. يستيقظ من نومه ويظل جالسا أمام كتبه ومذكراته يذاكر بعض الوقت ويتذكر محمد وذكرياته في البعض الآخر وظل هكذا حتي نهاية فترة الإمتحانات ..

أما عن سلمى فهي أيضا قد إنشغلت بمذاكرتها وإمتحاناتها وحفصه أيضا ولم يتحدثا مع بعضهما البعض إلا قليلا

---

إنتهت الإمتحانات وعاد كل إلي حياته ، أخذت سلمى تستعد لخطوتها القادمة في التغيير ، بينما إسلام كان يقضي معظم يومه في النوم هروبا من واقعه المؤلم وذكرياته مع محمد التي تلاحقه دائما وتجعله يكره ذاته ويكره كل يوم كان يقابل فيه إحسان محمد بإساءة حتي ضاع منه ، جلست سلمى

تحدث حفصه لأول مره بعد إنتهاء الإمتحانات فكتبت بحماس وسعاده :

- هيببييخ بقي خلصت إمتحانات وفضيتلك يا حجه ، خلاص مبقاش في أي حاجه تشغلني عن مواصلة طريقي

إبتسمت حفصه وأجابت بنفس الطريقه :

- هيببييخ بقي وأنا كمان خلصت إمتحانات وإتشغلنتك

ضحكت بتعجب وكتبت :

- يعني إيه ؟

إبتسمت حفصه بتلقانيه وكتبت :

- مش انا قولتلك يا بنتي إن فرحي بعد الإمتحانات ؟

تذكرت سلمي حوارها السابق مع حفصه فشبهت بذهول ممزوج بالسعاده وكتبت :

- هو إتحدد خلاص ؟ طيب إنتي كنت بتقولي حصل مشاكل مع خطيبك ، قوليلي وصلتوا لإيه صحيح  
- اه يا ستي إتحدد ، بعد ٣ أسابيع إن شاء الله

صمتت قليلا ثم كتبت بحزن :

- إضطريت أوافق إنني أسافر مع إيهاب الإمارات ، أنا مكنتش عاوزه أقولك علشان متزعليش وقولت  
أستني لما تخلصي إمتحانات بقي

شعرت سلمي بسعاده بالغه وكتبت بمنتهي الحماس :

- الف مليون مليون مبرووووووك يا حفصه ، فرحت اووووي والله ، وبعدين عادي يا ستي هبقي  
أكلمك وإنتي هناك ، ربنا يسعدك

لم تكن تريد أن تكسر فرحتها في هذا الوقت بالتحديد ولكن لابد أن تخبرها ولا يوجد حل آخر ، ترددت  
للحظات ثم كتبت :

- سلمي .. أنا مش هينفع أتواصل معاكي وأنا هناك

انتفضت سلمي من مكانها وإتسعت عيناها وكتبت بخوف :

- ليه يا حفصه ؟ يعني إيه ؟!! يعني أنا كده مش هينفع أكلمك تاني ؟

إبتلعت ريقها بإحراج وكتبت :

- للأسف يا سلمي مش هينفع يكون عندنا نت في الأول كده لظروف ما عند خطيبي ، بس أنا برضو واثقه فيكي وعارفه إنك هتعرفي تكلمي طريقك لوحدهك بإذن الله

كادت أن تسقط دمعها من عين سلمي وكتبت بألم :

- يا حفصه أنا إتعودت عليكي خلاص ، وإنتي كنتي سبب في كل الخطوات اللي أنا أخذتها دي ، أعمل إيه من غيرك بعد كده بس ؟

أغمضت حفصه عينيها وتنفست بعمق وإبتسمت بإطمئنان وكتبت :

- بصي يا سلمي .. إسمعي الكلمتين اللي هقولهملك دول وحطيمهم حلقه في ودنك وأوعي تنسيهم أبدا

" اللي معاه القرآن والدعاء مش هيكون محتاج لأي إنسان ، هما دول سلاحك اللي هتقوي بيهم نفسك "

تنهدت سلمي بحزن وكتبت :

- مش فاهمه ؟

أرسلت لها وجه برئ وكتبت هامسه بحنان :

- من خلال معرفتي بيكي الفتره اللي فاتت دي لقيتك إنسانه بسم الله ما شاء الله قويه وقادره علي نفسك ، بس كنتي محتاجه حد يشجعك تكوني أفضل وإنتي بالفعل بدأت في الطريق ده ، مهما حصل ومهما كانت العواقب اوعي تقفي او توقفي تقدمك ده علي شخص ، يعني أنا هروح .. لكن سلمي هتفضل موجوده ولازم تكمل طريقها ..

إبدأي إقرأ في الجروب من جديد وحددي خطواتك بنفسك ، لما تحسي إنك تعبت و مش قادره تكلمي طريقك إستخدمي سلاحك .. معاك الدعاء والقرآن

إفتحي المصحف وانتي بتقولي لـ ربنا يارب إبعثلي رسالة ، إبدأي دوري كل يوم علي رسالة من ربنا ليكي لحد ما توصليلها ، إدعي كتير اوووي ربنا يقويكي ويثبتك ، اوعي يا سلمي تستسلمي



للشيطان واوعي حد يضايقك بكلمتين ويخليكي ترجعي عن هدفك ..

معاكي قرآنك ودعائك يا سلمي فاهماني ؟ معاكي سلاحك يا سلمي اوعي تتخلي عنه .

تسللت الدموع من عيني سلمي دون أن تشعر بهم ، كتبت كلمات الوداع لـ حفصه :  
- حاضر يا حفصه هحاول ، هتوحشيني

إبتسمت حفصه برقه وكتبت :

- يا بنتي أنا معاكي أهو ، لسه فاضل ٣ أسابيع متقلقيش ، إدعيلي بس ربنا يصلح حالي ويبسرلي أمورى وبإذن الله أول ما الظروف تتظبط هفتح الفيس وأكلمك بس الله أعلم ده هيكون بعد أد إيه !!

- بدعيلك دايمًا والله من غير ما تقولي

- آخر حاجه بقي يا بطـل ، زي ما كنتي بتبعتيلى كل خطواتك وأنا موجوده ، إفضلي إعملي كده برضو حتى وأنا مش موجوده .. ممكن ؟

- كنت هعمل كده أصلا من غير ما تقولي ، لأن حتى لو إنتي مشيتي روحك هتفضل معايا .. ربنا يسعدك يا أحلي أخت في الدنيا

- إمسحي دموعك يا بت .. هتضربي

وضعت سلمي يدها علي وجنتيها فوجدت دموعها قد أغرفت وجهها بالفعل ، مسحت دموعها متعجبه وكتبت بذهول :

- إنتي عرفتي منين !!؟

- حسيت ((:))

- ربنا يخليكي ليا يارب

- ربنا يقربك منه أكثر ويجمعنا في الفردوس الأعلى اللهم آمين . معلىش بقي هقوم دلوقتي علشان بجهاز شويه حاجات كده ٨٨ أستودعك الله الذي لا تضيع ودائعه

- مع السلامه يا حفصه

ظل إسلام علي هذه الحالة التي لا تتغير ، يستيقظ من النوم لينام مره آخري ، لا يعرف ماذا يفعل ، لا يجد طعم للحياه بدون رفيق دربه ، لا يعرف ماذا يفعل محمد الآن في قبره ، هل هو سعيد أم حزين ؟ هل قبره روضة من رياض الجنه أم حفرة من حفر النار ؟ هل طيبة قلبه وحبه لكل الناس سيكون سببا في دخوله الجنه ؟ ام أن الجنه أعدت لاناس يخافون الله بحق ويعيشون ويموتون علي طاعته ؟

تكاد رأسه تنفجر من كثرة التفكير فيضطر للنوم ليخرج من هذا العالم الملى بالألم إلي عالم آخر لا يشعر فيه بشئ . أما عن والدته فهي لا تتركه أبدا ، تدخل عليه بين الحين والآخر وقلبها يعتصر ألما عليه ولكن ماذا تفعل ؟ فهو لا يريد أن يفعل شيئا سوي النوم .. قررت أن تحاول معه مره آخري وهي تدعو الله أن يستجيب هذه المره ، طرقت الباب طرقات خفيفه فلم يفتح كعادته فدخلت عليه ووجدته مازال مستيقظا وينظر إلي سقف الغرفه كما يفعل كل يوم ، نظرت إليه بحنان وقالت :

- أنت صاحي يا إسلام ؟

نهض من مكانه واعتدل في جلسته وقال بإبتسامه خفيفه :

- اه صاحي

مسحت علي وجهه بحنان وقالت :

- عامل إيه يا حبيبي

أجابها بنفس الإبتسامه :

- الحمد لله

رفعت حاجبها بمكر ونظرت في عينيه بعمق وقالت :

- طيب ومحمد عامل إيه ؟

إزدادت ضربات قلبه عندنا سمع اسم محمد ونظر لها بذهول ولم يتحد ، أعادت عليه السؤال مره آخري وقالت بإصرار :

- بقولك محمد عامل إيه ؟

أجابها بنفس الدهشه :

- عامل إيه إزاي يعني ؟

إبتسمت قائله بتساؤل :

- تفتكر هو عامل إيه دلوقتي ؟

مط شفتاه للأمام وقال بضيق :

- مش عارف !

أمسكت كفيه ووضعتهما بين راحتها وضغطت عليهما بشده وقالت :

- هو ممكن يكون محتاجك دلوقتي يا إسلام .. لو عايز تساعده بجد يبقي حاول تغير من نفسك وتكون الإنسان اللي محمد كان عاوزه

أجابها علي الفور :

- منا روحت لف ...

ثم قطع كلامه فجأه وإبتلع ريقه بأريحيه وقال :

- منا مش عارف أعمل إيه ولا أبدأ منين وكمان مش لاقى حد يساعدي .. أنا فعلا ندمت إني مسمعتش كلامه من الأول ، وخوفت أووي كنت أموت وأنا علي الحاله دي .. كمان خايف يكون دلوقتي بيتعذب ومش لاقى حد يساعده ولا يعمل له حاجه ، كل شويه أتخيل لو كنت أنا اللي موتت كنت هعمل إيه !! مجرد التخيل نفسه مرعب

ربتت علي كتفه وقالت بإبتسامه :

- يمكن كانت غلطتي إني محاولتش أغرس فيكم الدين من وإنتوا صغيرين ، كان كل همي تكونوا مبسوطين ومتفوقين وأفتخر بيكم قدام الناس ، يمكن أنا غلطت يابني بس مش لازم إنت كمان تكرر غلطي ، دور علي الصحبه الصالحه اللي تعينك وشوف طريقك وإمشي فيه صح ، بلاش تبقي عايش كده وخلاص .. أنا لما شوفت خوفك علي صاحبك وإحساسك بالمسئوليه تجاهه قلت لازم أجي أكلمك ولازم إنت كمان تعمل أي حاجه تساعده وتساعد نفسك بيها

نظر لها بسعاده وقال بفخر :

- أول مره أشوفك بتتكلمي كده يا امي

تحسست وجهه بحنان وقالت هامسه :

- لما شوفت موت محمد خفت إنت كمان تضيع مني وربنا ميكونش راضي عنك ، لازم تلحق نفسك يا إسلام محدش ضامن عمره يابني

- طيب أبدأ منين يا أمي ؟ جازي لما أبدأ أحسن من نفسي شويه أحس إنني إرتحت وبدأت أحقق وصيه محمد

عادت للخلف ونظرت إليه بتعجب وكأنها تذكرت شيئاً ما وقالت بتفكير :

- صحيح يا إسلام مش إنت كنت بتقول إن محمد عنده واحد صاحبه كده متدين ؟ ماتشوفه يابني يمكن ياخذ بإيديك

شرد إسلام قليلا وهو يتذكر توبيخ فاروق له ، تذكر أيضا عندما ذهب لمنزل فاروق ولكنه لم يعره أي إهتمام .. إنتشلتته من شروده وهي تكرر كلامها فقال :

- لأ مش هينفع يا أمي .. قوليلي حل تاني

أخذت تفكر لثوان ومن ثم قفزت من مكانها بحماس وقالت :

- أنا إزأااي مجتثش في بالي الفكره دي ، يابني الشباب الكويسين هتلاقيهم مواظبين علي الصلاة في الجامع ، حاول إنت كمان تصلي كل الصلوات في الجامع وبإذن الله أكيبيد هتلاقي الصحبه الصالحه هناك

ثم نظرت إليه بعمق وقالت بصرامه :

- لأ مش حاول ، ده إنت لازم تعمل كده

أعجب إسلام بالفكره وقال بحماس :

- عندك حق .. أكيبيد هلاقي حد زي فاروق هناك

غادرت والدته الغرفه وقد اطمئن قلبه قليلا بعد حواراه معها وأخذ يفكر في خطوته القادمه ولكنه سرعان ما أحس بالملل فذهب لإحضار الحاسب الخاص به ووضع علي الفراش ، فتح حسابه علي موقع الفيس بوك ونظر نظرة سريعة علي قائمه أصدقاءه فوجد ساره متصله الآن ..

وجد نفسه سريعا يغلق الحاسب مره آخري ، لا يعرف لماذا ؟ هل أصبح لا يحبها ؟ أم إنه لا يرغب

في مزيد من الذنوب ؟ والأرجح هو الحل الثاني .. أخذ يفكر قليلا هل سيفتحه مره آخري أم لا ولكن قطع تفكيره صوت طرقات الباب ، ظل ينادي علي والدته وعلي هند عدة مرات لكي تفتح إحداهما الباب ولكنهما لم يسمعانه فقرر أن يذهب ليفتح هو .. فتح بابتهامته المعتاده ولكن سرعان ما تحولت هذه الإبتسامه إلي حاله من الذهول وقال بصوت مختنق :

- محمد!!

رأى محمد أمامه ينظر له بابتسامته المعتاده ووجهه المشرق ، إقترب منه ليرتمي في أحضانه ويعتذر له عن كل ماحدث ، يطلب منه السماح ويعده بأن يكون الشخص الذي تمناه طيله حياته .

إقترب منه أكثر ليلمسه ولكنه لم يجده !! نعم إنه كان يتخيل ، كثرة التفكير في محمد جعلته يتخيل وجوده معه الآن ، جعلته يسمع نفس نقرة الباب التي كان يفعلها محمد ، جعلته يراه بنفس وجهه المشرق الباسم ، جعلته يشعر بروحه الطيبه ، جعلته يتألم ..

نعم يتألم .. فكيف لإنسان أن يكون له صديق مثل هذا ويذهب منه هكذا دون سابق إنذار ، هل من الممكن أن يجد صديقا آخر يحبه كحب محمد له ؟ صديق يحبه أكثر من نفسه ؟ في الغالب لا ، فشخص مثل محمد لا يتكرر كثيرا ..

أغلق الباب خلفه وذهب لغرفته كالعاده ، ولكن هذه المره لن يجلس ويتذكر ذكرياته مع صديق عمره ويتألم ويشعر بالمراره ، لا .. بل سيعمل ..

نعم سيعمل علي نفسه ليصبح أفضل ، سيستثمر هذه الأجازة أفضل استثمار ، لن تكون أجازة مثل باقي الأجازات .. لا .. بل سيخرج منها إسلاما جديدا..

نظر إلي وجهه في المرآه وقال بصرامه :

- حاضر يا محمد ، هكون زي ما إنت عايز بإذن الله

أخذت سلمي تفكر كثيرا في كلمات حفصه ، لا تعرف كيف ستعيش بدونها بعد أن إعتادت عليها ولكنها كانت تتذكر دائما كلماتها الآخيره :

"معاكي قرآنك ودعائك يا سلمي فاهماني ؟ معاكي سلاحك يا سلمي اوعي تتخلي عنه "

وأخذت تردد :

- معايا سلاحي صح ، اللي معاه ربنا مش هيحتاج مساعده من حد

ثم نظرت لنفسها في المرآه وقالت بقوه :

- إنتي قويه يا سلمي وهتقدري علي نفسك ، هتواجهي الناس كلها ومش هيهمك كلام حد طالما اللي بتعمليه ده يرضي ربنا ، انتي اللي هتتحاسبي لوحدك يا سلمي ومحدث هينفعك ، فوقي كده وواصلني طريقك بنفسك ، انتي قويه وهتعملها بإذن الله

ثم نظرت إلي الارض وقالت هامسه :

- بس كل شويه يتريقوا والموضوع كده بقي متعب أوي

رفعت رأسها مره آخري وقالت بحماس :

- مايهمنيش ، أنا اللي صح وهما اللي غلط ، يبقي المفروض مين يتكسف من مين بقي !!؟

نظرت للسماء وقالت برجاء :

- يارب قدرني علي مواجهتهم ، يارب ثبتني علي طاعتك ، يارب قربني منك أكثر وإرضي عني وإجعلني من أهل الجنه وأحشرني مع الأنبياء والصحابه يارب  
ثم نظرت للمرآه مره آخري وحدثت نفسها مبتسمه :

- كده بقي يا ست سلمي عملنا الآتي :

- بطلنا مسلسلات وأفلام
- بدلنا الأغاني وخليناها أناشيد
- بطلنا نكلم أولاد إلا للضرورة
- واظبنا علي الصلاة في البيت وبر البيت
- بطلنا البنطلونات اليع دي !
- بطلنا ننشر صور بنات ع النت

اممم أعتقد بقي الخطوه الجايه المفروض أطول الطرحه شويتين تلاته خمسه كده ، وكمان أبطل أسلم علي رجاله ، هيببيح بقي ، يارب قدرني ومحدث يكسفي وخصوصا في حكاية السلام دي

وفي وسط ما كانت سلمي غارقه في أحلامها وطموحاتها ، إذ تدخل عليها ولاء متسائله :

- سلمي هو أنا ممكن أسألك سؤال ؟

نظرت لها سلمي بإبتسامتها المعتاده وقالت :

- قول ياعم أبو عصام

تنحنت ولاء بحرج وقالت :

- مش هتزعلي يعني !؟

زفرت سلمي بقوه وقالت :

- يا بنتي إخلصي ، منا عارفه انك هتقولني حاجه رخمه كالعادة

ضحكت ولاء بإستفزاز وقالت :

- هو إنتي لسعتي !؟

أطلقت سلمي ضحكة عاليه وقالت بتعجب :

- إشمعني ؟

- أنا متابعه الحوار العجيب اللي إنتي عملتيه مع المراهيه ده ، حاسه إنك من ساعة ما عرفتي حفصه دي وإنتي لاسعه شويتين كده ، ما تقوليلي إيه الموضوع يمكن أقدر أقدم أي مساعده

شعرت سلمي بالحرج وضربت أختها علي كتفها قائله بضيق :

- يابويا علي الرخامه بتاعتك ، مش تقولي من بدري إنك سامعه يا بنتي !! عادي يعني إيه المشكله لما الواحد يكلم نفسه شويه ويرتب أفكاره ؟ حرام ولا إيه ؟

- لا مش حرام ولا حاجه ، براحتك

عقدت ذراعيها أمام صدرها ورفعت حاجبها قائله :

- طيب لما هو براحتي يبقي لما تلاقيني بكلم نفسي شويه سيبيتي لوحدني علشان أرتب دماغي وأفكاري ، مش كل شويه تنطيلي كده وتقعدي تسأليني علي اللي بفكر فيه

زفرت ولاء بضيق وقالت بعصبيه :

- وهي دي مش أوضتي أنا كمان ولا إيه !؟

أومات برأسها إيجابا وإبتسمت موضحة :

- عارفه إنها إوضتك إنتي كمان ، بس لازم يا ولاء تحترمي حرיתי ، لازم تكوني عارفه إنني ليا مساحتي الخاصة ومش بحب حد يتدخل فيها

وفعت ولاء حاجبها وقالت بعدم فهم :

- يعني إيه ؟ مش فاهمه حاجه !!

ربتت علي كتفها بحنان وقالت :

- بصي يا ولاء ، كل إنسان فينا بيكون ساعات محتاج يقعد مع نفسه من غير دوشه ، محتاج يفكر كتير في حياته ويرتبها صح ، محتاج من وقت للتاني يظبط دماغه ويظبط أولوياته ، علشان كده ما ينفعش كل ما تشوفيني سرحانه مثلا أو بفكر الأفيكي جايه تعترضني وتتريني علي تفكيري ده ..

ثم اردفت قائله :

- أنا من حقي أعمل أي حاجه في الدنيا طالما مش بغضب ربنا ، ومحدث من حقه يمنعي أو يتريق علي تصرفاتي دي ، فاهماني ؟

عقدت ولاء ذراعيها أمام صدرها ورفعت حاجبها للأعلي وقالت بضيق :

- أومال إشمعني بقي كل شويه تقولي ما تعملش كذا علشان حرام ، عيب ، ميصحش !!؟ مش إنتي بتقولي كل واحد حر في تصرفاته

ضحكت رغما عنها وقالت :

- هتفضلني طفله وعنديه كده لحد إمتي يا ولاء ؟ كملني الكلام للآخر يا بنتي ، كل واحد حر في تصرفاته طالما مش بيغضب ربنا ، لكن لما أشوفك بتعملي حاجه حرام ما ينفعش أسكت عليها .. تمام يا باشا ؟

أومات برأسها إيجابا وتركتها وغادرت كعادتها ..

---

بدأ إسلام في تنفيذ الخطه ، يذهب إلي المسجد محاولا البحث عن الصحبه الصالحه ويعود مره أخرى بلا فائده ، مر حوالي شهر وهو علي هذه الحاله ، لم يشعر بالراحه التي كان يتوقعها !!



هل الخطأ منه أم من الظروف ، ظل يدور في غرفته لبعض الوقت محاولاً التفكير ثم نهض فجأة  
وذهب لغرفة هند وطرق الباب بمرح وقال :

- بت يا هند إفتحي الباب

إتسعت عيناه هند من الدهشه وهرولت باتجاه باب غرفتها وقامت بفتحه علي الفور وقالت بسعاده :

- أخبييرا يا إسلام بدأت ترجع لطبيعتك ، من زمان اووي مشوفتكش بتقولي كده

أخذ ينظر لها بضع لحظات ثم جذبها من يدها وأجلسها بجواره علي الفراش وقال بإبتسامه خفيفه :

- بحاول والله يا هند بس مش قادر ، حاسس إن حياتي ملهاش معني ، حتي التجربه اللي بدأت فيها  
باين عليها فشلت ! قولت أجي أتكلم معاكي شويه يمكن أرتاح

تنهدت بأريحيه وقالت بحنان :

- ياه يا إسلام أخبييرا ، منا ياما حاولت معاك إنك تفضفضلي بس إنت مكنتش بتوافق ، هاه قولي  
يا سيدي إيه الخطه اللي كنت بتقول عليها دي ؟ وليه فشلت ؟  
إنتف لها بكامل جسده وقال بجديه :

- كنت يا ستي قررت كده خير اللهم أجعله خير يعني إني أبطل استهتار شويه وأعيش حياتي صح  
علشان أحقق حلم محمد اللي كان طول عمره بيحلم بيه وأنا مكنتش بواقفه ساعتها ، يمكن عرفت  
غلطي بس متأخر شويه ! علشان كده بقي قولت أكيد هلاقي الصحبه الصالحه في المسجد وكنت فاك  
الموضوع سهل كده ، ويقالي حوالي شهر أهو مواظب علي الصلاة في الجامع بس للأسف ملقيتش  
الصحبه الصالحه برضو .. عارفه ليه ؟

نظرت له متلفه وقالت :

- ليه !!؟

نظر لها والحزن يملأ وجهه وقال بصوت منخفض :

- لأن تقريبا كل اللي كنت بشوفهم هناك رجاله كبار وبصراحه كنت بتكسف أروح أتكلم معاها ، كنت  
متوقع إني إلاقي شباب في سني كتير هناك بس للأسف شوفت غير كده خالص ، معقوله يعني  
الشارع كله مفيهوش شاب مواظب علي الصلاة في الجامع !!؟

ابتسمت هند قائله :

- طيب ما إنت زيهم يا إسلام ، مستغرب ليه بقي؟!  
شعر بالحرص من كلماتها وقال هامسا :

- عندك حق ، بس خلاص أنا واطببت علي الصلاة في الجامع أهو وپرضو مش حاسس بحاجه ،  
يعني مش حاسس بطعم الصلاة ومش حاسس إني بدأت أقرب من ربنا شويه ولا أي حاجه ، عامل  
زي الآله بروح وباجي وخلاص ، مش عارف ليه?!  
ربتت علي كفه بخفه ونظرت له للحظات ثم إبتسمت قائله :

- بص يا إسلام ، لو إنت قررت تتغير علشان عاوز تبقي زي ما محمد بيتمني وخلاص يبقي عمرك  
ما هتحس بحلاوة القرب من ربنا ، أما بقي لو عاوز تتغير علشان ترضي ربنا بجد وعلشان نفسك  
وروحك تكون متعلقه بالله وكده ، ساعتها بس هتحس بحلاوه الإيمان .. يعني إنت بتتغير علشان  
نفسك أولا وأخيرا .. فاهمني ؟

إبتسم لها بسعاده وقال مازحا :

- إيه الكلام الكبير ده ياعم ، والله الواحد عمال يكتشف حاجات غريبه في البيت ده ، زي ما أكون  
مكنتش عايش معاكم قبل كده !

ثم أردف قائلا :

-تفتكري يا هند هو ده الحل فعلا ؟

نظرت له بثقه وأومات برأسها إيجابا فنظر لها بفرحه كالأطفال وقال :

- طيب هتساعديني ؟

جلست تفكر للحظات ثم قالت بتردد :

- بص انا هشجعك ، لكن ما أوعدكش اني هعمل زيك

نظر لها بلوم وقال بحزن :

- ليه ؟

- معلىش يا إسلام خليني علي راحتى ، أنا هحاول بإذن الله أعمل كل اللي أقدر عليه معاك علشان

ترتاح وترجع زي زمان ، لكن أنا حابه نفسي كده

- ماشي يا هنود براحتك ، وبإذن الله هرجع أفضل من الاول

ظهرت نتيجة إمتحانات نهاية العام ، كانت الفرحة تعم بعض المنازل بينما الحزن والبكاء يعم البقيه ولكن بفضل الله إستطاع أبطالنا الفرار بنفسهم من عام دراسي إلي عام دراسي آخر

حصلت سلمي وهند علي تقدير : جيد  
بينما حصلت فاطمه علي تقدير : مقبول

كان من المعتاد حصول إسلام ومحمد علي تقدير جيد جدا ككل عام ، ولكن في هذا العام حصل إسلام علي تقدير جيد فقط بينما حصل فاروق علي تقدير جيد جدا أيضا أما عن ولاء فهي تستعد الآن لإستقبال سنه " الربع " في وجهة نظر الطلاب والتي يطلق عليها ثانوية عامه

صعد إسلام للفرقه الرابعه بكلية الهندسه ، بينما صعدت كل من سلمي وفاطمه وهند للفرقه الثالثه .

بدأ إسلام يعيد ترتيب أفكاره ويفكر في كل ما قالته هند ، نعم إنها محقه ، فهو يجب أن يتغير لنفسه وليس لأحد آخر ، أخذ قراره بأن يذهب للصلاة بقلبه ، يحاول إستشعار أنه يريد أن يذهب للمسجد لكي يقابل ربه ، لكي يجلس في هذا المكان المريح للنفس خمس مرات في اليوم الواحد ، لكي يقترب من الله أكثر ويعرف عن دينه أكثر ، كان عندما يعلم أن هناك درسا بعد الصلاة ينتظر ليسمعه ، كان يشعر بإشراح قلبه وشعر أخيرا بلذة سماع كلام الله ومعرفة دينه .

أصبح كالمدمن للصلاة في المسجد ، لم يعد يترك صلاة واحده حتي صلاة الفجر التي كان يتركها دائما أصبح الآن يصلّيها بالمسجد دوما ، لم يكن يعرف ماهي الخطوه القادمه ولكن كل ما حرص عليه هو المواظبه علي الصلاة في المسجد فقط .

وفي يوم من الأيام جلس بعد صلاة المغرب لسماع درس المغرب ، كان عن فضل القرآن الكريم وفي وسط الكلام قال الإمام هذه الآيه التي فسرت لإسلام كل شئ :

"( وَمَنْ أَعْرَضَ عَن ذِكْرِي فَإِنَّ لَهُ مَعِيشَةً ضَنْكًا )"

هتف لنفسه قائلا :

- اااه علشان كده بقي ، مش لاقى حياتي ولا لاقى نفسي لاني بعيد عن ذكر الله ، فين القرآن اللي المفروض أكون حافظه أو علي الأقل فاهمه وبعمل بيه ، فين لساني اللي دايم بيردد الأذكار

والإستغفار والصلاة علي النبي ، إزاي زعلان إني مش حاسس بحاجه وهو التقصير مني أنا أصلا .

تنهد تنهيده قويه ونظر للفراغ نظره حاده وقال بثقه :  
- بس الوضع ده مش هيستمر كتير ، انا لازم ألاقي نفسي

عاد إلي منزله مهرولا ودخل غرفته ، فتح مصحفه الذي لم يُفتح منذ زمن ، بدأ يقرأ فيه ولكن هذه المره يقرأ بقلبه بدلا من لسانه ..

كان يقرأ ببطء شديد ، لم يهتم بعدد الصفحات ولكن إهتمامه كان بعدد الآيات التي تقشعر لها بدنه ، ظل يقرأ بهدوء ويحاول فهم وإستشعار معني كل آيه ، لم يترك آيه واحده إلا عندما ينظر لتفسيرها ويفهمها جيدا .

إنتهي من القراءة فوجد نفسه قد قرأ ثلاث صفحات فقط ولكنه كان سعيدا للغايه لإستشعاره بكلمات القرآن تمس قلبه ، إستلقي علي الفراش وأخذ المصحف ووضع فوق صدره وضمه بقوه وأغمض عينيه وذهب في النوم .

كان يوم الجمعه يوم التجمع العائلي في منزل سلمي وذلك لأن والدها أكبر إخوته ، وجدته سلمي اليوم المناسب لتنفيذ خطتها ..

كان من المعتاد أن يجلس والد سلمي وإخوته في صالة المنزل بينما يجلس الأولاد مع بعضهما البعض في الغرفه المفتوحه علي الصاله ..

في السابق كانت سلمي تمزح وتمرح معهم بشده لأنهم بمثابة إخوه وإخوات لها ، ولكنها حاولت بقدر الإمكان التقليل من هذا المرح المفرط لعلمها بأنهم أجنب عنها وحكمهم كحكم أي راجل آخر

إنتظرت سلمي في غرفتها حتي دخلوا جميعا وجلسوا بإعتبار أنها مازالت ترتدي ملابسها ، خرجت وألقت التحيه علي والدها وإخوته ومن ثم ذهبت ووقفت علي حافة باب الغرفه التي يجلس فيها الأولاد قائله بإبتسامتها المعتاده :

- ازيكم يا جماعه عاملين إيه ؟

ردد الجميع التحيه بينما إختارت هي أقرب كرسي للباب وجلست عليه ، نظرت لها إبنه عمها بتعجب وهتفت قائله :

- إيه يا بنتي مش تسلمي ؟

أحست سلمى بالإحراج ولكنها سرعان ما وجدت حلا للموقف فقالت بمرح :

- يعني أسلم دلوقتي ولا أروح أجيب العصير ؟ العصير أهم طبعاً

ثم قفزت من مكانها وذهبت مسرعة إلى المطبخ ، تنفست الصعداء فقد تم تنفيذ الخطه بنجاح ولم تصافح أي شاب باليد كما كانت تفعل في السابق ، أحضرت أكواب العصير وقامت بتقديمها وجلست وقد شعرت بالراحة الشديده ، ولكن هذه الراحة لم تدم طويلا ، فقد رن جرس الباب ونادي عليها والدها لتفتح الباب ، نهضت وهي تلقي نظره سريعه علي الحضور فتذكرت أن ياسر ابن عمها لم يأتي بعد فأحست بالإختناق وقالت لنفسها بتوتر :

- يادي النيله ، طب وأنا أعمل إيه دلوقتي بقي !!؟

أخذت تمشي كالنمله لتحاول التفكير بقدر المستطاع في كيفية الخروج من هذا الموقف ، فتحت الباب وبالفعل كان ياسر الطارق ، مد يده ليصافحها قائلا بإبتسامه خفيفه :

- إزيك يا سلمى

أحست بالتوتر الشديد ولم تكن تعرف ماذا تفعل فخرجت منها الجملة بكل براءة :

- إيدي مش بتسلم !

قطب حاجبيه وفتح فمه ونظر لها متعجبا وقال :

- إيه ؟

تحنحت قائله بإحراج :

- إيدي مش بتسلم علي رجالة ، إحم قصدي يعني بطلت أسلم علي رجاله

وقبل أن يستطيع الرد عليها كانت قد إختفت من أمامه ، عبر الممر ودخل إلي الصالة وهو يضحك فسألة الجميع عن السبب فأجاب قائلا :

- سلمى مرضيتش تسلم عليا وبتقولي إيدي مش بتسلم علي رجالة !!

أطلق الجميع ضحكات عاليه إخرقت أذن سلمى وهي في غرفتها ، تحسست وجهها وإذا به ساخن جدا وتتساقط منه حبات العرق ، جلست علي طرف الفراش وهي تقول بتوتر :

- طب وانا اخرج إزاي دلوقتي بقي !!؟

ثم نظرت للمرآه وقالت بحسم :

- خلاص مش طالعه ، مش مهم النهارده بقي

وقبل أن تكمل قرارها نادي عليها والدها مره آخري قائلا بصوت مرتفع :

- ياسلمي ، تعالي هاتي عصير لابن عمك

كادت أن تصرخ من كثرة الإحراج فقالت لنفسها بضيق :

- يعني لازم انا يا بابا ، ما تخلي ولاء تجيب طيب

ثم تنهدت قائله :

- أمري لله هطلع لما نشوف آخرتها .

خرجت من غرفتها متوجهه إلي المطبخ ، أحضرت كوب العصير وذهبت به إلي ابن عمها وقدمته إليه وهي تنظر للأرض بحرج وقبل أن تغادر المكان لتعود إلي الكرسي الخاص بها قال ياسر بطيبه :

- بس إنتي جدعه علي فكره

تعجبت سلمي ولكنها نظرت له بإبتسامه ولم تتحدث فأردف قائلا :

- إعملي اللي إنتي مقتنعه بيه بس واوعي يهملك أي حد

ثم نظر للجميع وقال ضاحكا :

- عارفين اللي هيفكر يسلم عليها تاني هقطعه إيده

كادت أن يغشي عليها من الإحراج ولكنها كانت في غاية السعاده ، فياسر قد ساعدها كثيرا في قرارها وسهل عليها الأمر بشده ، هذا الموقف جعلها تتحمس أكثر لتفعل المزيد فخرجت لوالدها واخوته ووقفت أمامهم قائله بسعاده :

- ممكن تيجوا تقعدوا معانا بقي ؟ يعني مش معقول كده كل مره نقعد لوحدها ومنشبعش منكم

ثم نظرت لعمها قائله بحنان :

- ولا إيه يا عمو ؟

تبسم عمها قائلا :

- عندك حق والله يا بنتي ، بس تعالوا انتوا بقي علشان هنا المكان اوسع

كادت أن تقفز من مكانها لولا خوفها من أن يراها احد ، فقد نجحت هذه الخطة أيضا ، دخلت وأخبرت الأولاد ورحبوا جميعا بالفكره وخرجوا للجلوس مع الكبار لكي تجتمع العائله كلها في مكان واحد ♥

في المساء جلس إسلام أمام كتاب سيرة الرسول للشيخ محمود المصري الذي أحضرة عقب صلاة الجمعة مباشرة ، نظر إليه بسعاده فأخيرا سوف يعرف أكثر عن نبيه ، فتح الصفحة الاولي وبدأ يقرأ فيها حتي وصل للصفحة العاشره ، تركه وذهب إلي المطبخ ليحضر زجاجة المياه ويعود مره أخرى ليكمل القراءة ولكن أثناء عودته سمع طرقات الباب ، لم يهتم في البدايه وأحس أنه يتخيل كالمراه السابقه ولكنه سمعها مره أخرى مما جعله يذهب ليفتح الباب .

فتح الباب بابتسامته المعتاده ولكن عيناه إتسعت بشده عندنا رأي الطارق !!

فقط رأي فاروق واقفا يبتسم له بحنان ويمد ذراعيه له ، تعجب من المنظر فلم يتحرك ولكنه سرعان ما شعر بفاروق وهو يجذبه نحوه ويأخذه في حضنه ويقول بإحراج :

- أنا أسف ، والله ما كان قصدي .. بس شكل محمد وهو بيموت قدام عيني كان صعب اووي ومقدرتش ألاقي حد أطلع فيه اللي جوايا غيرك

ثم ضمه بقوه أكبر وقال :

- عارف إني مكانش المفروض أعمل كده .. وبجد قلبي وجعني أووي لما لقيتك جيلي البيت وأنا مشيتك زعلان كده بس مكنتش قادر أسامحك ، ودلوقتي أنا جيت أعتذر اهو وأصلح غلطي فهل هتقبل إعتذاري ؟

شعر إسلام بالسعاده تغمر قلبه فنظر لفاروق قائلا بمرح :

- طيب إبعد كده يا عم ، حد يشوفنا ويفهمنا غلط

ارتفعت ضحكة فاروق وقال بسعاده :

- يعني سامحتني صح ؟

ربت إسلام علي كتفه قائلا بابتسامه :

- سامحتك طبعاً ، أنا تقريبا مكنتش عايش الفترة اللي فاتت دي ومكنش عندي فرصه أصلاً إني أزعل منك لأن قلبي كان واجعني علي محمد ، بس من كام يوم كده بدأت أقرب من ربنا والحمد لله قلبي بدأ يرتاح ، وأديك دلوقتي جيت أهو وفرحتني زياده

ظهرت ملامح السعاده والبهجه علي وجه فاروق وهم أن يضم إسلام مره آخري ولكنه سرعان ما وجد إسلام يبتعد ويقول مازحاً :

- خلاص يا عم إنت مصدقت ، قولنا عيب الله

أحس فاروق براحة الضمير أخيراً وأن الهدف من الزياره قد إنتهي بنجاح فقال لإسلام بابتسامه :

- طيب يا إسلام انا همشي دلوقتي بقي ، هنتقابل تاني كتير بإذن الله ومعلش لو جيت في وقت متأخر ولا حاجه بس مكانش ينفع أنام النهارده غير لما أصالحك

تبسم إسلام وصافحه وودعه ومن ثم دخل إلي غرفته وأغلق الباب خلفه وهو يتنهد بإريحيه ويقول :

- اللهم لك الحمد ، يارب ريح قلبي كمان وكمان

ثم أمسك كتاب سيرة الرسول مره آخري وشرع في القراءة

في اليوم التالي إتصل إسلام بفاروق وطلب منه لقاءه ليحدثه في أمر هام ، وبالفعل تقابلا وصافح كلا منهما الآخر وبدأ إسلام في الموضوع مباشرة وقال :

- بص يا سيدي كان في واحد أعرفه عنده مشكله كده وكنت عايز أخذ رأيك فيها علشان هو محتار

- تحت أمرك

حاول إسلام التحكم في تعبيرات وجهه كي لا يفهم فاروق وقال مبتسماً :



- هو عرف بنت من علي الننت وإتكلم معاها فتره كده والموضوع إتطور لحب وبعدين شوية تجاوزات كده في الكلام ، يعني مش كتير اوي بس هو برضو مش مرتاح ، هو طبعا ناوي يتجاوزها بس لما يتخرج ويشتغل ، هو كده عادي ولا إيه ؟

- إنت متأكد إنه بيحبها يعني زي ما بتقول ؟ يعني لو بعد عنها فتره كبيره مش هيقدر ؟ ولا هيكون مرتاح أكثر ؟

تردد إسلام قليلا ثم قال :

- بص هو حصل معاها ظروف كده ومبقاش يكلمها كتير وكان عايش عادي يعني ، بس هو برضو حاسس إنه بيحبها

تيقن فاروق ان إسلام هو صاحب المشكله ولكنه لم يرد ان يخرجه فأكمل قائلا :

- بص يا سيدي مبدأيا كده لا يجوز إنه يتكلم معاها لأن ربنا أكيد مش هيكون راضي عن كلامهم ده لانهم أجنب عن بعض ، كمان أعتقد إن هو مش بيحبها ولا حاجه زي ما إنت بتقول

أجاب إسلام بسرعه رهيبه :

- لا والله هو مش بيلعب بيها ، هو بيحبها فعلا

حاول فاروق كتم ضحكاته بداخله وأخيرا استطاع بعد عناء وأكمل بهدوء :

- بص يا إسلام ، هو ممكن الإحساس اللي حاسس بيه ده مجرد فرحه بالإهتمام أو الكلمتين الحلوين اللي بيتقالوا أو حاله الرومانسيه اللي بيعيشها او كده ، لكن حب بجد معتقدش ، لأن اللي بيحب حد بجد بيحافظ عليه من نفسه أصلا

ثم تنهد بسعاده وقال :

- يعني عندك أنا مثلا ب..

قاطعته إسلام بسرعه وقال بذهول :

-إنت إيه ؟ معقوله تكون بتحب والكلام ده !!؟

قفزت السعاده علي وجه فاروق عندما تذكرها وحاول إخفاؤها ولكنه لم يستطع فقال بسعاده :

- بص هو أنا مش عارف اللي أنا حاسس بيه ده حب ولا لا ، لكن كل اللي أقدر أقولهوك إنني مش متخيل مراتي تكون واحده غيرها ومستني بفارغ الصبر اليوم اللي أخرج فيه وأشتغل علشان أروح اتقدملها

ظل إسلام ينظر لفاروق وهو يتحدث بخجل هكذا حتي إنتهي فقال بمرح :

- زيدي يا زيدي ، إيه ياعم مانت طلعت رومانسي أهو ، أمال عمال تقولي حرام ولايجوز ليه؟!!!

أطلق فاروق ضحكة عالية وقال :

- ياعم طيب إستني بس لما أكمل كلامي ، بص يا سيدي ، انا اه بتمناها بقالي كتير اوووي تكون من نصيبي بس والله عمري ما حسستها بحاجه ولا حاولت ألفت انتباهها بأي شكل من الأشكال ، كمان لو شوفتها بالصدفه دايمًا بغض بصري عنها علشان أحافظ عليها من نفسي .. يعني بحاول دايمًا أتقي الله فيها ومعملش أي ذنب يخلي ربنا يغضب عليا ..

أقولك الصراحه ؟ هو أصلا المفروض الواحد ميعلقش قلبه بحد ويدعي بس ربنا دايمًا يرزقه بالزوجه الصالحه وألا يعلق قلبه بأحد سوي الله ، وأنا فعلا حاولت كتير بس معرفتش ، فقولت بقي خلاص أجد خطوه إيجابيه وأحاول أجتهد في دراستي علشان أجيب تقدير وأشتغل بسرعه وبعدها أروح اتقدملها ، بس يا سيدي دي كل الحكاية

كان إسلام ينظر لفاروق وهو يتحدث وكأنه يراه لأول مره ، كانت السعاده تقفز من وجهه وتحيط بكل ماحوله فلم يستطع الصبر أكثر من ذلك فسأل بشغف :

- طيب وهي عارفه ؟

إنتفض فاروق من مكانه ونظر له بخوف وقال :

- لأ طبعًا يابني متعرفش ، منا قولتلك بحافظ عليها من نفسي وبتقي ربنا فيها حتي من قبل ما تكون من نصيبي ، يعني مستحيل أصلا أحاول ألفت إنتباهها ليا

نظر له إسلام متعجبًا وقال :

- طيب ماهي لازم تعرف علشان تستناك ؟ أو علي الأقل علشان تعرف هي بتبادللك نفس الشعور ده ولا لا .. صح ولا إيه ؟

قال فاروق بثقه :

- لأ غلط طبعًا ، لأن قلوبنا بين إيدين ربنا يقلبها كيف يشاء ، يعني أنا دلوقتي هتقي ربنا فيها

وأعمل كل اللي أقدر عليه علشان أوصلها بالحلال وساعتها أنا متأكد إن ربنا مش هيخذني

نظر له إسلام باعجاب وقال متلهفا :

- إنت بتقول إنك ساعات بتشوفها بس بتغض بصرك ، يعني علي كده ممكن أكون أنا كمان أعرفها صح ؟

أوما برأسه إيجابا وقال :

- إنت فعلا تعرفها ، بس من بعيد شويه

قال بلهفه أكبر :

- طب هي مين بقي هاه هاه هاه ؟

ضربه علي كتفه بخفه وقال بمرح :

- وإنت مالك ياعم ، أما حشري صحيح ، وبعدين هو إنت سيبت موضوع صاحبك ومسكت فيا أنا !!؟

أطلق إسلام ضحكة عاليه وقال :

- اه صحيح والله نسيت ، طيب يعني أقول لصاحب المشكله ده يعمل إيه ؟

نظر له بجديه وقال :

- بص يا سيدي هو هياخد قرار إنه مش هيكلها تاني أبدا علشان رضا ربنا ، ويفتكر دايمًا إن " من ترك شيئًا لله عوضه الله خيرا منه " يعني هو يتركها لله ولو فعلا ليه نصيب فيها هيقدر يوصلها في الحلال بإذن الله ، ولو مش هي دي مراته اللي مكتوباله بيبقي وفر علي نفسه الذنوب اللي كان هياخذها بدون سبب

نظر له إسلام بحيره وقال :

- طيب ماهي كده هتقول عليه كداب وبيضحك عليها !!

ربت علي كتفه وقال بإبتسامه :

- صحيح ممكن ده يحصل ، بس هو لازم يحط في دماغه إن رضا ربنا أهم من أي حاجه ، وكمان والله بعد ما يبطل يكلمها هيحس براحه كبيره ويمكن ساعتها كمان يعرف إنه ولا كان بيحبها ولا حاجه ، هو بس كان عاجبه الجو والإهتمام وخلص ، عموما قوله يجرب ويدعي ربنا يقويه ويقدره

علي إجتياز الموضوع ده بسلام

تنهد إسلام بحيره وقال :

- ماشي هقوله

عاد إسلام إلي المنزل وهو يفكر في كلمات فاروق ، أعجب كثيرا بعفه فاروق وفكرة حفاظه علي هذه الفتاة حتي من نفسه ، لقد علم الطريق الذي يجب أن يسير فيه وبدأ بالتنفيذ ، ترك الموضوع لله وبدأ هو في إعداد نفسه لكي يكون رجلا بحق ويستحقها ، لم يرد أن يغضب الله لأن رضا الله عنده أهم من أي شئ آخر ولأنه يعلم أيضا أن قلبها بيد الله ومحال أن يحصل علي قلبها بعدما أغضب الله.

لقد خاف عليها حتي من " نظره " أو " كلمة " وكان علي يقين بأن الله لن يخذله أبدا .

أخذ إسلام يقارن حاله بحال فاروق ، وجد انه أخطأ تماما عندنا قبل بالتحدث مع فتاة أجنبية عنه بحجة الحب أو الزواج ، فأى حب أو زواج هذا الذي يأتي من الانترنت؟! وهل يظهر الإنسان علي حقيقته علي الانترنت حتي يستطيع كل منهما معرفة الآخر بدقه؟!!

أخذ قرارة بأن يحاول حل هذه المشكله في أقرب وقت ممكن ، ولكن لماذا في أقرب وقت؟! سوف يبدأ من الآن ، إنتظر الوقت الذي يعرف أنها معتاده علي الجلوس فيه وفتح حاسبه وقام بالدخول علي موقع الفيس بوك ، تنهد بعمق عندما وجدها موجوده بالفعل ، جلس يفكر بضع دقائق ومن ثم حسم أمره وقرر خوض المعركه . أرسل لها قائلا :

- إزيك يا ساره ؟

أجابته بفرحه :

- إسلام ازيك ؟ انا الحمد لله تمام جدا ، أخيرا بقي فكرت تكلمني

إبتلع ريقه وتردد كثيرا ، هل يكمل ام لا ولكن حسم أمره وكتب بجديه :

- الحمد لله

ثم سكت قليلا وكتب :

- سارة كنت عايز أقولك علي موضوع مهم ، هل هتسمعييني ؟ ومش عايزك تفهميني غلط أرجوكي

شعرت بالتوتر والقلق فأجابت مسرعه :

- قول

حاول تجميع أفكاره وترتيب كلماته في رأسه قبل إلقائها عليها ، تنهد بعمق وكتب :  
- بصي إحنا مش هينفع نكمل مع بعض ..

إتسعت عينها بشده وكتبت بغضب :

- لا والله !!! هاه وإيه كمان !!!

أبتلع ريقه وتحسس حرارة وجهه الساخن و كتب بتوتر :

- إستني هفهمك ، أنا عرفت إن كلامنا مع بعض لا يجوز وإن إحنا ماينفعش نفضل نتكلم أكثر من كده إلا لما يكون بيننا إرتباط شرعي ، فأنا قولت أقولك نبطل نتكلم مع بعض خالص دلوقتي لحد ما أخرج بإذن الله وأجي اتقدملك ، إيه رأيك ؟

زفرت بضيق وكادت أن تحطم الهاتف وكتبت :

- تصدق فكره حلوه ، بجد والله ، تقعد تقولي حرام ومش حرام ومعرفش إيه وبعدين تخلع !

قطب حاجبيه ونظر للشاشه بغضب وكتب :

- أخلع !!؟ هو ده اللي إنتي تعرفيه عني ؟

- وإنت بقي عايزني أصدق الكلام الفارغ بتاعك ده !!؟ ليه يابني شايفني عبيطه !!

نظر للشاشه بذهول وكتب :

- ساره مالك ؟ أنا اول مره أشوفك بتتكلمي كده !! أنا بقولك اللي فكرت فيه وبشوف رأيك إيه ؟

- رأيي !!؟ ااه وماله ، شكلك عينك زاغت علي واحده تانيه بعد ما زهقت مني ، بس تصدق فكره حلوه برضو وممكن حد يقتنع بيها

زفر بضيق وكاد أن يحطم حاسبه هو الآخر وأكمل :

- إيه اللي إنتي بتقوليه ده !!؟ واحده تانيه إيه وبتاع إيه ؟ يعني هيكون صاحبي لسه ميت وأنا أروح

أتعرف علي بنات كمان؟! إنتي بتتهرجي صح!! وبعدين إنتي أصلا أول بنت أكلمها وطبعاً مش بلعب بيكي

- وهو إنت فاكِر إني مصدقه حكاية صاحبك اللي مات ده كمان ، أنا مبقيتش بصدق أي حد أصلا  
شعر إسلام بأن دمانه تغلي بداخله وأن عقله سوف ينفجر من كثرة الغضب فضغط بشده علي لوحة المفاتيح وكتب :

- ياسلام!! وهو انا هكذب عليكِ ليه بقي إن شاء الله؟ منا لو عايز أخلع زي ما بتقولي كان ممكن أقولك أي حجة عبيطه ، مكونتش هموت صاحبي يعني!!

- لا ماهو ده الذكاء بقي ، علشان تبقي الحجة متقنه

أخذ يحرك رأسه يمينا ويسارا غير مصدقا لمايري ، من هذه؟ هل هذه هي الفتاة التي كان يحدثها لشهور؟ ولكن لماذا لم يكتشف هذا الجزء السيئ من شخصيتها ، لماذا لم يعرف من قبل أنها تعاني من قلة بل عدم الثقة في أي إنسان؟! هل لأنه كان دائما يمزح ويمرح معها ولم يحاول نقاشها أو اغضابها ذات مرة أم ماذا؟ حاول تهدئه نفسه كي يصلح مايمكن إصلاحه وقال بهدوء :

- يعني إنتي مقتنعه إني كذاب صح؟ طيب بصي ممكن تشوفيلي أي طريقه أثبتك بيها إني فعلا مش بضحك عليكِ وبرضو مغضبش ربنا؟ قولي أي حاجه وانا هعملها

ضغطت علي إسانها بشده حتي كادت أن تحطمها وكتبت بغضب :

- تصدق أنا المفروض أسفقلك ، بجد والله ، عندك طريقه للإقناع رهيبه ، بس خلاص مبقاش ينفع ، كلكم طلعتوا شبه بعض وخساره فيكم الوقت اللي ضيعته معاكم وقلبي اللي إتجرح كذا مره

لم يستطع إستيعاب ما قيل فكتب متسائلا :

- كلكم؟ قلبك إتجرح كذا مره؟ أنا مش فاهم حاجه

- مش مهم تفهم ، يلا يا أستاذ روح شوف حالك ، وأدي البلوك المتين علشان ترتاح خالص

وقبل أن يستطع الرد كانت قد حضرته بالفعل ، ظل يفكر في كل ماحدث ويتساءل ، هل هو ظلمها بالفعل أم هي ظلمت نفسها؟ من علي حق ومن علي باطل؟ عن ماذا تتحدث ومن الذي جرح قلبها أكثر من مره؟ كيف له ألا يعرف كل هذا عنها؟ كيف بعد محادثات دامت أكثر من ستة أشهر وجد نفسه لم يعرف عنها شئ قط؟ كل ما يعرفه عنها تلك الفتاة المرحه التي تعيش وسط عائله من أكبر عائلات المجتمع ولا تحمل للدنيا هما ، تمرح وتضحك وتتحدث الكثير من الكلمات الرومانسيه

وتقرأ الكثير من الكتب فقط .

ظل يتساءل .. من هذه التي كان يحدثها قبل قليل ؟ هل هذه ساره التي يعرفها ؟ أم سارة آخري لايعرف عنها شئ سوي اسمها ؟ وهل الحظر سيكون سببا لبعده عنها ؟ لا بل لابد أن يعرف عنها كل شئ ويحاول معها مره آخري كي تفهم قصده ولا تظلمه ولا يشعر هو الآخر أنه ظلما .

سجل خروجه بحسابه علي موقع الفيس بوك وبدأ في إنشاء حساب آخر بنفس الإسم ، دخل بحسابه الجديد وفتح صفحتها الشخصيه وهم بكتابة رسالة آخري لها ولكنه توقف فجأة وتذكر أنها من الممكن أن تفعل بهذا الحساب كما فعلت بالآخر ، فكر قليلا وقرر أن يتركها للغد كي تهدأ قليلا حتي يستطيع التحدث معها ، أغلق حاسبه وذهب إلي نافذته المفتوحه ، رفع يده للسماء وقال :

- يارب دبر لي فإني لا أحسن التدبير ، يارب أنا مش عايز أظلمها وكمان مش عايز أغضبك بس مش عارف أعمل إيه؟! يارب أنا مش فاهم حاجه ومش عارف هي عملت كده ليه ومش عارف هو أنا كده ظلمتها ولا أنا كده ماشي صح ولا إيه ؟ مبقيتش فاهم مين الصح ومين الغلط

يارب أنا عارف إني غلظت كتير ومكسوف من نفسي أوووي بس أنا مليش غيرك يسمعي ويدبرلي أموري ، يارب إفعلي الخير حيثما كان ورضني به ، يارب إرضي عني وسامحني واعفو عني ، يارب إنت عالم باللي جوايا من غير ما أتكلم ، ريحلي قلبي وقربني منك .. نفسي أرتاح

- بت يا لوءة

قالتها سلمى وهي تمسك هاتفها بفرحه وتضغط عليه ، حضرت ولاء إليها متبرمه كالعاده ، جذبتها سلمى من ملابسها وأجلستها علي الفراش بجوارها وقالت :

- اقدي هنا هسمعك حاجه تحفه

زفرت ولاء بضيق وقالت :

- ياست أنا مش بحب الحاجات التحفه بتاعتك دي ، بزهب منهم

رفعت سلمى حاجبها وقالت بثقه :

- ماشي مش مهم تحببها ، بس برضو هتسمعي

وقامت بتشغيل أنشوده " نفسي أتوب " لـ محمد عباس وأخذت تنشد معه ..

نفسى اتوب أنا م الذنوب و أكون قريب م الله  
كل لحظه وكل ثانيه أكون بقلبي معاه

وأبقى راضى وهو راضى عنى يوم ملقاه

مشتاق أوى لللقى و لوجهه الكريم

عشمان أوى فى الدعاء مانا عارفه رحمن رحيم

بدعيك و بتمنى القبول بكل خير دعاك بيه الرسول

ومهما عدنا للمعاصى هفضل برضو يارب أقول

نفسى اتوب أنا من الذنوب وأكون قريب من الله

كل لحظة وكل ثانية أكون بقلبي معاه

وأبقى راضى وهو راضى عنى يوم ما القاه

تنهدت سلمى بفرحه وقالت :

- والله تحفه أووي وتحسى كده إنها واخداكي فى عالم تانى ، بتخليكي نفسك تشوفي ربنا  
أووووي وتقوليله سامحني وقربني منك لأنى بحبك أووووي ومش عايزه غير رضاك ، فعلا والله  
الأناشيد بتفرق جدااا معايا وبتساعدني على الثبات

نظرت لها ولاء متعجبه وقالت :

- جايز ! بس أنا برضو مش بحب الحاجات دي ، وكمان مافيهاش موسيقي ولا أي حاجه كده !  
مجرد حد بيتكلم وخلص !

إبتسمت سلمى قائله :

- طب بالله عليكي مش تحسى إن الكلام لمس قلبك ؟

تبسمت ولاء وقالت :

- بصراحه الكلمات حلوه والإسلوب كمان ، بس برضو مش لازم أكون زيك علشان أبقي حلوه !!



وزي ماتني قولتي قبل كده إنك ليكي حريتك أنا كمان ليا حريتتي صح ولا إيه ؟  
ربتت سلمي علي كتفها بحنان وقالت :

- ياولاء انا مفرضتش عليكي حاجة ، إنتي حره في نفسك بس أنا لقيت حاجات حلوه وعيشتني  
إحساس بجد القرب من ربنا فقلت تسمعي معايا جايز تحببها ، بس إنتي براحتك برضو لان كل واحد  
بيتحاسب علي نفسه

- ماشي يا ستي انا هقوم أذاكر بقي

أطلقت سلمي ضحكة عالية وقالت :

- ماشي يا وحش ربنا يقويك علي الثانوية العايمه ، الحمد لله الذي عافانا ، مش عارفه إزاي كنت  
بطبق أروح دروس في الأجازة أصلا ، يلا ماعلينا

ظل إسلام يفكر طوال الليل في موضوع سارة وماذا يجب أن يفعل معها ، في اليوم التالي بعدما عاد  
من صلاة العصر قرر محادثتها مره آخري ، فتح حسابه الجديد علي موقع الفيس بوك وقام بإرسال  
رسالة لها وانتظر طوال اليوم ولكنها لم ترد ، أخذ يفكر قليلا .. لماذا لم ترد ؟ فلو كانت غاضبه  
كألمس كانت سوف تحظر هذا الحساب أيضا أو ترد بعصبيه علي أقل تقدير !!

مر يوم تلو الآخر وهو يرسل إليها الرسائل ولكنها لا ترد فأحس بالخوف عليها ، فلو كانت حذرته  
كان إطمئن عليها أكثر من ذلك ولكنه الآن يشعر بالقلق ، فهو كان يرغب أن يتركها إبتغاء مرضاة  
الله ولكن لم يُرد أذيتها أبدا ..

وبعدما يقرب من إسبوع فتح حسابه الجديد كالعاده ليطمئن عليها ولكنه وجد رسالة لم يكن يتوقعها  
أبدا !! فقد كانت الرسالة من أخت ساره ، أخذ يقرأها بذهول تام وهو لا يدري ماذا يفعل وقد كان  
محتوي الرسالة :

- ازيك يا إسلام ، أنا أخت سارة الكبيره ، أنا ببعثك الرسالة دي دلوقتي علشان أطلب منك تخرج  
من حياة سارة تماما وبكل هدوء ، هي من حوالي إسبوع كده لاقيناها عماله تكسر في كل حاجة  
حواليها ومنهاره تماما وحاولنا معاها كتير إنها تهدي أو تقولنا مالها ولكنها رفضت وإضطرينا إننا  
نودينا لأشهر دكتور نفسي في البلد علشان يشوف مالها ، هي دلوقتي محجوزه في المصحه علشان  
نفسيتها تعبانه جدا ولحد وقت قريب جدا مكناش نعرف هي تعبت كده من إيه لحد ما فكرت أفتح  
الأكونت بتاعتها علي الفيس وشففت اللي حصل بينك وبينها ، ساره يا إسلام بنت رقيقه جدا وقلبها  
طيب اوووي علشان كده بيتضحك عليها بسرعه وإتعرفت علي كذا واحد قبل كده وكانوا بيضحكوا  
عليها ويلعبوا بيها شويه ويسيبوها ، لكن هي لما كلمتك حسنت إنك مختلف عنهم وكانت مستعده  
تضحى بكل حاجه علشانك ، طبعا إنت عارف الفرق الواضح بين مستوانا ومستواكم لكن مع ذلك

هي كانت مستعدة تعمل أي حاجة علشان ترتبط بيك بس إنت لما جيت قولت لها إنك عاوز تسيبها علشان رضا ربنا طبعاً عرفت إنك بتكذب عليها وانكم كلكم زي بعض ، حقيقي أنا معرفش إذا كنت انت صادق ولا لا ، وأصلاً ده ميهمنيش في حاجة ، أنا بس جيت أقولك تبعد عنها تماماً وواعي تحاول تكلمها تاني أبدا ، هي دلوقتي بدأت كورس العلاج وبإذن الله الدكتور قالنا خلال شهرين كده ولا حاجة هترجع أحسن من الاول وكمان هيحاول معاها إنها يكون عندها ثقة بنفسها أكثر من كده وتبطل الطيبه الزيادة دي وتبدأ تعيش حياتها صح بقي ..

وعلشان أريحك خالص عايزه أقولك إن مستحيل بابا يوافق عليك لأنك بالنسباليه فقير ، أنا مش بقول كده علشان أخرجك او أضايك ، أنا بقولك كده علشان تفوق وتبطل تعيش في الأحلام انت وهي وفي الآخر تتصدموا بالواقع ، أنا عرفت إنها عملت بلوك للأكونت بتاعك يعني كده تقريبا كل حاجة إنتهت ، وبقول تاني أهو مش عايزاك تحاول تكلمها بأي شكل من الأشكال لأنها مش ناقصه وفيها اللي مكفيها ، وانا متأكد إن العلاج هيجيب نتيجة معاها بس بعد فترة كده إن شاء الله ..

لو عايز تساعدنا بجد إديها وبس ، وروح إنت يابني شوف طريقك وكافح وإعمل اللي إنت عايزه بعيد عنا

آخر حاجة بعد إنك ، أنا مش عايزه رد علي الرسالة دي لأنني مش فاضيه كل شويه أدخل اتكلم !! وبقولك لآخر مره أهو لو حاولت تكلمها تاني إحنا ممكن نعمل حاجة تزعلك ! يلا سلام

أخذ إسلام يقرأ الرسالة مرارا وتكرارا وهو في ذهول تام ، ماذا هذا الذي يراه ؟ هل هو يحلم أم يعيش في الواقع ؟ أخذ يضغط علي رأسه بشده من كثرة الألم الذي حل بها ، أخذ يحركها يمينا ويسارا عدة مرات محاولا الإستفاقه ، ما الذي يحدث له ولماذا تحولت كل حياته إلي ألم فقط !! إين حياة المرح والإستهتار واللامبالاه التي كان يعيشها ، فقد كان سعيدا بحياته هكذا ولم يطلب أن يعيش في هذا الواقع المؤلم ، لقد توفي والده ثم توفي محمد وترك في قلبه ألم ومرارة لم تنتهي ، وبعدها تخفي سارة وتترك في قلبه أيضا مراره وخوف ورعب وإحساس بالذنب ، ما هذا الذي يحدث ، ظل ينظر إلي السماء ويدعو الله أن يكون كل هذا حلما سيئا ولكن للأسف هذا واقع ، هذا نتيجة إستهتاره وعدم إحساسه بالمسئولية ، فكل فعل خطأ فعله آتي بنصيبه من الألم ، كادت رأسه أن تنفجر من فرط التفكير ، ظل يضغط عليها لفته طويله محاولا إيقاف التفكير ، جلس بعض الوقت محاولا تهدئه نفسه ولكنه لم يستطع فذهب إلي فراشه كي ينام محاولا الهروب ككل مره .

جلست سلمي علي حاسبها وقامت بفتح موقع الفيس بوك وهمت أن تبعث رسالة لحفصه ولكنها تذكرت أن حفصه الآن غير موجوده ولن تستطع الرد عليها إلي أن يشاء الله ، تذكرت أيضا أنها وعدت حفصه أن تظل تراسلها حتي بعدما ذهبت لتشعر دائما أنها بجوارها ، إبتسمت وهي تكتب :

- حفصه وحشتيني اووووي علي فكره ، أنا عارفه إنك مش هتقرأني الرسالة دي بس برضو كان

لازم أكلّمك لأنّي برتاح لما بفضفض معاكّي ومستنيه اليوم اللي تيجي فيه وتردي علي كل الرسائل اللي ببعتهالك ،، أنا يا ستي كويسه الحمد لله وماشيه في الطريق وكله تمام ، يمكن باخد شويه تريقه كده كل يوم بس مش مشكله بقي بحاول أتأقلم علي الوضع الجديد ، كمان الأناشيد اللي إنتي قولتي عليها دي بتساعدني أووووي ، بحس وأنا بسمعها إن قلبي طابير فوق في السماء ، بحس إنّي عاوزه أروح عند ربنا بقي وأشوفه وأقوله إنّي هعمل كل اللي يرضيه ومش هغلط تاني أبدا ولا هغضبه ، بجد بجد الأناشيد بالنسبالي بقت أسلوب حياه ♥

شكرا لأنك عرفتيني عليها ، شكرا لأنك موجوده في حياتي ، شكرا لكل حاجه حلوه حصلتلي بسببك

يلا سلام بقي ، ربنا يسعدك

إستيقظ إسلام من نومه وفتح عينيه فوجد نفسه في غرفته ، وجد نفسه قد عاد إلي هذا العالم الملى بالوجع ، أغمض عينيه مرة أخرى محاولا العوده للنوم ولكنه لم يستطع ، أخذت عيناه تدور في الغرفه بعض الوقت بعدم إهتمام وبدون أن يتفوه بأي كلمه ، بعدها نهض فجأة وإعتدل في جلسته وأخذ يحدث نفسه قائلا :

- وبعدين بقي ياعم إسلام ؟ هتفضل علي الحال ده كتير ولا إيه ؟ إنت راجل وماينفعلش تستسلم لوجعك وحزنك أكثر من كده ، فوق لنفسك كده علي الأقل علشان هند ومامتك إلي مسنولين منك دول

نظر للجانب الآخر وقال بحزن :

- يعني كنت بدأت أقرب من ربنا وأرتاح شويه بعد موت محمد ، دلوقتي جه موضوع سارة ده وقطم وسطي ، والله ما بقيتش عارف الأقيها منين ولا منين ؟

أخذ يتذكر أيامه ومحادثاته مع سارة ويتعجب ، هل هو كان يمزح كل هذا الوقت ام كان جاد ؟ هل هو فعلا يحبها أم أن الوضع أعجبه قليلا فقرر البقاء معها ؟ ولكن كيف يحبها ؟ هل كل شاب يري فتاة جميله ولديها أسلوب مرح ورومانسي يقول لقد أحببتها ؟ هل هذا هو الحب ؟ أم الحب كما قال عنه فاروق ؟ نعم ففاروق محق ، فلو كان يحبها حقا ما أستطاع أن يغضب الله فيها وخاف عليها من نفسه ، أخذ يسأل نفسه .. هل كان حقا يتسلي بها أم أحبها بصدق ؟ ام إستهتاره جعله لايري هذا خطأ وأكمل وهو غير مبالي حتي كسر قلبها كغيره ؟ سأل نفسه أيضا ؟ هل هي ظالمه أم مظلومه ؟

نعم فساره ظالمه ومظلومه معا ، ظالمه لأنها جعلت من نفسها فتاة رخيصة ورضيت علي نفسها أن تحدث هذا وذاك بحثا عن الحب والإهتمام ، ولكن من أين تحصل علي هذا الحب وهي تغضب الله ؟ وكيف يأتي هذا الحب وقلبها أولا وأخيرا معلق بيد الله والله قادر علي أن يقلبه كيف يشاء ، لقد بحثت عن الحب في مكانه الخطأ وفي الحرام وبالتالي كسر قلبها كالكثير من الفتيات غيرها ، ومظلومه لأنها وقعت تحت يد شباب لا يخافون الله ، فمنهم الظالم ومنهم المظلوم أيضا مثلها . فلو كانت صبرت

قليلا كانت ستحصل علي هذا الحب ولكن برضى الله عزوجل وكان الله سوف يكافئها علي صبرها بحب حلال يجعلها تعيش لذه الحب في طاعة الله .

أخذ إسلام يفكر في كل هذا ، فحقا هو يشعر أنه لا يحبها بصدق كما تصور ، هو فقط أحب سارة الفتاة المرحه الرومانسيه الهادئه ، أحب وجودها في حياته فقط كنوع من تفريغ المشاعر المكبوتة ليس إلا .

والآن ماذا بعد ؟ ماذا سيفعل ؟ هل يحاول محادثتها مره آخري ليوضح له كل شئ ؟ أم يتركها لحالها كما طلبت منه أختها ؟ أخذ يفكر كثيرا حتي قرر تركها ، تذكر أن " من ترك شيئا لله عوضه الله خيرا منه " تركها لكي لا يعذبها ويعذب نفسه أكثر من ذلك ، تركها وهو ينوي عدم محادثتها مره آخري فقط سيكتفي بالدعاء لها ، تركها لله ولأنه يريد رضاها .

شعر بالندم علي كل لحظه حادثها فيها وكل ذنب اقترفته نفسه ، ف بالتأكيد هذا الألم الذي يشعر به كله بسبب ذنوبه ، فقد قرر إسلام أن يعيش لله ، قرر أن يكون أفضل وأن يحاول ألا يغضب الله مره آخري ، قرر التوبه من هذا الذنب .

تذكر الندوه الدينيه التي دخلها مع محمد من قبل وتذكر كلمات محمد بعدها :

" حبيت فكرة إن زوجتي تبقي أول حب في حياتي وبإذن الله هفضل محافظ علي قلبي لحد ما أقابلها لأن المشاعر وقتها هتكون طازه ومش مستهلكه ، مش حابب أنا إني إتعرف علي دي ودي وفي الآخر أروح واحده تانيه خالص" !!

قرر أن يفعل مثله ، نعم سوف يحافظ علي قلبه حتي يرزقه الله بمن تستحقه ، ولكن قبلها سيفعل كل ما يستطيع حتي يرضي الله عنه ويستحق فعلا زوجه صالحه .

مر يوم تلو الآخر واقتربت السنه الدراسيه الجديده ، كانت في هذه الفتره قد توطدت العلاقة بين إسلام وفاروق وأخذ يصطحبه معه إلي عدة مساجد ويعرفه علي العديد من الشيوخ والصحبه الصالحه ، ، تغير إسلام كثيرا بعد معرفه هؤلاء الأشخاص ، فقد عرف المعني الحقيقي للقرب من الله والإلتزام بدينه ، عرف المعني الحقيقي للراحه ، أحس بقلبه وهو يشناق لسماع كلام الله وأحاديث نبيه ، عرف كيف كان دائما يصدر أحكاما مغلوطة علي الملتمزمين من دون حتي أن يحاول معرفه الحقيقه ..

بإختصار ، فقط عرف " الله "

بينما تعلمت سلمى عن دينها أكثر وأكثر عن طريق قراءة مجموعه كتب دينيه مبسطه ومشاهده العديد من البرامج الدينيه التي جعلتها تحب دينها أو بمعني آخر تلتزم مبادئه أكثر .

إنتهت الأجازة وإستعد الجميع لدخول العام الدراسي الجديد ، كانت سلمى قد أحضرت مفاجأة لصديقاتيها ولم تخبرهما عنها من قبل ، فقد كانت تريد أن تري رد فعلهما علي هذه المفاجأة ، رغم أنها كانت تتوقع ما سيحدث ، لكن كانت تريد أن تصبح أقوى بعد كمية الإنتقادات التي ستحصل عليها وفي أول يوم في الدراسة ، كانت فاطمه تجلس مع هند بانتظار سلمى عندما أتت إليهما أحدي الفتيات وقالت وهي تضع رأسها في حقيبتها كأنها تبحث عن شئ ما :

- يا بنات بعد إذنكم متعرفوش مدرج ء فين ؟

إبتسمت لها هند وقامت بوصف المكان لها ، رفعت سلمى رأسها من الحقيبة وقالت بمرح :

- ماشي ياختي شكرا

أطلقت هند ضحكة عاليه بينما نظرت لها فاطمه بتعجب وقالت :

- إيه يا بنتي اللي إنتي لابساه ده !!؟

نظرت لها سلمى وقالت بفرحه :

- لابسه خمار ياختي ، شكلي كيوت مش كده ؟

عقدت فاطمه ذراعيها أمام صدرها ورفعت حاجبها قائله :

- كيوت إيه بس يا شيخه ، حرام عليكي اللي بتعمليه في نفسك ده والله

إبتسمت سلمى وقالت :

- والله إنتي رخمه طول عمرك ، إسكتي بقي بدل ما أعضك

ثم نظرت لـ هند وقالت :

- وإنتي إيه رأيك يا هنوود ؟

أخذت هند تنظر لها للحظات وقالت بإبتسامه :

- والله يا سلمى شكك حلو فيه ، الف مبروووك

تهدت سلمي بسعاده ونظرت لفاطمه قائله :

-أيوه كده شوفي الناس اللي تفرح الواحد ، مش إنتي ، عيله رخمه بجد

زفرت فاطمه بضيق وقالت :

- دلوقتي ما بقيتش عجاكي هاه ؟ هتعملي فيها متدينه علينا يعني !!

إقتربت منها سلمي ونظرت لها بحنان وقالت :

- يا بت بهزر معاكي مالك قفشتي كده ليه ؟ وبعدين أصلا أنا مبقيتش بحس ، تقريبا كده أخذت  
مناعه ، يعني إترريقي براحتك خالص

ثم نظرت لهما بجديه وقالت :

- المهم ، متعرفوش أول محاضره هتكون في مدرج كام ومادة إيه ؟

نهضت هند من مكانها وسارت للأمام قليلا وهي تقول :

- عرفنا يا ستي كل حاجه ، يلا بينا

---

ذهب إسلام إلي الجامعه لأول مره من دون محمد ، أخذ يقلب في وجوه الشباب حتي يراه ولكنه يعلم أنه لن يراه ثانيه إلا في أحلامه ، لم يرد أن يؤلم نفسه هذا اليوم أيضا فأحب أن يقصر الشر وذهب إلي ممر الجامعه ليري الجدول ، نظر أمامه فإذا به يري شادي صديقه فتبسم له قائلا :

- ازيك يا شادي عامل إيه ؟

صاح شادي بفرحه وقال :

- إسلام .. إيه يابني محدش بيشوفك ليه ؟

- موجود أهو يا باشا

- عامل إيه دلوقتي ؟

- الحمد لله تمام جدا ، هاه قولي عرفتوا الجدول ؟

- لألسه منزلش ، بيقولوا الإسبوع ده هنقضيه لعب ونبدأ من الإسبوع الجاي إن شاء الله

ظهرت ملامح السعاده علي وجه إسلام وقال :

- أحسن برضو ٨٨

ثم نظر إليه بتساؤل وقال :

- بقولك إيه ؟ مشوفتش فاروق ؟

أخذ شادي يفكر قليلا ثم انتبه فجأة وقال :

- فاروق ده اللي هو بتاع كهرباء صح ؟

- اه هو

- اه شوفته هنا من شويه ، ممكن تلاقيه فوق عند مدرج ٣ ولا ٤

- ماشي ياشادي شكرا

- الشكر لله يا باشا

صعد إسلام لمكان المدرجات وبالفعل وجد فاروق هناك ، نادي عليه وصافحه وجلس معه ليتحدثا قليلا فقال إسلام متسائلا :

- بما إن النهارده أول يوم دراسه ودي آخر سنه لنا الحمد لله ، عاوزك تقولي بقي هل في طريقه أخذ بيها ثواب طول السنه دي ؟

ثم أردف قائلا :

- يعني بما إننا كده كده هنتعب وهتطلع عينينا ، يبقي علي الأقل الواحد ياخذ ثواب علي التعب ده

تبسم فاروق قائلا :

- الموضوع ده بقي يا سيدي متوقف علي نيتك ، يعني إنت ممكن تتعب طول السنه من غير ما تستفيد حاجه غير إنك عديت سنه وخلص ، وممكن برضو تتعب طول السنه بس تاخذ ثواب علي

التعب ده كله

ثم قال موضحا :

- يعني يا سيدي إنت المفروض هتخط في نيتك إنك بتتعلم علشان تفيد بلدك وتبقي مهندس ناجح وعنده ضمير بجد ، كل ما تتعب أو تزهدق من الكلية تجدد نيتك وتحمس نفسك وتقول لأ مش هياس ، أنا هكمل طريقي علشان أرضي ربنا وأكون من عمار الارض ، بس كده يا سيدي ♥

أوما برأسه متفهما وقال :

- اه يعني الموضوع كله متوقف علي نيتي ؟

- أيوه بالضبط كده

- ماشي تمام جدا ، هعمل كده بإذن الله وأهو عداد الحسنات يفضل شغال طول ما أنا مطحون في الكلية العسل دي

---

عاد إسلام إلي المنزل وجلس مع اخته ليحدثها عن يومه وتحدثه هي الآخري ، فقال متسائلا بمرح كعاداته :

- هاه عملتي إيه النهارده يا بطه ؟

أجابت بنفس الطريقة :

- روحت الكلية وجيت هاهاهاها

ضربها علي كتفها بخفه وقال :

- علي فكره رخمه جدا

رفعت رأسها للأعلي وصوبت نظرها اتجاهه وقالت بثقه :

- بنتعلم منك يا بشمهندز

رفع حاجبه الأيسر ومط شفتاه لأعلي قائلا بإستكار مصطنع :  
- بشمهندز !! يا شيخه الله يقرفك ، آل وداخله قسم إنجليزي آل



سقطت علي الأرض من كثرة الضحك وقالت :

- خلاص ياعم الحج ٩٦% من ٨٥% مش هتفرق أوي يعني ، كلها درجات علي ورق

إعتدل في جلسته وأخذ يجذب طرف قميصه بغرور وقال :

- مع مع لأ طبعا هتفرق كتير

رفعت حاجبها ونظرت له ولم تتحدث بينما إلتف هو بكامل جسده ونظر لها بجديه وقال :

- بصي بقي يا ستي ، عاوزين نبدأ السنه دي جد كده ونجدد النيه إن كل لحظه فيها ناخذ عليها ثواب ، يعني نحاول كده وإحنا رايعين الجامعه نقول إننا رايعين علشان نتعلم زي ما ربنا أمرنا ، لما نتعب نقول معلى لازم شوية تعب كده أو مال هناخد ثواب علي إيه ؟ لما نزهق أوووي بقي من المواد الكيوت اللي عندنا دي نقول معلى إحنا هنكون بإذن الله من عمار الأرض وهننفع البلد دي بجد ونرجع نتحمس تاني ونكمل وكده ، ماشي ولا ماشي ؟

أخذت تحك رأسها بطرف اصبعها وهي ترفع له حاجبها وتقول :

- أنا سمعت الكلمتين دول فين بس ياربي

ثم انتبهت فجأة وقالت :

- أيون إفتكرت ، دول نفس الكلمتين اللي سلمى قالتلنا عليهم النهارده ، هو إنت سمعتها ولا إيه؟!!!

أطلق ضحكة عاليه وقال :

- أسمع مين يا ماما؟!!! لالا لا ده إنتي لو عايزه كلام من ده كل يوم هقولك ، جعيتي مليانه لا تقلقي

ثم نظر لها بخبث وقال :

- بس مين سلمى دي صحيح ؟

أمسكت بأطراف شعرها وكادت أن تمزقه وهي تقول بعصبيه :

- يابني إرحمني بقي ، مش كل ما أقول إسمها علي لساني تقولي سلمى مين !!  
ثم أخذت تتحدث بطريقة جنونيه وتقول :

- سلمى جارتنا يا إسلام ، سلمى صاحبتى فى القسم يا حبيبي ، سلمى اللى كانت معايا فى ثانوي يا كميله ، سلمى اللى كانت بتلعب معنا فى الشارع يا بطه ، سلمى اللى إنت عارفها وبتستعبط يا إسلام

ثم ضربته على كتفه بضيق وقالت :

- بقولك إيه يا إسلام ؟ ما تروح أوضتك دلوقتي ينوبك فيا ثواب بدل ما أعمل جريمه ، مش عارفه إيه اللى جابك عندي أصلا

ثم أخذت الوساده وقذفته بها وقالت :

- يلا من هنا يا حاج ، شطبنا خلاص

خرج من غرفتها وأخذ يحرك رأسه يمينا ويسارا وهو يضرب كفا بكف ويكاد يختنق من كثرة الضحك ويقول :

- سلمى جارتها وصحبتها وكانت بتلعب معاها فى الشارع ، طب وأنا مالي أصلا؟! هي بتكلمني عن صحباتها ليه؟! بت غريبه اوووي بصراحه!!

مش عارف طالعه مجنونه كده لمين؟! إحم لأ عارف ، ربنا يقوينا عليها إحم وعليها

---

أخذ إسلام يجتهد كثيرا فى آخر سنه له فى الجامعه كي يستطيع التخرج بتقدير يجعله يحصل على وظيفه فى مكان مرموق كما كان يتوقع!!

بينما جددت سلمى نيتها وأخيرا شعرت بحبها لكلية التربية وأخذت عهدا على نفسها أن تكون المعلمه اللتى يتمناها كل طالب ، ستكون من عمار الأرض وسيكون تعديل حال التعليم فى بلدنا على يديها ، هذا نوت وهكذا دعت الله أن يوفقها وتمر هذه السنه على خير كغيرها من السنين ولكن برصيد أكبر من الحسنات .

كان إسلام يقضى معظم يومه فى الجامعه وعندما يعود للمنزل يذهب للنوم قليلا ثم يستيقظ ليقرا بعض الكتب الدينيه أو يشاهد بعض البرامج على موقع اليوتيوب اللتى تجعله يتحمس ليكون أفضل ، ف الان لا توجد سارة ولا توجد ذنوب تعلقه بها ، فكر مرارا وتكرارا أن يدخل ليطمئن عليها ويخرج سريعا ولكن عهده مع الله كان أقوى ، كان يتذكرها كثيرا بدعائه وهو على يقين بأن الله قادر على أن يردّها إليه ردا جميعا ، كان يتذكر محمد دائما ، بل لم ينساه قط وكان يدعو له دوما أن يغفر الله له ويجعله من أهل الجنه ويجمعهما سويا فى الفردوس الأعلى كما جمعهما فى الدنيا بالرغم من مفارقه سلمى لـ حفصه إلا أنها لم تتأثر كثيرا ، فدائما كانت تستخدم سلاحها كما قالت لها حفصه من قبل " القرآن والدعاء " أخذت تقترب من الله أكثر وتعرف عن دينها أكثر ، حاولت أن

تصبح قدوه بين أصدقائها ودائما تحثهم علي كل ما هو خير لهم ، أحببت أن تكون فتاة مختلفة عن جميع الفتيات ، فتاة مختلفة بحيائها وضميرها وأخلاقها وقربها من الله

مر هذا العام الدراسي بخير أيضا كالعالم السابق ، ولكن أبطالنا مختلفون تماما عن السابق : ف إسلام قد تقرب كثيرا من الله وأصبح يشعر دائما أن قلبه معلق بالمساجد ، أصبح يشعر بالراحة التي كان يتمناها من قبل ، بالطبع قد تعذب كثيرا ولكنه الآن قد تاب توبة نصوح وساعده في ذلك رفيقه الآخر فاروق .

سلمي أيضا أنهت هذا العام الدراسي بكل خير ، حاولت بقدر الإمكان الإستفادة من هذه المواد الدراسية التي تدرسها وأيضا دربت نفسها علي أن تكون معلمة ناجحة ، فهي لن تسمح لنفسها أبدا أن تكون معلمة بالإسم فقط .. لا بل ستصبح معلمة بالفعل وليست معلمة للغة الإنجليزي فحسب بل معلمة للأخلاق والقيم والمبادئ والكثير من الأشياء التي يجب أن يعرفها الطالب بحق .

كانت سلمي تجلس علي موقع الفيس بوك عندما وجدت أمامها خبرا جعلها تقفز من مكانها ، ذهبت مسرعة إلي والدتها وأخذت تصرخ بأعلي صوتها :

- ماما الحقني نتيجة الثانوية العامة بانت

سمعت ولاء هذه الكلمة وقفزت من مكانها هي الآخري ، ذهبت إلي الحاسب ويدها ترتعش بشده فلم تستطع فعل أي شئ ، حاولت سلمي تهدئتها وجلست علي الموقع لتري نتيجة اختها ، مرت لحظات الإنتظار كأنها ساعات وقلب ولاء ينبض بشده وخوف ورعب ، جاءت لها العديد من الوسوس في تلك اللحظات القليلة ولكنها سرعان ما إستفاقت علي صوت سلمي وهي تصرخ :

- % 97 يا بنت الإيه ، عملتيها إزاي دي يا لوءه

ثم أطلقت ضحكة عاليه وقالت :

- علي فكره أنا مش بحسد ، انا بقربس ، ده انتي كده يا بت يا ولاء داخله هندسه وش بإذن الله أخذت ولاء تقفز في كل مكان وتصيح بأعلي صوتها ، تقفز علي الفراش وتهبط وتجلس علي الأريكة وتجري وتأخذ أختها ووالدتها في حضنها وتصرخ وظلت هكذا ما يقرب من النصف ساعه حتي تعبت وهذأت تماما ولكن مازالت إبتسامتها تقترب من اذنيها ، عاد الأب مسرعا من عمله عندما علم بظهور نتيجة الثانوية العامة ، دخل المنزل بلهفه كبيره وفتح الباب بسرعه ووجد ولاء أمامه فنظر إليها وقبل أن يتحدث قاطعته قائله :

- هندسه يا حاج بإذن الله

شعر الأب بالسعادة ونظر لسلمي نظرة ذات معني وعاود النظر لولاء وقال :

- أيوه كده يا بنتي فرحتيني ، الحمد لله إنك مخيبتيش خيبة اختك ، خلي الواحد يفتخر بيكي كده قدام الناس

أحست سلمى وكان خنجرا مزق قلبها فنظرت إلي والدها بحزن وقالت :

- يعني إنت مش بتفتخر بيا يا بابا

نظر لها بوجه خالي من أي تعبير وقال :

- أكيد مش هفتخر قدام الناس إن بنتي خابت ودخلت تربيته يعني !! بس هندسه يبقي لازم افتخر طبعا

أحست سلمى بالغضب الشديد ولكنها حاولت التحكم في هذا الغضب لأنها تحدث والدها وقالت :

- يعني يا بابا اللي في تربيته هيدخلوا النار؟! اه أنا مكنتش بجيب الفول مارك في الثانوية بس مش معني كده إني وحشه يعني وإن اللي في هندسه أحسن مني

ضرب الطاولة بقوة أفزعتها وقال بغضب :

- جري إييه يا سلمى ؟ هو انتي بتغيري من اختك ولا إييه ؟ !!

تراجعت للخلف قليلا وقالت بحزن :

- يا بابا والله أبدا ، ده أنا حتي كنت دايمًا بقول لولاء تذاكر وتشد حيلها علشان تجيب مجموع أكبر مني ، وكنت بساعدها علي كده وبذاكر معاها لو جالها الإكتتاب بتاع الثانوية ده ، وحضرتك عارف إنها إختي الصغيره وسعات كمان بعتبرها بنتي وعمري ما هغير منها أبدا ، بس مش كل شويه حضرتك تقولي كده لأني تعبت أحس بحزنها فتبسم لها قائلا :

- خلاص يا سلمى روجي اوضتك وإفرحي كده مع اختك ، دي ناجحه برضو ولازم تفرح ، وبلاش الكلام ده دلوقتي  
- يا بابا والله أنا...

قاطعها بحده :

- قولا خلاص ، الموضوع انتهى

دخلت سلمي غرفتها وكادت أن تمطر الغرفة كلها بالدموع ولكنها تذكرت أن الدموع لن تفيد بشئ ، فهذا طبع والدها الذي اعتادت عليه ولن يتغير مهما حدث ، ففي بعض الأوقات تشعر بأنه يحبهم كثيرا وباقي الأوقات تشعر بقسوته عليها ، لا تعرف لماذا ولكنها قررت فجأة أن تفرح وتفرح اختها معها ، قررت أن تحتفل معها بهذا النجاح ولا تعكره عليها ، فهي تعلم نفسها جيدا وتعلم أنها من المستحيل أن تغار من اختها الصغرى لأنها بمثابة ابنة لها .

وبعد إسبوع تقريبا ظهرت نتيجة إمتحانات جميع الكليات وأخيرا لقد تخرج كل من فاروق وإسلام وحصل كل منهما علي تقدير جيد جدا بينما صعدت كل من سلمي وهند وفاطمه إلي الفرقة الرابعة بكلية التربية وقد نجن بتقدير جيد لكل منهن

جلس فاروق يفكر من أين يبدأ ، فهو قد تخرج الآن ويريد أن يحصل علي وظيفة بأقصى سرعه حتي يستطيع التقدم للفتاة التي لطالما حلم بها زوجة له ، قرر الذهاب إلي كل مكان من الممكن أن يحصل فيه علي وظيفة ، أخذ يتجول في محافظته شبرا شبرا بحثا عن أي وظيفة ، أخذ يسأل كل من يعرفه عن شركة تبحث عن مهندسين أو مصنع أو أي شئ فلم يجد !!

جلس في يومه حائرا لا يعرف ماذا يفعل ، أخذ يدعو الله كثيرا أن يرزقه بوظيفة عاجلا غير أجل حتي يتقدم لخطبه تلك الفتاة ، بعدها بعدة أيام وجد هاتفه يرن ويتصل به أحد أصدقائه ليخبره عن شركة جديدة تم إنشاؤها وتريد مهندسين جدد ، أخذ يشكر الله كثيرا علي هذه النعمة وهذا العطاء المتواصل وبالفعل تقدم للوظيفة وتم قبوله في الشركة ، لم يستطع أن ينتظر أكثر من ذلك وذهب لوالدته ليفاتحها في الأمر ، وقف علي باب المطبخ ونظر لها بابتسامه مرحة وقال :

- حجه

إتفتت له قائله بحنان :

- أيوه يا حبيبي

إتسعت إبتسامته وهو يقول :

- أنا عايز أتجوز

قفزت الفرحة علي وجهها ولكنها حاولت مداعبته وقالت :

- يعني يا واد تتقبل في الوظيفة النهارده ، تقولي عايز اتجوز النهارده برضو !! هو إنت كنت مجهز كل حاجه ولا إيه ؟

تنحج قائلا بإحراج :

- بصراحه اه

رفعت حاجبها بدهشه وقالت :

- او مال ياخويا عاملي فيها شيخ ليه وإنت عمال تبص علي البنات أهو

إنتابته حاله من الذهول ، فهو لم يكن يتوقع هذه الكلمات من والدته وهي أقرب إنسانه له علي وجه الأرض وتعرفه أكثر من أي شخص آخر ، فقال بضيق :

- بقي إنتي اللي بتقولي كده يا ماما؟! وهو إنتي مش عارفه يعني إني بخاف علي بنات الناس وبغض بصري عنهم دايما الحمد لله ، دي بنت أنا عارف أخلاقها كويس أووي وحببت أرتبط بيها في الحلال ، فيها حاجه دي ؟

إبتسمت له مداعبه وقالت :

- يا واد بهزر معاك مالك كده ، طيب قولي بقي مين دي اللي امها داعيه عليها اللي عايز تتجوزها ؟

ثم أردفت قائله بمرح :

- قصدي يعني داعيالها

إبتسم وهو يقترب من اذنيها ويخبرها عن من يتحدث ، فنظرت له قائله :

-والله يا بني هو أنا معرفهاش اوي البنت دي ، بس طالما عجبتك يبقي أكيد كويسه

تنهد بحماس وقال :

- طيب هنروح إمتي بقي هاه ؟ ينفع النهارده ؟  
ضربته علي كتفه بمرح وقالت :

- مالك يا واد كده ما تتقل شويه ، خلاص حاول تشوف أهلها وتكلمهم ونتفق علي ميعاد نروحهم فيه

قفز بسعاده من مكانه وقال :

- ماشي يا حجه

جاءت ولاء الي الغرفه وهي غارقه في الضحك ، تتمايل يمينا ويسارا ولا تستطيع أن تقف مستقيمه أبدا ، رأتها سلمي علي هذه الحاله فإنتابها الفضول وأرادت أن تعرف ماذا حدث فقالت بتعجب :

- مالك يا بنتي هتموتي من الضحك كده ليه ؟ طب ضحكيني معاكي يا ستي

إرتمت ولاء علي الفراش وهي لازالت تضحك ولا تستطيع كتمان ضحكاتها ، أخذت تتنفس بصعوبه وتنظر لسلمي بين الحين والآخر حتي إستطاعت أخيرا أن تهدأ بعض الشئ وقالت :

- أبوكي بيتكلم عليكي برا

نظرت لها سلمي بذهول وقالت :

- ياسلام !!؟ طب ودي حاجه تخليكي هتموتي من الضحك أوي كده ، عادي يعني فيها إيه !!؟

أخذت ولاء تتذكر ماحدث وتضحك أكثر وأكثر حتي شعرت سلمي بضيق وقالت :

- يابنتي ما تقولي في إيه ، بابا بيقول عليا إيه برا

حاولت الهدوء مره آخري وقالت :

- أبوكي جايبك عريس ههههاي ، والله إحلويتي وكبرتي وبقيتي عروسه

بسبوسه بسبوسه ، بت يا نوسه يا نوسه شايله البسبوسه ..

قاطعتها سلمي عندما ضربتها علي كتفها وقالت :

- بطلي إستعباط يا ولاء ، عريس إيه وبتاع إيه !!؟ إنتوا عارفين رأيي في الموضوع ده من زمان وضعت ولاء يدها علي فمها في محاولة منها لكتمان ضحكاتها وقالت :

- وأنا مالي يا ستي ده بابا هو اللي بيقول

زفرت سلمي بضيق وقالت :

- طب ماهو بابا عارف إني قولت قبل كده مش هرتبط إلا لما أخرج ، وبعدين أنا أصلا لسه مش مستعده دلوقتي ، يعني محتاجه ألتزم أكثر من كده علشان أبقي زوجه وأم صالحه ومحتاجه أقرأ عن تربيته الأطفال والتعامل مع الرجال وحاجات كده مهمه قبل ما أفكر اتجوز ، الجواز ده مسئوليه مش لعبه ! نظرت لها ولاء بجديه وقالت :

- ماهو بيقول إنك خلاص داخله رابعه يعني عادي لو إتخطبتي السنه دي وتبقي تتجوزي بعد التخرج ضربت الفراش بقوه وقالت :

- اووووف بقي لأ طبعاً مش عايزه دلوقتي  
ثم قالت بحيره :

- طيب هو أنا لو طلعتله دلوقتي يعني هينفع أتكلم معاه ولا هيتعصب عليا ولا إيه ؟  
قالت ولاء بضحكة مستفزه :

- متقلقيش ياختي هو جايلك دلوقتي

وقبل أن تكمل حديثها سمعت طرقات الباب ، إعتدلت كل منهما في جلستها وقالت سلمى :  
- إفضل يا بابا

إقترب الأب منها مبتسماً وجلس بجوار ابنته علي حافه الفراش وقال :

- بقولك إيه يا سلمى ، في عريس عاوز يتقدمك

تنهدت سلمى بضيق وقالت :

- يا بابا بس إحنا كنا متفقين إني مش هتجوز إلا لما اتخرج

تبسم قائلاً :

- ماهو انتي مش هتجوزي إلا لما تتخرجي فعلاً ، لو وافقتوا علي بعض هتتخطبوا السنه دي والفرح بعد التخرج إن شاء الله



زفرت بملل وقالت :

- يا بابا بس انا مش عايزه دلوقتي بقي

نظر لها نظرة أخافتها ، وقال بغضب :

- مفيش حاجه إسمها مش عايزه ، إنتي مش صغيره دلوقتي ، شوفيه ولو محصلش نصيب خلاص ، هو حد قالك اتجوزي بالعافيه !!

نظرت له سلمي بحزن وقالت :

- يعني لازم يا بابا !؟

نظر لها بوجه خالي من أي تعبير وأوماً إيجاباً فوجدت أنه لا مفر فقررت الإستفاده من الوقت ومعرفة معلومات أكثر عن هذا الشخص فقالت :

- طيب هو ملتزم ؟

أجابها مؤكدا :

- أيوه محترم وبيصلي

شعرت بالضيق لأنها تعرف أن مفهوم كلمة ملتزم عند والدها تعني شاب يصلي فقط فلم ترد مناقشة هذا الأمر حتي لا تحصل علي غضب والدها مره أخرى ، وقالت :

- طيب حضرتك تعرف عنه إيه تاني يا بابا ؟

أجابها مبتسماً :

- هو شغال في شركه كويسه وأهله ناس طيبين وأنا موافق عليه وإن شاء الله إنتي كمان توافقي حاولت الإستفسار أكثر وقالت :

- طيب يا بابا هو طموح ؟ عنده أي اهداف في حياته مثلا بيسعي ليها ؟ عارف هو عايش ليه ولا عايش كده وخلاص زي كل الناس ؟ كمان معاملته لأهله عامله إزاي ؟ وبيصلي في الجامع ولا لا ؟ وبيعامل زميلاته في الشغل إزاي ؟ وعلاقته بربنا عامله إيه ؟ قريب ولا بعيد ؟ وبيسمع أغاني وحاجات كده ولا إيه ؟ و.....

قاطعها والدها بجده وصرخ قائلاً :

- إيسه يا بنتي ده كله ؟ هو انتي بالعه راديو ؟ أما تشوفيه يا ستي إبقى إسألينه عن اللي إنتي عايزاه ، أنا حاسس إنه هيكره نفسه أصلاً لما يبجي هنا شعرت سلمي بالإحراج وقالت بتوتر :

- يا بابا أنا زهقانه ومش عايزه بجد ، بالله عليك مشيه وقوله أي حاجه

إستعد لمغادرة الغرفه وهو يقول بصرامه :

- الكلام اللي قولته هيتنفذ ومعنديش كلام غيره ، أنا هتفق معاه علي الميعاد وهقولك

ضربت الفراش بقوه وهي تتوعد لهذا العريس قائله :

- طيب ، أنا هوريك !

---

ظلت تفكر في الأمر طوال الليل ، كادت أن تختنق من الفكره في حد ذاتها لأنها تعرف أنها غير مستعده بالمره ، ظلت تفكر كيف ستجعله يكرهها ويغادر المنزل بلا عوده ، فهي تعرف أنها إذا حاولت النقاش مرة اخري مع والدها لن تحصل في النهاية إلا علي سيل من الدموع وهي وحيده في غرفتها ، أخذت تحدث نفسها قائله :

- طب وانا أطفشه إزاي ده بقي ؟ أعمل نفسي غيبه ولا مش بفهم ولا سانجه ولا أعمل إيه ؟ أضايقه وأكرهه في عيشته علشان يمشي ؟ ولا أكون عاديه معاه وفي الآخر أرفضه بدون سبب ؟

ثم نظرت للجانب الآخر وقالت :

- بس كده مش هينفع وممكن ربنا يعاقبني ، ممكن فعلاً يكون كويس وأنا أظلمه

- بيبي بس أنا مش عايزه بقي دلوقتي خالص ، يعني هلحق أعمل كل الحاجات اللي عاوزاها دي إمتي بس ؟

- طيب وفيها إيه يعني لما أشوفه مش جايز يطلع كويس وفعلاً يساعدي أقرب من ربنا ؟

- لالالا مش هينفع ، مش هلحق مش هلحق

- طيب ماهو برضو لو طلع كويس أنا هفرح وهتشجع علي حاجات كتير وممكن كمان ألحق أخلص كل الكتب اللي أنا عاوزاها بسرعه جدا بالإضافة لمساعدته ليا

- بيبي بقي مش عارفه ، يارب إهمني الصواب وإفعلني الصالح

- خلاص بقي أنا أشوفه وخلص وأسأله كل اللي أنا عاوزاها جايز فعلا يبقي ملتزم بقي ويفرحني كده

ثم نظرت للنافذة المفتوحة وظلت تدعو الله أن يرزقها الخير حيثما كان ثم يرضها به ..

---

بعد ثلاثة أيام سمع إسلام طرقات علي باب شقته ففتح بسرعه فإذا به يري فاروق واقفا والإبتسامه تعلقو شفتيه فتعجب قائلا :

- فاروق ؟ والساعه ١١ بليل ؟ غريبه !!

نظر له فاروق بسعاده بالغه وحماس كبير وقال :

- أنا لسه جاي من عندها دلوقتي يا إسلام

رفع إسلام حاجبه قائلا :

- لسه جاي من عند مين ؟

كاد أن يقفز من مكانه وهو يقول :

- أنا إتقدمتلها أخيرا يا إسلام ، ولسه جاي من عندها دلوقتي ، أنا حاسس إنني طاير ، ومش عارف أصلا إيه اللي جابني هنا دلوقتي بس فجأة كده لقيتني عند باب بيتك

تذكر إسلام حواراه السابق مع فاروق وتذكر أيضا الفتاة التي قال أنه يرغب في الزواج منها فقال بحماس :

- أيوه بقي ياعم ، طيب تعالي ندخل وإحكي لي حصل إيه

تبسم فاروق قائلا :

- لا مش هينفع علشان عندك بنات في البيت ، تعالي ننزل تحت وأنا هحكلك كل حاجه

استعدت سلمي لإستقبال العريس كمان أمرها والدها ، إرتدت فستان رقيق ووضعت فوقه خمارها ورفضت أن تضع نقطة واحدة من مساحيق التجميل رغم الضغوطات الكثيره التي حصلت عليها فقد كانت تريد أن يراها هذا الشاب علي طبيعتها بدون أن تخدعه وهذا بالطبع بعدما قامت بعمل العديد من ماسكات تجميل البشرة وغيرها من الأشياء الطبيعيه ، جلست في توتر بالغ تجهز وتحفظ جيدا في الأسئلة التي ستلقها عليه ، كانت حالتها مابين الإختناق والتفاؤل فهي لاتريد الزواج الآن ولكن كانت علي أمل أن يكون شابا ملتزما يأخذ بيديها للجنه ويعينها علي الإلتزام بأمر دينها أكثر وأكثر .

جلست تردد الأذكار لكي تهدأ قليلا ، ظلت هكذا لدقائق معدودة حتي سمعت صور الباب ، نعم فقط جاء العريس مع والدته ، حاولت مشاهدة أي شئ من وراء الستار ولكنه كان بعيدا فلم تري شيئا ، جلس والدها يتحدث معه لوقت قصير ثم دخل ليحضرها قائلا :

- يلا يا سلمي

نظرت إليه بضعف وقالت بتوتر :

- مش عارفه اتحرك من مكاني يا بابا مكسوفه جدا

جذبها من يدها بسرعه وقال :

- يا بنتي يلا الناس برا

افلتت يدها ورجعت للخلف وقالت بخوف :

- طيب يا بابا هو شكله عامل إزاي ولا قاعد فين ؟

جذبها مره آخري بعصبيه وقال :

- يلا بقي وإبقي شوفي اللي يعجبك لما تطلعي

خرجت أخيرا وصافحت والدة العريس وأثناء إنتقالها للمكان الذي ستجلس فيه رآته بطرف عينها ، شعرت بالسعاده تغمر قلبها ، فقد كان يرتدي ملابس أنيقه للغاية ويضع عطرا مميزا وأيضا كان ذو وجه حسن أعجبها ، جلست بخجل وهي تقول لنفسها :

- بدايه موفقه ، هيبح يارب خير

جلس يتحدث مع والدها قليلا عن عمله وإمكانياته وعائلته وأشياء من هذا القبيل ، ساد الصمت

لبعض الوقت حتي شعر بالضيق فطلب من والد سلمي أن يجلسا معا ليتعرفا علي بعضهما البعض ،  
رحب الوالد بالفكره وطلب من سلمي أن تصطحبه للغرفه المفتوحه علي الصاله حتي يستطيعا التحدث  
بعيدا عن الكلام العائلي ، نظرت سلمي لوالدها بتردد ومن ثم وافقت علي الأمر ، سارت باتجاه المكان  
التي ستجلس فيه وسار العريس خلفها ، دخل وإختيار مكانا بعيدا عن الأنظار ولكن سلمي جلست  
علي أقرب كرسي من الباب حتي يراها والدها بوضوح ويسمع بعض الكلمات إن اراد .  
تبسم لها قائلا :

- إزيك يا أنسه سلمي ؟

نظرت للأرض بخجل وقالت :

- الحمد لله

ساد الصمت للحظات حتي قطعه مره آخري وهو يشير علي أقرب كرسي له قائلا :

- طيب بعد إذنك ممكن تيجي علي الكرسي ده علشان مش عارف أسمع صوتك ؟

شعرت بالتوتر وقالت في نفسها :

- مش عاوزه أجي في حته أنا ، أقوله ايه ده بس ياربي

إبتلعت ريقها وقالت بإبتسامه محرجه :

- حضرتك ممكن تيجي علي الكنبه اللي قدام الباب دي علشان الجماعه يكونوا شايفيننا يعني

تنهد بغضب ولكنه لم يظهره وقال لنفسه:

- إيه البت دي !! يلا ما علينا

إنتقل من مكانه إلي الأريكه المقابله للصالة مباشره فكان كل من يجلس بالصاله يري كل منهما ،  
حاول إستعادة إبتسامته وبدأ في الحديث عن نفسه ، أحست من كلامه أنه شاب عادي كمعظم شباب  
هذه الأيام يعمل وينام ويخرج مع أصدقائه وينام مره آخري وهكذا ، لا يوجد في يومه شئ آخر ،  
فإنتظرت حتي ينتهي من كلامه وأحبت أن تسأله عما يجول بخاطرها ولكن بذكاء فقالت بإبتسامه  
برينه :

- وحضرتك بقي بتقعد في شغلك لحد الساعه كام كده ؟

أجابها علي الفور :

- يعني لحد ٥ او ٦ كده

فنظرت له بخبث وقالت :

- ااه ربنا يعينك ، وطبعا حضرتك بتضطر تصلي الظهر والعصر لما ترجع البيت بقي علشان مش بيكون عندك وقت فاضي

- اه للأسف بقي هعمل إيه

نظرت له وكأنها متأثره بما يقول وأكملت :

- فعلا شغلانه حضرتك صعبه ربنا يعينك ، كمان أكيد في أيام بترجع تعبان من الشغل وتنام ولما بتصحي بقي بتصلي كل اللي فاتك ، أكيد مش بتسيبهم يروحوا منك يعني

- لالا لا أسيبهم إيه ، بصليهم كلهم بليل طبعا

نظرت للأرض بضيق وقالت لنفسها :

- وأدي أول إختبار سقطت فيه ، للأسف شكلك الحلو كنت فرحانه بيه بس برضو دينك وأخلاقك أهم

إنتبهت له وهو ينادي عليها وعندها نظرت له وقالت ببلايه :

- هاه

- إيه روحتي فين

- لالا مفيش حاجه ، موجوده أهو  
إبتسم قائلا :

- طيب يلا عاوزه تسألني في إيه تاني ؟

فكرت للحظات ثم قالت :

- حضرتك إيه المواصفات اللي عاوزها تكون موجوده في زوجتك المستقبليه

أجابها علي الفور :

- يعني طبعا تكون حلوه وتعامل أهلي كويس وتهتم بيا وبأولادها ومتبقاش نكديه زي معظم الستات كده

- طيب وحضرتك بتعرف تربى أولاد ؟  
نظر لها بتعجب ممزوج بالدهشه وقال :

- ولما أنا أربيهم هي هتعمل إيه !!؟

تحنحت بإحراج وقالت :

- لأ قصدي يعني حضرتك تساعدها في تربيتهم

- لأ طبعا مش هينفع خالص ، انا عليا الشغل والمصاريف وهي عليها الباقي

- طيب يعني مثلا مين هياخدهم معاه المسجد علشان يتعودوا علي الصلاة وكده

شعر بالملل ولكنه حاول الإبتسام وقال :

- اه طبعا هبقي أخدمهم إن شاء الله

صمتت قليلا ثم قالت :

- أخر حاجه بقي ، حضرتك بتحلم بإيه أو إيه أهدافك في الحياه ؟

- بحلم أعيش حياة مستقره وهاديه ومن غير مشاكل ، وأفضل أترقي في شغلي لحد ما أوصل للإدارة

- بس ؟

- وهو الإنسان هيجتاج إيه تاني غير كده !!؟

وأخذت تفرك يدها بالآخري بتوتر وتقول لنفسها :

-أنا إتشليت ، حاسه إنك كرهتني أصلا ، يارب بابا ينادي عليا بقي ، يارب مكونش بظلمه بس  
بجد هتشل مش قادره أقعد

عادت من شرودها فوجدته ينظر لها بوجه خالي من أي تعبير فقالت بابتسامه :

- طيب وحضرتك مش عايز تسألني أي حاجة ؟

- اه قوليلي صحيح إيه هي مواصفات فارس أحلامك ؟  
أحست سلمي بطاقه كبيره جدا بداخلها والآن حان الوقت لإخراجها فقالت بسرعه رهيبه :

- نفسي يكون حافظ القرآن ويحفظني ويكون مواظب علي الصلوات كلها في الجامع وعارف عن دينه حاجات كثير جدا!!! وعن معاملة الزوجه وتربيته الاولاد ، كمان عاوزاه يكون حد عايش لخدمه دينه وهدفه كله رضا ربنا وبس ، حد يكون من عمار الأرض كده ومعروف بين الناس بأخلاقه ، يكون بيغض بصره طبعاً ودايماً محافظ علي نفسه وقلبه مش فيه غير حب ربنا وبس ، حد بيتخذ النبي عليه الصلاة والسلام قدوه ويساعدني في شغل البيت ويعاملني أحسن معاملته ويحسن إلي أهلي زي ما انا هعمل مع أهله ، دايماً ينبهني لو عملت حاجه حرام ويعرفني الصح بهدوء كده ويساعدني ويأخذ بيدي للجنه . يعني هي حاجات كثير بس انا لخصتها بقي

شعر بالإحراج ولكنه نظر إليها بابتسامه وقال :

- ربنا يرزقك بيه ، أستاذن انا بقي

نهضت من مكانها وتوجهت إلي الصالة وهو معها ، غادر المنزل أخيراً بعد كمية لابأس بها من نظرات الإحتقان والإحراج ، عندما سألته والدته عن رأيه رد قائلاً بسخريه :

- دي عايزة تتجوز سوبر مان

تعجبت الأم وقالت :

- يعني إيه ؟

تنهد تنهيدة قويه أخرجت كل ما بداخله وقال بملل :

- عادي مفيش ، عموماً أدينا لسه معانا إسبوع نفكر فيه ، رغم إنني حاسس إننا مش طايقين بعض أصلاً !!

---

دخلت سلمي غرفتها وأغلقت الباب خلفها وإنفجرت منها الضحكات ، نظرت للسماء عبر النافذة المفتوحة وقالت :







أطلق ضحكات عاليه متواصله وقال :

- وهتقولها إزاي بقي يا ذكي وإنت متعرفهاش أصلا ؟

كاد أن يسقط علي الأرض من الضحك والإحراج معا وقال :  
- إخلص يا فاروق وقول

نظر له بتعالي وقال :

- ماشي هقولك علشان صعبت عليا ، البنت دي تبقي نهى اخت محمد الله يرحمه

إقشعر بدنه عندما سمع اسم محمد وقال :

- الله يرحمه

ثم نظر لفاروق وقال محذرا :

- خد بالك منها أووي يا فاروق دي أخت الغالي ، لو زعلتها أنا اللي هاجي أقفلك مكان محمد فاهم

إبتسم فاروق وربت علي كتفه بخفه وقال :

- ما تقلقش يا إسلام دي في عينيا والله ، بس يارب هي توافق

تنهد إسلام بحماس وقال :

- طيب كمل بقي عملتوا إيه تاني ؟

أخذ يتذكر فاروق ماحدث وأخذت إبتسامته تتسع أكثر وأكثر وهو يقول :

- مفيش يا سيدي دخلت وكانت هتموت من الكسوف وحاولت معاها تتكلم كتير بس مفيش فايده ،  
في الآخر بقي أخذت منها كلمتين بالعافيه والحمد لله علي كده ، شكلي كده هطمع وأطلب رؤية  
شرعيه تانيه بس أصلا حتي لو مشوفتهاش تاني انا موافق عليها ..

ربت إسلام علي كتفه بحب وقال :

- بإذن الله هتوافق يا فاروق ، إنت أصلا تستاهل كل خير وهي طالما أخت محمد تبقي اكيد بنت  
كويسه

رفع فاروق حاجبه وأشار بإصبعه لإسلام محذرا :

- يا أستاذ بطل تتكلم عن مراتي المستقبلية لو سمحت ، أو مسمحتش عادي برضو

ضحك إسلام بمرح وقال :

- والله انا فرحانك يافاروق ، ياريت كل الشباب يفكروا زيك كده

تبسم فاروق وقال لإسلام كلماته الأخيره قبل الرحيل :

- عقبالك يا إسلام ، يلا بقي همشي علشان الوقت متأخر ، معلى لو قلقتك بس أنا لقيتني جيت هنا لوحدني كده مش عارف ليه !!؟

- ولا يهملك يا باشا ، يلا تصبح علي خير

- وإنت من أهله ، في أمان الله

---

مر الإِسبوع المتفق عليه من قبل والد سلمي والعريس وجاء والدها ليسألها عن رأيها فقالت بتوتر :

- بابا انا صليت إستخاره ومش موافقه

ضحك والدها بشده وقال :

- يا سبحان الله !!

تعجبت سلمي من رد فعله ، فهي كانت تتوقع أن يصرخ بها كالعاده أو يوبخها فلم تستطع السيطره علي فضولها أكثر من ذلك وقالت :

- في حاجه يا بابا ؟ حضرتك بتضحك ليه !!؟

ضحك مره آخري وقال :

- أصل العريس لسه مكلمني دلوقتي

نظرت له بلهفه وقالت :

- طب وقال إليه ؟

نظر لها للحظات ثم قال :

- قال لي كل شيء نصيب

ارتمت علي الفراش براحة تامه وقالت بفرحه :

- سبحان الله القلوب عند بعضها

ظل فاروق يدور حول الهاتف بخوف ، فهو يريد الإتصال ليعرف رأيها ولكنه أيضا خائف من عدم موافقتها ، قرر أخيرا إستجماع شجاعته وإتصل بوالدها وكان الحوار كالاتي :

- السلام عليكم

- وعليكم السلام ورحمة الله وبركاته ، إزيك يا فاروق يا بني

- الحمد لله يا عمي بخير طول ما حضرتك بخير

- ربنا يبارك فيك يا بني

- كنت عاوز أعرف من حضرتك رأي الأتسه نهي في الموضوع

غمز لها والدها بإبتسامه طيبه وقال :

- والله يا بني ...

وصمت قليلا ، أخذت ضربات قلب فاروق ترتفع أكثر وأكثر وهو يرجو الله ألا تكون رفضته ، أخذ يفرك أصابعه ببعضها البعض بخوف وقلق حتي سمع منه كلمة :

- وافقت يا بني ، الف مبروووووك

إتسعت عيناه ونظر لأمه غير مصدق ما يسمع وسأل بلهفه :

- بجد يا عمي

أبعد الأب سماعة الهاتف عنه ونظر لها قائلاً :

- ده بيقولي بجد يا عمي !! الواد شكله هيموت

كتمت ضحكاتهما بصعوبه وأشارت إليه أن يكمل حديثه :

- أيوه بجد طبعا هو أنا ههزر معاك يا فاروق !!؟

-أسف يا عمي مش قصدي والله ، جزاك الله خيرا وربنا يخليك لينا

- وإياكم يا بني ، يلا سلام عليكم

- وعليكم السلام ورحمة الله وبركاته

أغلق الهاتف وأخذ يهرول إلي امه ويمسك يدها ويقول ببهجه :

- وافقت يا ماما وافقت ، أنا مش مصدق نفسي والله ، ربنا بيكرمني أووووي وانا مستاهلش أي حاجة من ده كله أصلاً

ثم نظر للسماء ورفع يده قائلاً :

- يارب إجلبها زوجه صالحه ليا وإرزقني منها بالذرية الصالحة وقويني علشان أربيهم أحسن تربيته ، تربيته ترضيك يارب يوم ما أقابلك ، تربيته أفخر بيها يوم القيامة ، اللهم لك الحمد كما ينبغي لجلال وجهك وعظيم سلطانتك .

ربتت الأم علي كتفه بحنان وقالت :

- والله يا فاروق يا بني إنت تستاهل كل خير ، وكفايه إني راضيه عليك ليوم الدين أمسك كفها وقبله بسعاده وقال :

- ربنا يخليكي ليا يا أمي ويقدرني علي برك

ظهرت نتيجة التنسيق وبالفعل تم قبول ولاء في كلية الهندسه كمان كانت تحلم ، شعر كل من في المنزل بالسعاده ولكن سعادة سلمي كانت ظاهريه فقط ، فقد كانت تعاني في تلك الفتره بفتور في

قلبها ، ككل إنسان يأتي عليه وقت ويشعر أن إيمانه قل وأنه لن يستطيع مواصلة مسيرته وخصوصا لو كان وحده ، حاولت إخفاء هذه الحالة عن الجميع وكانت تنام طوال اليوم وتستيقظ فقط لأداء الصلاة وتنام مره أخرى ، من سوء حظها أن هذه الحالة أتت إليها في نفس توقيت تنسيق الاء ، في البداية لم يلحظ أحد الأمر ولكن مع مرور الوقت أخذت اختها تلاحظ هذا التغيير وتخبر به والديها .

مر حوالي إسبوع ونصف علي هذه الحالة حتي جاءت إليها أختها ذات يوم لتخبرها ان والدها يستدعيها للحضور ، نهضت ووقفت أمام باب غرفته وطرقت الباب للحظات وسرعان ما سمعت صوته من وراء الباب يأذن لها بالدخول ، نظرت له بابتسامتها المعتاده وقالت :

- حضرتك كنت عاوزني في حاجه يا بابا ؟

أجلسها بجواره وقال بابتسامه :

- مالك اليومين دول يا سلمي ؟

إبتسمت له بحنان وقالت :

- مفيش يا بابا انا كويسه الحمد لله

إختفت الإبتسامه من علي وجهه وقال بجديه :

- بس من ساعة ما ظهرت نتيجة التنسيق بتاع اختك وانتي مش مبسوطه ؟ خير في حاجه ولا إيه !!؟

نظرت له بتعجب وقالت :

- طيب وإيه دخل ولاء في الموضوع يا بابا ؟

ثم انتبهت فجأة وقالت بصوت مختنق :

- بابا هو معقول حضرتك تكون لسه متخيل إني بغير منها !!!

عقد ذراعيه أمام صدره وقال بضيق :

- يمكن !

إنتفضت من مكانها بذهول وقالت :

- إزاااي حضرتك تظن فيا كده !! طيب ما أنا كنت متأكده أصلا إنها هتتقبل في هندسه لأن مجموعها الحمد لله كويس ، وبعدين أنا إيه اللي هيخليني أغير منها مش فاهمه !! أنا مقتنعه بكليتي جدا والحمد لله جددت نيتي وبقيت بحبها وحببت إني أبقي مدرسة ، هغير منها ليه بقي!!؟

نظر لها بوجه خالي من أي تعبير وقال :

- طيب وإيه تفسيرك إنك من ساعة ما نتيجة اختك بانث وانتي نايمه في السرير ومش طايقه تعملي أي حاجة ؟

حاولت كتم غضبها بداخلها لانها تحدث والدها وقالت :

- يعني حضرتك عاوز تعرف أنا متضايقه ليه بابا ؟ لو عرفت مش هتظلمني تاني يعني !!

أوما برأسه إيجابا ، فقالت بتعب :

- علشان حاسه ان قلبي مات يا بابا ، لا بقيت عارفه أقرأ قران ولا أصلي زي زمان ، مبقيتش عارفه أضحك وحاسه إني مخنوقه علطول ، مبقيتش حاسه إني سعيده في حياتي زي الاول ، مبقيتش قادره أستحمل كمية التريقه اللي باخدها دي ومحدش حاسس بيا ، بقيت حاسه إن الدنيا سوده قدامي وإن ربنا مش متقبل مني العباده ، من الآخر مبقيتش حاسه بروحي !!

لكن مع ذلك أنا مطلبتش من حد يساعدي ، وعمرى ما عاملت حد وحش زي ما بتعاملوني ، حرام يعني إني أكتب شويه وأخليني في حالي وأبطل ضحك!!؟ حتي دي كمان هتظلمني فيها يا بابا !!

أنا قلت لحضرتك قبل كده إني عمري ما هغير منها ومقتنعه بنفسى جدا الحمد لله وعمري ما حقدت علي حد أو بصيت لحاجه في إيدى حد ، وحضرتك مربييني من زمان وعارف كده ، لكن لو حضرتك مصّر إني وحشه يبقي خلاص مش مشكله ، كفايه إن ربنا عالم بنيتي لاني أصلا مليش غيره يحس بيا

ممكّن أمشي يا بابا ولا حضرتك عاوز تقولي حاجه تاني ؟  
جذبها من يدها وأجلسها بجواره مره أخرى وظل ممسكا بيدها وهو يقول بحنان :

- إيه يا بنتي اللي إنتي شايله جواكي ده كله ؟

تنهدت بمرارة وقالت :

- حضرتك عارف من زمان إني كتومه ومش بطلع اللي جوايا بسهولة ، علشان كده أرجوكم خدوا



بالكم من كلامكم لأنكم مهما عملتوا برضو مش هعرف أرد عليكم وهشيل جوايا وبس ، ممكن حضرتك بس تدعيلي وانا هبقي كويسه ؟

تنهد بحزن وقال :

- حاضر ، روجي علي أوضتك لو حابه

غادرت سلمى الغرفة وهي لا تدري شيئا كالعاده ، هل والدها قاسي أم حنون ؟ لماذا دائما يغضبها ويوبخها ويظلمها وأيضا تشعر أحيانا انه يحبها ويخاف عليها ؟ سألت نفسها هذا السؤال مئات بل الاف المرات ولكنها لم تجد إجابة كالعاده ، فمن الممكن أن يكون رد فعله هذا نتيجة لانه يحبها ولكن بطريقته؟! لا تعلم شيئا فقررت عدم التفكير في هذا الأمر الآن ، فيكفيها الم قلبها الذي تحمله .

ذهبت إلي حاسبها وقامت بفتح حسابها علي موقع الفيس بوك وأرسلت رسالة لحفصه الغائبه وكتبت فيها :

- حفصه أنا محتاجك أووووي اليومين دول ، أنا حاسه إنني كارهه نفسي ومبقاش ليا نفس أعمل أي حاجه زي زمان ، واقفه مكاني ومش عارفه أتقدم خالص ، مفيش أي حد كان بيساعدني غيرك ودلوقتي مبقاش ليا حد اصلا ، يلا ما علينا ، ربنا يسعدك

أخذت تعيد قراءة المحادثات التي حدثت بينها وبين حفصه وتوقفت عند هذه الرسالة الموجوده في آخر محادثه بينهما :

" لما تحسي إنك تعبتي ومش قادره تكلمي طريقك إستخدمي سلاحك .. معاكي الدعاء والقرآن "

" إفتحي المصحف وانتي بتقولي لـ ربنا يارب إبعثلي رسالة ، إبدأي دوري كل يوم علي رسالة من ربنا ليكي لحد ما توصليلها ، إدعي كتير أووووي ربنا يقويكي ويثبتك ، اوعي يا سلمى تستسلمي للشيطان اووعي حد يضايقك بكلمتين ويخليكي ترجعي عن هدفك "

" معاكي قرآنك ودعانك يا سلمى فاهماني ؟ معاكي سلاحك يا سلمى اوعي تتخلي عنه "

أخذت سلمى تقرأ الكلمات مرة تلو الأخرى وتنهدت بأريحيه وقالت :

- زي ما تكوني حاسه بيا يا حفصه ، يارب أقدر أكلمك تاني في يوم من الايام

ثم أخذت تردد :

- يارب إبعثلي رسالة ، يارب إبعثلي رسالة ، يارب إبعثلي رسالة

تركت الرسائل وهي مازالت تردد جملة " يارب إبعثني رسالة " وذهبت لصفحتها الرئيسية لمتابعه آخر الأخبار ، نظرت أمامها فإذا بها تري منشور مكتوب فيه :

زهرة اللوتس تستمع الآن إلي " اشتقت إليك " شعرت بالحزن بداخلها ، نظرت للسماء وقالت :

- الحمد لله الذي عافاني ، ربنا يهديكي يا زهرة ، ربنا يبعدك عن الاغاني ويعلق قلبك بالقرآن

وقبل أن تهبط لتري منشور آخر لمحت إسم صاحب الأغنية " أحمد سعيد "

أخذت تحدث نفسها قائله :

- أنا شوفت الإسم ده قبل كده ، فين ياربي فين

ثم تذكرت فجأة وقالت :

- أيوه صح ده واحد من المنشدين الجداد اللي حفصه قالتلي عليهم

أخذت تحك ذقنها ببطء وتفكر قليلا ثم ابتسمت قائله :

- مش يمكن دي تكون رسالة من ربنا ليا ، أحملها وأشوف

قامت بتحميلها وبدأت تستمع إلي كلماتها :

ضاقت بيا الدنيا .. لقيتني انسان غريب  
وبقيت انا حاجة تانية .. بجد انسان عجيب  
لقيتني بعدت في تانية .. بعد أما كنت قريب  
لقيت قلبي بقي آسى .. عينيا مافيهاش دموع  
لقيتني بجد ناسي .. أي معنى للخشوع  
خلاص قلبي احساسى .. بيتمنوا الرجوع

وخلص يارب انا راجع ليك .. ندمان بشدة انا بين ايديك  
على كل لحظة ماكنتش ليك .. وكنت فيها عاصيك وناسيك  
يارب راجع ادق الباب .. باب الرحيم باب التواب  
دا لما بعدت شوفت العذاب .. خلاص يارب اشتقت اليك

انا قوالت هاعيش حياتى .. بس انا عايشها حرام  
علشان ارضى شهواتى .. وابقى مبسوط وتمام  
اتارينى هازيد آهاتى .. وكل دا اوهام  
وخلص عرفت حقيقى .. بجد احلى حياة  
لما ينور طريقى .. برضا وحب الله  
يبقى القران صديقى .. ورسولى امشى فى خطاه

وخلص يارب انا راجع لىك .. ندمان بشدة انا بين ايديك  
على كل لحظة ماكنتش لىك .. وكنت فيها عاصيك وناسيك  
يارب راجع ادق الباب .. باب الرحيم باب التواب  
دا لما بعدت شوفت العذاب .. خلاص يارب اشتقت اليك

أخذت تسمع كلماتها بذهول !! فكأنها توصف حالتها تماما ، سمعتها مره تلو الأخرى حتى كادت ان  
تحفظها كاسمها وأخذت تردد :

وخلص يارب انا راجع لىك .. ندمان بشدة انا بين ايديك  
على كل لحظة ماكنتش لىك .. وكنت فيها عاصيك وناسيك  
يارب راجع ادق الباب .. باب الرحيم باب التواب  
دا لما بعدت شوفت العذاب .. خلاص يارب اشتقت اليك

تنهدت بأريحيه وهي تقول مؤكده :

- راجعالك يارب ومش هيهمني حد ، مش هستنى مساعده من حد لإنك معايا دايمًا ، حفصه كانت  
دايمًا تقولي اللي معاه ربنا مش هيجتاج مساعده من حد ، وانا معايا ربنا ومش عايزه أي حاجه من  
حد ، هفوق لنفسي كده وأرجع أحسن من الأول مليون مره وأبدأ أخذ خطوه جديده في حياتي بإذن  
الله ، يارب قدرني وقويني .

أغلقت حاسبها وذهبت لمصحفها ولكن بقلب آخر ، فهي قد سمعت إنشوده واحده فقط ولكن غيرت  
فيها الكثير ، أمسحت مصحفها بإشتياق ونظرت إليه فوقع عينها علي هذه الآية التي أراحت قلبها  
أكثر وأكثر :

"وَنَحْنُ أَقْرَبُ إِلَيْهِ مِنْ حَبْلِ الْوَرِيدِ"

أخذت تنظر للآية بسعاده وتقول:

- فهتمت الرسالة يارب وهنفظها بإذن الله

كان إسلام يتحدث مع اخته هند عندما سمع رنين هاتفه المحمول ، تركها ودخل غرفته فوجد فاروق المتصل فأجاب مسرعا :

- الو
- يا بني أنا مش قتلتك إسمها السلام عليكم
- أيوه أيوه صح ، إستني لما أقفل وأتصل تاني بقي
- يا بابي عليك مش هتبطل رخامه بقي ، السلام عليكم أولا بس
- وعليكم السلام ورحمة الله وبركاته ، هاه متصل ليه ؟
- إقفل يا ض ، إنت أصلا متستحقش الأخبار الحلوه اللي أنا جايبهالك دي
- أخبار حلوه ، ياريت ياخويا حد لاقى
- بص عندي خبرين حلوين وواحد وحش ، تحب نبدأ بيايه ؟
- قول أي حاجه ، المهم تتكلم بس

تنهد فاروق بسعاده وقال :

- أولًا كده يا سيدي نهى وافقت عليا الحمد لله

تنهد بدلع مصطنع وقال :

- هيببيح وإيه كمان  
ضحك فاروق رغما عنه وقال :

- ياوادم بطل بقي ، ثانيا يا سيدي لقيتلك شغل

إنتفض إسلام من مكانه واتسعت عيناه وقال :

- لقيتلي أنا؟! قول وربنا

- وربنا لقيت ، بص هي شركة خاصه مفتوحه من كام سنه كده ، كانوا طالبين مهندسين ومدير

شركتنا قالنا لو تعرفوا حد محتاج وظيفه وكده وانا رشحتك ليهم ، إبقى تعالى بقي بكره وهات معاك اوراقك وربنا يقدم اللي فيه الخير إن شاء الله

- بجد يا فاروق انا مش عارف أقولك إيه ، ربنا يبارك فيك

- يابني عيب ماتقولش كده ده انت أخويا

- طيب وإيه الخبر الوحش بقي ؟

-بص هو مدير الشركة دي صعب حبتين واللي أعرفه إن محدش بيحبه ، بص أنا مش عايز أظلمه بس ده اللي أنا سمعته عنه ، عموما روح وشوف بنفسك

- يا عم وانا مالي ومال المدير ، هو حد لاقى شغل دلوقتي ، هحضر اوراقى وأجيبك بكره بإذن الله

- تعالى علي الساعه ٩ الصبح كده ماشي ؟

- ماشي بإذن الله

- يلا إقفل بقي

تنهد إسلام بدلع مستفز وقال :

- لا إقفل إنت الأول ، هخاف أقفل علي ودنك وتوجعك وإنت عارف أنا حونين إزااي

- ماشي يا ظريف ، مستنيك بكره بإذن الله ، يلا سلام عليكم

-وعليكم السلام ورحمة الله وبركاته

---

- أماما أماما

قالها إسلام وهو يهرول كالأطفال نحو غرفة والدته ، نظرت له بسعاده وقالت :

- مالك يا واد في إيه ؟

أخذ يقفز كالأطفال وهو يقول :

- لقيت شغل ياماما لقيت شغل

ضمته والدته بقوه وقالت :

- يا مانت كريم يارب ، الحمد لله يابني الف مبرووووك

ثم نظرت له بتساؤل وقالت :

- بس لقيته إمتي ده ؟ ما إنت كنت لسه قاعد من شويه ومقولتش حاجه

- لأ ماهو فاروق كلمني دلوقتي وجابلي شغل

- والله يابني فاروق صاحبك ده فيه الخير ومن ساعة ما عرفته وانت حالك اتصلح

أجابها مؤكدا :

- والله فعلا يا ماما ، طلع جدع وراجل بجد ، وانا اللي كنت دايمًا بظلمه ، يلا الحمد لله

- طيب يابني هتروح إمتي تقدم ؟

- بكره إن شاء الله

- بإذن الله هتقبل ، هما هيلاقوا زيك فين يعني ؟

- قولي يارب

---

تقدم إسلام للوظيفه وبالفعل تم قبوله بفضل الله ، لقد كان المرتب صغير بعض الشيء ولكنه رضي به وأخذ يدعو الله أن يرزقه من حيث لا يحتسب ، وبعد هذه المناسبه السعيده قرر أيضا أن يفتح فاروق في الموضوع الذي يفكر فيه من عدة أيام ، فقال له مبتسما :

- فاروق أنا عايز أحفظ قرآن

نظر له فاروق بدهشه ممزوجه بالسعاده وقال :

- بجد والله !



- ربنا يخليك يا إسلام ، بس إشمعني يعني !!؟

تنهد بخبث وقال :

- إيه يعني حرام أدلع اختي الصغيره شويه ، قلت أجيبك ورد ونقعد نتعرف علي بعض بقي وكده

رفعت حاجبها قائله :

- هنستعبط يا إسلام !!؟ نتعرف إزاي يعني مانت عارف عني كل حاجه

جلس علي الفراش ووضع ساقا فوق الآخري وقال بثقه :

- لأ طبعا أكيد مش عارف عنك كل حاجه ، إحكي لي عن نفسك لاني حاسس اني بقالي كثير متكلمتش معاكي

جلست بجواره وقد فرحت بهذا الإهتمام وأخذت تحدّثه عن نفسها لفترة طويلة حتي إنتهت فقال :

- طيب وعندك أصحاب بقي ؟

-أكيد عندي

نظر لما بمكر وقال :

- طيب إحكي لي عنهم

نظرت له نظرة غاضبه وقالت :

- إحكيك عنهم ليه ؟ وإنت مالك بيهم أصلا !!

ضحك ببراءه وقال :

- يا بنتي مش لازم اتظن علي اختي مصاحبه مين وبتتكلم مع مين وكده ؟

أومأت براسها موافقه وأخذت تحدّثه عن سلمى أولا ، حدثته عن أخلاقها وتفكيرها ، عن التغيير المفاجئ الذي حدث بشخصيتها وإقترابها من الله عزوجل وتغيير خطة مستقبلها بالكامل ، عن حبها لهما وحنانها عليهما ، عن إصرارها وعدم يأسها ، عن كل شئ جميل تشعر به تجاه سلمى



أخذ إسلام يستمع إلى الكلمات وهو في غاية السعادة ، لا يعرف لماذا شعر بالسعادة وقتها وهو يسمع عنها ولا يعلم أيضا لماذا الآن فقط فكر في السؤال عنها ، كل ما كان يدور بداخله وقتها انه يريد معرفة كل شئ عنها وفقط ، إنتهت هند من كلامها عن سلمى وبدأت في التحدث عن فاطمه ، لم يرد سماع شئ آخر بعد ما سمعه عن سلمى ، حاول الخروج من الموقف بطريقة مرحة وقال :

- إيه يا ست إنتي رغايه كده ليه ؟

نظرت له بتعجب وقالت :

- يابني مش إنت اللي قلت عاوز تعرف عني أكثر !!؟

إبتسم ببراعة وقال :

- ماشي منا عرفت عنك خلاص ، بس مليش دعوه بصحباتك أنا

وافقته الرأي وقالت :

- صح عندك حق

نهض من مكانه متجها لغرفته وهو يقول بمرح :

- إبقى إدفعي تمن الورد ده بقي هاه

أطلقت ضحكة عالية وتبعتها بنظره ساخره وقالت :

- خد الباب في إيدك يا إسلام ، ربنا يهديك يابني

---

وقف امام شرفة غرفته وأخذ ينظر إلي السماء ويقول :

- ياربى هو في بنات كده !!؟ طيب وهو أنا معقوله أستاهل واحده زي دي بعد كل المصايب اللي عملتها في حياتي دي ؟

نظر للجانب الآخر وقال هامسا :

- بس أنا توبت والله ، وبإذن الله ياربى تكون سامحتني وغفرتلي ذنوبي ، هو معقوله لو انا

أتقدمتها ممكن توافق ؟

عاد بنظره إلي الشرفه وقال :

- طيب هو أنا ليه أصلا دلوقتي بالذات بفكر فيها ؟ ماهي جارتني من زمان ومكنش بيهمني أعرف عنها حاجه قبل كده ، معقوله يكون كلام فاروق عن الحلال والقرب من ربنا أثر فيا وخلاني أنا كمان أفكر زيه ؟ معقوله تكون دي البنت اللي ربنا كاتبهالي علشان يعوضني عن كل مره حزنت وتعبت فيها ؟ معقوله يارب تكوني بتحبني وسامحتني ؟

- طيب وليه لأ ؟ مش دايمًا محمد الله يرحمه كان بيقولي ان ربنا أحن علينا من أي حد ؟ ودايمًا كان بيقولي محدش هيحس بيك غير ربنا ، يا حبيبي يا محمد كان نفسي اوووي تكون موجود جنبني دلوقتي وتشوفني وانا كده ، يارب لو هي من نصيبي قربني ليها وسهلي الامور في الحلال ، ولو مش ليا نصيب فيها ارزقها بالزوج الصالح اللي يسعدها ويحقق لها ما تتمني .

بس انا برضو مش هسكت ، هحاول .. هنخسر إيه يعني !!؟

عاد إلي غرفة اخته وطرقها ودخل مسرعا وقال بسرعه البرق :

- هند أنا عايز أتجوز سلمني

رفعت حاجبها وقالت متعجبه :

- نعم ياخويا!!

تنحنج بخرج وقال مؤكدا:

- والله بتكلم بجد ، أنا عاوز أتقدملها

نظرت له بعدم إهتمام وقالت :

- روح نام يا إسلام علشان عندك شغل الصبح ، إنت شكلك نعست وخرفت !!

قفز من مكانه وجلس متربعا في وسط فراشها وقال :

- مش هنام ، ومش ماشي من هنا غير لما تقوليلي أتقدملها إزاي

صرخت به قائله :

- يا إسلام إنت مجنون !!؟

أطلق ضحكات عاليه متواصله وقال :

- اه اه مجنون ، وبرضو هتجوزها مليش دعوة ، لو ربنا أذن يعني

مطت شفتاها للأمام وقالت بغضب :

- يا إسلام إحنا هنستعبط !! يعني علشان قولتك عليها كلمتين تقوم تقولي عايز أتجوزها !!؟ طب لو كنت كلمتك عن فاطمه كمان كنت هتروح تتقدملها هي التانيه !!

أخذ يحرك رأسه يمينا ويسارا وهو يقول بصوت طفولي :

- تَو تَو سلمي بس

تنهدت بغضب وقالت هامسه :

- لا حول ولا قوة إلا بالله ، ربنا يهديك بابني

قفز من علي الفراش ووقف أمامها مباشرة وقال مؤكدا :

- يا هند والله بتكلم جد ، أنا فعلا عاوز أتقدملها وإنتي لازم تساعديني

عقدت ذراعيها امام صدرها وقالت بإستنكار :

- طيب وإنت لحتت تعرفها بقي علشان تتقدملها !!؟

نظر لها بثقه وقال :

- لأ ما أنا هعرفها في بيت أهلها ، كل اللي أعرفه عنها دلوقتي سمعتها الحلوه وأنا بصراحه يشرفني تكون مراتي بنت زي دي ، كمان كلامك عنها دايمًا كان بيبين أد إيه هي بنت محترمه فعلا وقليل اللي زيها اليومين دول ، يمكن زمان مكنتش بهتم أوي بكلامك عنها بس دلوقتي بتكلم بجد والله

أخذت تحك ذقنها عدة مرات وهي تفكر ثم نظرت له بجديه وقالت :

- يعني أكيد أكيد عاوز تتقدملها ؟

- وربنا اه

تنهدت قائله بقلق :

- بس اللي أعرفه إن هي مش هتوافق تتخطب قبل ما تتخرج ، هي كانت دايمًا بتقول كده ، كمان باباها شديد شوية فمش عارفه هيوافق علي إمكانياتك ولا لأ

نظر لها بتوتر وقال :

- هو عايز يجوزها لواحد غني يعني ؟

- بص مش عارفه بالظبط ، لكن برضو ممكن أجس نبضها كده وأقولك

نظر لها بسعاده وحب وقال :

- يعني هتساعديني بجد ؟

قالت بابتسامه :

- هساعدك علشان أخلص منك بس

- طيب بصي اوعي تقوليها حاجه عليا هاه ، إنتي بس شوفي الأول هتوافق علي المبدأ ولا لأ ، يعني هترضي تتجوز واحد ظروفه زيي كده ؟ كمان إيه مواصفات الولد اللي عايزه تتجوزه ، كمان قوليلها لو جالك واحد مواصفاته كذا وكذا هتوافقي ولا لأ ، كده يعني اكيد إنتي فاهمه أكثر مني في الحاجات دي.

- ماشي أمري لله ، وانا أقول برضو الواد جايبلي ورد وعاملي فيها عم الرومانسي ، أتاريها طلعت رشوة

- هع هع فاهماني إنتي دايمًا أهنود

- سرحاته في إيه يا لوءه

قالتها سلمى عندما دخلت غرفتها لكي تحضر بعض الأشياء ولكن ولاء لم تلحظها ، إنتبهت ولاء وقالت :

- هاه

-بقولك سرحانه في ايه يا بنتي ؟

أسندت وجهها علي كفتها وقالت بحزن :

- إفتكرت العريس التحفه اللي إنتي رفضتیه ده ، بجد لو كان جالي أنا كنت وافقت فوراً !

أخذت سلمي تضحك بشده وتقول :

- إنتي لسه فاكراه ؟ ده من أكثر من شهر يا بنتي ، والله ده أنا بحمد ربنا إن هو كمان رفضني  
علشان مكونش ظلمته معايا

قالت ولاء بإستنكار :

- والله إنتي عبيطه ، وده هتلاقي زيه فين بقي إن شاء الله

نظرت لها بثقه وقالت :

- هيجيلي أحسن منه

مطت شفاتها للأمام وقالت بإستنكار :

- ليه بقي إن شاء الله تكونيش الوزيرة وأنا معرفش ؟!! ولا بتعرفي في علم الغيب!!

جلست علي حافه الفراش ونظرت لها بجديه وقالت :

- لأ مش كده ، لكن علشان أنا عندي ثقه في ربنا إنه مش هيخذلني ، ربنا عالم باللي جوايا وإني  
بجد مش عايزه حاجه من الدنيا غير واحد يكون كل هدفه الجنه ويشدني معاه ويساعدني علي تربية  
أولادنا علي القرآن والسنة.

عارفه إني أقل بكتير من إني أستاهل واحد زي ده ، بس برضو ثقتي في ربنا أكبر من كده ، وكمان  
اللي بيدعي بيقين بأذن الله ربنا هيستجيب دعائه لان الرسول صلى الله عليه وسلم قال : "ادعوا الله  
وأنتم موقنون بالإجابة واعلموا أن الله لا يستجيب دعاءً من قلب غافل لاه". رواه الترمذي ، وكمان  
ربنا قال في الحديث القدسي " أنا عند ظنّ عبدي بي "

علشان كده يا ستي أنا متأكد إن ربنا هيرزقني بالإنسان اللي أنا بتمناه ، ماهو مش معقول هيكون كل هدفي أعيش حياتي صح وأرضي ربنا وربنا هيخدلني ومش هيساعدني ، مستحيل يا بنتي لأن ربنا كريم وأنا واثقه في كرمه .

- يلا إتصلي إتصلي خليكى جدعه يلا يلا يلا

قالها إسلام وهو يقفز في مكانه كالأطفال ويطلب من هند بالحاح أن تتصل علي سلمى لتخبرها برغبتها في الذهاب إليها لكي يتحقق حلمه ويعرف رأيها في الأمر وذلك بعد موافقة والدته أيضا وترحيبها بالموضوع ، إستجابت هند لكلامه وإتصلت بسلمى وهو ينظر لها بترقب وقالت :

- الو سلمى ازيك

- و عليكم السلام ورحمة الله وبركاته ياختي ، الحمد لله تمام جدااا إنتي عامله إيه يا هنود ؟

- كويسه الحمد لله ، بقولك إنتي فاضيه النهارده ؟

- اه فاضيه هروح فين يعني !! إسمعزه ؟

- كنت عاوزه أجيك أشوفك ينفع ؟

- ياسلام إيه الرضي ده كله ، يلا شدي العباية بسرعه وتعالى هستناكي

- ماشي ١٠ دقائق وأبقي عندك بإذن الله

أغلقت هند الهاتف وغمرت لإسلام بسعاده فقال لها :

- هند اوعي تجيبي سيرتي في الموضوع هاه

- ما تقلقش يا باشا عيب عليك

- طيب يلا روعي بسرعه بقي وإسألها كل الأسئلة اللي اتفقنا عليها ماشي ؟

أومات برأسها إيجابا وهي مبتسمه وتركته وذهبت لغرفتها لترتدي ثيابها وتذهب بينما إتصل هو علي فاروق ليعرف ما إذا كان يستطيع مقابلته الآن ام لا ، أجاب فاروق بالموافقه فهبط إسلام الدرج بسرعه وإستلقي اول سيارة أمامه وذهب إلي منزل فاروق ، حضر إليه فاروق فقال إسلام بسعاده :



تسأل نفسك يا تري ربنا دلوقتي راضي عني ولا لا ؟ يا تري أنا دلوقتي باخد حسنات ولا سيئات ؟ لو عرفت تحس بكده فعلا يبقي إنت هتبقي كويس زي ما بتتمني

- طيب أعمل إيه تاني علشان أبقي قريب من ربنا ؟ أنا الحمد لله واضبت علي الصلاة في الجامع وبدأت أحفظ قرآن أهو وكمان قرأت سيرة سيدنا محمد وباقي الأنبياء ، وحاليا بقرأ في سيرة الصحابه ، أعمل إيه تاني بقي ؟

- في حاجات كتير اووي ممكن تعملها ، لو عبادات مثلا ممكن تعمل لنفسك جدول صغير كده وتحط فيه الحاجات اللي هتقدر تواظب عليها يوميا زي مثلا أذكار الصباح والمساء ، عدد معين من التسبيح والصلاة علي النبي والإستغفار ، صلاة السنن وصلاة الضحي ، قراءة سورة الملك قبل النوم ، ورد قرآن مثلا وورد تفسير يومي ، قيام الليل حتي لو ركعتين مع الوتر ، كده يعني

أما بالنسبه للمعاملات فحاول دائما تخليك قدوة بأخلاقك ، عامل كل الناس كويس وإبتسم في وشهم وحببهم في الملتزمين ، وطبعا طبعا بر الوالدين مفيهاش كلام دي ، وخذ بالك من أختك اووي لأنها مسئولة منك ، إستنذن دائما من شغلك وروح صلي ومع الوقت هتلاقي صحابك عملوا زيك ، غص بصرك طبعا وحافظ علي بنات الناس من نفسك ، حاول دائما لو جه سؤال في بالك إبحث عنه وإقرأ فيه وزود معلوماتك ، إتفرج علي برامج دينيه بقدر الإمكان وخلي معاك دائما ورقة وقلم وسجل الحاجات المهمه اللي الشيخ بيقولها وإبدأ في التنفيذ ، اممم ده اللي في بالي حاليا

قال إسلام بمرح:

- معلىش يا فاروق قولهم تاني بقي علشان أكتبهم في ورقه

وكزة في يده بشده وهو يقول بضيق مصطنع :

- إمشي يا إسلام من قدامي

ضحك إسلام بصوت مرتفع وقال :

- خلاص خلاص والله فهمتهم وبإذن الله هبدأ في التنفيذ ، لازم أكون من عمار الأرض ولازم أكون مسلم بجد

- ربنا يثبتك ويقربك منه أكثر

ثم نظر له بتمعن وقال :

- بس قولي إيه سبب القرار المفاجئ ده بقي ؟ يعني إيه اللي فكرت بيا دلوقتي وجاي فجأة تقولي عايز أبقي زيك يا فاروق !!؟



أغض عينيه للحظات ثم نظر له بسعاده وقال :

- علشان قررت اتدوز

ضحك فاروق بمرح وقال :

- تتدوز ! وماله يا خويا مش عيب ، بس برضو مفهمتش إيه علاقة القرار ده بالجواز

تنهد إسلام قائلًا بأمل :

- مفيش يا سيدي شوفت النهارده بنت ماشيه تحت البلكونه بتاعتنا مع مامتها وفجأة كده لقيتني بسأل عليها وعاوز أعرف عنها كل حاجه وفجأة كده برضو حببت شخصيتها أوي ونفس ذات الفجأة لقيت نفسي عاوز أبقي أفضل علشان أستاهلها بجد وأتقدم لها بقي ، عارف إني مجنون بس هو ده اللي حصل والله

أطلق فاروق ضحكات عاليه متواصله وقال :

- طب كل ده جميل بس إيه حكاية إنك شوفتها تحت البلكونه دي بقي ؟ يعني لقيت بنت ماشيه في حالها كده قلت تتجوزها ؟!! وكمان فين غض البصر يا استاذ !

شهق إسلام بخوف مصطنع وقال مازحا :

- لالالا اوعي تفهمني صح ، البنبت دي أصلا جارتنا وصاحبة هند اختي وانا عارفها من زمان ، كمان والله غضيت بصري ، انا لمحتها بس

ضغط علي يده بقوه وقال بسعاده :

- ربنا يوفقك يا إسلام ويجعلها من نصيبك لو فيها الخير ليك

ثم انتبه قائلًا :

- ب S خد بالك من حاجه ، إنت هتبقى كويس علشان ترضي ربنا وتبقي مسلم صح مش علشان هي توافق عليك ، فاهم الفرق يا إسلام ؟

أوما برأسه إيجابا وقال :

- ماتقلش يا فاروق ، أنا بدأت في الطريق ده ومش هسيبه لأي سبب من الأسباب بإذن الله ، كل

الحكاية إنى حسيت انها إنسانه بجد تستاهل كل خير فعلشان كده مش عايز أظلمها معايا وبإذن الله لو ليا نصيب فيها هكون فعلا الزوج اللي هي بتتمناه ، ولو مش ليا نصيب فيها برضو هفضل مكمل في طريقي إن شاء الله

- أيون تمام كده ، ربنا يفعلك الخير

كاد إسلام أن يذهب ولكنه تذكر موضوع غاية في الأهمية فعاد مره آخري وقال بتوتر :

- فاروق صحيح عاوز أسألك في حاجه

- إسأل

صمت للحظات محاولا تجميع كلماته وقال :

- فإكر لما قولتلك إن في واحد أعرفه كان يعرف بنت من علي انت وكانوا بيحبوا بعض وكده

إبتسم فاروق بمكر وقال :

- يياه ده من حوالي سنه ونص او سنتين يابني ، بس اه فإكر ماله ؟

أخذ يفرك يده اليمني باليسري بتوتر وقال :

- هو من ساعتها ندم جدا علي اللي عمله وسابها وتاب الحمد لله ، دلوقتي بقي لو حب يتقدم لواحده وسألته عن ماضيه وكده ، هل المفروض يقولها إنه كان يعرف واحده زمان ولا يكذب عليها ؟

أجاب فاروق بثقه :

- لأ طبعا ميقلوش

تعجب إسلام وقال :

- طيب مش هو كده يكون بيخدعها ؟

تبسم فاروق وقال بحنان :

- لأ يا سيدي مش بيخدعها لأن هو تاب بجد وربنا ستر عليه فمينفعش يروح هو بقي يفضح نفسه ويجاهر بالمعصيه دي ، واجب علي أي حد فينا يا إسلام إنه يستر علي نفسه وميعرفش حد

بالمعاصي التي هو بيعملها ويتوب لربنا من سكات

- متأكد يا فاروق ؟

أوما برأسه إيجابا وقال مؤكدا :

- متأكد والله يابني ، ولو مش مصدق روح بنفسك وإبحث عن فتاوي عن الموضوع ده هتلاقي كلامي صح ، أنا قرئت في الموضوع ده كتير متقلقش

تنهد تنهيده قويه أخرجت كل ما كان يحمله من خوف وقال بفرحه :

- ربنا يريح قلبك يا فاروق

نظر له فاروق بخبت وقال :

- ياه هو صاحبك ده عزيز عليك أوي كده ؟ والله فيك الخير يا إسلام

انتبه إسلام فجأة ولم يستطع تجميع كلماته فقال بصوت متردد :

- هاه ؟ اه طبعا طبعا

بعد قليل إستندن منه إسلام وغادر المكان ، شعر بأن قلبه يطير في الهواء ، فأخيرا قد شعر بالراحه من هذا الموضوع الذي ألمه كثيرا وكان يشعره دوما بالذنب ، كان يعرف انه لن يستطيع الكذب علي خطيبته في يوم من الأيام لأن إسلام والكذب أعداء ولكنه أيضا كان دائما يخاف من رد فعلها حتي بعد علمها بأنه تاب إلي الله وندم علي كل شئ ، لكن الآن وبعد أن أصبح لديه رخصه شرعيه أحس بالراحه أخيرا وأن هذه الصفحه من حياته قد تم غلقها نهائيا ، عاد إلي المنزل فوجد هند لم تأتي بعد فجلس في إنتظارها وهو مابين الخوف والفرح والضحك والحزن والجنون والملل ، لم يعرف كيف مر الوقت ولكنه لم يشعر بنفسه إلا عندما إنتفض من مكانه علي صوت مفتاح الباب وهو يتحرك في مكانه ، دخلت هند وأغلقت الباب خلفها فوجدته أمامها ينظر إليها بلهفه ويقول :

- هاه قوليلي بسرعه عملتي إيه ؟

كانت تتنفس بصعوبه فحاولت الراحه قليلا وقالت بضجر :

- طيب يابني إستني أخذ نفسي حتي !

أجابها متعجبا :

- تاخدي نفسك من إيه يا هند ده إنتي يا دوب جايه من آخر الشارع !  
تركته ودخلت غرفتها ، جلست علي حافة الفراش محاوله إلتقاط انفاسها ، دخل خلفها وجلس علي  
الفراش بجوارها وانتظر حتي ترتاح قليلا وتبدأ في الكلام ، إلتفتت إليه بكامل جسدها ونظرت له  
بحزن وقالت :

- معلىش يا إسلام ..

وصمتت ... نظر لها بخوف وأمسك يديها وهو يحركهما بعصبية ويقول :

- هاه قولي بسرعه حصل إيه ؟

- يابني إستني عليا طيب

- يا هند إخلصي بقي وقعتي قلبي

إنتظرت قليلا حتي يتوتر أكثر وأكثر ثم قالت :

- شكلها كده والله أعلم هتوافق عليك يا إسلام ، هيص يا عم

قفز من مكانه وعاد للخلف قليلا وهو ينظر لها بتمعن ويقول :

- بجد والله ؟

أخذت تفكر للحظات وهي تنظر لتعابير وجهه وقالت :

- يعني ده اللي إستنتجته من كلامها

نظر لها محذرا وقال :

- هند اوعي تكوني قولتيها عليا حاجه

أومات براسها نفيا وقالت :

- يابني مجيبتش سيرتك خالص متقلقش

إقترب منها قليلا وهو ينظر لها بسعاده وقال :

- طيب قوليلي بقي اللي حصل بالتفصيل

- مفيش يا سيدي ، هي قالتلي إنها كل اللي بتحلم بيه إنها تتجوز راجل بجد يشيل مسئوليتها ومسئولية ولادها ، حد يكون عايش بس علشان يرضي ربنا وياخد بايديها للجنة ، يكون قدوة ليها ولغيره ويعلمها دينها ويحفظها قرآن ، نفسها يشجعوا بعض دايمًا علي التقرب من الله عزوجل أكثر ويكون هو ده هدفهم في الحياة أصلاً ، مش مهم عندها إنه يكون عنده فلوس أو شقة ملك أو كلية قمه او كده ، يعني قالت أي كلية مش هتفرق واي وظيفه المهم يكون عنده مرتب يعرف يعيشهم حتي لو صغير هي ممكن تستحمل عادي ، طبعًا يكون بيحبها اووي وبيحب روحها أكثر من شكلها ومش بيبص لواحد غيرها أبدا وراضي بيها وبيناقشها لو في حاجة مضايقه منها ، باختصار يا إسلام عاوزاه مسلم بجد ، هو ده شرطها الأساسي

أخذ إسلام يستمع إلي كلمات اخته وهو في غاية السعاده ومع كل كلمة يزداد إحترامه لسلمي أكثر وأكثر ، شجعتة هذه الكلمات علي ان يكون الرجل الذي تتمناه لسلمي بحق ، أخذ قراره بأن يعدل من حاله قليلا ومن ثم يتقدم لها وينتظر من الله الخير ، إنتبه علي صوت هند وهي تنادي عليه قائلة :

- إيه ياعم روحت فين ؟

- هاه ؟ معاكي اهو

- طيب هتقدملها ولا إيه ؟

- اه بإذن الله ، بس في حاجات كده هظبطها في نفسي الأول وبعدين أروحلها

تذكرت هند شيئًا هاما فقالت بحرج :

- صحيح في حاجة مهمه لازم تعرفها

نظر لها بتوتر وقال :

- خير ؟

- هي قالتلي إنها مش بتفكر في موضوع الجواز ده دلوقتي خالص ، لما تتخرج الاول

نظر لها بحزن وقال :

- الكلام ده أكيد يعني ولا إيه ؟ يعني خلاص كده مفيش أمل السنادي ؟

نظرت له بإستفزاز وقالت :

- أمل ماتت منتحره هيهيهيهي

وكزها في ذراعها بقوه وقال بغضب :

- مش وقت إستظراف دلوقتي يا هند والله

أطلقت هند ضحكات عاليه أعضبته أكثر ثم هدأت قليلا وقالت :

- بس علي فكره في حل

إنتفض من مكانه وقال بلهفه :

- إيه قولي

- كان في عريس متقدملها من فترة كده وباباها ضغط عليها وخلاها شافته ، متهيألي المبدأ متاح يعني حتي لو بنسبه ٥٠%

ثم أجابت بثقه :

- يعني لو أنا قولتلها إن في شخص كويس ومواصفاته اللي هي بتحبها ممكن توافق تشوفه

إرتمي علي الفراش براحه وقال :

- أيوه كده ريحيني ، بآذن الله هحاول اتقدملها قريب جدااااا

نظرت له هند وقالت بسرعه هائله :

- طيب وقريب لييه ؟

ثم أمسكت بهاتفها بسرعه أكبر وضغطت علي الازرار وفي خلال لحظات وجدها تقول :

- سلمى إسلام اخويا عاوز يتقدمك !

نظر لها بذهول ، إتسعت عيناه وضغط علي أسنانه بشده حتي كاد أن يحطمها وأمسكها من يدها بعصبية وقال بصوت خفيض حتي لا تسمعه سلمى :



- كان زماننا دلوقتي سامعين ناس عماله تصوت تحت !

نظرت لها متعجبه وقالت :

- إشمعني !!؟

رفع حاجبه وقال بمكر :

- علشان كان هيبقي في جثه مرميه تحت الشباك دلوقتي ، بس الحمد لله لحقت نفسها

عادت للخلف قليلا ونظرت له بخوف مصطنع وقالت :

- يعني رخم ومجنون وكمان قتال قتله ؟ !!

ثم أردفت قائله بمرح :

- الله يعينك يا سلمي يا بنتي

إتسعت إبتسامته وهو يقول :

- الله يعينها فعلا !

---

كانت سلمي تشاهد أحد البرامج الدينيه لداعية شاب عندما أنتها ولاء ونظرت لها بتعجب وقالت :

- إيه يا بنتي اللي إنت عامله ده !!؟

أجابتها بكل براءه :

- بغض بصري !

مطت شفتاها للأمام وقالت بإستنكار :

- يعني حظالي ورقة بتاع لوحه ورسالي عليها ولد كرتون ضحكته لحد ودانه ولزقاها علي وش  
الراجل وتقوليلي بغض بصري !!؟ ده اللي هو إزاي يعني ؟ !!

إرتفعت ضحكات سلمي وهي تنظر لولاء بتعبيرات وجهها الغاضبه وحركات يدها السريعه وقالت :



- عادي يا ولاء أهو تغيير ، بدل ما أنا علطول بتفرج علي الديكور أو علي التيشترات بتاعتهم زفرت بضيق وقالت :

- ويعني فيها إيه لما تبصي للراجل وهو بيتكلم ؟ هو هياكلك !!؟

التفت لها بكامل جسدها وقالت بجديه :

- لا يا ولاء مش هياكلني ، بس غض البصر فرض علينا لان ربنا سبحانه وتعالى قال " وَقُلْ لِلْمُؤْمِنَاتِ يَغْضُضْنَ مِنْ أَبْصَارِهِنَّ " وإنتي عارفه إني من النوع اللي مش بعرف أركز غير لو بصيت في وش اللي بيتكلم علشان كده بحاول أعمل أي حاجه تساعدني علي غض البصر ، وبإذن الله مع الوقت أعود علي التركيز وأنا باصه في الأرض ، إدعيلي إنتي بس

قالت ولاء بتعجب :

- طيب بس ده شيخ يعني مفيهاش حاجه !!

تبسمت قائله بهدوء :

- يعني يا ولاء هو الشيخ ده مش راجل !!؟ أي راجل مهما كانت وظيفته أو درجه قربه من ربنا لازم نغض بصرنا عنه ، وحتى روحي إسألني بنفسك البنات عن رأيهم في الدعاه وخصوصا الدعاه الشباب هتلاقيهم عمالين يقولوك فظيع وهيببيح ووسيم ومعرفش إيه !! رغم إنه شيخ أهو لكن برضو في الأول وفي الآخر هو راجل وماينفعش نفضل نبص عليه كده

- ماشي يا سلمى براحتك ، بس إنتي كده مش بتزهقي يعني ؟

أومات برأسها نفيا وقالت :

- لأ بالعكس والله ده أنا بكون مرتاحه جدا ، وكمان لما أكون مش ببص علي شباب خالص أكيد ربنا هيجازيني خير ويحلي في عيني زوجي المستقبلي حتي لو هو شكله عادي ، أخطت واثقه في كرمه بقي

تركتها ولاء وغادرت بينما دفنت هي رأسها بين كفيها وأخذت تدعو الله قائله :

- يارب إحفظني وإرضي عني وقربني منك أكثر ، يارب قويني وساعدني علي غض البصر وإحفظلي قلبي وإبعد عني أي فتنه ، يارب جنبني الفتن مظهر منها وما بطن ، يارب عوضني عن كل لحظه حزن عيشتها وإرضي عني وإرزقني باللي يساعدني وياخد بإيدي للجنه .

وبعد ثلاث أسابيع طرقت هند باب غرفة أخيها ودخلت وقالت بحيره :

- يا إسلام إنت مش هتروح تتقدم لسلمي بقي ولا إيه ؟ يابني ده الدراسه خلاص قربت جدا ، يأما تروح اليومين دول يأما بقي تستني لما نتخرج ونكون فاضيين

نهض من علي الفراش بتثاقل وقال بحيره أكبر :

- والله يا هند كنت لسه بفكر في الموضوع ده دلوقتي

نظرت له بتعجب وقالت :

- طيب ومستني إيه ؟

تنهد بتوتر وقال :

- هروح أقولهم إيه يا هند ولا اتقدم بايه ؟ إنتي من ساعة ما قولتيلي إن باباها عاوز يجوزها لواحد معاه فلوس وأنا قلقان ، وزى ما إنتي عارفه الفلوس اللي بابا الله يرحمه سايبهالي مش هتكفي جهازي كله والمرتب بتاعي برضو صغير ومش هيعمل حاجه

- طيب يا إسلام ما تروح وتشوف واللي فيه الخير يقدمه ربنا

صمت قليلا ثم نظر لها بتساؤل وقال :

- تفتكري ممكن باباها يوافق عليا ويخفف عني طلباته شويه ؟ وهل هي اصلا هتوافق تتنازل عن شبكه كبيره وفرح مش عارف فين والكلام ده ؟

ربتت علي كتفه مطمئنة إياه وقالت:

- لو علي سلمي متقلقش هي مش بتفكر في الحاجات دي خالص وأكيد هتوافق عليك لو لقت إنك فعلا الشاب اللي هي بتتمناه

ثم نظرت له بحيره وقالت :

- أما بقي باباها فبصراحه معرفش ، بس إحساسي بيقولني إنه هيعصرك

ضربها علي ذراعها بخفه وقال :

- لا أنا كده إتطمنت بصراحه ، مش عارف من غيرك كنت هعمل إيه بس ؟

قالت بلهفه :

- هاه أروح أفاتها في الموضوع بقي ولا إيه ؟

أوما برأسه نفيا وقال :

- لا إستني شويه هفكر تاني وأخذ رأي واحد صاحبي في الموضوع وأشوف

غادرت الغرفة وإستلقي هو علي الفراش وأخذ يفكر في الأمر مرة آخري

---

في المساء إتصل إسلام بفاروق ليقابله ويأخذ رأيه في الأمر وذلك لأنه دائما يحب سماع آراء فاروق ويتق بها ، تقابلا وصافحه فاروق وسأله عن أحواله فقال :

- الحمد لله أديني مطحون أهو في الشركه دي ربنا يقدرني ، بس إنت عارف ؟ رغم إني كثير جدا بحس إن أنا الوحيد اللي براعي ربنا في شغلي والباقي نايمين ومقضيها أكل وهزار وشاي ومعرفش إيه ، لكن برضو ببقلي مرتاح جدا لما باخد المرتب وبحس إن هو حلال وإني أستحقه فعلا

نظر له فاروق نظرة إعجاب ثم تنهد بحسره وقال :

- هو ده الحال في معظم الوظائف للأسف ، المهم بس الواحد يراعي ربنا في شغله وميبصش للتاني ويقول إشمعني لأن كل واحد فينا يوم القيامة هيتحاسب علي نفسه وبس

أوما برأسه مؤيدا ثم تذكر فجأة موقف ما جعله يقفز في سعادته كالأطفال وقال :

- عارف يا فاروق ؟ حصلت حاجه تحفه أوووي في شغلي الإسبوع ده

نظر له فاروق بلهفه وقال :

- خير ؟

تنهد بأريحيه وقال :

- فإكر لما قولتي أبقى أسيب الشغل وقت الصلاة وأروح أصلي وأرجع ؟ رغم إن ساعات المدير كان بيضايتي ومش بيوافق إلا إني برضو كنت بصر علي رأبي وأروح ، الإسبوع ده بقي لقيت اتنين صحابي في الشغل بقوا يجوا يصلوا معايا وبيقولولي إنهم كان نفسهم يعملوا كده من زمان مع المدير بس مكانوش بيقدروا

أمسك فاروق كفه وربت عليه بخفه وقال :

- والله أنا فخور بيك يا إسلام فوق ما تتخيل

إستمع إسلام إلي هذه الكلمات وهو في سعادته بالغه وقال مازحا :

- عارف بيقولولي إيه كمان ؟ بيقولولي إنت ناقصك لحيه وتبقي شيخ علي حق ، رغم إني مبعملش حاجه غير إني بعاملهم بما يرضي الله وبصلي وتبقي ربنا في شغلي ، سبحان الله ميعرفوش أنا كنت إيه في الأول ، اللهم لك الحمد .

نظر له فاروق بدهشه وقال :

- تصدق بالله ؟ أنا كنت لسه بفكر في موضوع اللحيه ده ، من زمان اووي وأنا نفسي أعفي لحييتي بس مش عارف إيه اللي كان مأخرنى لكن من يومين كده كلمت نهى وإتفقنا إننا نقرأ أكثر عن اللحيه والنقاب وبعدين نقرر ، بس كلامك ده حمسني ، بشرة خير إن شاء الله

تبسم له إسلام وقال :

- ربنا يوفئك يا فاروق

نظر له فاروق بحماس وقال :

- طب بقولك إيه يا إسلام ؟ ما تيجي نعفي لحييتنا إحنا الإثنين وأهو نكون بنساعد بعض علي رضا ربنا وناخذ الثواب سوا

نظر لها بدهشه وقال :

- لأ يابني لحيه إيه دلوقتي ، صعب اووي وأنا مش أدها أصلا

- طيب فكر تاني في الموضوع وإقرأ عنها برضو وشوف

- إن شاء الله

وفجأة تذكر إسلام الموضوع الأساسي الذي أحضر فاروق لأجله فقال :

- بقولك إيه يا فاروق ، فإكر البنت اللي قولتلك إني عاوز أتقدم لها دي ، إيه رأيك أروح دلوقتي وأنا مش جاهز ولا إستني ولا أعمل إيه ؟ أنا خايف تروح مني

نظر له بتربق وقال :

- إنت مش جاهز خالص يعني ولا إيه نظامك ؟

أجابه بالنفي قائلا :

- لأ الحمد لله بابا الله يرحمه سايبلي مبلغ كويس بس مش هيكفي برضو ، وكمان سمعت إن والدها عاوز حد غني يعني فقلقت بصراحه

نظر له فاروق بحماس ممزوج بالسعادة وقال :

- أيوه يابني روح طبعاً وبإذن الله ربنا يقدم اللي فيه الخير ، يعني ممكن يوافقوا علي إمكانياتك وممكن إنت تطول الخطوبه شويه لحد ما تجهز نفسك وطبعاً ساعتها مرتبك كله هيتحوش للجهاز وممكن ربنا يرزقك بمكافئة أو تثبيت أو أي حاجة تزودلك المرتب شويه متقلقش .

رجع إسلام بذاكرته قليلاً ثم قفز من مكانه بسعاده وقال :

- تصدق فعلاً كانوا بيقولوا إنهم كل سنه في شهر ٩ بيثبتوا واحد من اللي شغالين جداد ، وده طبعاً بيكون علي حسب الكفاءه والضمير وكده ، وإحساسى بيقولي إني انا اللي هتثبت علشان أنا أكثر واحد بشتغل في الموظفين الجداد ، احم احم ده بفضل ربنا طبعاً

ربت علي كتفه عدة مرات وقال مطمئناً إياه :

- خلاص يبقي إنت تروح تتقدم فوراً وربنا يبسرلك الأمور

ثم قال مؤكداً :

- وبعدين يا عم لو ليك نصيب فيها محدش هيقدر يمنعكم عن بعض ، كل دي حجج البشر بيعملوها لكن اللي ربنا كاتبه هيحصل مهما كان ، إتظمن بقي

إبتسم إسلام بسعاده وقال :

- تصدق والله أحسن حاجة قولتها ، هي فعلا لو من نصيبي محدش هيقدر يمنعها عني ، هروح بقي وربنا يبسر الأمور إن شاء الله ، إدعيلي هاه

- حاضر

عاد إسلام إلي المنزل وذهب مباشرة إلي غرفة هند وقال بحماس :

- يلا روعي قوليلها إني عاوز اتجوزها بقي

أخذت هند تضحك ضحكات متواصله أغضبته فقال :

- وهو أنا قولت حاجة تضحك للدرجادي يعني !!؟

أشارت إلي الساعة المعلقة علي الحائط وقالت بتعجب :

- إنت شايف الساعة كام ؟

نظر للساعة وقال بعدم فهم :

- اه ١٠ ه فيها إيه يعني ؟

أخذت تضحك مرة آخري وهي تقول :

- وأنا اروح أبات عندها دلوقتي يعني ولا أعمل إيه ؟

نظر للساعة مره آخري فوجدها العاشرة مساءا بالفعل فضرب جبهته بيده وقال محرجا :

-أوبس ، معلى مش مركز

نظرت له بمكر وقالت :

- اللي واخذ عقلك بقي

أزاحها علي الفراش وقال مازحا :

- نامي يا هند يا حبيبتي شطوره ، وبكره إن شاء الله إبقى روجي عند طنط سلمي جارتنا !  
- ماشي هعديها مزاجي ، بكره بإذن الله أروحها ونشوف

بالفعل ذهبت هند في اليوم التالي إلي منزل سلمي ، جلست كل منهما تحدث الآخري عن الكثير من أمور الحياة ، كانت سلمي تتحدث بينما هند تفكر كيف تفتحها في الأمر وأخيرا إستجمعت شجاعتها وقالت :

- سلمي هو إنتي ممكن تتخطبي دلوقتي ؟

نظرت لها سلمي متعجبه وقالت :

- إيه يا هند ماتتي عارفه رأيي من زمان في الموضوع ده !!

تحنحت قائله بخرج :

- طيب لو جالك واحد زي ما بتتمني بالظبط توافقي ؟

نظرت لها بتوتر وقالت :

- وده هيجيلي مينين ده ؟ قولني يا هند اللي عندك علطول قلقتيني

تهدت تهديه قويه وحاولت ترتيب كلماتها وقالت :

- أنا جايالك عريس وفيه تقريبا كل المواصفات اللي إنتي عاوزاها ، هينفع ييجي دلوقتي ولا المبدأ مرفوض أصلا ؟

أسندت رأسها بداخل راحة كفها وقالت بقلق :

- طيب وهو مين العريس ده بقي ؟

أجابتها علي الفور :

- إسلام أخويا

إتسعت عينا سلمي وقالت بتعجب :

- إسلام أخوكي !!؟  
نظرت لها هند فشعرت بالتوتر وقالت بصوت هامس :

- اه وحش ولا إيه ؟

تحنحت سلمى بإحراج وقالت متعذره :

- لأ والله مش قصدي ، علي عيني وعلي راسي طبعاً ، بس يعني إنتي عارفه تفكيرى كويس  
ومتهايلى إسلام أخوكي مش زي الشخص اللي في بالي خالص !!

تنهدت هند بأريحيه وقالت :

- لأ يا سلمى ده إسلام إتغير خالص ، ده حتى يا بنتي ....

وأخذت تقص عليها التغييرات التي طرأت علي أخيها ، شعرت سلمى بالسعادة وهي تستمع إلي  
كلمات هند ، ليس لأنها تتحدث عن إسلام بحد ذاته ولكنها دائماً ما تفرح عندما تعلم أن هناك شخصاً  
آخر عرف الله وإقترب منه أكثر ، إنتظرتها سلمى حتي إنتهت من كلماتها وكادت ان تتحدث ولكنها لم  
تجد ما تقوله فصمتت ، قالت لها هند متسائله :

- هاه إيه رأيك ؟

أجابتها بقلق :

- مش عارفه بصراحه

- طيب حتى قوليلي رأيك مثلاً في شكله أو في الكلام اللي سمعته او أي حاجه

شعرت بالإحراج فقالت بصوت خفيض :

- بصي الكلام اللي أنا سمعته جميل طبعاً ويفرح أي حد ، وبالنسبه لشكله فأنا مشوفتهوش من  
زمان فمش مركزة في ملامحه يعني ، بس أصلاً مش مهم عندي الشكل ، أهم حاجه من جواه عامل  
إيه

أخذت تحرك يدها بحماس وهي تقول :

- طب قولى بقي يلا يلا يلا



ضحكت بشده وقالت :  
- أقول إيه بس ؟

- قولي إنك موافقه ، أنا عارفه إنك موافقه يا أروبه بس مكسوفه ، وعموما يا ستي اقعدوا مع بعض وشوفوا هتتفقوا ولا لا ؟

نظرت لها سلمي بجديه وقالت :

- طيب إنتي متأكده من الكلام اللي قولتيه عليه ده ؟

ثم قالت بمرح :

- مش علشان أخوكي بقي وكده هاه بدل ما أعرف الحقيقه وأعورك

ضحكت مؤكده وقالت :

- لا والله كل اللي قولته عليه حقيقي ، وأصلا إنتوا من بعد ما بدأتوا تلتزموا وإنتوا شبه بعض جدا وأنا بصراحه عاوزه أخلص منكم إنتوا الإثنين وارتاح بقي

نظرت لها بقلق وقالت :

- طيب بصي هفكر وأقولك

نهضت هند من علي الفراش متجهه إلی باب الغرفه وهي تقول بجديه :

- خلاص قشطه هقوله إنك وافقتي ، إبقي عرفي باباكي بقي علشان ميتفاجئش لما إسلام يتصل بيه

فقزت سلمي من مكانها في فزع وقالت :

- يا هند إنتي بتهزري !!؟

أطلقت ضحكات متواصله وقالت :

- إنتوا ما ينفعش معاكم إلا كده ، يلا أنا همشي بقي ماشي ، سلام عليكم

وقبل ان تستطيع الكلام وجدتها قد إختفت من أمامها فقزت علي الفراش بخفه وسعاده وقالت :

- والله مجنونه !

عادت هند إلي المنزل فوجدت إسلام في إنتظارها ، نظر لها بلهفه فلم تعره أي إهتمام فقال بحزن :

- رفضت صح ؟ أنا كنت حاسس ، يلا كل شئ نصيب

و غادر المكان متجها إلي غرفته ، أسرعت الخطي خلفه وقالت بتعجب ممزوج بالمرح :

- ياعم هو أنا هلاقيها منك ولا منها ، بطلوا جنان بقي جنتوني معاكم وأنا غلبانه أصلا وفي حالي

جلس علي حافة فراشه ونظر لها بيأس وقال :

- ماهي لو كانت وافقت كنتي هتقولي علطول ، خلاص بقي حصل خير

جذبتة من يده وأوقفته أمامها مباشرة وقالت :

- ركز معايا كده وبلاش شغل الأفلام ده هاه ، وإسمعني كويس

نظر لها بترقب وقلق ولم يتحدث فأمسكته من ذراعيه ونظرت في عينيه وقالت بصوت مرتفع :

- إسلام سلمي وافقت

لم تنتبه إلا عندما سقط أمامها علي الأرض فضربت علي قلبها بقوه وصرخت قائله :

- إسلام

حاولت تحريكه يمينا ويسارا ولكنها لم تستطع فهولت إلي الخارج وصرخت بأعلي صوتها مناديه والدتها ولكنها قبل أن تصل إلي غرفة والدتها سمعته يقول بمرح :

- بت يا هند

عادت للغرفة ونظرت إليه بفرع وهو مازال مستلقيا علي الأرض وقالت بخوف :

- إسلام مالك ؟

نظر لها بتعجب مصطنع وقال :

- إيه ياختي عمرك ما شوفتي واحد ميت من الفرحة ولا إيه !!؟

نظرت له بإندهاش وقالت :

- إنت بتهزر ؟ ولا إنت تعبان بجد ؟ ولا متفاجئ ولا إيه !!؟

نهض من مكانه وجلس علي حافة الفراش محاولا التعديل من هيئة رابطته عنقه الغير موجوده أصلا ونظر لها بغرور وقال :

- يا بنتي أتفاجئ من إيه ؟ منا عارف إنها هتوافق أصلا ، هو أنا في واحده تقدر ترفضني

عقدت ذراعيها أمام صدرها وقالت بعصبيه :

- يا إسلام إنت بتستعبط !! هو ده وقت هزار أصلا ؟ وبعدين هي مقاتليش إنها موافقه اوي يعني

إنتفض من مكانه وهو ينظر لها بخوف ورفع حاجبه قانلا :

- او مال إنتي بتقولي وافقت إزاي ؟

جلست بجواره ووضعت ساقا فوق الأخرى وقالت بتعالي :

- ههههههاي شوف من شوية كان عاملي فيها رئيس الجمهورية ودلوقتي أخره فرخه مشلوله

وكزها في ذراعها بشده وقال بصرامه :

- هند إخلصي وافقت ولا لا !!؟

رفعت حاجبها ونظرت له باستفزاز ولم تتحدث ، وكزها مره أخرى بعصبيه وقال :

- يا بت إخلصي

نظرت له بإبتسامه وقالت مازحه :

- خلاص حرام صعبت عليا هقولك وأمرني لله ، بص هي طبعا كانت مكسوفه وكده ومقاتليش حاجه ، بس يعني مكانتش رافضه فأنا بقي أخذتها في دوكة وقولتها هقول لإسلام إنك موافقه وطلعت

أجري ، بس يا سيدي

نظر لها بإعجاب وقال مشجع ا:

- جدعه يا هنود ، طالعه راجل من ظهر راجل

نظرت له بإستهزاء وقالت :

- هنشوف ياخويا الراجل ده هيكون شكله عامل إزاي لما عمو باباها يكلمك

نظر لها بثقه وقال :

- متقلقيش ، هستخبي تحت السرير بس

أخذت سلمى تفكر في الامر في حيرة ، فكلام هند عن إسلام أسعدها بينما هي رافضه تماما لفكرة الخطوبه أثناء الدراسة ، ولكن ماذا إذا كان إسلام رجلا بحق ؟ ماذا لو كان هو الشاب الذي تتمناه ؟ هل ترفضه بسبب إنشغالها بالدراسة ؟ أم تقبل به وتجلس معه لتعرف عنه أكثر وبعدها تقرر ؟ تنهدت بعمق ثم تذكرت كلمات هند وإنها سوف تخبر إسلام ان سلمى وافقت علي رؤيته بالفعل ، فطردت الأفكار عن رأسها وحاولت التفكير في أمر آخر.

كيف ستخبر والدها ؟ هل سيوافق عليه أم انه اقتنع بوجهة نظر سلمى ولن يتدخل في حياتها قبل ان تتخرج ؟ أخذت تفكر كثيرا حتي إستجمعت شجاعتها وقررت الذهاب لإخبار والدها بالأمر كي يكون علي علم عندما يتصل به إسلام ، ذهبت إلي غرفته وطرقت بابها بخفه وقالت هامسه :

- بابا حضرتك صاحي ؟

أجابها من الداخل علي الفور :

- تعالي يا سلمى

دخلت وجلست بجواراة وقالت بهدوء :

- بابا في عريس عاوز يتقدملي وأنا مش عارفه أعمل إيه ؟ حضرتك رأيك إيه ؟

نظر لها بتعجب وقال :

- مش إنتي قولتي مش هوافق علي حد قبل التخرج ؟ بس عموما يعني لو غيرتي رأيك أنا معنديش مشكله طبعا ، بس هو مين العريس ده ؟  
أجابته علي الفور :

- إسلام أخو هند صاحبتني

نظر لها بتفكير وقال :

- طيب وده مواصفاته إيه ؟

أخذت تتذكر كلمات هند وقالت مبتسمه :

-هو مهندس ومحترم وشايل مسئولية هند ومامته من زمان وشغال في شركة كده بس نسيت إسمها

نظر لها بإعجاب وقال :

- مهندس ، طيب حلو جدا يعني هيعيشك في مستوي كويس

إبتلعت ريقها وقالت بتوتر :

- اه طبعا إن شاء الله

إبتسم لها قائلا :

- خلاص ماشي نشوفه واللي فيه الخير يقدمه ربنا

نظرت له بسعاده وقالت :

- هقول لهند بقي علشان تخليه يتصل بحضرتك

- ماشي

---

وبعد ثلاثة أيام قالت هند وهي تتجه مسرعه إلي غرفة أخيها :

- إسلام سلمي إتصلت بيا وبتقولي إنها بلغت باباها بالموضوع خلاص ، دلوقتي بقي المفروض تتصل بيه إنت وتحدد معاه ميعاد

نظر لها بسعاده وقال :  
- قشطه بقي

ثم قال بحيره :

- هما الناس بيقولوا إيه في الحاجات اللي زي دي ؟ يعني أتصل بيه أقوله يا عمي أنا عاوز أتجوز بنتك !!؟

أطلقت هند ضحكات متواصله وقالت :

- ياعم أنا مالي قول اللي إنت عاوزه ، المهم تتكلم بس

ثم أمسكت بهاتفها وقامت بالإتصال بوالد سلمي وأعطته الهاتف علي الفور ، تفاجئ من سرعتها ونظر لها بفزع وقبل أن يستطيع التحدث سمع صوتا يقول :

- السلام عليكم

إبتلع ريقه قانلا بحرج :

- و عليكم السلام ورحمة الله وبركاته

صمت للحظات محاولا الحصول علي أي كلمة ولكنه لم يجد ، أخذ ينظر لهند بقلق ويحاول إستغاثتها لتخبره بأي شئ يقوله ولكنها لم تفعل فسمع الصوت مره آخري يقول :

- مين معايا ؟

قال بتوتر :

- أنا إسلام يا عمي أخو هند صاحبة الأنسه سلمي بنت حضرتك

- أهلا يا إسلام إزيك ؟

- الحمد لله يا عمي بخير

ثم تنحنح قانلا :

- كنت حابب أحدد ميعاد مع حضرتك علشان أجي أتقدم للأنسه سلمي

قال بجديه :

- طيب يابني إحنا فاضيين بكره او الإسبوع الجاي اللي يريحك

- خلاص بإذن الله نيجي بكره ، ممكن علي الساعه ٧ كده كويس ؟

- تمام كويس

- ماشي يا عمي بإذن الله قبل الميعاد هتصل بحضرتك ، سلام عليكم

- وعليكم السلام ورحمة الله وبركاته

أخذ يكرر الضغط علي زر الإغلاق للتأكد من أن والدها لن يسمعه بعد الآن ، إرتمي علي الفراش بإجهاد قاتلا لهند :

- مكنتش أعرف إن الموضوع صعب أوي كده ، أنا حاسس إنني قربت أنصهر

نظرت له بإستعلاء وقالت :

- ههههاي وأخيرا بقي هعرف أفرح فيك ، قولتلي بقي إنني راجل من ظهر راجل هاه ؟

قذفها بالوساده بمرح ثم إبتسم برجاء وقال :

- طيب الله يخليكي يا هند هاتيلي الحته اللي علي الحبل بقي ولمعيلي الجذمه وكده يعني ، ولو عندك شويه برفيوم من أي نوع ميضرش برضو

رفعت حاجبها قائله بغضب :

- ألمعك الجذمه ؟ أهني دي آخرتها كمان !! أنا خلاص دوري خلص لحد كده ، قابل بقي يا معلم

---

- يا سلمي تعالي عاوزك

قالها والدها بعدما تحدث مع إسلام وحدد معه موعد الرؤية الشرعيه ، حضرت علي الفور وقالت بإبتسامتها المعتاده :

- نعم يا بابا

نظر لها بجديه وقال :

- العريس هبيجي بكره بعد المغرب إن شاء الله  
نظرت له بانتباه وقالت :

- بكره بكره يعني ؟ اليوم اللي طالع ده ؟!!

أجابتها ضاحكا :

- أيوه بكره اليوم اللي طالع ده

عادت للخلف قليلا وقالت بحياء :

- ماشي يا بابا اللي تشوفه

تركته وعادت إلي غرفتها وهي تحدث نفسها بصوت مرتفع قائله بتعجب :

- بكره ؟ طب بكره إزاي ؟ أوام كده ؟!! إستر يارب

سمعتها ولاء فاقتربت منها وقالت بدهشه :

- هو إيه اللي بكره ؟

تنهدت بسعاده وقالت :

- إسلام أخو هند جاي يتقدملي بكره

قفزت ولاء من مكانها وقالت بفرحه :

- إسلام ؟ كويس جداااا ، ده ولد شيك وروش آخر حاجه

ثم نظرت لها باستنكار وقالت :

- بس إنتي اكيد مش هتوافقي عليه أصلا !!



تبسمت سلمى وقالت :

- شيك وروش ؟ طب والله كويس ، وضيقي عليهم بقي كلمة ملتزم

نظرت لها بتعجب وقالت :

- ملتزم إزاي؟! !!

حاولت إستفزازها وقالت بسعاده :

- أيوه يا بنتي ماهو من سنه وشوية كده بقي معقد زيي الحمد لله ، يعني دلوقتي شيك ومعقد في نفس ذات اللحظة ، والله حاجه تفرح

ثم نظرت لها بعدم فهم وقالت :

- بس صحيح إنتي إزاي عرفتي إنه شيك وروش زي ما بتقولي ؟ ده أنا نفسي صاحبة اخته اهو بس معرفش عنه حاجه

قالتها علي الفور :

- لا ما أنا كنت دايمًا بشوفه مع اصحابه في الشارع ، يلا ما علينا المهم إنتي توافقي بس

تنهدت بحيره وقالت :

- قولي يارب

---

في اليوم التالي إرتدت سلمى ملابسها وجلست علي الفراش بتوتر كعاده كل فتاة في ذلك الوقت ، سمعت جرس الباب فإزادت ضربات قلبها بشده ، إقتربت من باب غرفتها وفتحت منه جزء صغير لتستطيع رؤية أي شئ ولكنها مع الأسف لم تري شيئًا ، ولكنها سمعته وهو يتحدث مع والدها ومن الواضح ان والدته فقط هي التي معه ، أخذ يحدث والدها عن عمله وأخلاقه وعائلته ووالده المتوفي وحياته وأشياء من هذا القبيل ، بعد عدة دقائق سمعت أصوات أقدام والدها تقترب من غرفتها فتبينت انه ات ليأخذها ، توترت أكثر حتي وجدت باب غرفتها يُفتح من قبل والدها وهو يقول لها :

- يلا يا سلمى

سارت خلفه علي إستحياء وجلست في المكان الذي أشار إليه والدها ، ظل الاب يتحدث عن إبنته

ودراستها وأخلاقها ومعاملتها لهم وهي صامته تماما لا تتحدث ، تبتسم فقط ، نظرت والدتها لوالدها نظرة ذات معنى ، قام الأب وطلب من سلمي الجلوس مكانه وإستئذّن هو للذهاب للداخل قليلا ليحضر شئ ما ، بينما نهضت والدّة سلمي بصحبة والدّة إسلام وجلسا في الغرفة المفتوحة علي الصالة في مواجهة إسلام وسلمي مباشرة ، نظر لها مبتسما وقال :

- ازيك ؟

أجابت بخجل :

- الحمد لله

صمت قليلا وأخذ يفرك يده بالآخري في توتر ويحدث نفسه قائلا :

- فين الإسئلة اللي كنت محضرها !!

كاد أن يضرب رأسه بيده ليتذكر أي شئ ولكنه تذكر انها ستراه فأحس بالإحراج وحدث نفسه مره آخري قائلا :

- ياض مانت لساتك طويل عطول ، إشمعني دلوقتي ، يارب أي حاجة شكلي بقي وحش

ثم وجد نفسه يحدثها بدون تفكير :

- بتحبي الرغي ؟

نظرت له بتعجب ممزوح بالخجل وقالت :

- رغي ؟!!

إنتبه لما قال فتتحنج بإحراج قائلا :

- هكلمك عن نفسي يعني ، تحبي أختصر ولا أقولك كل حاجة ؟

ظلت تفكر للحظات وهي تقول لنفسها :

- طيب لو قولتله يقول كل حاجة عن نفسه ممكن يقول مدلوقه ، وفي نفس الوقت برضو انا عاوزه اعرف كل حاجة ، متهيأي ده حقي أصلا !

إجابته علي الفور :

- لا إفضل حضرتك قول كل حاجة تحبها

نظر لها مبتسما وبدأ حديثه قائلا :

- إحنا عندنا ٢ إسلام ، إسلام بتاع زمان وإسلام بتاع دلوقتي ..

أنا عيشت أكثر من ٢٠ سنة من حياتي كده بدون هدف ، كان هدفي الوحيد أكون عايش مبسوط ومتفوق وبس ، مكنتش أعرف أنا مخلوق ليه ولا مهمتي في الدنيا دي إيه ولا أي حاجة ، كنت بمعنى أصح مستهتر ومش بعمل حاجة مفيدة ، يمكن الحاجة المفيدة الوحيد اللي عملتها هي اني اتحملت مسئولية ماما وهند وكمان ده مكنتش بمزاجي ده كان غضب عني لما بابا الله يرحمه مات.

أما بقي دلوقتي الموضوع مختلف ، يمكن إتأخرت شويه بس الحمد لله ربنا هداني ، من حوالي سنتين إلا شويه كده بدأت أقرب من ربنا وأصاحب صحبة صالحه ، بدأت أعرف أنا عايش ليه ؟ عرفت إن هدفي الأساسي هو الجنة ، وإن كل حاجة بعملها في دنيتي دي المفروض توصلني للجنة ، مذاكرتي وشغلي ونومي وأكلي وجوازي وأولادي وأهلي وكل حاجة بعملها في حياتي لازم أعملها بس علشان أرضي ربنا ، عرفت يعني إيه بجد إحساس إنك تستشعر قرب ربنا منك ، تحس بجد بكلمات القرآن بتلمس قلبك ، تحس إنك مش عايز حاجة من الدنيا دي غير رضا ربنا وبس ، أي نعم أنا لسه في بداية الطريق لكن بحمد ربنا في كل وقت إنه هداني قبل ما أموت وأنا بعيد .

السبب بقي في تغييرني من إسلام رقم ١ لإسلام رقم ٢ هو حبيبي وصديق عمري محمد الله يرحمه

محمد ده كان كتله خير وحنان ماشيين علي الارض ، كان دايمًا بيوجهني للطريق الصح ودايمًا واقف جنبني في كل مشكله تقابلني ، كان بيحبني أكثر من نفسه وكان بيقولني كتير اوووي اننا لازم نقرب من ربنا قبل ما نموت بس أنا كنت مستهتر اوي ساعتها ومكنتش متخيل أبدا انه ممكن يروح مني كده بين يوم وليله ، ومن ساعتها بقي بدأت أفوق لنفسي وأعرف أنا عايش ليه وأقرب من ربنا وأفهم أكثر عن ديني وكده ، رغم إن هو مش معايا دلوقتي بس روحه عايشه جوايا أصلا وبإذن الله أي حاجة حلوه بعملها دلوقتي تكون في ميزان حسناته .

نظر لها بابتسامه وهو يمسح علي عينيه ببطء حتي لا تخرج منها دموعه حائره ، تنهد بعمق وقال :

- هو ده بقي إسلام

أخذت سلمي تستمع إلي كلماته وهي ما بين السعاده والحزن والتأثر والفخر ، أحست بمشاعرها مختلطة تماما وما إن إنتهي حتي قالت بصوت خفيض :

- ربنا يرحمه

تبسم وهو يقول بأدب :

- ممكن انا بقي أسألك ؟

- إتفضل

صوب نظرة تجاهها وقال :

- مين هي سلمى ؟

إتسعت إبتسامتها وهي تقول :

- أرغي برضو ؟

أوما برأسه إيجابا وقال بمرح :

- اه إرغي

تنهدت بعمق وهي تنظر للارض وبدأت حديثها قائله :

- سلمى برضو نفس نظام حضرتك كده ، يعني كانت عايشه حياتها كلها كده وخلص ، كانت دايمًا بتحس إن ليها دور في الحياة بس هي مش عارفه إيه هو ، بتحس إن حياتها ناقصه حاجه معينه بس هي مش عارفها ، من الآخر كنت عايشه وخلص زي ناس كتير لحد ما ربنا رزقني ببنته من علي الفيس إسمها حفصه عرفتني علي جروب كده شقلب حياتي كلها ، إتعلمت منه حاجات كتير جدا ، عرفت أنا عايشه ليه وإيه هدفي في الحياة ، بدأت أغير من نفسي والحمد لله بطلت حاجات كتير كنت بعملها غلط ولسه بحاول أكمل طريقي أهو ، كمان غيرت تفكيري تماما وأهدافي ، دلوقتي بقيت أهدافي كلها متعلقه بالجنه وبقيت بعمل أي حاجه علشان أرضي ربنا وبس ، مش هنكر ان ساعات بييجي عليا وقت ضعف كده ومش يكون عارفه أعمل أي حاجه ، ويمكن كمان الموضوع ده زاد بعد ما حفصه سابنتي واتجوزت ، بس برضو الحمد لله ربنا مقويني وبيرجعني تاني للطريق المستقيم.

أحس إسلام بالسعادة وهو يستمع إلي كلماتها ، فكأنها تتحدث عنه هو وليس عن نفسها ، راوده سؤال كان لا بد منه فقال بلهفه :

- لو ربنا رزقك بزوج كويس بس فقير هتوافقى ؟

همت بالتحدث ولكنه قاطعها مسرعا وقال :

- عاوزين نتفق علي حاجه الأول ، كل كلمة هنقولها هنا هنكون مقتنعين بيها ١٠٠% ماشي ، يعني مش عايزين نزوق الكلام والحاجات دي ، أكيد كل إنسان فينا مهما كان كويس برضو جواه حاجات وحشه ، علشان كده كل واحد فينا هيقول اللي بي فكر فيه بكل صدق حتي لو هيبان انه وحش في النقطة دي ماشي ؟ وطبعا علي الطرف الثاني إنه يحسن الظن تمام ؟

إبتسمت له وقالت :

- علي فكره أنا أكثر شخص بكرهه في حياتي أصلا الكذاب واللي بيخلف وعده

ثم أردفت قائله :

- علشان كده بقي أنا او عد حضرتك إنني هتكلم بكل صدق ، مبدأيا كده علي حسب درجه الفقر ده ، وعلشان أكون صادقه مش هقدر أجزم إنني هقدر أعيش في عشه فوق السطوح مثلا ، لكن لو شقه صغونه كده حتي لو إيجار والمرتب صغير شويه مفيش مشكله ، وطبعا الشبكة والحاجات دي كلها مش فارقه معايا طالما الإنسان بيخاف ربنا فعلا وهياخد بإيدي للجنه .

أحب إسلام صراحتها ، فكان من الممكن أن تقول انها تقبل زوجها فقيرا و فقط ، ولكنها أرادت ان توضح له رأيها بالتفصيل كي يكون علي نور ، سألتها مره آخري قائلا :

- لو قولتلك قوليلي صفات زوجك المستقبلي في جملة واحده وبعدين فسريها في جملة برضو هتقوللي إيه ؟

أخذت تفكر قليلا ثم قالت :

- إجابتي هتكون " يكون حد بيخاف ربنا بجد وهدفه الجنه وبس "

والتفسير بقي " إنه لو خاف ربنا فعلا وعاش حياته كلها بيعمل لآخرته أكيد هيكون إنسان كويس بلاشك " سألتها ثانية :

- طيب والصفات اللي حباها تكون في شخصيته ؟

نظرت له في حيرة وقالت :

- يعني يكون راجل بجد ، مسنول ، صادق ، خلوق ، عارف يقول إيه وإمتي ، مش بيرجع في كلمته ، بيساعد أهل بيته ، من الآخر يكون حد قدوته النبي عليه الصلاة والسلام ، يحاول دائما يشوف سيدنا محمد كان بيتصرف إزاي ويعمل زيه

هم أن يسألها مرة أخرى ولكنه سمع أذان العشاء فنهض من مكانه وقال باسمه :

- أنا هروح أصلي وأجي تاني علشان نكمل

ثم صوب نظره تجاهها وقال :

- ولا مجيش ؟

نظرت إلي الارض بخجل ولم تتحدث ، فقال بمرح :

- أجي تاني ولا أروح علي بيتنا بقي ؟

إنكشيت في نفسها أكثر وكادت أن تنصهر من الإحراج فأحس بها وقال بطيبه :

- خلاص نكمل مره تانيه بإذن الله ، يلا السلام عليكم

نادي علي والدته ووقف عند الباب في إنتظار والد سلمي ليودعه قبل المغادره ، صافح كل منهما الآخر وهبط درجات السلم كالأطفال وهو يقول لوالدته بسعاده :

- والله حلوه حكاية الرؤية الشرعيه دي يا حجه ، ما تيجي نعمل كده كل يوم

ضربته علي كتفه بمرح وقالت :

- إمشي يا واد بدل ما حد يسمعنا ونتفضح

أوصلها إلي المنزل وذهب هو لأداء الصلاة وعندما عاد وجد هند تنتظره بلهفه فدخل غرفته ولم يعرها أي إهتمام فقالت بغضب :

- يا سلام يعني أخذت مصلحتك مني وطنشتني علي كده؟! قولي عملت إيه يا عم !

رفع حاجبه قائلا بتعالى :

- عاوزه حاجه يا أنسه ؟

وكزته في ذراعه بشده وقالت بضيق :

- إسلام خلص بجد !

جلس علي حافة الفراش ونظر لها بسعاده وقال :

- هيببيح ماشي ، مبدأيا كده يا ستي أول ما قعدت قدامها حسيت إنني معاق مكنتش عارف انطق ولا كلمة وكل الاسئله اللي كانت في دماغني طارت والحمد لله ، روحت بقي قعدت أحكيلها عن نفسي وهي كمان حكلي عن نفسها وكده وبس

رفعت حاجبها قائله بإستنكار :

- ياراجل !! هو ده بس اللي حصل

ضربها علي كتفها بطرف يده وقال بخجل مصطنع :

- ما تكسفنيش بقي يا هند الله

ضحكت قائله :

- أهم حاجه بس عملت فيها مؤدب ولا عرفتها إنك مجنون ؟

- والله يا بنتي أنا حاولت أعمل مؤدب علي قد ما اقدر بس اللي فيه طبع بقي ، عموما متقلقيش أنا هعرفها إنني لاسع حبتين أو هخليكي تقوليها ، إحنا أتفقنا علي الصراحه في كل حاجه .

ثم نظر لها مستكرا وقال :

- وبعدين هو حد لاقني واحد كيو ت زيي كده اليومين دول ؟

كادت ان تضحك ولكنها تذكرت شيئا هاما فجأة وقالت :

- صحيح إتفقت مع باباها إنك هتبلغه برأيك إمتي ؟

ضرب رأسه بشده وقال بدهشه :

-أوبس ، تصدقي نسيت !

---

عادت سلمي إلي غرفتها وهي في غاية السعاده ، فكلمات إسلام جعلتها تشعر وكأنه الشخص الذي تبحث عنه طيلة حياتها ، يفكر مثلها وأهدافه وصفاته قريبه منها وأيضا بدأ إلتزامه في نفس الفترة التي بدأت فيها هي ، كانت تشعر وكأنها تجلس أمام نفسها وليس امام شخص آخر ، كل هذا جعلها

تشعر بالراحة المبدئية تجاهه ، قطعتها ولاء من تفكيرها عندما دخلت عليها قائله بمرح :

- هاه عملتي إيه يا عروسه

إرتمت سلمى علي الكرسي المجاور لها وقالت بسعاده :

- عملت كل خير

نظرت لها بلهفه وقالت :

- هاه يعني وافقتي ولا لا

رفعت حاجبها قائله بتعجب :

- أوافق علي إيه يا بنتي ؟ هو أنا لحقت؟! مش لما أصلي إستخاره الأول وافكر كده

جلست بجوارها قائله بهمس :

- طيب هتبلغهم برأيك إمتي ؟

إنتبهت سلمى فجأة وقالت :

- تصدقي بابا مقالش حاجه عن الموضوع ده ، ولا إسلام كمان !

أطلقت ضحكات متواصله وقالت :

- الواد إتلخ يا عيني ، يلا ما علينا ، المهم يعني هتعرفوا رأي بعض إزاي ؟

أجابة سلمى بابتسامتها المعتاده :

- أولا متقوليش واد علشان كده عيب ، ثانيا عادي أكيد هند هتتصل بيا في أي وقت وتقولي رأييه  
وبعدها بقي أنا أقول رأيي

ضحكت ولاء بمرح وقالت :

- عيب؟! وماله

ثم إلتفت لها بانتباه وقالت :



- طيب قوليلي حسيتي إنك عجبتيه يعني ؟ تلقاه يا عيني إتصدم لما شافك وكأنك لسه صاحيه من النوم كده

زفرت سلمى بضيق وقالت :

- ولاء إحنا مش إتكلما في الموضوع ده قبل كده ؟ وقولتك ساعتها رأيي وهفضل متمسكه بيه ، وبرضو مش هحط نقطه ميك اب واحده علي وشي وهطلع بطبيعتي جدا ، لو عجبه كده تمام معجبهوش يبقي خلاص ده نصيب ، أكيد يعني مش هفرح لما أكب وشي في جردل ميك اب والولد يا عيني يعجبه الشكل وبعد الجواز يشوفني علي الطبيعه ويتصدم !!

انا بحب شكلي كده وواتقه في نفسي الحمد لله ، واللي مكتوبلي هيتجوزني علي شكلي ده ومن غير ما أظطر إني أخدعه او اظهر بشكل غير شكلي ، وساعتها يا ستي لما نتجوز هيبقي يشوف شكلي بالميك اب براحتة .

تنهدت ولاء بملل وقالت:

- ماشي يا ستي براحتك ، بس ده الطبيعي يعني !!

أومات برأسها نفيا وقالت :

- الطبيعي فعلا إنك تكوني علي طبيعتك تماما ، علشان لما يتجوز يشوف الأحلي مش الأوحش ، فهماني ؟ وبعدين أبسط حقوقه يعني إنه يبقي عارف شكلك الحقيقي ، صح ولا إيه ؟

- ماشي

---

في اليوم التالي ظل إسلام يدور في غرفته في حيرة ، فهو لم يستطع التحدث مع سلمى إلا قليلا ولم يعرف عنها سوي القليل ، ذهب لغرفة والدته وطرق الباب بخفه وقال بهدوء :

- ماما إنتي صاحيه ؟

نهضت من فراشها بتثاقل وقامت بفتح الباب وقالت بحنان :

- أيوه صاحية تعالي

دخل الغرفة وجلس بجوارها وقال بجديه :

- ماما هو إنا ينفع نروح لسلمي تاني ؟ علشان إمبراح ملحقتش أتكلم معايا كتير يعني ولسه معرفش حاجه عنها برضو .

إبتسمت قائله بحنان :

- يعني إنت لسه مش عارف تحدد إذا كنت موافق ولا رافض؟

تنهد قائلا بسعاده :

- هو أنا غالبا يعني موافق ، بس برضو حابب أعرف عنها أكثر وكده ، ينفع نروح مره كمان ولا خلاص كده ولازم أقول رأيي ؟

ربتت علي كتفه قائله بابتسامه :

- اه ينفع عادي ، خلي اختك تكلمها وتشوف رأيها إيه في الموضوع ده ، بس خد بالك خليها تجس نبضها الاول وتشوف مايله للقبول ولا للرفض ، علشان لو هي رفضت هيكون شكلك وحش لو عرفت إنك عاوز تروح تشوفها تاني ..

نهض من مكانه وقال بحماس :

- متقلقيش يا كبيره ، هروح بقي أشوف البت هند

وقبل أن يغادر الغرفه وجد هند بانتظاره وهي تقول بمرح :

- تم سماع كل شئ بنجاح ، والآن سوف يصل هذا الكلام إلي الأخت سلمى ويقال لها إنك موافق  
وبتستعبط نياهاهاهاهاهاها

أمسكها من شعراتها ورفع حاجبه قائلا بمرح :

- إبقى إعملها كده وأنا هوريكي ، فأكرة الجثه اللي كانت هتكون تحت الشباك هاه ؟

أفلتت شعرها من يده وابتلعت ريقها قائله بخوف مصطنع :

- تمام يا فندم تم نسيان كل ما قيل وجاري الإتصال بسلمى

عادت لغرفتها وإسلام خلفها وأمسكت بهاتفها وقامت بالإتصال بسلمى وقالت :

- السلام عليكم

- وعليك السلام ورحمة الله وبركاته ، أخيرا بطلتي ألودى

- بطلت ياخيتى بطلت ، المهم عاوزه أعرف رأيك فى الموضوع

نظرت سلمى للمرآه وهى متعجبه وقالت :

- رأيى فى إيه يا بنتى هو أنا لحقت ؟ ده أنا كمان لسه مصليتش إستخاره والله

نظرت هند لإسلام بسعاده وقالت بصوت مرتفع :

- إيه ؟ بتقولى موافقه ، يا ألف نهار أبيض يا ألف نهار مبروك

إنتابتها حاله من الذهول وقالت بصراخ :

- موافقه إيه يا هند إنتى بتستعبطى ؟

ثم نظرت للجانب الآخر وقالت بتساؤل :

- وكمان بتعلي صورتك كده ليه ؟ اوعى يكون فى حد جنبك يا هند !

غمزت هند لإسلام وقالت ببراءه :

- لأ مفيش حد جنبى ده إسلام بس

زفرت سلمى بضيق وقالت بصوت هامس :

- هند إنتى بتهرجى ؟!! فى حد يعمل كده ؟!! إتفضلى صلحي اللي عملتیه ده بقى علشان خليتى شكلى وحش حرام عليكى

أطلقت هند ضحكات عاليه وقالت :

- يا ستي مش بهرج ولا حاجه

ثم نظرت لإسلام وقالت :

- ما قالتش إنها موافقه ياعم ، أنا اللي بستعبط

ثم عادت لسلمي مرة أخرى وقالت :

- المهم كنا عاوزين نيجي مره كمان ينفع ولا إيه ؟

تنهدت بحيره وقالت :

- مش عارفه ، قولوا لبابا وشوفوا رأيه إيه ؟

قالت بسرعه هائله :

- قشطه ، يعني موافقه إننا نيجي تاني ، ماشي هقول لإسلام يكلم باباكي ، يلا سلام

وأغلقت الهاتف بسرعه ، نظر لها إسلام بتعجب وقال :

- ليه اللفه دي كلها ؟ ما كنتي قولتي اللي إحنا عاوزينه وخلص !!

صوبت نظرها تجاهه وقالت بجديه :

- كان لازم أجننها شويه علشان أحس من طريقة كلامها إذا كانت موافقه ولا لا ، ولما حسيت انها ممكن تكون موافقه قولتها إننا جايين وقفلت بسرعه علشان متخرجش

ثم نظرت له بثقه وقالت :

- في حاجات كده يا إسلام لازم تستخدم فيها ذكائك ، ومن الذكاء إنك تستعبط في بعض المواقف علشان متخرجش اللي قدامك وبرضو توصل للي إنت عاوزه .

نظر لها إسلام بفخر وقال بمرح :

- تصدقي إنتي برنصه

نظرت له بتعالي وقالت :

- عارفه عارفه

---

إتصل إسلام بوالد سلمي وطلب منه الحضور لعمل رؤية شرعية ثانيه قبل إخبارهم بقراره ، وافق الاب علي ذلك وتم تحديد الموعد في الإسبوع القادم ، كانت سلمي أيضا سعيدة بهذا القرار ، فهي لم

تعرف شيئا عن إسلام سوي انه تحول من شخص غير ملتزم إلي شخص أكثر جديه وملتزما ليس إلا ، لا تعرف شيئا يذكر عن حياته ولا عمله ولا قراراته ولا مسؤولياته ولا أراءه في بعض الأمور ولا أي شئ آخر سوي ما قاله هو وما قالته هند عنه ، مر الإسبوع ببطء شديد ولكنه إنتهي أخيرا وجاء يوم المقابله ، عاد إسلام من صلاة العصر وما أن دخل منزله حتي سمع رنين هاتفه المحمول ، أجاب فإذا به فاروق فقال مبتسما :

- يا راباااا إنت لسه فاكرنى؟! عمال أتصل بيك طول الإسبوع وإنت مش بترد عليا !

ضحك قليلا وقال علي الفور :

- أنا تحت البيت

أسرع إسلام الخطي نحو الشرفه وأطل منها فلم يري شيئا فقال متعجبا :

- إنت فين ؟

قال فاروق مازحا :

- يا عم إنزل بس وهتشوفني

هبط درجات الدرج علي عجل ووقف أمام الباب فلم يري شيئا ، أمسك بهاتفه وكاد أن يتصل علي فاروق مرة أخرى ولكنه سرعان ما ظهر أمامه قائلا بمرح :

- تاتاتاتاه ، إيه رأيك بقي في المفاجئه دي ؟ شكلي حلو صح ؟

عاد إسلام للخلف وهو ينظر له ذبهول ثم قال مداعبا إياه :

- عملتها برضو يا مجنون ، يعني مش طولت دقنك بس ، لا كمان جلبيه بيضا وحركات

أطلق فاروق ضحكات عاليه متواصله وقال :

- طولت دقني !! إسمها أعفيت لحيتي يا عم الحاج ، هفضل أعلم فيك لحد إمتي بس؟! !!

جذبه إسلام من لحيته وقال بمرح :

- والله حلوه ، أهو الواحد يلاقي حاجه يشدك منها برضو

ثم أخذ يلعب في شعره ليستفزه وقال :

- والشعر الحلو ده بقي مش هيتغطي ولا إيه ؟ لأ ومسرح وحافظ كريم وعاملي فيها برنس ، مش لايق علي فكرة

أبعد يده بخفه ورفع حاجبه قانلا بابتسامه :

- لأ حلو كده وعاجبني ، عقبالك بقي يا أخ

أخذ يحرك رأسه يمينا ويسارا عدة مرات وهو يقول برفض :

- لأ يابني بعيده اووي وصعبه كمان ، خليني ماشي واحده واحده كده

تنهد فاروق بسعاده وقال :

- بس عارف ؟ بقيت مرتاح اوووي دلوقتي لما أعفيتها وحسيت كده إني مسئول وقدوه وبحاول دايمًا أكون مثال للملتزم اللي بجد من الداخل والخارج ، كمان والله اللحية هي اللي بتربيك مش إنت اللي بتربيه ، لأنك لو فكرت تعمل أي حاجة حرام بتلاقي نفسك تلقاني بتقول أنا ملتحي ما ينفعش أعمل كذا ، فبتساعدك بقي علي إنك تكون أفضل ، كمان بصراحه لما قرئت حديث الرسول صلي الله عليه وسلم :

" قصوا الشوارب وأعفوا اللحى ، خالفوا المشركين " رواه البخاري ومسلم

وإن جمهور العلماء إتفقوا علي وجوب إعفاء اللحية وحرمة حلقها أخذت قراري بقي إني أعفيتها علشان أتشبه بحبيبي وقدوتي سيدنا محمد عليه الصلاة والسلام وأتبع سنته زي ما ربنا قال في القرآن :

" وَمَا آتَاكُمُ الرَّسُولُ فَخُذُوهُ وَمَا نَهَاكُمُ عَنْهُ فَانْتَهُوا "

" لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ "

بجد دلوقتي أنا مبسوط فوق ما تتخيل يا إسلام وبقيت بندم علي كل لحظه عيشت فيها من غير لحيه ، متضايق من نفسي اوووي ومش عارف إزاي كان بيجيلي قلب أحلق دفتي ، بس الحمد لله إن ربنا هداني في الوقت المناسب وقرئت في الموضوع ده بقي علشان مفضلش جاهل كده طول عمري ، كمان قرار نهى بإرتداء النقاب شجعني اووي وبقينا لحيه ونقاب هيبيح بقي ، الحمد لله علي الراحه اللي فيها دلوقتي

نظر له إسلام بتعجب وقال :

- هي كمان لبست النقاب ؟

أجابه مبتسما :

- اه الحمد لله ، رغم إني مش هينفع أشوفها تاني بس برضو أنا مبسوط من القرار ده ، وبإذن الله نحاول نظبط الإتفاقات بتاع الجواز علطول ونقرب كتب الكتاب شويه بقي

رفع حاجبه قانلا بحزن :

- مش هينفع تشوفها كمان؟! ليه ؟

تنهد بأريحيه وقال :

- بص يا سيدي " الخطوبه ماهي إلا وعد بالزواج " يعني أنا بالنسبه لها راجل غريب والحكم اللي هيمشي علي أي راجل غريب لازم يمشي عليا أنا كمان ، الفرق بس إنه يجوز ليا أروح عندهم وأتكلم معاها علشان نقرب أفكارنا ونتفق علي أساسيات حياتنا وكده ، لكن طبعا يكون الكلام ده بدون خلوه وفي وجود محرم يعني وعلي قدر الحاجه والله أعلم طبعا

نظر له بضيق وقال :

- الواحد حاسس إنه مش عارف أي حاجه في الدين والله ، وخصوصا بقي إني تقريبا كده والله أعلم داخل علي خطوبه ولازم أقرأ في الضوابط بتاع الخطوبه وكده

قفز فاروق من مكانه بسعاده وقال :

- خطوبه؟! !!إمتي ده وحصل إزاي ؟

نظر له بتعالي وقال :

- ماهو يا استاذ لو كنت بتترد علي التليفون كنت عرفت إني اتقدمت للبنت اللي قولتلك عليها دي وروحتلها مره وبإذن الله النهارده رايح تاني ربنا يبسر بقي ، إدعيلي يا شيخنا

ربت علي كتفه بحنان وقال :

- ربنا يتملكم علي خير يا إسلام لو فيكم الخير لبعض ، وبعدين ياعم منا كنت عاوز أعملهالك مفاجئه

ثم نظر له ضاحكا وقال :

- مش كفايه ياخويا إني مستحملتش أستني لحد ما اللحية تطول ع الآخر وجيت أقولك علطول أهو

إبتسم قائلا بمرح :

- ماشي يا عم كتر خيرك

أمسكه من يده وقال بابتسامته المعتاده :

- هروح انا بقي يا عريس علشان تلحق تحضر نفسك ، ربنا يوفقك ويتممك علي خير

- ماشي يا فاروق نوررتني ، يلا السلام عليكم

- وعليكم السلام ورحمة الله وبركاته

---

بعد صلاة المغرب أعد إسلام نفسه لزيارة سلمى للمره الثانيه ، إرتدي أفضل مالديه هو ووالدته  
وذهب إليها ، طرق الباب بخفه ودخل المنزل وجلس مع والدها قليلا ثم خرجت هي بخمارها وحيائها  
المعتاد ، جلست أمامه وبدأ حديثه معها قائلا :

- أنا قولت بقي أجي مره كمان علشان ملحقناش نتكلم المره اللي فاتت يعني

إبتسمت بخجل ولم تتحدث فنظر لها بجديه وقال :

- إحنا إتفقنا إننا هنتكلم بكل صراحه صح ؟ وبناء عليه فأنا أحب أعرف عن شخصيتك أكثر ، يعني  
إيه الحاجات اللي بتضايقك ؟ إيه اللي ممكن تستحمله ؟ طباعك وإيجابياتك وسلبياتك وكده يعني ،  
وطبعا ده بس علشان أفهمك أكثر وأعرف هل ممكن يكون في توافق في تفكيرنا وشخصياتنا ولا لا

ثم تنحنح قائلا بمرح :

- معلى أنا صريح شويه ، بس بصراحه بشوف إن الحاجات دي مهمه جدا ، لأن ممكن اتنين  
يكونوا ملتزمين جدا وكويسين بس شخصياتهم غير بعض وميعرفوش يتفاهموا ويحصل بينهم  
مشاكل كتير بسبب الموضوع ده

ثم إبتسم قائلا :



- يلا معاكي المايك

نظرت للارض بخجل وقالت :

- مبدأيا كده أنا متفانله جدا وقويه إلي حد ما ، يعني مش عندي حاجه إسمها مستحيل وبحاول دائما أدوس علي نفسي علشان أعمل الصح ، مش بيهمني حد طالما أنا بعمل اللي يرضي ربنا ، كتير أووي بتناقش وبختلف مع الناس بس دائما الحمد لله محافظة علي هدوني ومش بتخانق مع حد لو الحوار إشتد أو كده ، ده طبعا مش حاجه من عندي ولكنه فضل من عند ربنا إن طبيعتي مش بعرف أتخانق أصلا ، بس ده ميمنعش إني ممكن أنفجر كده كام مره بس في الغالب يعني هاديه .

في حاجه مهمه بقي في شخصيتي لازم زوجي المستقبلي يبقي فاهمها لأنها هيتوقف عليها حياتنا كلها تقريبا ، أنا مش عارفه هي حاجه حلوه ولا وحشه بس برضو لازم أقولها لأنها مهمه جدا بالنسبالي ، أنا من النوع اللي مش بيعرف يتخانق أو ي لكنه بيثيل جواه ، يعني دائما لما حد يتكلم عليا وحش أو يظلمني أو يظلمني غطانه في حاجه أو كده بحاول مره واثنين وتلاته وعشره إني أوضح وجهة نظري ، لو لقيت إستجابته يبقي تمام ، ولو لقيت الإسلوب برضو فضل حاد فأنا مش بعرف أتكلم وبنسحب في هدوء .

طيب أنا بقول الكلام ده ليه دلوقتي ؟

لأن الموضوع ده لو حصل من زوجي المستقبلي تبقي مصيبه ، لان غالبا المشكله دي بتتكرر في كل البيوت وبصراحه أنا مش هسمح إن يحصل كده في بيتي علشان كده كان لازم أعمل زووم عليها .

ثم قالت مفسره :

- يعني تلاقي الاتنين مختلفين في نقطه معينه وبيتخانقوا جامد وكل واحد بيحاول يطلع نفسه هو اللي صح ولما ميلاقوش حل كل واحد فيهم يثيل جواه من الثاني ومع الوقت يبدأوا يبعدوا عن بعض ومهما حاولوا يرجعوا زي الاول مش بيقدروا ..

معلش لو إتكلت كتير في الموضوع ده ، بس من كتر المشاكل اللي الواحد بيسمع عنها وبيقراها كان لازم أوضح النقطه دي جدا ، ومش عارفه بقي ده وقتها أصلا ولا لا .

نظر لها بتفهم وقال :

- لأ طبعا إنتي عندك حق والنقطه دي مهمه جدا ولازم الواحد يكون واخد باله منها ، أنا مبسوط إنك ذكرتها .

ثم نظر لها بجديه وقال :

- بالنسبالي بقي فأنا مجنون شويتين تلاته خمسه كده ، يعني حد علطول بيتنطط ومش بيقد في مكان أبدا ، وده طبعا مع الناس اللي أعرفهم لكن في الشغل وكده ببيقي جد وعلي اد الهزار الخفيف مع زميلي الرجاله وخلص لان ساعات بيكون معانا ستات وطبعا مش هينفع أتكلم معاهم ونضحك والحاجات دي !

صمت قليلا ثم قال بإحراج :

- في حاجه بقي وحشه في شخصيتي وهي إني ساعات بتعصب شوية وساعتها مش بكون طايق حد يناقشني في حاجه ولا يكلمني أصلا ، لكن لما بهدأ برجع تاني أتناقش وأعتذر وكده .

وعارف إن دي مش من صفات الملنزم وعلشان كده بحاول الفترة دي أقلل الموضوع ده بل إني بحاول أقضي عليه تماما علشان أكون مثال كويس للشباب الملنزم وبإذن الله أنا متأكد إن ربنا هيقدرني ويقويني وأتغلب علي النقطة دي .

نظرت له بحزن وقالت بصوت خفيض :

- ولما بتتعصب بقي ممكن تضرب حد أو تشتم أو كده ؟!

وقبل أن يجيب قالت بسرعه :

- إحنا إتفقنا إن ربنا شايفنا ومش هنقول غير الحق هاه

أجابها علي الفور :

- معتقدش ، متهيألي أنا أخري خالص صوتي يعلي شويه وبعدين أنزل علي مفيش ، بس والله دايمنا بتناقش وبحب أتفاهم علي كل حاجه ومدخلش في نقاشات حاده ، يعني في العادي أنا بهزر وبضحك وكده وممكن تسألني هند بنفسك لكن وقت العصبية مش بحب حد يكلمني خالص ، أنا حبيت أوضحك النقطة دي علشان مكونش بضحك عليكي وأبين إني كويس علطول .

قالت بضيق :

- بس وقت العصبية ده ممكن الإنسان يقول كلام جارح ويفضل محفور جوا الطرف الثاني العمر كله

أوما برأسه نفيا وقال :

- ولا بعرف أقول كلام جارح كمان ، وزى ما قولتلك أنا الأيام دي بشتغل علي نفسي في الموضوع

ده وبإذن الله مش هستريح إلا لما ينتهي خالص ، أوعدك اني هحاول أقلله جدا في الفترة الجايه  
ثم نظر لها بثقه وقال :

- وإسلام لما بيوعد مش بيخلف وعده أبدا

أجابت مبتسمه :

- تمام

ثم سألته قائله :

- شايف إنك ممكن تعرف تربي أولاد ؟ يعني هتكون قدوة صالحه لأولادك ؟

تنهد بحيره وقال :

- اللي شايفه اني لازم أكون قدوه ولازم أكون بعرف أربي كويس ، يعني حاليا لسه مبيقيتش كده لكن  
شغال علي نفسي الفترة دي وبحاول أعرف عن ديني أكثر وأواظب علي فروضي وعلي بعض السنن  
علشان ولادي يبقوا شايفيني قدامهم مثال للأب اللي بجد ، وطبعا هيقلدونني في كل حاجه فلازم أكون  
جاهز للمرحله دي وخصوصا لأن الرسول صلي الله عليه وسلم قال :

" كلكم راع وكلكم مسئول عن رعيته " رواة البخاري

فالموضوع مش فيه مجال للتفكير ، يأما أبقي أب بجد وأد المسئولية يأما بلاش من الجواز خالص ،  
لأني هتحاسب علي ولادي والموضوع مش سهل . بس كده  
نظرت له سلمني بإعجاب وقالت :

- صح كده ، يأما نبقي أد المسئوليه يأما بلاش

هم أن يسألها هو الآخر ولكنه سمع آذان العشاء مره آخري فقال :

- العشاء أذنت ، هروح أصلي

وقبل أن يغادر نظر لها وقال بمرح :

- بس المرادي راجع تاني علشان نكمل ، يلا السلام عليكم

نظرت للأرض بخجل وقالت :

- وعليكم السلام ورحمة الله وبركاته

غادر المنزل هو ووالدته ليوصلها هي لمنزلها ويذهب هو للصلاة وبعدها يعود مرة أخرى لمنزل سلمى بينما نهضت هي لأداء صلاة العشاء لأنها كانت علي وضوء حتي يستتير وجهها بنور الوضوء بدلا من نور مستحضرات التجميل الزائف ، إنتهت من صلاتها وجلست علي فراشها في حيره وحدثت نفسها قائله :

- إيه الصعوبه دي بقي ، مكنتش أعرف إن الموضوع صعب كده ، يعني هو كلامه مريح أوووي وأنا فرحانه بتفكيره أصلا ، بس في نفس الوقت خايفه من عصبيته دي وخصوصا إني مش بعرف أتخاقق مع حد ومش هستحمل حد يتعصب عليا كل شويه .

نظرت للجانب الآخر وقالت هامسه :

- بس هو برضو كان ممكن يخبي عليا علشان يبان كويس وبرضو مكنتش هعرف حاجه وهتصدم في النهايه ، لالا هو أكيد كويس ويحاول أهو مع نفسه إنه يبقي أحسن ، وكمان ما أنا برضو فيا عيوب يعني مفيش حد كامل .

عقدت ذراعيها أمام صدرها في حيره وقالت :

- يوه بقي مش عارفه ، عموما صلاة الإستخاره هي اللي هتحمس الأمر لأن ربنا واحده هو اللي عالم الخير فين وبإذن الله طالما أنا إتوكلت علي الله يبقي ربنا هيفعلي كل الخير ، أنا متأكده من كده

نهضت من مكانها وقامت بفتح خزانتها وأخرجت منها الورقه التي كتبتها من قبل والتي تحتوي علي كل الأسئلة التي تريد أن تعرفها عنه ، ورغم أنها تعلم إنها لن تتذكر إلا القليل أو ربما لا تتذكر شيئا أصلا ولكنها حاولت أن تفعل كل ما تستطيع كي تبدأ حياتها بداية جيدة .

عاد إسلام من الصلاة فخرجت وجلست أمامه ليكملا الحديث سويا فقال مبتسما :

- كان في سؤال كنت عاوز أسأله قبل الصلاة بس نسيت ، هو إحنا وقفنا فين ؟

أجابت بخجل :

- كنا بنتكلم عن تربيته الاولاد ومسئوليتهم وكده

تذكر علي الفور وعاد للخلف قليلا وهو ينظر لها وقال بجديه :

- طيب إنتي شايفه إنك المفروض تربى ولادك إزاي ؟ وحاسه إنك هتعرفى تربى تربيته صالحه ولا الموضوع صعب ؟

أخذت تحك ذقنها بتفكير ثم قالت :

- لاشك إن الموضوع مش سهل أبدا ، كتير من الناس فاهمين إن الأم يعني تأكل وتشرب وتتميم وتودي المدرسه وتذاكر وخلص ، بس أنا بإذن الله مش هعمل كده .

إبتسمت بحماس ثم نظرت له بجديه وقالت :

- أنا لازم أربي نفسي الاول علشان أعرف أربي أولاد ، ومش قصدي إنى أربي نفسي يعني أكون مؤدبه وكده ، لأ أنا قصدي إنى أكون عارفه ديني كويس جدا وكمان عارفه عن التربيته السليمه للأطفال والمراهقين وقاريه في علم النفس و كده ، وده برضو في الخطه بإذن الله ، حاليا بدأت دينيا وشوية كده هبدأ بقي في العلوم التانيه إن شاء الله

وجدت نفسها تصوب نظرها تجاهه بجديه ثم طأطأت رأسها خجلا وقالت :

- بس أنا مش هينفع أعمل كده لوحدي ، لازم جوزي كمان يشاركني في تربيتهم ، لازم يكون قدوه ليهم ويأخذهم معاه المسجد علطول ، لازم يسعي دائما إنه يعلمهم الدين ويفهمهم هما عايشين في الحياة دي أصلا ليه ، لازم يشوفلهم شيخ كويس يحفظهم ويفهمهم القرآن ، مش هسمح أبدا إن أولادي يكبروا زيي كده وهما مش حافظين حاجه

ثم تنهدت بثقه وقالت :

- وده قرار ، وسلمي لما بتأخذ قرار مش بترجع فيه أبدا ، ربنا يقدرني ويقويني

نظر لها بسعاده وقال :

- أنا كمان زيك كده ، وبرضو مش حافظ كتير للاسف ، بس حاليا بدأت أحفظ الحمد لله وبالتفسير والتجويد وكله ، ورغم إنى ماشي علي مهلي شويه بس برضو فخور إنى فاهم كل كلمة بحفظها ، الحمد لله

إبتسمت سلمى بأريحيه وقالت :

- كلمني عن علاقتك بمامتك وهند ، يعني بر الوالدين إيه أخباره ؟ صراحه هاه

أجابها علي الفور :

- لا هند دي عادي بقتلها كل يوم مفيش مشكله ، إنما ماما تبقي حاجه كبيره أوووي بالنسبالي ربنا يخليهالي مقدرش أصلا از علها ، ساعات بحس إنهم أولادي وإني مينفعلش أز علمهم لأنهم ملهمش حد غيري بعد ربنا ، يعني لما يبقي أقرب حد ليهم بيعاملهم وحش هيروحووا فين؟! وخصوصا إن بابا الله يرحمه مات برضو وإحنا صغيرين إلي حد ما ، فبقيت أنا المسئول عنهم وأنا في ثانوي ، واهي ماشيه الحمد لله

ضحكت رغما عنها وقالت :

- بتقتلها إزاي يعني ؟

تذكر هند فابتسم قائلا :

- يعني مثلا ادخل أرخم عليها وأجننها شويه وأطلع ، أضربها بأي حاجه وأجري ، لو مثلا الحوار إشتد شويه بيني وبين ماما بروح علي اوضه هند وأطلع كل غضبي عليها ونتخايق شويه ونضرب بعض بأي حاجه قدامنا وبعدين نضحك وحاجات غريبه كده ، عيله مجنونه متاخذيش في بالك

حاولت كتم ضحكاتها كي لا تُخرج أمامه وقالت في نفسها بمرح :

- وأنا أقول البنت مجنونه كده من إيه ؟ أتاريتها متجيش ١٠% منك ومن جنانك ، بس عادي الجنان حلو برضو مفيش كلام

إنتبهت علي حديثه وهو يقول :

- فعادي بالنسبالك وممكن توافقي ولا إيه ؟

نظرت له بتعجب وقالت :

- أوافق علي إيه ؟

ضحك رغما عنه وقال متعجبا :

- بعد كل اللي قولته ده طلعتي مش واخده بالك ؟ ماشي ما علينا هعيد تاني ..

كنت بكلمك عن ظروف وإمكانياتي ، بقولك يعني إني مش عندي شقه فالمفروض إني هأجر شقه لحد ما ربنا يرزقني وأقدر أجيب واحده ، بالنسبه للجهاز فبابا الله يرحمه سايبلي مبلغ كده ممكن يقضي الشبكة وشويه من العفش والباقي إن شاء الله هتصرف فيه من مرتبي ، بالنسبه لبعد الجواز فأعتقد

هيكون الحال ميسور يعني مش فقر ومش غني برضو ، كمان أنا متأكد إن ربنا هيرزقني ويديني علي أد تعبني ، حبيت أقولك برضو علشان تكوني عارفه لأن ممكن الموضوع ده يآثر علي قرارك ، وطبعا الكلام ده المفروض هيتقال لعمي لو في نصيب يعني ، بس أنا قولت أعرّفك من دلوقتي لأن ده حقك .

كانت تريد أن تخبره بأنها موافقه علي تلك الإمكانيات ولا تريد شيئا سوي رجل يتقي الله فيها فحسب ولكن خجلها منعها فقالت :

- تمام

صمت قليلا ثم قال بتساؤل :

- حابه تسألني عن حاجه تاني ؟ علشان بس حسيت إنني طولت ولازم أستندن

إبتسمت وهي توما برأسها نفيا فنهض من مكانه وألقى عليها التحيه وهم بالخروج ولكنه سمعها من خلفه تقول :

- في حاجه كمان

إستدار ليراها ويعرف منها ماذا تريد وقال :

- إتفضلي

أجابته علي الفور :

هتاخذ بايدي للجنه ؟

ثم تنحنت قائله بجرج :

- قصدي يعني هتبقي تاخذ بايدين زوجتك للجنه ؟

أبتسم بسعاده وقال :

- أوعدك إنني هعمل كده ، لو في نصيب يعني

ثم تركها وغادر وقلبها يخفق بشده ، لا تعرف بماذا تشعر ؟ هل هي سعاده ام قلق ام خوف ام توتر ام كل هذا ؟ دخلت إلي غرفتها مسرعه وبدلت ملابسها وإستلقت علي الفراش وأخذت تفكر في كل

ما حدث حتى ذهبت في النوم .

وقبل الفجر بساعة تقريبا إستيقظت سلمي وتوضأت وصلت ركعتين قيام ليل ، ثم عقدت النية لتصلي صلاة الإستخاره ، كانت تعلم أنه من السنه أن تقرأ بالركعة الأولى بعد الفاتحة بسورة ( قُلْ يَا أَيُّهَا الْكَافِرُونَ ) ، وفي الركعة الثانية بعد الفاتحة بسورة ( قُلْ هُوَ اللَّهُ أَحَدٌ )

إنتهت من الصلاة ورفعت يدها متضرعه إلي الله وهي مستحضرة عظمتة وقدرته ، بدأت تحمد الله عزوجل وتثنى عليه ثم قامت بالصلاة علي النبي صلي الله عليه وسلم ثم بدأت دعائها قائلة :

اللهم إني أستخيرك بعلمك ، واستقدرك بقدرتك ، وأسألك من فضلك العظيم ، فإنك تقدر ولا أقدر ، وتعلم ولا أعلم ، وأنت علام الغيوب . اللهم إن كنت تعلم أن زوجي من إسلام بن محمود خير لي في ديني ومعاشي وعاقبة أمري فاقدره لي ، ويسره لي ، ثم بارك لي فيه . وإن كنت تعلم أن زوجي منه شر لي في ديني ومعاشي وعاقبة أمري عاجله وآجله فاصرفه عني واصرفني عنه ، واقدر لي الخير حيث كان ثم أرضني به .

وعلي بعد بضع أمتار كان يجلس إسلام نفسه الجلسة وهو يرفع يده إلي الله بكل تضرع وخشيه ويقول :

اللهم إني أستخيرك بعلمك ، واستقدرك بقدرتك ، وأسألك من فضلك العظيم ، فإنك تقدر ولا أقدر ، وتعلم ولا أعلم ، وأنت علام الغيوب . اللهم إن كنت تعلم أن زوجي من سلمي بنت مصطفى خير لي في ديني ومعاشي وعاقبة أمري فاقدره لي ، ويسره لي ، ثم بارك لي فيه . وإن كنت تعلم أن زوجي منها شر لي في ديني ومعاشي وعاقبة أمري عاجله وآجله فاصرفه عني واصرفني عنه ، واقدر لي الخير حيث كان ثم أرضني به .

كانت سلمي تشعر بالراحة التامة تجاه إسلام ولكنها كانت تريد التأكد من أمر ما في نفسها ، إنتظرت حتي أذنت صلاة المغرب وصلت بعدها مباشرة ، وبعدما يقرب من الخمس دقائق إتصلت علي هند وحاولت التحدث معها في أي شئ وفي وسط الكلام قالت لهند :

- عماله تضحكي إنتي كده ياختي وتتكلمي براحتك ولا كأنك ممكن تخرجيني ولا حاجه ، اوعي يا بت يا هند يكون أخوكي جنبك ، هتضربي والله

قالت هند علي الفور بكل براءة :

- لأ إسلام لسه مرجعش من الصلاة



وضعت يدها علي قلبها وتنفست براحه تامه وهي تحمد الله علي هذا ، أخذت تحدثها في أشياء آخري لوقت قصير ثم أغلقت الهاتف ولكنها لم تكتفي بهذه المره فقط ، حاولت التفكير في أي طريقه تعاود بها الإتصال بهند وقت صلاة العشاء لكي تطمئن أكثر وأخيرا وجدتها ، إنتظرت أيضا صلاة العشاء وصلتها ثم إتصلت بهند وقالت :

- هنود حبيبتي إزيك ؟

رفعت هند حاجبها بتعجب وقالت :

- إيه يا بنتي مالك ؟ ما إحنا لسه متكلمين من شويه

ضحكت قائله بمرح :

- يا ستي كنت هتعشي فقولت أقولك تيجي تتعشي معايا

ضحكت بتعجب وقال :

- يا سلام !! وهتبعيلي الأكل في التليفون ولا إيه بقي ؟ وبعدين يا ستي إنتي بالهنا والشفاء ، انا هستني إسلام لما ييجي ونتعشي كلنا

نظرت للمرآه بخبث وقالت :

- إيه ده هو لسه مرجعش من الشغل لحد دلوقتي ؟

- شغل إيه يا بنتي اللي هيقد فيه لحد دلوقتي إنتي ناصحه ؟!! وبعدين ماهو كان هنا المغرب أصلا ، هو نزل للعشاء وهييجيب الأكل معاه وييجي

أخذت سلمى المعلومة التي تريدها وتحدثت قليلا مع هند وأغلقت الهاتف وهي تنظر للمرآه بإصرار وتقول :

-كده تمام أوووي ، فاضل بقي آخر حاجه !!

إستيقظت من نومها قبل الفجر كالعاده لتستعد للصلاة ، سمعت أذان الفجر فأدت الصلاة وقامت بالإتصال علي هند ، لم تجيبها في المرة الأولى ولكنها عاودت الإتصال مرة آخري فأجابت بصوت شبه نائم :

- سلمى تالت ، نعم يا بنتي

قالت بمرح :

- بصحبي للفجر يا حجه ، أنا الغلطانه يعني

تنهدت هند بتعب وقالت :

- يا بنتي ماهو لسه مصحيني ، هو أنا هلاقيها منك ولا منه بس

سألته بشغف :

- مين اللي لسه مصحيني ؟

أجابت علي الفور :

- هيكون مين يعني ؟ هو فيه غيره سي إسلام ، سيبوني في حالي بقي يا جدعان هموت من النعس

إبتسمت قائله بمرح :

-يا بنتي لازم تقومي تصلي حرام عليك

تنهدت بضيق وقالت :

- يا ستي قايمه والله قايمه ، عاوزه ألحق أنا ملي شويه بس قبل ما ييجي من الجامع ويكهربني زي كل يوم ويقومني بالعافيه ، إمشي بقي يا سلمي وهكلمك بكره والله

أطلقت ضحكات عاليه متواصله ثم قالت:

- ماشي يا ستي ، يلا تصبحي علي خير ، قصدي تصبحي علي خير بعد الصلاة يعني

أغلقت الهاتف وقفزت من مكانها بسعاده وهي تنظر للمرآه بكل فخر وتقول :

- yeeeeeeeeeeeeeeeees

ارتمت علي الفراش وهي تتنهد بفرح وتقول :

- كده بقي أنا وثقت فعلا إنك مواظب علي الصلاة في الجامع ، معلش بقي ماهو الواحد لازم يتأكد بنفسه ، دي صلاه مش هزار



- عروستك يا عم كانت لسه مكلماني دلوقتي

نظر لها بسعاده وقال :

- إشمعني ؟

قالت علي الفور :

- كانت بتصحيني للفجر برضو

حرك رأسه للأعلي وللأسفل وقال بمرح :

- أفارم أليها والله

ضحكت وهي تقول :

- مش عارفه ايه حكايتها النهارده ؟ كل شوية تتصل بيا وانت تكون مش موجود ، حظها حلو  
علشان متتخرجش ، بس مش عارفه برضو إتصلت كتير كده ليه !!؟

إبتسم قائلا :

- وأنا بروح فين يعني ؟ منا موجود علطول أهو

أومأت برأسها نفيا وقالت :

- لأ ما إنت بتكون في الصلاة

نظر لها متعجبا وقال :

- وهي كل ما بتتصل بكون أنا في الصلاة !!؟

أومأت برأسها إيجابا وقالت :

- أيوه إتصلت ساعة المغرب والعشا ومن شويه ، وكل مره تبقي إنت تحت في الجامع

نظر لها بإهتمام وقال :

- طيب وسيرتي بتيجي في الموضوع ؟

أجابته بالتأكيد قائله :

- أه ساعات بتيجي سيرتك وبقولها إنك في الجامع وبعدها نتكلم شويه وننقل

ضحك بشده بل وسقط علي الأرض من كثرة الضحك حتي كاد أن يختنق فنظرت له بتعجب وقالت :

- إيه مالك ؟

خرجت الكلمات من بين ضحكاته وقال بخبث :

- صحبتك دي أروبه أوووي علي فكره ، أنا كده خوفت منها بصراحه ، بس والله برافو عليها ،  
ياريت كل البنات زيها مكنش حد عرف يضحك عليهم .

تعجبت أكثر وقالت :

- إيه يا عم ما تفهمني !؟

رفع حاجبه قائلا بمرح :

- معقوله ده كله مش فاهمه ، الأخت سلمى يا اخت هند بتعمل ده كله علشان تتأكد إنى مواظب علي  
الصلاة في الجامع ، والله جدعه

ضربت هند رأسها وقالت بانتباه :

- اااااااا وانا أقول برضو إشمعني إتصلت بيا كتير كده النهارده ، اه يا بنت الإيه يا لذيئه

وبعد مرور إسبوع تقريبا دخل إسلام غرفة والدته وقال بحيره :

- ماما أنا عاوز أقول لوالد سلمى إنى موافق ، بس خايف هي ترفض وأتخرج

ربتت علي كتفه بحنان وقالت :

- لأ مش هترفض إن شاء الله ، أنا حاسه بكده ، وبعدين ماهو لازم الراجل هو اللي يقول رأييه الأول ،  
كلمه النهارده في التليفون وشوف رأييه ورأيها إيه ؟



- أيوه بقي يا عم العريس ، والله لو كنت بعرف أزغرت كنت زغرت

إرتمي علي الفراش ونظر لها بقلق وقال :

- سيبك من الزغاريط دلوقتي ، تفتكري أنا ممكن أتنفخ ؟

نظرت له بتعجب وقالت :

- يعني إيه تتنفخ ؟

تنهد بحزن وقال :

- حاسس إن والدها هينفخني ، ربنا يستر بقي ، إدعيلي ربنا يتم الموضوع علي خير

جلست بجواره وهي تربت علي كتفه قائله :

- إن شاء الله النفخه تكون خفيفه يا إسلام

نظر لها بإستنكار وقال بضيق :

- يا شيخه حرام عليكي ، ده بدل ما تقولي ربنا يعدي الموضوع علي خير

تنهدت بثقه وقالت :

-أنا عارفه والد سلمي أكثر منك ، خليك بس مستعد كده وحافظ علي هدونك واوعي تزعله بدل ما يبوظلك الجوازه كلها ، وبرضو هو مهما كان أب وببجب بنته وعاوز مصلحتها ، لازم تحط ده في إعتبارك

أجابها علي الفور :

-عندك حق !

---

بعد ثلاثة أيام حضر إسلام بصحبة عمه الوحيد وجلسا مع والد سلمي وعمها ، جلس إسلام يتحدث عن نفسه بخرج ووالد سلمي يسمع ويناقشه في كل شئ ، بعد عدة دقائق جاءت ولاء تهزول إلي غرفة سلمي وقالت بفرع :

- إلحقي يا سلمى أبوكي بيز عقلهم برا

إنتفضت سلمى من مكانها وقالت برعب :

- ليه حصل إيه ؟!! بيزعق إزاي يعني ؟!!

إلتقطت ولاء أنفاسها وهي تجلس علي حافة الفراش وقالت :

- بصي هو مش بيزعق اوي يعني ، بس باين عليه كده متضايق جدا ومش متفاهم معاهم

زفرت بضيق وقالت :

- ليه بس ؟

نظرت لها بعدم فهم وهمست :

- مش عارفه ، بس أكيد يعني مش متفقين علي الجهاز والحاجات دي

تنهدت سلمى بحزن وقالت :

- يارب عديها علي خير

وبعدما يقرب من الساعه والنصف غادر إسلام وعمه وعم سلمى أيضا ودخل الأب غرفته ليستريح ، هرولت سلمى إليه وقالت بلهفه :

- ها يا بابا عملتوا إيه ؟

زفر بضيق وقال :

- إنتي موافقه علي الولد ده فعلا ؟

أومات برأسها إيجابا وهي تنظر له بتعجب ولم تتحدث فأردف قائلا :

- يا بنتي ما إنتي كان متقدمك واحد هيعيشك ملكه وموافقتيش عليه ، إشمعني موافقه علي ده يعني

نظرت له بعدم فهم وقالت :



- بابا بعد اذنك أنا مش فاهمه حاجه !! فهمني أكثر

تنهد بحيره وقال :

- الولد مستواه مش أد كده وانتي هتتعبي معاه ، مش عارف موافقه عليه علي إيه بس !!

إبتسمت قائله بحنان :

- يا بابا إسلام شاب كويس وبيخاف ربنا وهي دي أهم حاجه عندي

أخذ يحرك رأسه يمينا ويسارا بضيق وقال :

- والله إنتي طيبه يا سلمى ومتعرفيش حاجه ، انا وأمك تعبنا في أول حياتنا كتير جدا علشان نوصل للمستوي ده ، ومش هسمح بصراحه ان بنتي تتمرط مع واحد غريب والله أعلم هيقدر ده في الآخر ولا هيذلها ويقولها أهلك باعوكي بالرخص .

نظرت له بدهشه وقالت :

- لا يا بابا مستحيل إسلام يعمل كده لانه فعلا شاب بيتقي ربنا ، وكمان مستواه مش عيب علشان نرفضه وانا بصراحه موافقه أعيش معاه علي أد مستواه ده لحد ما ربنا يرزقنا ، كمان هو مش فقير اوي يعني زي ما حضرتك متخيل

تنهد بممل وقال :

- يعني أتعب عليكي السنين دي كلها وفي الآخر تخيبي ظني في تعليمك وكمان جوازك !!

نظرت له بحنان وقالت :

- متقلقش يا بابا مش هخيب ظنك المرادي بإذن الله ، وكمان أنا صليت إستخاره والحمد لله مرتاحه وحاسه إن ده الزوج الصالح المناسب ليا

إبتسم قليلا وقال :

- عموما يا سلمى الجواز ده الحاجه الوحيده اللي مش هقدر أغضب عليكي فيها ، بس برضو أنا مش هتنازل عن الحاجات اللي طلبتها

قالت بقلق :

- طيب حضرتك طلبت منهم إيه يا بابا ؟

ضحك قائلا :

- شوف البت خايفه علي الواد إزاي ، يا بنتي أنا اللي أبوكي مش هو

إبتعدت قليلا وقالت بخجل :

- اه طبعا يا بابا

نظر لها والإبتسامه تملو وجهه وقال :

- عموما يا ستي إحنا قسمنا الحاجات بيننا ، رغم إن الراجل المفروض يبقي عليه كل حاجه بس برضو إحنا عارفين الظروف وإن مفيش شاب بيقدر يشيل كل حاجه لوحده دلوقتي ، ف هيكون هو عليه النوم والسفره وإحنا علينا الصالون والمطبخ ، وطبعا بقي عليه كمان الشبكة والفرح والحاجات دي ، وكفايه أوووي إني وافقت إنك تقعدني في شقه إيجار

تنهدت سلمي بأريحيه وقالت :

- طيب كده تمام جدا

ثم نظرت له بتساؤل وقالت :

- طيب هما كان رأيهم إيه ؟

مط شفتاه للأمام بعدم فهم وقال :

- معرفش أنا عطيتهم مهله إسبوع يفكروا ويردوا عليا وهما حرين بقي

تبسمت قائله :

- ماشي يا بابا شكرا ، هسيبك بقي تستريح شويه

---

عاد إسلام إلى المنزل والحزن يملأ قلبه ، فطلبات والد سلمي كانت أكثر مما يطيق ، فالمبلغ الذي تركه له والده لن يكفي وأيضا مرتب سنه كامله لن يفي بالغرض ، دخل غرفته في هدوء وأغلق الباب خلفه حينها سمعت هند صوت باب غرفته فخرجت مسرعه ودخلت عليه وقالت بسعاده :

- أيوه بقي ياعم العريس ، كده الموضوع بقي رسمي

تنهد بحزن وقال :

- لسه مبقاش رسمي ولا حاجه !

نظرت له متعجبه وقالت بلهفه :

- ليه حصل إيه ؟

إرتمي علي الفراش ونظر إلي سقف الغرفه بضيق وقال :

- طلباته غاليه اوووي ومش عارف أتصرف إزاي

جلست بجواره وقالت بخوف :

- ليه هو طلب إيه ؟ مش العادي دلوقتي إن العريس والعروسه بيشتركوا في الجهاز علشان ظروف الشباب وكده

نظر لها بحيره وقال :

- أيوه الحمد لله إتفقنا إن أنا هجيب النوم والسفره وهما هيجيبوا الصالون والمطبخ ، بس مش دي المشكله ، المشكله إن الشبكه اللي والدها طالبها لوحدها هتخلص كل الفلوس اللي معايا وكده مش هلاقي أي حاجه أجهز بيها

إتسعت عيناها ونظرت له بذهول وقالت :

- إنت بتتكلم بجد !!

أوما برأسه مؤكدا وقال :

- اه للأسف ، حاولت معاه إنه يقلل عدد الجرامات شويه بس هو مش راضي أبدا وعمال يقولي بنتي غاليه ويجيلها الغالي ، وهي مش أقل من بنات إعمامها ومعرفش إيه

ثم أخذ يمرر أصابعه بين خصلات شعره في توتر وقال :

- والله أنا لو عليا أجيلها الدنيا كلها ، بس أعمل إيه بقي ظروفك كده

ربت علي كتفه بحنان وقالت :

- طيب وانت هتعمل إيه دلوقتي يا إسلام ؟

نظر لها والههم يملأ قلبه وقال :

- مش عارف والله ، هو عطانا مهله إسبوع علشان نفكر وطبعاً أنا مضطر أوافق ، بس تيجي تقوليلي هتجيب بقية الفلوس منين أقولك معرفش !!

نظرت له بحيره وقالت :

- لا ما إنت لازم تعرف يا إسلام ، مش هينفع توافق علي حاجه وبعدين متبقاش قدها

حاول الإبتسام قليلا وقال :

- أكيد مش هوافق علي حاجه وأنا مش أدها يا هند ، بس كده مش قدامي غير إني أطلب منه نطول الخطوبه ونخليها سنتين كده ولا حاجه لحد ما ألحق أحوش من مرتبي وأجيب الجهاز ، وكمان بقي هضطر أشوف شغل لليل أهو يساعد بأي حاجه ، وعندني في الشغل بيثبتوا موظف كل سنه في شهر ٩ وحاسس إن التثبيت السنادي ممكن يكون من نصيبي ومرتبي يزيد شويه ، إديلي بس ربنا يبسر الأمور وأهو شهر ٩ قرب أهو وهنشوف

زفرت بضيق ممزوج بالحزن وقالت :

- بس إنت كده هتموت نفسك يا إسلام

إبتسم إبتسامة مكسوره وقال :

- معنديش حل تاني يا هند ، إديلي إنتي بس

---

بعد ثلاثة أيام إتصلت سلمي علي هند وقالت مازحه :

- السلام عليكم يا ست هنود ، بقي كده متسألينش عليا ٣ أيام بحالهم

أجابت هند بكلمات خاليه من أي مشاعر :

- وعليكم السلام ورحمة الله وبركاته ، معلى يا سلمي

ضحكت قائله بمرح :

- معلى يا سلمى؟! ودى أصرفها من أى بنك بقى إن شاء الله !

زفرت بضيق وقالت :

- سلمى قولتلك معلى ، خلاص بقى

قطبت حاجبىها وقالت بهشه :

- مالك يا هند بتكلمينى كده ليه؟!!!

تنحنت قائله بإحراج :

- معلى يا سلمى مش قصدى والله ، بس متضايقه شويه بسبب اللى حصل ده

نظرت للمرآه بتعجب وقالت بلهفه :

- حصل إيه خير ؟ مامتك فيها حاجه ؟

أجابتها بضيق :

- ويعنى إنتى مش عارفه اللى حصل يا سلمى ؟ ده الواد يا عيني كل شويه يقولى أجيبله برشام صداع ودماغه تعبت من كتر التفكير

قالت على الفور :

- يا بنتى فهمينى اللى حصل الله يباركلك ، أنا مش فاهمه حاجه والله ، واد مين وحصل إيه ؟

أخذت هند تحدثها عن طلبات والدها وإمكانيات إسلام اللى لا تستطيع تحمل كل هذه النفقات ، فإنه بالفعل سوف يقاسمه فى شراء أثاث المنزل ولكنه أيضا أكثر عليه فى طلب شبكة إبنته ، شهقت سلمى فجأة وهى تنظر للمرآه بعينين متسعيتين وقالت بصوت متقطع :

- هو بابا طلب الشبكة دى كلها فعلا ؟

قالت متعجبه :

- أيوه ، هو إنتي متعرفيش ولا إيه ؟

أجابت علي الفور :

- لأ والله يا بنتي معرف حاجه ، هو بس قالى إنه وافق علي موضوع الشقه الإيجار دي وهيقسم معاكم الجهاز وطبعا الشبكة والفرح والحاجات دي عليكم فأنا قولتله كده تمام اووي ، بس مكنتش أعرف انه طلب حاجات غاليه يعني ، بس عموما إقفلى دلوقتي وأنا هحاول أتصرف وهتصل بيكي تاني .

حاولت سلمي الهدوء قليلا حتي تستطيع ترتيب أفكارها وإقناع والدها بتخفيف طلباته قليلا ، ذهبت لغرفته وطرقت الباب ففتح لها وقال مبتسما :

- أيوه يا سلمي

جلست علي أول كرسي أمامها ونظرت لوالدها بجديه وقالت :

- بابا إيه حضرتك طلبت شبكة كبيره كده ؟

نظر لها بتعجب وقال :

- مش كبيره ولا حاجه ، هو ده العادي دلوقتي

أومأت برأسها نفيا وقالت :

- يعني يا بابا العادي إننا ناخذ كل الفلوس اللي معاه علشان نحطها في شبكة وفي الآخر ميلافيش حاجه يجهز بيها !! وفي الغالب الذهب ده كله مش بيتلبس أصلا غير للمنظره وانا مش بحب المنظره

زفر بضيق وقال :

- تلبسيه ما تلبسيهوش إنتي حره ، ده حقك ولازم شبكتك تكون عندك حتي لو هتتشال في الدولار سنين ، وبعدين إنتي مش رخيصه علشان أجوزك بالساهل كده ، وكمان لما هو مش قد الجواز كان بيتقدم لبنات الناس ليه !!؟

تنهدت بحزن وقالت :

- يا بابا ماهو هيجيب شبكة برضو بس مش لازم تكون كبيره كده يعني ، حتي لو ده العادي اليومين

دول خلىنا إحنا مقدرين ظروفه ونبقي أقل من العادي بشويه ، كده كده أنا مش هلبس ده كله فوق بعضه يعني .

نظر لها بضيق وقال بعصبيه :

- خلاص يا سلمي الموضوع بالنسبالي منتهي ، مش هتنازل عن شبكتك لأنها من حقك وكمان إنتي مش أقل من بنات عمامك .

أخذت تفرك كفيها في توتر بالغ وهي تفكر ماذا تفعل ، صمنت قليلا ثم حاولت فعل محاولة أخيره فقالت :

- طيب حضرتك يا بابا ممكن توافق نمد فترة الخطوبه شويه علشان يلحق يتصرف يعني ؟

أوما برأسه إيجابا وقال:

- ماشي مفيش مشكله لانك لسه متخرجتيش أصلا ، بس الموضوع ميطولش أوي يعني وكمان بيلغني بالتطورات أول بأول

إبتسمت قليلا وهي تقول :

- حاضر يا بابا ، بعد إذنك

ذهبت سلمي إلي غرفتها وقامت بالإتصال بهند لتخبرها بما حدث ، كانت هند تتوقع كل هذا ولكنها سعدت بخبر موافقة والد سلمي علي مد فترة الخطوبه قليلا كي يستطيع إسلام تحصيل باقي المبلغ المطلوب .

---

وفي اليوم المحدد حضر إسلام بمفرده ليخبر والد سلمي بقراره النهائي ، إعتدل في جلسته ونظر لوالد سلمي بإبتسامه وقال :

- حضرتك مفيش مجال إن الإتفاق يتغير شوية ويقل حبتين صح ؟

نظر له بضيق وقال :

- ده كلام رجالة يا إسلام وكلام الرجاله مايبتيغيرش طبعا

تنحنح قائلا بإحراج :

- تمام يا عمي وأنا موافق

ظهرت علي وجهه ملامح الإنتصار وقال :

- حيث كده بقي نقول مبروك  
إتسعت إبتسامته وهو يقول :

- الله يبارك فيك يا عمي

ثم نظر للأرض بخجل وقال :

- معلىش يا عمي كان في طلب كده

نظر له بتفهم وقال :

- إتفضل

حاول الإبتسام وهو ينظر له بقلق وقال :

- كنت بطلب من حضرتك إننا نطول فترة الخطوبه شويه علشان ألحق أجهز نفسي يعني

نظر له نظره لم يرها من قبل ، نظرة الحنان الأبوي وقال :

- ماشي مفيش مشكله ، بس أخرك سنتين علشان تكون سلمي إخرجت وإستريححت شويه ، انا كنت  
ناوي أقولك علي سنه واحده خطوبه بس مفيش مشاكل نخليها إثنين لإنك شاب محترم وتستاھل

تنهد بسعاده وقال :

- بإذن الله يا عمي مش هتكون أكثر من كده ، ولو ربنا أذن ولحقت أجهز المطلوب قبل كده هنتمم  
الموضوع قبل السننتين بإذن الله

- إن شاء الله

نهض الأب من مكانه وذهب لإحضار سلمي ، وقبل أن تدخل سلمي طلبت من والدها أن يجلس في  
مكان قريب منهما لكي يستطيع رؤيتهما بوضوح وهذا سيكون الحال في كل مرة يأتي فيها إسلام إليه ،  
دخلت وألقت التحية وجلست علي بعد مناسب وقالت بحياء :

- معلىش والله أنا مكنتش أعرف الحاجات اللي بابا طلبها دي ، حاولت أعمل اللي أقدر عليه بس  
معرفةتش



تبسم قائلا :

- عادي ولا يهكم ، أنا إتفقت مع عمي علي كل حاجه ، بس هل يا تري هتوافقي إن الخطوبه تطول شويه لحد سنتين مثلا ؟ علشان بس ألحق أجهز

نظرت للأرض بخجل وقالت :

- هوافق إن شاء الله

تنهد بسعاده وقال بحماس :

- حيت كده بقي نتكلم في المهم ، قريتي حاجه قبل كده عن ضوابط الخطوبه ؟

تحنحت بإحراج وقالت :

- بصراحه لأ بس كنت ناوية أقرأ يعني

أخذ يرتب أفكاره للحظات ثم قال بجديه :

- بس أنا بقي قريت ، ركزي معايا اووي علشان نشوف هنمشي المرحله دي إزاي

مبدأيا كده " أنا قررت أحافظ عليك حتي من نفسي "

وإعملي زوووم اوووي علي الجملة دي واوعي تنسيها ، وبناء عليه : فأنا قريت كل الضوابط اللي المفروض تتعمل في فترة الخطوبه علشان منعضبش ربنا

وبما إن " الخطوبه ماهي إلا وعد بالزواج " يبقي أنا بالنسبالك دلوقتي أجنبي والحكم اللي هيمشي علي أي راجل غريب هيمشي عليا ، مع الفرق بس إنني مسموح ليا أزورك لو في حاجات هحتاج نتكلم فيها يعني ، والضوابط اللي هيمشي عليها الفترة دي هتكون كالاتي :

طبعا يكون الكلام علي قدر الحاجه ومن غير خضوع بالقول أو كلام بشهوه ، كمان طبعا ميكونش في خلوه ، يعني لازم بباكي يكون قاعد وشايفنا دايمًا زي النهارده كده ، وطبعا مع إلتزامك بكامل حجابك وكمان غُض البصر من الطرفين

لو إلتزمنا بالحاجات دي يبقي أنا هينفع أجي ومش هنعضب ربنا إن شاء الله ، ومش في حل تاني غير إننا نلتزم بالكلام ده علشان إحنا إتفقتنا إن هدفنا الجنه تمام ؟

بالنسبه بقي للتليفون فهيكون للضرورة بس ، يعني لو في حاجه لازم تتقال يبقي يأما تتصلي بهند وتقوليلها يأما تتصلي بيا بس ساعتها إستندني باباكي الأول وأقفي كده في نص الصاله وخلي صوتك مسررع علشان البيت كله يسمع الكلام اللي هتقوليه ، ونقول الحاجه اللي هنقولها بسرعه بسرعه ونقفل ، وآخر حاجه بقي مفيش إتصال بعد الساعه ٩ بليل مهما كان السبب تمام ؟

حاولت كتم ضحكاتها وقالت بهدوء :

- مسررع !! حاضر

تتحنح قائلا بابتسامه :

- قصدي يبقي عالي يعني وتبقي قدام كل الناس علشان منحسش إننا بنعمل حاجه تغضب ربنا ، انا عارف إن الموضوع ممكن يكون صعب شويه ، بس اللي هدفه الجنه ممكن يعمل أي حاجه صح ؟  
وكم ان في قاعده فقهيه بتقول " من إستعجل شيئا قبل أوانه عوقب بحرمانه " وانا بصراحه بقي مش عايز أتعاقب بحرمانى من حاجه بعد جوازي بسبب ذنوب الخطوبه

كانت تريد أن تقول له إنه يزيد في نظرها كل يوم عن اليوم الذي يسبقه ، تريد أن تقول له كم هي فخوره به وكم كانت تحلم دائما أن ترتبط بشاب يخاف الله ويحافظ عليها حتى من نفسه ، كانت تريد أن تقول له كم تمنى أن يرزقها الله بشاب مثله تماما ، كانت تتمنى أن تقول الكثير والكثير ولكن لايجب أن تتحدث الآن بما في داخلها فإكتفت بقول :

- موافقه علي كل حاجه ، ربنا يعيننا ويقدرنا علي طاعته

تذكر شيئا فجأة فقال بجديه :

- آخر حاجه بقي معلش معلش ، لو حسيتي في يوم إنى ممكن أخلف وعدي ده إقفلني باب الشيطان في وشي ، يعني لو جيت عندكم هنا وكنت هقول حاجه ممكن تغضب ربنا إطرديني ولا يهملك أي حاجه المهم رضا ربنا ، ولو برضو كلمتك في التليفون وحببت أستعبط إقفلني السكه في وشي علطول وانا مش هزعل ، وحتى لو زعلت شويه أتفلق مش مهم ، المهم رضا ربنا ، هتوعديني بكده يا سلمى ماشي ؟ أنا مش عايز أعضب ربنا فيكي وعاوز أحافظ عليكي وإنتي لازم تساعديني

أومات برأسها إيجابيا وقالت بحياء :

- حاضر

حاول غض بصره وقال بمرح خفيف :

- ماشي كده إتفتنا ، نغير الموضوع بقي ، إنتي قرיתי في السيره قبل كده ؟

تنهدت بإحراج وقالت :

- علي خفيف كده

ضحك بسعاده وقال :

- قشطه يبقي هاخذ الثواب ، أنا كنت جايب مجموعة كتب كده عن سيرة الرسول والأنبياء والصحابه ، خلصت سيرة الرسول والأنبياء التانيين وحاليا شغال في سير الصحابه ، لو كده هجيبلك الكتب دول تتسلي فيهم علشان هيفيدوكي اووي لو حابه يعني

إبتسمت بفرحه وقالت :

- اه ياريت

- خلاص بإذن الله هجيبهم معايا المره الجايه

- تمام جدا ، انا كمان عندي كتاب فووق الرائع اسمه إستمتع بحياتك للشيخ العريفي ، هبقي أعطيه لحضرتك تقرأه لانه بجد حلو اوووي وفيه إقتباسات كتير مفيده

قفزت ضحكاته رغما عنه وقال :

- حضرتي !! وماله الإحترام حلو برضو

شعرت بالإحراج ولم تستطع الرد فحاول تغيير الموضوع وقال :

- طيب عموما إحنا كده إتفتنا علي أهم حاجه وهي المبادئ اللي هنمشي عليها الفترة دي ، وأنا بإذن الله بفكر أجي كل إسبوع لحد ما نعرف بعض كويس ونتفق علي كل حاجه وبعدين ممكن نقلل الموضوع شويه أو نمنعه خالص طالما مفيش ضروره ، المهم يوم الجمعة هيكون مناسب معاكي ؟

تنهدت بحيره وقالت :

- يوم الجمعة بيكون إجتماع العيله بتاعتنا ، بس عادي برضو ممكن تيجي وتتعرفوا علي بعض بس هيكون دوشه شويه يعني

- اممم طيب السبت كويس ؟

- اه تمام جدا

- خلاص بإذن الله هكلم عمي وأخذ رأييه في الميعاد ده ، يلا هستأذن أنا بقي عاوزه حاجه ؟

إبتسمت بحياء وقالت :

- شكرا

هم أن يغادر ولكنه عاد مرة آخري وقال :

- صحيح إبقى أي سؤال بييجي في بالك خلال الإسبوع ده إكتبه في ورقة ولما أجي بصي في الورقه عادي وإسأليني علشان أجابوك علي كل حاجه بتدور في دماغك ، وانا كمان هعمل كده ، وهنمشي بالنظام ده علطول بإذن الله لإن الواحد لما بييجي هنا بينسي كل حاجه

- أيوه ياريت

هم بالذهاب مرة آخري وقبل ان يصل إلي باب الشقه ليغادر ضرب رأسه بيده وهو يقول بتعجب  
مضحك :

- أوبس ، نسيت اهم حاجه

قالت بلهفه :

- إيه ؟

نظر للأرض مبتسما وقال :

- متفقتناش هنعمل حفلة الخطوبه إزاي علشان نفرح أهلنا وبرضو منغضبش ربنا

أخذت تفكر قليلا ثم قالت بإبتسامه :

- ممكن نعملها حاجه علي الضيق كده علي أد الأهل والاصدقاء المقربين وندور علي أناشيد أفراح بدون موسيقي ونشغلها ونخلي الرجالة في الصالة والستات في الأرج مثلا لو العدد كبير .

ثم تنهدت قليلا وقالت بتساؤل :

- بس مش عارفه بقي هنجيب الأناشيد دي منين !!؟

إبتسم قائلا :

- هتصرف أنا في الموضوع ده إن شاء الله متقلقيش ، عندي واحد صاحبي أكيد هيكون عنده أناشيد من دي وياذن الله هبعثهملك مع هند لما أجيبيهم ، كمان أنا بقول نعمل الخطوبه الإيسبوع الجاي علشان يبقي الموضوع رسمي يعني ونلحق قبل الدراسة برضو .

- تمام

-طيب خلاص ياذن الله هكلم عمي ونتفق علي يوم خلال الإيسبوع ده علشان نروح نشترى الدبل

ثم إنتبه قائلا بجديه :

- اه صحيح قبل ما أنسي ، أنا لو لبست الدبله دي هتكون علي اساس إنها خاتم مش أكثر لان الخاتم الفضة يجوز للرجل ، بس مش علشان دي حاجه بتربط بين الزوجين وبتخلي بينهم موده والحاجات دي لأنها كلها إعتقادات محرمة . تمام ؟

- تمام جدا

أمسك بقبضة الباب وصافح والدها بحرارة و غادر عائدا إلي منزله

عاد إلي منزله ودخل غرفته بسرعه وأغلق الباب خلفه ، نظر إلي السماء وأخذ يحدث ربه بكل ما يشعر به وما يتمناه فقال :

- يارب انا مش عاوز أخذ ذنوب تاني ومش عاوز أعضبك تاني ، كفايه اووي الذنوب الكثير اللي عملتها زمان دي ، يارب أنا خايف اووي من المسئوليه دي وخايف مكنوش أدها ، يارب أنا مليش غيرك ونفسي بجد أعيش حياتي صح ومغضبكش في خطوبتي وأتقيك في سلمي ، يارب قويني وقوي سلمي وتمم لنا علي خير ، أنا عارف إن فترة الخطوبه كبيره اووي وعارف ان الخطوبات دي بيحصل فيها مصايب بس انا مش هبقي كده ، أنا واثق يارب إنك هتساعدني ومش هقع وهفضل محافظ علي عفتي وعلي خطيبتني وياذنك يارب هنواجه أي حاجه لحد ما نعيش مع بعض في الحلال  
ثم تنهد تنهيدة قويه أخرجت كل ما بداخله وقال بكل جديه :

- أنا أدها ياذن الله ، ومش هتنازل عن هدفي ، حتي لو وصلت إنني مروحلهاش خالص بقي !!

ثم أخذ يردد بكل حماس :

- رضا ربنا أهم .. رضا ربنا أهم .. رضا ربنا أهم

أخرج هاتفه من جيبه وقام بالاتصال علي فاروق ليسأله ما إذا كان عنده من هذه الأناشيد أم لا ، ألقى التحية عليه فأجابه فاروق قائلا :

- وعلیکم السلام ورحمة الله وبركاته ، ازيك يا باشا

- الحمد لله يا فاروق ، إنت عامل إيه ؟

- الحمد لله كويس

- بقولك يا فاروق ، عندك اناشيد من اللي هي بتاع الأفراح دي بس من غير موسيقي

- اه عندي مجموعه كده

- طيب عاوزهم منك ضروري ، أعدي عليك أخذهم إمتي ؟

- خلاص بإذن الله بكره قبل الشغل هعدي عليك أديهوملك ونمشي مع بعض ، بس خير كنت عاوزهم ليه ؟

ضرب إسلام رأسه بكفه وضحك بإحراج وقال :

- بيبيي تصدق نسيت أقولك ، مش أنا خلاص تقريبا هعمل خطوبتي الإسبوع الجاي

أخذ فاروق يضحك بشده وقال بسعاده :

- ياراجل ، ولسه فاكتر تقول دلوقتي ، علي العموم يا سيدي الف مبرووووك

إبتسم بإحراج وقال :

- معلىش بقي الواحد دماغه مقلوبه والله ، الله يبارك فيك ، يلا هستناك بكره بقي علي الساعة ٨ ونص كده علشان منتأخرش علي الشغل

- ماشي بإذن الله

وفي صباح اليوم التالي حضر فاروق أسفل شرفة إسلام وقام بالإتصال به فهبط إسلام علي الفور وعندما رأي فاروق قال بمرح :

- فيرووق ، فين الجلبيه يا فيروق

ضربة علي كتفه بخفه وقال ضاحكا :

- يابني هو أنا مش هخلص من رخامتك دي بقي ، أكيد يعني يا ظريف مش هروح الشركة بالجلبيه ، شويه كده وشويه كده

أخذ إسلام يجذبه من ذقنه وهو يحركها يمينا ويسارا ويقول بمرح :

- خلاشي يا ناس اللحيه طولت شويه أهى ، تتربي في عزك يا فيروق

إبتعد فاروق قليلا وهو مازال غارقا في الضحك ثم إنتبه فجأة للوقت وقال :

- يا عم الحج إنجز علشان هتأخر علي الشغل ، خد الفلاشه أهى ومنتامش عليها هاه

إنتزعها منه بشده وقال مازحا :

- طبعا طبعا يابني ، أقل من سنه وهتكون عندك إن شاء الله

جذبه من يده للامام وقال :

- ماشي ياخويا إن شاء الله ، يلا بسرعه بقي بدل ما نترقد وإحنا ما صدقنا لقينا شغل أصلا

أسرع الخطي وسبق فاروق وهو ينظر له بجديه ممزوجه بالمرح وقال :

-أيوه يافيروق عندك حق والله ، الواحد داخل علي جواز ومحتاج لكل قرش

---

وفي يوم الخطوبه حضرت الفتيات ومن أهمهن هند وفاطمه وولاء لتجهيز العروسه ، كانت سلمي قد إختارت فستانا ساترا لجميع جسدها وفضفاض أيضا مع إصرارها علي إرتداء خمارها فوقه كما إعتادت ، جلست في الصباح الباكر أمام المرآة وقالت بكل حماس :

- هاه وروني بقي هتعملوا فيا إيه

ضحكت هند وقالت :

- الأول بقي لو هنعمل ماسكات كده ولا حاجه علشان بشرتك تبقي منوره  
ثم تابعتها فاطمه قائله :

- وبعدين يا ستي هنعمل حواجبك وبعدها بقي نشوف هنعط ميكب إيه وكده

رفعت سلمي حاجبها وقالت بإستنكار :

- حواجبي !! إمشي يا بت من هنا بدل ما ألسوعك

نظرت لها بتعجب وقالت :

- إنتي ناصحه يا سلمي؟! أكيد طبعا لازم تعملها دي خطوبة يا ماما مش يوم عادي يعني

ضحكت بسخريه وقالت مازحه :

- حد يقتل البت دي ، آل خطوبه آل

عقدت ذراعيها أمام صدرها وقالت بعدم تصديق :

- إنتي بتتكلمي بجد ؟ إنتي مش هتعملها فعلا؟!!

أومأت برأسها إيجابا وقالت مؤكده :

- أيوه بتكلم بجد طبعا

زفرت بضيق وقالت متبرمه :

- ليه بقي إن شاء الله؟!!

إبتسمت سلمي وقالت بحنانها المعتاد وإسلوبها الراقى :

- علشان يا ستي الرسول صلى الله عليه وسلم قال " لعن الله الواشمات والمستوشمات والنامصات  
والمتنمصات والمتفلجات للحسن المغيرات خلق الله " رواه البخاري ومسلم



واللي إنتي عايزاني اعمله ده يا أستاذة إسمه نمص ، واللعن ده معناه الطرد من رحمة ربنا  
ثم نظرت لها بكل ثقه وقالت :

- وأنا بقي مستحيل أتخلي عن رحمة ربنا علشان كام شعرايه !! وبعدين ربنا خلقتني في أحسن  
صورة ف مينفعش بقي أجي أنا وأقول لأ مش عاجبني شكلي وعاوزه أغيره !!  
أخذت تحرك رأسها يمينا ويسارا بضيق ورفعت حاجبها قائله :

- يا بنتي مش هينفع ، ده إنتي عروسه ، الناس تقول عليكى إيه بس ؟ وخطيبك نفسه هيتضايق  
تنهدت بعمق وقالت مبتسمه :

- بصي يا فاطمه ، الناس مش هينفعوني بحاجه لو اتطردت من رحمة ربنا ، وخطيبي لو هيتضايق  
من شرع ربنا يبقى أنا مش هتجوزه أصلا ، أنا عاوزه واحد ياخد بإيدي للجنه مش للنار !!  
ثم نظرت لهند وقالت مؤكده :

- ولا إيه يا هند

إبتسمت هند بطيبه وقالت :

- إعملي اللي يريحك يا سلمى ، وأصلا إسلام بيحبك زي مانتى كده

نظرت لفاطمه بمرح وقالت :

- طب خدي التقبيله بقي

تعجبك قليلا وقالت :

- وهو في تقيله كمان ؟ خير !!

ضحكت قليلا وقالت بإستفزاز مصطنع :

- أنا مش هحط ميكب

ضرخت فاطمه بها وقالت :



قال بإصرار أكثر :

- بقولك مش هلمس إيدك ، أنا هحطها من بعيد وإنتي دخليها  
أخذت تحرك كفيها في توتر بالغ وقالت بضيق :

-يا إسلام لأ ، مش هينفع والله

أخذ الجميع ينظر لهما ولكل فرد نظرتة المختلفه مابين شماته وفخر وحزن وغضب وإستنكار ، ترك الخاتم من يده ونهض من مكانه سائرا إلي الخارج ، نظرت إليه كل الأعين بإنتباه وكل منهم ينتظر الكارثة ، وقف علي الباب ونظر للفراغ وهو رافعا رأسه للأعلي وقال :

- هي دي بقي مراتي ، هي دي البنت اللي أستأمنتها علي بيتي وأولادي ، هي دي البنت اللي قالت مش هغضب ربنا مهما حصل ، هي دي البنت اللي هفضل فخور بيها طول عمري وهعمل كل اللي أقدر عليه علشان أسعدها .

تنهد بخفه وقال بحماس أكبر :

- هي دي بقي البنت اللي هتاخذ بإيدي للجنه

نظر لها لحظه ثم غض بصره وقال بكل فخر :

- وهي دي برضو البنت اللي نجحت في أول إختبار أعملهولها ، حقيقي يا سلمي أنا فخور بيكي

أخذ الجميع يصفق بحراره علي هذا الموقف الذي لم يروه من قبل ، بينما إنكمشت هي في الكرسي أكثر وكادت أن تبكي من فرط السعاده والإحراج ، فرغم ضيقها من إسلام قبل ثوان إلا أنها الآن أسعد إنسانه علي وجه الأرض ، نظر لوالدته قبل المغادره ففهمت مايريد ، نهضت من مكانها وأمسكت بالعلبه وأمسكت بيد سلمي وقامت بتلبيسها الخاتم وجلست مره آخري بينما جلس إسلام بالخارج مع عائلة سلمي وتعرف عليهم فردا فردا .

---

إنتهي اليوم وعاد كل إلي بيته ، أسرعت سلمي الخطي نحو غرفتها وإرتمت علي فراشها ونظرت إلي سقف الغرفه وهي تتنفس بصعوبه ، فإسلام قد وضعها في موقف لن تنساه أبدا ، فبقدر ما شعرت بالغضب منه بسبب إصراره علي تلبيسها الخاتم برغم أنه يعلم أنها لا تصافح الرجال ، بقدر ما شعرت وكأنها تطير فوق السحاب عندما سمعت كلماته عنها ، بالفعل هذا هو الزوج الذي تمنته طيلة حياتها ، أخذت تسترجع ذكريات ما قبل الإلتزام وتحمد الله علي ماهي عليه الآن ، فلو كانت مازالت علي حالها كان من الممكن ألا تتزوج بمثل هذا الرجل ، فبرغم تربيتها في منزل لا يهتم بتطبيق الدين

إلا انها أصرت علي أن تكون أفضل وإقتربت من الله عزوجل أكثر حتي أهداها الله تلك الهدية الغاليه ،  
شاب مثلها تماما في كل شئ ، وكأتهما روح واحده في جسدين .

حاول إسلام كتم ضحكاته في الشارع حتي وصل إلي المنزل وإنفجر في الضحك ، ضحكت هند  
ووالدته أيضا علي أثر ضحكاته ثم وكزته هند في يده بمرح وقالت :

- عاملي فيها شجيع السيماهاه ، لأ بتعرف تمثلي يا واد

إرتمي علي الكرسي وهو مازال يضحك وقال :

- إحساس لطشيف إن الناس كلها تبصلك بإعجاب كده ، كان شكلي كيوت صح ؟

ضحكت والدته بحنان وقالت :

- كنت فخوره بيك علي فكره وعماله أتباهي بيك قدام الستات

أخذ يعدل من وضع رابطه عنقه وقال بغرور مصطنع :

- احم احم تباهي يا أماه تباهي

وكزته هند مره آخري وقالت بجديه :

- بس حقيقي إنت كنت مبسوط لما عملت كده يا إسلام ؟

أومأت برأسه إيجابيا وقال بكل ثقاه :

- أنا كنت متأكد إنها هتعمل كده

ثم ضحك قليلا وهو يقول :

- بس كنت عايز أجننها شويه ، وكمان كنت حابب أعلم الناس اللي قاعدين درس مهم

قالت بلهفه :

- درس إيه ؟

ربت علي يدها وقال بحنان :

- إنك لازم تبقي غاليه أووي وحتى لو قالوا عليكى معقده مش مهم ، أكيد هتلاقى برضو اللي  
يحبك زي مانتى كده  
- هيببيح وإيه كمان

أخذ يسترجع الذكريات وقال :

- عارفه يا هند ؟ لما كنت بقعد أستعبط وأتريق علي كلام محمد وكده ، كان جوايا حاجه بتقولي إن  
هو اللي صح بس مكنتش عايز أصدق ، لكن لما جربت بجد الحياة اللي كلها حلال دي عرفت أد إيه  
كان عنده حق

إبتسمت هند وقالت :

- الله يرحمه

إستنذن إسلام منهما ودخل إلي غرفته ، أغلق الباب خلفه وإرتمي علي فراشه وأخذ يقلب في هاتفه  
حتى وقعت عينه علي صورة محمد فقال بقلب محترق :

- محمد انا محتاجك أوووووي !! بجد وحشتني فوق ما تتخيل

نهض من مكانه وإعتدل في جلسته ونظر للصورة بكل شوق وقال :

- عارف يا محمد ؟ أنا خطوبتي كانت النهارده ، بجد كنت فرحان أوي ؟ لكن برضو كان في وجع  
جوايا ، عمري ما تخيلت إنى أخطب وإنت متكونش جنبى يا محمد ، طب عارف إنى خطبت واحده من  
البنات اللي إنت كنت دايما بتقول عليهم دول ؟ البنات اللي محافظين علي نفسهم أووي وبيحبوا ربنا  
وبيطيعوه دايما ، كان نفسي تكون معايا اووي في يوم زي ده يا محمد .

عارف كمان ؟ أنا حاسس إنك مستريح أووي دلوقتي وحاسس إنك أكيد كنت هتكون مبسوط وإنت  
شايبنى كده ، وأصلا بقى أنا علطول بصلي بليل وبدعيلك ، بصلي بجد وأنا مش عايز حاجه من الدنيا  
إلا ان ربنا يغفرلك ونتقابل سوا في الجنه ، بحبك اووي يا محمد فوق ما تتخيل وبندم علي كل لحظة  
مكنتش بسمع فيها كلامك وكنت بتتريق عليك ، بس خلاص أخوك دلوقتي بقى حد تاني ومش  
هيتنازل أبدا عن هدفه الأول والأخير وهو إنه يكون ليه مكان في الجنه ، إتظمن عليا أنا بقيت كويس  
دلوقتي ، وهعيش حياتي صح زي ما انت كنت دايما بتقولي ، سامحني لو قصرت في حقك في يوم  
بس بإذن الله طول ما أنا عايش هدعيلك جايز أقدر أفيدك بـ حاجه ..

بحبك يا صاحب أحن قلب في الدنيا وأعذب إبتسامه ♥

وتمر الأيام سريعا ويستيقظ إسلام من نومه ليذهب إلى عمله ولكن يبدو أن اليوم مختلف عن كل يوم ، ذهب ليتأكد من اليوم والتاريخ كعادته كل يوم ، ولكنه قفز من مكانه عندما رأى تاريخ اليوم وقال :  
- ده النهارده اول يوم في شهر ٩ ، يا حلاوه يا ولاد ، يعني ممكن تثبتت في شغلك النهارده ياعم إسلام ، يارب يارب يكون الثبيت من نصيبي ، يارب أنا محتاج لكل قرش دلوقتي والتثبيت ده لو كان من نصيبي ممكن محتجش أشوف وظيفه بليل علشان تساعدني ف الجهاز .

أخذ يهرول إلى غرفة والدته كالأطفال وألقى عليها التحية وأخذ يطلب منها أن تلح في الدعاء لكي يكون الثبيت من نصيبيه ، إرتدي ملبسه بسرعه وذهب إلى عمله وعلي وجهه علامات الرضا والسعادة ، دخل مكتبه فوجد زملائه ينظرون له نظرات مختلفه كالعاده مابين حب وتفاول ، او إحتقان وإستنكار .. كان داخل المنافسه :

- إسلام محمود .. يعمل منذ شهرين

- ذكي ماهر .. يعمل منذ خمسة أشهر

- لبني فهد .. تعمل منذ سنه وثلاثة أشهر

- وأخيرا مروان يسري .. يعمل منذ سنه وتسعة أشهر

كان إسلام يعلم أن المهندس الذي يتم تثبيته يتم إختياره علي أساس الكفاءة والضمير وحب العمل لذلك كان علي يقين ان التثبيت سيكون من نصيبيه لما يري من عدم إتقان زملائه للعمل كما يتقن هو ، جلس يعمل في مكتبه حتي الظهيرة وذهب لأداء الصلاة ثم عاد فوجد الجميع في حاله من التوتر ، سألهم عن السبب فعلم أن نتيجة التثبيت سوف تخرج بعد قليل ، جلس يدعو الله كثيرا أن يرزقه من حيث لا يحتسب .. بعد قليل خرج رئيسه في العمل وقال بجديه :

- بعد الكثير من التحريات والإستشارات من قبل أعضاء الشركة تم إختيار المهندس ...

أخذ إسلام يتنفس بسرعه ويفرك في يده بعصبيه وإزدادات ضربات قلبه بشده وسمع أخيرا رئيسه في العمل يقول :

- تم إختيار المهندس ذكي ماهر للتثبيت هذا العام وحظ موفق للبقية في الأعوام القادمة بإذن الله

وجد نفسه يضرب الطاولة بشده رغما عنه ، فلو كان التثبيت من نصيب أي شخص آخر ماكان ليغضب هكذا ، ولكن ذكي ؟ كيف !! ذكي الذي يمضي معظم وقته في المزاح مع أصدقائه وإحتساء الشاي والقهوه ؟ أم ذكي الذي يأتي متأخرا للعمل في أغلب الأحيان ؟ ام ذكي الذي لا يحمل

من الجديه و الخبره و الكفاءه شئ؟! ما هذا الذي يحدث؟! فلو كان لن ينال التثبيت لأنه حديث بالشركه فكان لن ينالها ذكي أيضا لأنه حديث مثله وكانت من حق مروان وقتها!!

شرد قليلا في همومه حتي إنتشله مروان من شروده عندما جذب الكرسي ووضع بجواره وجلس عليه وهو يقول بضيق :

- وهو يعني علشان أبوه صاحب أستاذ شوقي يبقي يتعمل فينا كده؟!!!

نظر له إسلام بتعجب وقال :

- أبو مين ؟

نظر له والغضب يعلو وجهه وقال :

- الحاج ماهر أبو ذكي باشا يبقي صاحب أستاذ شوقي مدير الشركة

إتسعت عيناه وقال بذهول :

- ياسلام؟! وسطه يعني!! أو مال فين بقي علي أساس الكفاءه والضمير ومعرفة إيه؟!!!

أشاح بيده جانبا وقال بغضب :

- يا عم إنت بتصدق الكلام ده؟!!!

أخذ يمسح رأسه بيده عدة مرات وهو يقول بضيق :

- أستغفرك ربي وأتوب إليك ، طيب وبعدين هنعمل إيه ؟  
نهض مروان من مكانه متجها إلي مكتبه وقال بإستسلام :

- مش هنعمل حاجه يا بشمهندس غير إننا نستني للسنة الجايه ، يلا شوف شغلك بدل ما يبجوا يتلذقوا علي أي حاجه

أخذ يحرك رأسه يمينا ويسارا بضيق وقال :

- مش هينفع نسكت ، إحنا لازم نتصرف

نظر له بوجه خالي من أي تعبير وقال بملل :

- لو فكرت تعمل حاجه هتترفد ، أنا هنا بقالي سنتين وفاهم الدنيا ماشيه إزاي أكثر منك

رفع حاجبه للأعلي وقال بتعجب :  
- أترفد!!!

أوما برأسه إيجابا وقال مؤكدا :

- أيوه تترفد ، كان معانا واحد السنه اللي فاتت عامل حمش زيك كده وقال هغير الفساد ومعرفش إيه لحد ما لبس مصيبه وإترفد

نظر له بذهول وإتسعت عيناه ورفع حاجبه بإستنكار وقال :

- إنت بتتكلم جد !!؟

زفر بملل وقال :

- يا بشمهندس وهو إنت مش عارف يعني إن البلد مليانه فساد ؟ لو عرفت تشوف شركة محترمه عن دي يبقي إنقل نفسك ولو معرفتش يبقي إشتغل وإنت ساكت

تنهد بضيق وقال :

- يعني مفيش حل تاني !!؟

قال مؤكدا :

- الحل إننا نتحد ونقف قدام الظلم ، غير كده لأ

نظر له بعدم فهم وقال متسائلا :

- طيب وليه منتحدش !!؟

أخذ يطرق بأصابعه عدة طرقات علي المكتب نظر لإسلام بضيق وقال :

-الشركه كلها واسطه يا باشمهندس ، نتحد مين بس

ثم ضحك قانلا :



- تلقاك إنت كمان جاي بواسطه

إنتفض من مكانه وقال بتعجب :  
- أنا !!

ضحك أكثر وهو يؤكد ذلك وقال :

- طيب قوللي إنت جيت هنا إزاي ؟

قالها بكل براءه :

- واحد صاحبي شغال في شركة برضو قالي إن مدير شركتهم بيقول إنهم طالبين مهندسين هنا  
فجيت أقدم وقبّلت الحمد لله

نظر له بإستهزاء وقال :

- طيب يعني الموضوع كله معارف أهو ، هو ده حال البلد يابني ، اللي مالوش ظهر يترمي في  
الشارع ، لنا الله ♥

نظر له إسلام بخوف وقال :

- إيه ده يعني أنا شغلي كده حرام ولا إيه ؟

أوما برأسه نفيا وقال :

- أنا مقولتتش حرام ، إنت واحد محتاج شغل وعندك كفاءه بيبقي تستاهل الشغلانه دي فعلا ، الدور  
والباقي بقي علي اللي ياخذ حقوق الناس وهو ميستاهلش أصلا

ثم أشاح بيده مرة آخري وهو ينظر للأوراق الملقاه علي مكتبه وقال :

- إشتغل يا باشمهندس إشتغل ، إحنا لينا ربنا اللي أحسن من الكل ، وعيائنا برضو هيلاقوا أكلهم  
متقلقش

زفر بإستسلام وأمسك قلمه وبدأ في العمل مرة آخري

وفي موعد الإنصراف خرج إسلام وهو لا يدري ماذا يفعل ، فقد كان يحلم بهذا التثبيت حتى يزداد مرتبه قليلا ويمكنه الإستغناء عن التقدم لأي وظيفة ليليه ، قرر العوده مشيا حتى تتاح له الفرصه أن يفكر ويخطط ماذا سيفعل الآن ، ظل يفكر كثيرا بلا جدوي ولكن قطع تفكيره جرس هاتفه المحمول فأخرجه من جيبه بضيق وهو يقول :

- إيه يا هند كل شويه رن رن رن ، مستعجله أوي يعني علشان تعرفي إني متثبتتش !!

أخرج الهاتف ونظر فيه تعجب عندما رأي المتصل ، فقد كانت سلمي !! هذه أول مره تتصل به منذ خطوبتهما ، فياتري ماذا تريد ؟ ولماذا تتصل في هذا الوقت بالتحديد ؟ حاول الخروج من حالة الضيق التي تسيطر عليه وابتسم وهو يضغط علي زر الإجابة وقال :

- السلام عليكم

- وعليكم السلام ورحمة الله وبركاته ، إزيك يا إسلام

- الحمد لله تمام

ثم إبتسم أكثر وقال :

- حدديلي موقعك في الشقه بالتحديد بسرعه

حاولت كتم ضحكاتهما وقالت بتأكيد :

- ماتخافش أنا في الصاله وبابا قاعد قدامي أهو

ثم غمزت لوالدها الذي كان يبتسم ، ضحك إسلام وقال بهدوء :

- حسنا يا فتاة تحدثي ، ماذا تريدي ؟

تنهدت بسعاده بالغه وقالت :

- بابا وافق إنك تجيب نص الشبكه بس ، والباقي لما ربنا يرزقك في أي وقت إن شاء الله

قفز من مكانه وهو يقول بعدم تصديق :

- بنتقولي إيه !!؟

نظرت لوالدها ضاحكة وقالت :

- بقولك بابا وافق إنك تجيب نص الشبكة دلوقتي والباقي بعدين لما ربنا يرزقك

شهو بشفه وهو يقول بذهول :

- إنتي بتتكلمي بجد !!؟

أجابت مؤكده :

- اه والله

سألها بلهفه :

- وافق إزاي ؟ إنتي عملتي إيه معاه !!؟

قالت بكل ثقه :

- إستخدمت سلاحي

نظر لها والدها بذهول وكان رد فعل إسلام نفس الشئ وقال بعدم فهم :

- سلاح إيه ؟

إبتسمت لوالدها أكثر وهي تقول مؤكده :

- سلاحي اللي هو الدعاء ، كنت بلح علي ربنا في الدعاء إنه يخلي بابا يوافق وكنت بدعي بيقين اوووي إن ربنا قادر علي كده ، والحمد لله بابا وافق أهو

أخذ إسلام يتنفس بكثره وهو مازال لا يستطيع التصديق وقال علي الفور :

- طيب إقفلني يا سلمي إقفلني

ثم أخلق الهاتف مباشرة ، ضحكت سلمي بشفه وهي تقول لوالدها :

- يا عيني ده أتصدم

ثم نظرت لوالدها بحنان وقالت :

- شكرا يا بابا لأنك خلّيتني أكلمه وأقوله الخبر بنفسي علشان كنت حابه أعرف رد فعله  
إبتسم قائلا :

- يا سلمى ده خطيبك يعني عادى لما تكلميه  
نظرت له بسعاده وقالت :

- مش عادى أوى يعني ، بس طالما الكلام قدام حضرتك يبقى خلاص

أخذ إسلام ينظر إلي الهاتف بذهول وهو يحدث نفسه قائلا :

- هو اللي أنا سمعته ده صح ؟ لالا لا بجد ده حصل !!؟ يعني عمى وافق خلاص ؟ يعني مفيش شغل  
بليل ؟

أخذ يعد على أصابعه قليلا ثم قال :

- إيه ده إيه ده !!؟ يعني كده كمان ممكن نتجوز خلال سنه بس ؟ سنه إيه ؟ دول ١٠ شهور  
كمان !! ياربى معقوله اللي حصل ده ؟ معقول علشان كنت خايف من طول فترة الخطوبه ربنا  
حل المشكله من عنده وقصرت ؟ ولا علشان سلمى دي بنت نقيه أصلا فد ربنا إستجاب دعائها ؟ ولا  
علشان مفضلش مضغوط وشايل الهم عطول ؟ ولا علشان إيه ، اه اه عرفت ، علشان ربنا  
أحسن علينا من أي حد وهو بس اللي بيحس بينا ، علشان ربنا عالم بنيتي وإني مش عاوز  
أغضبه فسهيلى أموري ، علشان ربنا كريم اووووي ودايما بيرحمنا برحته

نظر للسماء وظل يردد :

اللهم أعني على ذكرك وشكرك وحسن عبادتك

اللهم أعني على ذكرك وشكرك وحسن عبادتك

اللهم أعني على ذكرك وشكرك وحسن عبادتك

وضع يده على قلبه وهو يتنفس بصعوبه وظل ينظر للسماء بعدم تصديق ، ظل يلتفت يمينا ويسارا  
حتى وجد سياره وركبها وعاد لمنزله على الفور ، كانت هند في إنتظاره ووالدته أيضا ، عندما دخل  
وشاهدتا علامات الفرحة على وجهه إقتربت منه هند وقالت بسعاده :

- أيوه يا عم إتببتنا ومرتبنا كبر ومحدث قدنا بقي

ثم ربتت والدته علي كتفه بحنان وقالت :

- الف مبروووووك يا حبيبي

نظر لهما بغرور وقال :

- بس أنا متببتش !!

رفعت هند حاجبها وقالت متعجبه :

- أو مال مالك يا خويا منشكح كده ليه؟!!

نظر لها بتعالي وقال :

- يا بنتي أنا حصلي اللي أحسن من التثبيت

قالت متلهفه :

- إيه ؟

قفز من مكانه وهو يقول بسعاده :

- أبو سلمي وافق علي نص الشبكة يا ناس

وضعت يدها علي فمها ونظرت له بذهول وقالت :

- إزاي ده؟!!

بينما إبتسمت والدته بسعاده وقالت :

- إنت بتتكلم بجد؟!!

تنهد بحراره وقال بمنتهي السعاده :

- اه والله يا ماما الحمد لله ، شوفي ربنا كريم أد إيه

ثم أخذ يضحك بشده وهو يقول :

- والجدير بالذكر إنها أول ما قالت كده قفلت السكه في وشها  
أطلقت هند ضحكات متتاليه وقالت :

- إنت بتهرج ، عملت كده إزاي يا مجنون

إبتسم قانلا :

- منا كنت طاير من الفرحة ساعتها ولو كنت إتكلمت كان ممكن أقول حاجه كده ولا كده ، خليني  
ماسك نفسي وسأكت أحسن علشان لو إفتحت محدش هيعرف يقفلني ، يلا ربنا يقوينا بقي

تعجبت هند وقالت :

- حاجه كده ولا كده إزاي يعني !!؟

إبتسم وهو يقول مفسرا :

- يعني عارفه لما ربنا يرزقني بواحد قلبها عليا أوووي وبتعمل كل اللي تقدر عليه علشان تتقي  
ربنا فيا وتخليني مش حامل هم أي حاجه علشان نعرف نوصل لهدفنا سوا ، ده أكيد هيخليني نفسي  
أتجوزها النهارده قبل بكره علشان أعرف أقولها كل اللي أنا عاوزه وأد إيه أنا بحبها فعلا وبتمني من  
ربنا إنه يجعلها ليا خير زوجه ، كمان لما الواحد بيكون مبسوط ممكن ميعرفش يتحكم في مشاعره  
وممكن أي حاجه تطلع منه غضب عنه ، علشان كده أنا قفلت بسرعه خوفا من إني أقول أي حاجه  
تغضب ربنا

تعجبت هند وقالت :

- طيب ما إنت بتروحلها البيت .. إشمعني مش بتخاف تقولها حاجه تغضب ربنا هناك !!؟

جلس علي الكرسي ونظر لها بتفهم وقال :

- لو روحتلها البيت فده بيكون علشان نتكلم في حاجه معينه وهمشي بعدها ، يعني الحمد لله مش  
بنفتح أي مجال إننا نتكلم في مواضيع مش ضروريه خوفا من الوقوع في أي محدور وكمان باباها  
بيكون قاعد وشايفنا وتقريبا بيسمع كلامنا كمان ، إدعيننا يا هند ربنا يتمم خطوبتنا علي خير ومن  
غير أي ذنوب ويجمعنا سوا في الحلال

مر يوم تلو الآخر وجاء يوم السبت ، ذهب إسلام إلي منزل سلمي لكي يتحدث معها ومع والدها قليلا ، طرق الباب بخفه ففتح والدها وصافحه إسلام بحراره وجلس معه ليحدثه فقال بسعاده :

- والله أنا مش عارف أشكر حضرتك إزاي يا عمي إنك وافقت علي نص الشبكه بس

إبتسم الأب قائلا :

- البت سلمي دي زنانه اووي وعماله تقولي مش عاوزه الخطوبه تطول ومعرفش إيه ، ومن الواضح كده إنها كانت بتصلي بليل وتدعي لأنني كنت دائما بشوفها صاحيه متأخر

ثم نظر له بجديه وقال :

- المهم يعني إني وافقت علي النص دلوقتي وبإذن الله لما ربنا يرزقك تبقي تجيبها الباقي ، وده وعد هاخده منك دلوقتي

نظر له بإمتنان وقال :

- وأنا أوعد حضرتك إني بإذن الله أول ما تتاح ليا الفرصه إني أكملها الشبكه مش هتأخر

- بإذن الله

حضرت سلمي وألقت التحيه علي إسلام وجلست بجوار والدها ، قام الأب من مكانه وجلس أمام التلفاز مباشرة لكي يتابع الأخبار ويكون موجود معهما في نفس الوقت ، نظرت سلمي للأرض كعادتها وقالت :

- كان في حاجات مهمه عاوزه أتكلم فيها وكتبتها في ورقه زي ما إتفقتا ، نبدأ بقي

إبتسم قائلا:

- بحب أنا الشغل الرسمي ده ، يلا إتفضلي

تنهدت بخفه وقالت :

- أول حاجه ، بالنسبه للتلفزيون .. أنا بفكر منجيبش تلفزيون في بيتنا علشان بحس انه مبقاش فيه أي حاجه مفيده دلوقتي أصلا ، وكمان كل حاجه بحب أشوفها بشوفها علي النت أسهل

صمتت قليلا ثم قال بتفهم :

- طيب ما إحنا ممكن نجيب تلفزيون ونمسح من عليه قنوات الأغاني والافلام والحاجات دي ، أعتقد كده هيكون أفضل  
- هنمسحها أكيد يعني ؟

أجابها بنفس الطريقه :

- أيوه هنمسحها أكيد يعني ، وكمان في المستقبل إن شاء الله لما يكون عندنا أولاد هيجبوا يتفرجوا علي كرتون وكده فلازم يكون عندنا تلفزيون

إبتسمت قائله :

- ماشي كده تمام .. تاني حاجه ، قرئت الكتاب اللي قولتلك عليه ده ؟ لازم أعرف رأيك فيه ضروري

تتحنج بإحراج وقال :

- بصراحه لسه ، بس متقلقيش هو في الخطه ، إن شاء الله لما أجي الإسبوع الجاي أكون خلصته وأقولك رأيي

- أنا كمان لسه مخلصتش الكتب اللي إديتها لي ، بإذن الله برضو أكون خلصتها الإسبوع الجاي أو اللي بعده

ثم إعتدلت في جلستها وقالت بجديه :

- في حاجه مهمه بقي كان لازم أتكلم فيها من زمان بس نسيت ، وبعد إنك أوعي تفهمني غلط

قال بقلق :

- خير ؟

تتحنحت قائله بتوتر :

- أنا حابه أشتغل بعد ما أخرج

عاد للخلف قليلا وأسند نقه علي كفته ونظر للأرض بضيق وقال :



- ليه بقي ؟ وهو أنا مش هعرف أصرف علي بيتي ؟!! ولا صعبت عليكي وقولتي تساعديني ؟!!!

ابتلعت ريقها وقالت بهمس :

- والله ما قصدي كده خالص ، ثواني أنا هوضحك كل حاجه

أخذت نفس عميق وقالت علي الفور :

- أنا لما دخلت الكلية دي مكنتش بحبها ، قلت عادي يعني أهى أي حاجه مجموعي جابها وخلص ويمكن قعدت علي الحال ده سنتين ، بس لما دخلت ثالثه بدأت أفكر في الموضوع ولقيت إن التعليم في بلدنا مستواه متدني جدا وده بسبب قلة المدرسين اللي هدفهم الأول والأساسي يطلعوا جيل واعى ويرضوا ربنا في شغلهم ، معظم المدرسين بيشتغلوا علشان بس المرتب ودايما يقولوا هنشتغل علي أد مرتب الحكومه !! ساعتها بس أخذت قرار حاسم إنى أنا اللي هغير التعليم !!!

ويمكن تضحك وتقولي : وهو إنتي بقي اللي هتغيري التعليم ؟!!

هقولك اه بإذن الله ، شوف كام طالب هيطلع من تحت إيدي سنويا ، شوف لو الطلاب دول حبوا المدرسة بسببي وحبوا الإنجليزي بسببي ، تخيل كده إنهم يقولوا لأهلهم إحنا مستحيل نغيب في يوم عندنا فيه حصه إنجليزي وكل ده علشان بيحبوني ، كمان بما إنى هبقي مدرسة ابتدائي فالموضوع هيكون مؤثر أكثر وبإذن الله أنا اللي هخرج الجيل اللي هيفضل فاكرنى دايما وبيدعيلي لأنى كنت سبب في حبه للمدرسة وللإنجليزي ، وأقسم بالله الموضوع ما مستحيل ولا حاجه ، الأطفال دول حاجه بريئه أوي وكل الحكاية إنهم محتاجين حد يحن عليهم ويعاملهم بأدميه شويه ، وكل حصه كده شويه حماس وإسلوب مختلف في التدريس وشويه حلويات وهدايا والموضوع هيمشي بإذن الله

ثم إعتدلت في جلستها وقالت بجديه :

- وإنت لازم تساعديني علي تحقيقي حلمي ده يا إسلام ، لازم توافق علي شغلي ، ومع ذلك لو لقيت في يوم من الايام إن الشغل واخدي من بيتي بشكل ملحوظ يبقى أنا هسيبه فورا

ثم إبتسمت قائله :

- بس ده مش معناه إنك تحاول دايما تطلعي مقصره علشان أسيب الشغل ، لا لازم تحط في بالك إن في أطفال كثير محتاجين مدرسين يتقوا الله فيهم ويعاملوهم بأدميه شويه ، وربنا يعيننا بقي ، كمان بقي بالنسبه لموضوع الإختلاط فأنا بإذن الله هكون في حالي ومليش دعوه بالرجاله ، ولو لقيت اوضة المدرسين فيها رجاله هسيبها وأشوف مكان تاني يكون ليا علطول ، وأصلا في الغالب الستات بتكون لوحدها والرجاله لوحدها .

تنهدت بأريحيه وقالت :

- تمام كده ؟ موافق ولا إيه ؟

أخذ يفكر قليلا ثم قال :

- طيب سيبيني أفكر في الموضوع وأقولك قرارى بعدين

إبتسمت قائله :

- ماشى هسيبك تفكر ، بس برضو هتوافق إن شاء الله

وقبل أن يتحدث قالت علي الفور :

- كان في حاجه مهمه برضو عاوزه أقولك عليها ، رغم إنها ممكن تعمل مشاكل ، بس مش عارفه  
بقي لازم أقولها !!

- خير إيه كمان ؟

تنهدت بكل حماس وقالت :

- أنا مش عاوزه أوضة سفره ولا عاوزه نيش

نظر للأرض بتعجب وقال :

- ليه ؟ وبعدين إحنا إتفقنا خلاص ودي إتفاقات رجالة ومش بتتغير  
قالت علي الفور :

- إحنا مش هنغير إتفاقات الرجاله ، إحنا بس هنعمل عليها تعديل بسيط

ثم تنهدت تنهيدة طويله وقالت بحماس :

- لو لاحظت كل الناس المتجوزين وعندهم شقه صغيره هتلاقي إنهم أول ما بيكون عندهم بيبي يأما  
بيبيعوا السفره ويجيبوا مكانها أوضة أطفال يأما بيلزقوا السفره وحاجتها جنب الحيطه ويجيبوا سرير  
يحطوه في نفس الأوضه ، علشان كده أنا عاوزه أجيب بنفس تمن أوضه السفره أوضة أطفال ،  
هتكون كامله علي بعضها وشكلها يكون زي الحاجات الكيوت اللي علي النت دي ، وكده كده في  
الغالب محدش بيستخدم أوضة السفره إلا في العزومات بس ، أما بالنسبه للنيش فأنا بحس إنه  
إختراع ملوش أي لازمه ، ولكن مع ذلك خايفه المطبخ ميكفيش الحاجات بتاعتي علشان كده ممكن

نعمل نيش ومكتبه في نفس الوقت .

يعني يتقسم نصين : النص اللي فوق يكون إزاز علشان الحاجات اللي جواه تبان ، والنص اللي تحت يكون خشب وده ونخليه مكتبه .

تنهدت بتعب وقالت :

- بس كده

أعجب إسلام بطريقة تفكيرها ورجاحه عقلها ، فهي لم تقلد باقي الفتيات بل حكمت عقلها وإستطاعت إختيار الأفضل لمنزلها من حيث الإستخدم لا المنظر كما يفعل البعض فأجابها علي الفور :

- أنا موافق جدا ، وكده أحسن والله ، عموما هقول لعمي علي الموضوع ده ونشوف بإذن الله

وبالفعل تحدثت إسلام مع والدها في الأمر فطلب الأب مهله للتفكير وموازنة الموضوع من وجهة نظره والرأي الاخير سيكون المره القادمه بإذن الله ولكن كان يغلب علي وجهه القبول

---

- يا سلمى قومي إلبسي بقي

قالتها ولاء عندما كانت تستعد للخروج هي ووالدتها وسلمى لشراء ملابس الجامعه ، فولاء تستعد لعامها الأول في كلية الهندسه وبالطبع يجب أن تظهر في أفضل صورة ، أجابت سلمى علي الفور :

- يا بنتي منا قولتك ١٠٠ مره إني بلبس الفستان والخمار علي طول ومش باخد وقت ، الدور والباقي علي الناس اللي بتقعد تلبس سنه ، عيشي حياتك إنتي بس وهتلاقيني جاهزة إن شاء الله أول ما تخلصي

وبالفعل إرتدت كل واحده منهن ملابسها وهبطن جميعا إلي وسط المدينه ، كانت الملابس كالعادة تمتاز بالضيق والإلفات وإفتقاد أي شئ له علاقة بالحجاب الشرعي ، ظلت ولاء تختار ووالدتها تختار معها بينما سلمى تقف في تزمير ، فعندما تبدي رأيها في أي شئ تصرخ ولاء بوجهها قائله جملتها المشهوره :

- هي دي الموضه !!

إنتهت ولاء من إختيار ملابسها التي أعجبت سلمى ببعضها وشعرت بالغضب تجاه البقيه وعندما إتجهت لشراء الحجاب وما شابه لتكملة كل الاطقم أوقفها سلمى قائله بجديه :

- بصي يا ولاء علشان نكون متفقين ، هنشتري طرح طويله شويه ومفيش باديهات كارينا ماشي ؟

زفرت بضيق وقالت :

- ليه بقي إن شاء الله ؟

إبتسمت وقالت بحنان :

- لأن يا ستي البادي الكارينا ده إختراع فاشل أصلا وملوش أي علاقة بالحجاب ، يعني بالظبط زي ما تكوني جبتي عليه دهان ودهنتي بيها إيدي ، من الآخر بيكشف أكثر ما بيستر وده مش حجاب يا ولاء ، والطرح الطويله علشان لو في حاجه ضيقه ولا حاجه تبقي تغطيها .

تنهدت بملل وقالت :

- أو مال أجيب إيه يعني علشان ألبسه تحت البلوزات !!؟

ربتت علي كتفها بحب وقالت :

- في إختراع تاني كده إسمه " بادي إسلامي " ده ممكن يكون ضيق شويه من فوق بس الطرحه لو طويله بتغطيه ومن تحت بقي بيكون الكم بتاعه واسع وحلو ومش لازق علي الإيد ولا حاجه

ثم جذبتها من يدها وقالت بحماس :

- تعالي أنا هوريكي

---

وبدأ العام الدراسي الجديد والآخر لكل من سلمى وهند وفاطمه ، جدت سلمى نيتها ووضعت أمام عينيها هدفها الأول والآخر وهو رضا الله عزوجل وإتقائه في طلابها وبذل قصاري جهدها في أن تكون المعلمه التي يتمناها كل طالب ، وقفت تتحدث مع هند وفاطمه كعادتها فوجدت سمر صديقتها تقترب منها وتقول بلهفه :

- سلمى شوفتي اللي حصل

نظرت لها سلمى بتعجب وقالت :

- خير يا سمر ؟

التقطت أنفاسها بصعوبة وقالت علي الفور :

- الدكتور اللي ماسك التربيه العملي السنادي عمل شوية تغييرات ومش هنكون كلنا مع بعض في نفس المجموعه  
نظرت لها سلمي بعدم فهم وقالت بلا مبالاه :

- عادي يا بنتي في الآخر هنكون كلنا بحرف السين !

زفرت بضيق وقالت :

- ماشي بس سمير هيكون معانا !!

شهقت سلمي بذهول واتسعت عيناها وقالت بعدم تصديق :

- سمير مين ؟ إزاي يعني !!؟

ضحكت بسخريه وقالت :

- وهو في غيره يعني !!؟ المهم أنا جيت أقولك علشان عارفه إنك لو كنتي لقيتيه معانا في الحصه فجأة كده كنتي هتضايقي

وقبل أن تغادر أمسكتها سلمي من يدها وقالت بخوف :

- يا بنتي مش هينفع بجد ، ده أنا بشرح قدام الدكتور بالعافيه ، دلوقتي كمان هيكون معانا واحد ورايح جاي معانا كده !!؟ مش هينفع طبعاً ، وكمان ده أنا عامله خطه كامله لتجديد طريقة الشرح السنادي ، كده بقي مش هعرف أنفذ ااااااي حاجه

قالت وهي تغادر مكانها :

- يا بنتي عادي بقي سمير ده محترم أصلاً ، أنا قولت أقولك وخلص ، يلا سلام

ضربت سلمي يدها بالآخري وزفرت بضيق وقالت في نفسها :

- ماشي محترم ، بس برضو مش هينفع بقي اوووووف

عادت إلي المنزل وهي ثائره تماما لاتعرف ماذا تفعل ، فهي تحاول بقدر الإمكان عدم الإختلاط بالشباب ولكن الآن ماذا سيحدث ؟ ستضطر للتحدث معه ومناقشته وسؤاله عن الدرس وأشياء من هذا القبيل لأنه أصبح واحدا من مجموعتها ويجب أن يكونوا جميعا علي توافق ، لم ترد أن يحدث هذا فظلت تدعو الله كثيرا أن يخرجها من هذا الأمر علي خير ، وبالفعل مع أول يوم لها في التربية العملي لهذا العام كانت تقف مع زميلاتها وكأنها تنتظر شيئا ما عندما جذبتها سمر من يدها قائلة :  
- يلا يا بنتي مش هنروح حصتنا ولا إيه؟!!!

إنتبهت لها وقالت :

- هاه ، هو إحنا كده كملنا ولا إيه ؟

ضحكت قليلا ثم قالت بجديه :

- أيوه يا بنتي كملنا خلاص ، هو إنتي مش بتعرفي تعدي ولا إيه ؟ بقينا ه أهو قدامك

نظرت حولها وأخذت تعدهم وبالفعل وجدتهم كما قالت سمر فلم تستطع السكوت أكثر من ذلك وقالت بلهفه :

- هو سمير زميلنا ده مش جاي معانا ولا إيه ؟

أطلقت سمر ضحكات متواصله وقالت :

- يا عيني دي البت هتموت ، عموما يا ستي سمير من ساعتها راح للدكتور وقعد يزن عليه ويقوله مش عايز أبقي في مجموعة البنات لحد ما الدكتور نقله وجاب بداله ساميه ، مش بقولك يا بنتي واد محترم

قفزت سلمي من مكانها بسعاده وقالت :

- yeeeeees- ، أيوه كده بقي الواحد يعرف يشتغل براحته

ثم وكزتها في ذراعها بخفه وقالت :

- طيب ما قولتيش ليه من ساعتها يا رخمه ده أنا كنت متغازه اوووي

ضحكت بإستفزاز وقالت :

- ما إنتي مسألتيش!!

وبالفعل بدأت سلمي حصتها الأولى ولكن هذه المرة بطريقة مختلفة ، فقد قررت أن تكون صديقه لهؤلاء الطلاب أكثر من كونها معلمه ، دخلت بكل حماس وقالت :

- السلام عليكم ورحمة الله وبركاته يا حلويين

نهض الطلاب من مكانهم كالعاده وقالوا بفتور :

- وعليكم السلام ورحمة الله وبركاته

نظرت لهم بكل حب وقالت :

- أنا بقي ميس سلمي التربيه العملي ، مبدأيا كده عاوزه أقولكم إني بحبكم اووي وبإذن الله هتستمتعوا بالحصه بتاعتي دايمًا .

ثم نظرت لهم بجديه وقالت :

- عاوزين بس نخط شوية قوانين كده مع بعض علشان الحصص تكون ماشيه علي مايرام :

أولا إعتبروني أختكم الكبيره قبل ما أكون الميس بتاعتكم ، يعني أي حد حابب يسأل عن حاجه او يكلمني في موضوع معين او كده هتلاقوني معاكم علطول بإذن الله ، ومش بزعم ولا حاجه متقلقوش

كمان مش عندي حاجه إسمها حد بليد وحد شاطر ، كلنا شطار بإذن الله وكلنا هنجابو وحتى اللي مش هيعرف أنا هفضل معاه لحد ما يجابو صح

ثم نظرت لهم بكل حماس وقالت :

- أقولكم علي سر بقي ؟ الطالب اللي مش هيكون يجابو خالص ده ويبجي في مره كده ويستجمع شجاعته ويقرر يقوم يجابو هياخد هديه ، حتي لو جابو غلط

نظر لها الطلاب بتعجب فأجابت مؤكده :

- أيوه بتكلم بجد ، وهتشوفوا الكلام ده بنفسكم

ثم نظرت لهم مازحه وقالت :





- ماشي

قالت بحب :

- الكلمة دي اسمها **Apple** ، أنا قولها ٣ مرات وإنت تقولها ورايا ، وبعدين ترجع علي مكانك وإنت عمال ترددها لحد ما أنا أقول مين يعرف ينطق الكلمة دي تروح إنت رافع إيدك وتقوم تقولها ماشي ؟

أوما برأسه إيجابا وقال :

- ماشي ، بس كده هيعرفوا إني غشيتها منك يا ميس

إبتسمت له بحنان وقالت :

- لأ متقلقش ، أنا هتصرف

وأثناء عودته إلي مقعده نظرت لهم سلمي بجديه وقالت :

- اللي هيكتب تاني وأنا بشرح هجيبه علي جنب كده وأزعقله في ودنه جامد ماشي ؟

ثم ضحكت قائله :

- هخليه يتسرع بقي ، إنتوا حرين ، كل واحد يخلي باله من ودنه أحسن ويسيب القلم وانا بشرح

إبتسم الجميع وقد صدقوا تلك الحيله ، بينما شعر محمد بالسعادة لأنها لم تخرجه أمام أصدقائه ، وهذا كان المنهج الذي إنتهجهت سلمي في تدريسها للطلاب ، فالكل عندها سواء ، بل أن الضعفاء أقرب لقلبها من هؤلاء الممتازين في كل شئ ، فقد كانت رحيمه بهم إلي أقرب حد لذلك أحبها الجميع

---

وقبل إمتحانات الفصل الدراسي الأول بقليل إستيقظ إسلام من نومه قبل الفجر كالعاده ليستعد للصلاة ولكنه تعجب عندما وجد غرفة هند مضاءة فدخل وهو يقول بحماس :

- أيوه ياعم الناس اللي صاحيه للفجر دي ، أخيرا بقي مش هقع أجرجرك في الأرض علشان تقومي

إبتسمت هند بإحراج وقالت :

- ده انا صاحيه علشان عندي إمتحان الميديتيرم بتاع البوتري النهارده ، ربنا يعديه علي خير بقي

جلس بجوارها وأخذ يعبث في أوراقها وهو يقول :

- طيب وإنتي عامله إيه في الشعر ده ؟

إبتسمت قائله :

- لأ كويس معايا الحمد لله

ثم ضحكت وقالت بمرح :

- سلمى يا عيني اللي تلقاها عمالها تشد في شعرها دلوقتي علشان بتكرهه أوووي

ضحك قليلا ثم قال :

- ربنا يعينكم ، أنا هقوم بقي علشان أستعد للصلاة

وبعد صلاة الفجر جلست سلمى مع أوراقها وكتبها في محاولة منها لفهم أي شئ ، إنتبهت علي جرس هاتفها وهو يعلن لها وصول رسالة جديده ، أمسكته وقد ظنت أنها رسالة من الشركة كالعاده ولكنها تعجبت عندما وجدت الهاتف ينير بإسم إسلام ، شعرت بالقلق لأن هذه أول مره يرسل لها إسلام رساله والذي أشعرها بالتوتر أكثر هو التوقيت الذي أرسلت فيه الرساله ، ضغطت علي الأزرار بخوف فوجدت محتوى الرساله :

- في حاجه ليكي قدام الباب إطلعي خديها

إتسعت عيناها وظلت تنظر للرساله بخوف ، ثم ذهبت لتوقظ ولاء لتخبرها بالأمر فقالت ولاء بضجر:

- خلاص يا ستي قولت هقوم أصلي ، بطلي زن بقي

أجابتها سلمى بكل براءه :

- لأ انا مش بصحيكي علشان تصلي ، أنا هقولك حاجه مهمه

ثم إنتبهت لما قيل فأعادت ضياغة الجمله وقالت بإحراج :

- قصدي يعني قومي علشان تصلي وبرضو في حاجه مهمه حصلت وأنا مش عارفه أعمل إيه ؟

فتحت ولاء عين واحده وقالت بنعاس :

- هااااا عيزه إيه ؟

أجابت بخوف :

- إسلام بعثلي رسالة وبيقولي إنه سايبلي حاجه بره وأنا مش عارفه أعمل إيه ؟

إنتفضت ولاء من مكانها وقالت بحماس :

- الله ، بحب أنا حركات المجانين دي

تنهدت بقلق وقالت :

- مهو أنا علشان عارفه إنه مجنون خايفه يكون لسه واقف برا

وقبل أن تتحدث ولاء سمعت سلمي رنين هاتفها مره آخري يخبرها بوصول رسالة جديده ، فتحتها بتوتر وكان محتواها :

- أنا مشيت علي فكرة ، يعني أنا دلوقتي في البيت متقلقيش

زفرت سلمي بأريحيه وقالت :

- ياربي ده زي ما يكون حاسس بيا

ثم نظرت لولاء بتساؤل وقالت :

- دلوقتي بقي أنا هجيب الحاجه اللي بيقول عليها دي إزاي ؟ خايفه الواد عبد الرحمن ياخذها لانه  
دايما بينزل يصلي مع باباه

نظرت لها بتعجب وقالت :

- يا ستي إفتحي الباب وخديها بسرعه وخلص

- لا يا ولاء أنا خايفه ، وبعدين الناس هيقولوا إيه لما يسمعوا صوت الباب إتفتح دلوقتي

نظرت لها بوجه خالي من أي تعبير وقالت :

- هيقولوا بابا رجع من صلاة الفجر !!

ارتدت سلمى إسدال الصلاة وفي أقل من الثانيه كانت قد فتحت الباب وأخذت الكيس المُلقى علي الأرض وأغلقتة بسرعه البرق ، دخلت ووضعت الكيس علي الفراش وهي تتفحصه ، قفزت من مكانها كالأطفال عندما رأت ما فيه وقالت وهي تصرخ بفرحه :

- الحقني يا ولاااااا شوفي جايلبي إيه ، اللسه بقي شيبسي كتير وشيكولاته وكمان علبه لبنان ، ياخراشي يا جدعان ده جاب كل الحاجات اللي بحبها ، وكمان في أكثر وقت كنت محتاجه أفرح فيه ، ربنا يخليك يا إسلام ويسعدك .

ثم نظرت لولاء بتساؤل وقالت :

- بس هو إزاي عرف إني بحب الأنواع دي بالذات ؟ وكمان إشمعني النهارده يعني ؟

ضحكت ولاء بسخريه وقالت :

- ياختي ما أكيد أخته قالتله علي كل حاجه ، وتلقاها كمان قالتله إنك عندك إمتحان شعر النهارده وقربتي تنتحري من الماده دي

جلست علي الفراش وهي تقلب في الأشياء بسعاده وقالت :

- هو انا المفروض أشكره صح ؟

أومأت برأسها إيجابا وقالت :

- أيوه طبعا

همست بقلق :

- طيب هكلمه إزاي دلوقتي ؟ ولا أعمل إيه ؟

قالت بضيق :

- علي فكره إنتي ممله اووووي ، فيها ايه يعني لما تكلميه وتقوليله شكرا وخلص

تنهدت سلمى بقلق ثم إستجمعت شجاعتهأ وقالت :

- خلاص هكلمه وأقوله شكرا وأقفل علطول ، وإنتي خليكي معايا يا ولاء ماشي

- ماشي

قامت بالإتصال به ووضعت سماعة الهاتف علي أذنها بتوتر وإنتظرت قليلا ولكنه لم يجب ، شعرت بالإحراج ونظرت لولاء وقالت هامسه :

-مش بيرد

-كلميه تاني

قالت علي الفور :

- لأ طبعا خلاص بقي ، الحمد لله إنه مردش أصلا علشان محسش بتأنيب الضمير

وقبل أن تتحدث ولاء سمعت سلمى رنين هاتفها للمره الثالثه يخبرها بقدوم رساله جديده ، أمسكت الهاتف بيد مرتعشه وفتحت الرساله وكان محتواها :

- الشكر لله ، مفيش تعب ولا حاجه ، دي أول وآخر مره تتصلي فيها في الوقت ده ماشي ؟

كادت أن تبكي عندما رأت الرساله وشعرت وكأنها تنصهر في مكانها من فرط إحراجها ، ظلت علي هذه الحاله قليلا ثم نهضت من مكانها فجأة وقالت :

- أنا لازم أقول لبابا علي اللي حصل ده

نظرت لها ولاء بذهول وقالت :

- يا بت أنتي مجنونه ؟ ده ممكن يموتك !!!

تنهدت بخوف وقالت :

- عارفه ، بس برضو لازم أقوله واللي يحصل يحصل بقي

ظل إسلام ينظر إلي هاتفه بضيق ويحدث نفسه قائلا :

- معلىش بقى يا سلمى كان لازم أعمل كده

ثم نظر للمرآه بغضب وقال :

- وبعدين ما تبطل جنان بقى يا عم إنت كمان ، إنت ناسى إنك لسه خاطب ولا إيه !!؟

نظر للأرض بطيبه وقال هامسا :

- بس والله أنا كنت عاوز أفرحها مش أكثر ، مش عارف بقى ده غلط ولا إيه

ثم نظر للمرآة مره أخرى وقال :

- الحمد لله إنى لحقت نفسى ومرديتش وإلا كانت تبقي مصيبه ، يعنى سلمى اللي كانت صامده  
عاطول دلوقتي بدأت تضعف .  
ثم تذكر الآيه الكريمة " ولا تتبعوا خطوات الشيطان "

وقال لصورته المنعكسه فى المرآه بغضب :

- ودي ممكن تكون خطوه من خطواته علشان يوقعنا ، وطبعاً هو ناصح وبيحب يشتغل علينا واحده  
واحده علشان منحسش بنفسها !!

ثم نهض من مكانه فجأة وقال بصرامه :

- بس أنا مش هينفع أسكت ، انا لازم أعرف باباها علشان محسش بالذنب !!

---

ظلت سلمى تدور فى غرفتها بتوتر ، فهى لا تستطيع التركيز فى مذكرتها حتى يستيقظ والدها  
وتخبره بما حدث ، ولا تستطيع أيضا إيقاظه حتى لا يكون غاضبا منها ويزداد الأمر سوءا ، زفرت  
ولاء بضيق وهى تنظر لها وهى على هذه الحاله وقالت :

- يا بنتى ما تقعدى فى حته بقى خيالتينى !!

نظرت لها سلمى بخوف وقالت:

- مش عارفه أتوقع رد فعله خالص ، وخايفه الموضوع يتقلب فوق دماغى وأنا عندي إمتحان  
وجاييه أخرى أصلا

تنهدت ولاء بممل وقالت :

- ما قولتك خلاص مش مهم تقويله يعني ، الموضوع عادي جدا مش مستاهل وجع الدماغ ده كله !!

جلست سلمي علي حافة الفراش ونظرت لولاء بضيق وقالت :

- لأ يا ولاء لازم يعرف ، أنا متعودتش أخبي عليكم حاجة حتي لو كانت صغيرة وبحب كل أفعالي تكون في النور علشان أبقي مستريحه

ثم أردفت قائله :

- وعلي فكرة الغلط كان مني أنا مش من إسلام ، كون إني أتصل في وقت متأخر زي ده وإحنا متفقين إن مفيش إتصالات بعد ٩ بليل وكمان بابا مش موجود يبقي أنا بدأت أقع والشيطان عرف يدخلني إزاي وأنا مش هسمح لنفسني أبدا بكده ، كانت غلظه ومش هكررها تاني بإذن الله

ثم تنهدت بتعب وقالت :

- إديلي بس إنتي الموضوع يعدي علي خير

وقبل أن تجيب ولاء إستيقظ الوالد ذاهبا إلي الحمام ليتوضأ ويؤدي صلاته ، ظلت سلمي تدعو الله أن يمر هذا الموقف علي خير ، إنتهي من صلاته فذهبت سلمي إليه وأخذت نفسا عميقا وبدأت حديثها قائله :

- بابا في حاجة حصلت وحضرتك لازم تعرفها

نظر لها بتعجب وقال :

- حاجة إيه ؟ خير ؟

تنهدت بخوف وقالت :

- إسلام بعثلي رسالة من شوية وقالي في حاجة قدام الباب إطلعي خديها ، وأنا لبست الإسدال وأخذتها بسرعه وقفلت تاني وطلع جايبلي شيكولاته ولبان وحاجات كده

ضحك الأب قائلا :

- طيب وبعدين ؟

نظرت إليه بتعجب وأجابت :

- وبعدين أنا غلطت وكنت هتصل بيه علشان أشكره بس هو مردش عليا وبعثلي رسالة وقالني  
متصليش في الوقت ده تاني

ثم قالت بسرعه هائله :

- والله يا بابا أنا عارفه إنني مكنش المفروض أتصل في الوقت ده بس اللي حصل بقي ، وأنا عرفت  
غلطي وبإذن الله الموضوع ده مش هيتكرر تاني أبدا لاني مش متعوده أخلف وعدي أصلا

إبتسم قائلا :

- ماشي

نظرت إليه بذهول وقالت :

- ماشي إيه !!؟

إتسعت إبتسامته وهو يقول :

- خلاص روعي شوفي مذاكرتك ، مش إنتي عندك إمتحان النهارده برضو ؟

لم تستطع إدراك ما يحدث فقالت بعدم فهم :

- يعني عادي ولا إيه ؟

نظر إليها بجديه وقال :

- مكنش هيبقي عادي لو كنت عرفت إن في حاجه حصلت في البيت ده من ورايا ، بس طالما إنتي  
قولتي علي الحقيقه خلاص

ضحكت بتعجب وقالت :

- يعني أمشي خلاص كده ؟



- عاوزاني أزعق يعني ؟

- هاه ؟ لأ طبعا

- خلاص روعي ذاكري دلوقتي ، وطالما بتقولني أخذتي الكيس وانتي ساكتة ومحدثش كلم الثاني يبقى خلاص ، بس تاني مره بلاش حركات الجنان دي وخصوصا إن الوقت متأخر

أومات برأسها إيجابا وقالت بسعاده :

- حاضر والله

ثم أخذت تقفز كالأطفال حتي وصلت لباب غرفتها وقالت لولاء بسعاده بالغه :

- أبويا طلع كيوت يا ولاء والموضوع عدي علي خير الحمد لله ، يا ربي لك الحمد كما ينبغي لجلال وجهك وعظيم سلطتك

ثم قفزت بحماس وجلست في وسط فراشها وأمسكت أوراقها قائلة بسعاده :

- أيوه كده الواحد يعرف يذاكر وهو مرتاح

ثم نظرت لولاء وقالت بإطمئنان :

- أحسن حاجه في الدنيا إن ضميرك يبقى مرتاح دائما ومش بتعملي حاجه من ورا أهلك ، حتي لو بابا كان زعق شويه برضو زعيقه هيبقي أهون عليا من إني أحس دائما إني خايفه ومخبيه عنه حاجه

ثم تنهدت قائلة بأريحيه :

راحة الضمير دي نعمه أصلا ، اللهم لك الحمد

---

وفي المساء قبل صلاة العشاء بالتحديد إتصل إسلام علي والد سلمي ليطلب منه مقابلته ليخبره بأمر هام ، وافق الأب علي ذلك وطلب من إسلام الحضور ولكنه إعتذر بحجة انه لا يريد أن يزعجهم في المنزل وطلب لقاءه في المسجد عقب الصلاة مباشرة ، إنتهت الصلاة وبالفعل تقابل كل من إسلام ووالد سلمي وبدأ إسلام حديثه قائلا بإجراج :

- عمي أنا جيت النهارده الفجر عند بيت حضرتك وسيبت حاجه لسلمي كده فمش عارفه بقي ده

ممکن یضایق حضرتک منی ولا ایہ ؟ أنا واللہ مکنش قصدي حاجه بس لما عرفت إنها عندها إمتحان النهارده والماده صعبه قلت أعملها أي حاجه تفرحها وتساعدنا علي المذاكره يعني

نظر له بتفهم وقال :

- سلمی قالتلی علی الموضوع ، وقالتلی کمان إنک مردیتش ترد علیها لما إتصلت متأخر وأنا إحتزمت فیک حفاظک علیها فی غیابی . بس الموضوع میتکررش تانی ولو عاوز تعمل حاجه یبقي تقولي الأول

تنهد تنهیده قویه أخرجت کل ما بداخله من خوف وقال بسعاده :

- حاضر یا عمی

ثم نظر إليه بتساؤل وقال :

- صحیح هی عملت ایہ فی الإمتحان ؟

تبسم قائلاً :

- بتقول أول مره تحل حلو أوي كده في الماده دي ، الحمد لله

ثم ضحك وهو يقول :

- شكل الشيكولاته واللبن عملوا معاها مفعول

أغمض عينيه للحظات وهو يحمد الله علي هذا الفضل ثم قال بإحراج :

- عمی كنت عاوز أطلب من حضرتک طلب

- إتفضل

إبتسم قائلاً :

- كنت عاوز أكتب الكتاب في أجازة نص السنه إن شاء الله ، والفرح يكون علي آخر السنه كده

أجابه علي الفور :

- لا طبعا

نظر إليه بتعجب ممزوج بالضيق وقال :

- ليه بس !!؟

قال بجديه :

- بنتي ما يتكتبش كتابها إلا قبل الفرح بيومين تلاته كده ، بالكثير أوي إسبوع ولا إثنين لكن أكثر من كده لأ

أخذ يفرك كفيه بضيق وقال بتساؤل :

- طيب إيه السبب ؟

إبتسم قائلاً بنفس الجديه :

- محدش عارف النصيب فين يا إسلام وياما ناس بعد كتب الكتاب حصل بينهم مشاكل والموضوع باظ والبنت بقت إسمها مطلقه وخلص ، وأنا طبعا مش هسمح إن بنتي يحصل معاها كده

تنهد بحزن وقال :

- بس يا عمي انا وسلمي متفقين في كل حاجه والحمد لله تفكيرنا زي بعض ، يعني بإذن الله مفيش مشاكل ولا حاجه

- الموضوع غير قابل للنقاش يا إسلام ، في الأجازة الكبيره تكتبوا الكتاب وتعملوا فرحكم بعدها عطلول .

أمسك بيده محاولاً مصافحته وهو يقول بنفس الجديه :

- أنا ماشي بقي ، عاوز حاجه تاني ؟

تبسم قائلاً بإحراج :

- طيب ينفع أكلم سلمى لما حضرتك تروح ؟

أوما برأسه إيجاباً وقال :

- ماشي هخليها تتصل بيك لما أروح ، يلا سلام عليكم

- وعليكم السلام ورحمة الله وبركاته

تحرك إسلام من المسجد عائدا إلي منزله وهو يردد بكل جديه :

- أنا قررت أحافظ عليكي من نفسي يا سلمي ، وحتى كتب الكتاب باباكي موافقش عليه ، أعذريني بقي مش قدامي غير كده لأنني مش هقبل إنني أغضب ربنا فيكي أبدا .

فور عودته إلي منزله وجد هاتفه ينير بإسم سلمي وكأنها كانت تعلم موعد عودته بالتحديد أو ربما رأته عائدا عبر النافذة ، أجابها وهو يقول بحماس :

- السلام عليكم ورحمة الله وبركاته

- وعليكم السلام ورحمة الله وبركاته ، بابا قالي إنك كنت عاوزني في حاجه

إبتسم قائلا :

- إفتحي الإسيكر يا سلمي

تعجب قائله :

- إشمعني ؟

إتسعت إبتسامته وهو يقول :

- أهو كده رخامه بقي

قامت بفتح السماعه الخارجيه كما طلب منها وقالت علي الفور :

- فتحتة

أغمض عينيه بإقتناع وقال مبتسما :

- ماشي ، بصي يا ستي بما إن إمتحاناتك قربت جدا فأنا مش هاجي الفتره دي خالص لحد ما تخلصي إمتحانات بإذن الله

ثم أردف قائلا :

- أنا مش عاوز أشغلك اليومين دول وعاوزك تركزي في مذاكرتك وبس ، عاوزين تقدير حلوه هاه

إبتسمت سلمي وقد فهمت مايرمي إليه فوافقت علي الفور وقالت :

- حاضر هذاكر كويس والله

- ماشي شدي حيلك بقي ، يلا السلام عليكم

- وعليكم السلام ورحمة الله وبركاته

إبتسمت لوالدها وذهبت مهروله إلي غرفتها وهي تتذكر جملة إسلام التي لم تنساها قط :

" انا قررت أحافظ عليك من نفسي يا سلمي ، وإنتي لازم تساعديني "

ظلت تنظر للهاتف بمنتهي السعاده وهي تقول بكل حماس :

- حاضر يا إسلام هساعدك ، لأنني مش عارفه أتخيلك غير زوجي في الدنيا وكمان في الجنه ومش هتنازل عن الحلم ده أبدا

---

- علي فكرة يا إسلام إنت مكبر الموضوع زياده عن اللزوم

قالتها هند إثناء دخولها غرفة إسلام بعدما سمعت مكالمته مع سلمي وأكملت حديثها قائلة :

- أنا مكنش قصدي أسمع كلامك معاها بس صوتك كان عالي

نظر لها مبتسما وقال :

- مش مكبر الموضوع ولا حاجه ، هو ده الصح

نظرت له بإستنكار وقالت :

- يا بني دي خطيبتك يعني مش واحده غريبه

جذبها من يدها وأجلسها بجواره وقال مفسرا :

- خطيبتني دي يا هند قدام ربنا تبقي واحده غريبه طالما مش كاتبين الكتاب

ثم تنهد بحزن وقال :

- ده أنا حتي النهارده طلبت من والدها إننا نكتب الكتاب بس هو مرضيش قولت خلاص بقي أتصرف أنا

نظرت إليه بتعجب وقالت :

- هتصرف أزاوي يعني ؟

قال بكل جدية :

- هحاول أقلل الزيارات خالص وأروح للضرورة بس ، كده كده أنا خلاص إتكلت معاها كتير الفتره اللي فاتت دي وعرفت عنها كل حاجه وإتفقنا علي حاجات كتير الحمد لله ، دلوقتي بقي مرواحي ملوش لازمه وممكن يترتب عليه مفاسد أكثر من المنافع

أخذت تحرك رأسها يمينا ويسارا بعدم رضا وقالت :

- أنا مش معاك في الموضوع ده بس براحتك برضو

ثم نظرت له بتساؤل وقالت :

- بس هتبرر بيايه بقي غيابك الفتره دي كلها ؟

نظر لها بخبث وقال :

- السؤال ده ميتسئش لإسلام يا ماما ، كله تحت السيطره لا تقلقي

تنهدت بإستسلام وقالت :

- ماشي يا سيدي براحتك ، في الآخر دي حياتكم وإنتوا حرين فيها ، ربنا يسعدكم

---

إنتهت إمتحانات نصف العام وظهرت النتيجة وحضر إسلام لمنزل سلمى ليبارك لها علي هذا التفوق ، فسلمى لأول مره تحصل علي تقدير جيد جدا وهذا جعلها في غاية السعاده والفخر .



- وخليهم كده بقي علشان أفرح بيهم شويه

إتصلت هند بإسلام وأخبرته بإمكانية حضوره الآن وبالفعل حضر وجلس علي إستحياء وقدم هديه بسيطه لسلمي وقال :

- الف مبرووووك وعقبال الترم الجاي إن شاء الله

أمسكتها بسعاده وهمت أن تفتحها ولكنه قال علي الفور :

- لأ بلاش تفتحها دلوقتي ، لما أمشي بقي

ثم إبتسم قائلا:

- أنا بس كنت جاي أباركلك وأقولك علي حاجه مهمه

قالت بانتباه :

- الله يبارك فيك ، إتفضل

حاول إنتقاء كلماته لكي يمر الموقف علي خير وقال مبتسما بجديه :

- أنا عارف إنك الفتره الجايه دي هتبدأي كورسات وبعدها إن شاء الله هيكون آخر ترم ليكي في الكليه ، وغالبا آخر ترم ده الواحد بيكون مضغوط وخصوصا لأنه بيكون خايف يشيل ماده ولا حاجه ويضطر يعيد السنه عليها يعني

إبتسمت قائله :

- كده في وشي وأنا لسه ناحجه

تنحج بإحراج وأكمل حديثه :

- علشان كده أنا مش عايز أشغلك معايا وعاوزك تاخدي بالك اووي من مذاكرتك ، مدرسة المستقبل لازم تكون قدوه هاه ، بإذن الله هبقي آجي علشان نتفق علي تجهيزات الشقه وكده ، لكن بقية الأيام حابب أفضيلك الجو علشان تركزي في مذاكرتك ، بس دي الحاجه اللي كنت جاي علشانها

تبسمت بسعاده وقد فهمت هذه المره أيضا ما يقصده وقالت :



- ماشي

كان إسلام قد حضر إليها قبل موعد الصلاة مباشرة حتى تتاح له الفرصة أن يهرب منها بحجه مقنعه ، فهو يحمل لها الكثير من الكلمات ولا يريد أن ينطقها لسانه إلا في الحلال لذلك يفعل الكثير من الحيل حتى يصل إلي هدفه ، وبالفعل أذنت صلاة العشاء وإستئذن إسلام في المغادره ولكنه هذه المره نسي هاتفه المحمول علي الطاولة ، تذكرت سلمي فجأة الحوار الذي دار بينها وبين هند قبل شهر والذي كانت تضحك فيه هند وتقول :

- ده إنتي لو تشوفي مسميكي إيه علي الموبايل عنده ، الواد عايش الدور أوي

وقتها لما تتمالك سلمي نفسها وقالت بكل لهفه :

- مسميني إيه قوليلي ؟

أخذت هند تضحك بشده وتقول :

- لأ يا ستي لو عرف هيزعل

تذكرت سلمي الحوار وأخذت تنظر للهاتف بتردد ، لم تستطع تمالك نفسها أكثر من ذلك وقامت بالاتصال به فرأت إسمها ينير الهاتف

" رفيقتي إلي الجنه "

نظرت إليه بذهول وهي تضع يدها علي صدرها محاوله إلتقاط أنفاسها ، فقلبها اليوم حصل علي كمية من السعاده لم يحصل عليها قبل ذلك قط ، ومن ثم لم تستطع الصبر أكثر من ذلك فقامت بنزع غلاف الهديه وصعقت عندما رأته قد أحضر لها شئ لطالما حلمت به أيام وليال ولكنها لم تكن تتوقع ان تحصل عليه فعليا ، قفزت من مكانها وظلت تهزول بإتجاه غرفتها قائله لولاء بصراخ :

- ولـاء إلحقي شوفي إسلام جاييلي إيــــــــــــه

قفزت ولـاء من مكانها بحماس وقالت :

- إيه إيه !!؟

إحتضنته سلمي وهي تقول بمنتهي السعاده :

- المصحف اللي بشوف صوره علي النت دايمـا ده وكنت طول عمري بحلم يكون عندي واحد زيـه



وفي المساء قبل صلاة العشاء بقليل جلس إسلام مع الرجال في المسجد بينما وقفت سلمى قلقه في مصلي النساء بالأعلي ، أقيمت الصلاة وقام الجميع بأداء صلاة العشاء ثم تقدم كل من والد سلمى وعم إسلام وإسلام واقتربوا من المأذون لكي يقوم بكتب كتاب سلمى وإسلام ، أخذت سلمى تنظر بين الحين والآخر من وراء الستار علي الرجال القابعين بالأسفل وضربات قلبها تزداد مره تلو الأخرى ، نظرت لإسلام فرأت ملامح السعاده تكاد تقفز من وجهه وتحيط بكل ماحوله ، إبتسمت رغما عنها عندما وجدت المأذون يقول :

- بارك الله لكما وبارك عليكما وجمع بينكما في خير

أغمضت عينيها وهي تقول بكل صدق :

- آمين

إلتفت النساء حولها والكل يأخذها بالأحضان وينثر عليها القبلات والتهاني والمباركات ولكنها لا تشعر بشئ قط ولا تتذكر أي شئ سوي وجه إسلام وفقط ، إستفاقت من شرودها علي رنين هاتفها الذي يعلن لها وصول رسالة جديده ، نظرت علي اسم إسلام الذي ينير الشاشة فإبتسمت بسعاده وفتحت الرساله بحماس وكان محتواها :

- بحبك بقي يا اوزعه إنتي ♥

دمعت عيناها من الفرحه ووضعت يدها علي فمها وهي ماتزال مصوبه نظرها تجاه الهاتف ، أخذت تقرأها الكثير والكثير ثم إستجمعت شجاعته وقررت الرد علي الرساله فكتبت :

- هروح أقول لمامتك إنك بتقولي كلام عيب

إرتفع صوت ضحكات إسلام رغما عنه عندما قرأ الرساله ووجد أصدقائه يأتون إليه من كل حذب وصوب قائلين بمرح :

- أيوه بقي ياعم مين أدك

- الله يسهلوا يا باشا

- بعنتك إيه هاه هاه

- كنت بتضحك علي إيه يا إسلام ؟ قول ومتخافش مش هقول لحد والله



- إيه ده إيدك مفعصه كده ليه ؟

ضحكت رغما عنها وقالت بتعجب :

- مفعصه إزاي يعني ؟

ترك يدها وعقد ذراعيه أمام صدره وقال بضيق مصطنع :

- يعني اوزعه وقولنا ماشي ، كمان بايد مفعصه !!؟

ثم نظر إليها بتأثر مصطنع وقال :

- يا خوفي لتطلي قرعه كمان ، والله تبقي كملت

ضحكت وهي تقول :

- لا يا خويا مش قرعه متقلقش ، وبعدين مانت شايف إيدي دي من زمان ، إشمعني دلوقتي بقي  
مش عاجباك

أمسك أطراف أصابعها وجذبهم للأعلي أمام عينيها وقال بمرح :

- دي إيد دي ؟ طب هتمسكي عيالي بيها إزاي بقي ؟ وانا أقول ياختي البنت بتقول مش بحب أضرب  
العيال في المدرسه ليه أتاريها مش بتعرف تمسك العصايا أصلا

ثم أخذ يضرب كفا بكف و يقول مازحا :

- اه يا بختك البامبه يا إسلام يابني ، اه يا ليلتك الفسفوري يا ضنايا ياخويا ، مراتك اوزعه وإيدها  
مفعصه وكمان شكلها قرعه ياتي ياما

نظرت له بإحراج وقالت بحزن :

- إسلام إنت بتهرج ولا بتتكلم بجد ؟ طب ما إنت كنت شايفني من زمان كده ولو مكنتش عاجباك  
مكنتش توافق عليا وخلص

رفع حاجبه بمرح وهو ينظر ليديها وقال بسعاده :

- خلاص خلاص صعبتني عليا ، أنا موافق يا ستي إن مراتي تكون اوزعه وإيديها صغونه وحتى لو  
قرعه برضو موافق ، حد لاقى جواز اليومين دول ، هيببيح بقي كم أنا حونين ، والله يا بنتي

الرجاله دول ليهم الجنه

نظرت له بعدم فهم وقالت :

- يعني إنت كنت بتهزر ؟  
إرتفعت ضحكاته وقال مازحا :

- ياسلمي بهزر ، وربنا بهزر ، وبعدين هو إنتي لسه شوفتي حاجه ، التقييل جاي ورا يا زوجتي  
العزيره ، إصبري علي رزقك بس

ثم أمسك يدها وقال بمرح :

- بنات طيبين اوووي يا خال !

جذبها من يدها وأخذ يهرول باتجاه باب ساحة المسجد فسألته وهي تحاول إلتقاط أنفاسها عن السبب  
فقال مازحا :

- هنوهرب يا واد عمي ، هنوهرب

قالت بلهفه :

- طيب مش هنقول لبابا ؟

- لع مش هنقول لحد

ثم نظر لها بخبث وقال :

- ولا تحبي نرجع نقول لبابا ؟ وأهو بالمره نسأله إذا كان الكلام اللي بعتهولك في الرساله ده عيب  
ولا لا ؟ وبرضو ممكن نسأل ماما ونسأل باقي الشعب مفيش مشكله عندي إطلاقا

تتحنحت قائلا بمرح :

- لأ وعلي إيه ؟ أصلا أصلا إنت جوزي دلوقتي يعني عادي لما نخرج من غير ما نقول لحد ، هيا بنا  
يا أخ العرب

هم أن يذهب معها ولكنها أوقفته مره آخري وقالت :

- بس كده هيقلقوا علينا يا إسلام ، وتلقاهم دلوقتي عمالين يدوروا علينا جوه

نظر إليها بحب وقال :

- متقلقيش هكلم باباكي دلوقتي ، بس يلا نلحق نوصل لآخر الشارع علشان محدش يلحقنا بقي وبالفعل وصل إسلام إلي آخر الشارع وقام بالاتصال علي والد سلمي الذي أجاب بلهفه :

- يا إسلام إنتوا فين ؟ إحنا قلبنا الدنيا عليكم

- هربنا يا عمي

ضحك الأب وقال بتعجب :

- هربتوا إزاي يعني ؟

نظر لسلمي بحنان وقال :

- هربت أنا وسلمي

ثم غمز لها وقال بصوت هامس :

- ام إيد مفعصه

وارتفع صوته مره آخري وهو يقول :

- ورايحين النادي ، بإذن الله مش هنتأخر

- طيب يابني مش كنتوا سلمتوا علي الناس الاول وبعدين مشيتوا ؟

- معلىش يا عمي إعتذر لهم بالنيابه عننا وقولهم العيال إتجننوا ولا أي حاجه بقي

- ماشي يا إسلام ، ربنا يسعدكم

---

وفي النادي المطل علي البحر ، جذب إسلام الكرسي للخلف قليلا وهو ينظر لها بحنان وقال :

- تفضلي يا أميرتي

ثم ضحك كعادته دائما وقال :

- إيه رأيك بقي في شغل الأفلام ده ؟ أنفع صح ؟

جلست سلمي بسعاده وقالت :

- شكرا ، بس تنفع إيه ؟

أجابها ببراءه مصطنعه :

- مطرب شعبي

نظرت لتعبيرات وجهه وحاجبه المرفوع بطريقة مضحكه فضحكت رغما عنها وقالت :

- مين راح فين جه منين وعمل إيه ؟!! إنت مين يا إسلام ؟

نظر لها بـ شر وقال :

- والآن حان الوقت للظهور علي طبيعتي ، بقالي ١٠ شهور يا شيخه مستني وعامل نفسي مؤدب  
علشان معملش حاجه حرام ودلوقتي بقي حان وقت الجنان نياهاهاهاهاها

إلتصقت بالكرسي الذي تجلس عليه ونظرت له بسعاده وقالت مازحه :

- انا كده بدأت أخاف علي فكره ، إنت إتحولت ولا إيه ؟

جذب كرسيه وجلس عليه وصوب نظره تجاهها وقال بثقه :

- القادم أجمل يا زوجتي العزيزه ، إستني عليا بس ، وأمري لله ههدي اللعب شويه علشان  
متتخضيش ، عدي الجمائل بقي ، وأوعدك إن سلمي الكيوت دي هتقلب متوحشه بعد شويه ، إنتي  
هتعيشي مع إسلام يا ماما هاهاهاهاهاهاها

إنتهي من جملمته ونظر لوجه سلمي فوجدها تنظر له بذهول مصحوب بالمرح ولاتستطيع التحدث من  
فرحتها وتعجبها معا فإكتفي بهذا القدر الآن وحاول إستعادة هيئته البرينه وقال بطيبه :

- أجيبك عصير ؟



أومأت برأسها إيجابا فطلب لها المشروب الذي تفضله ، حضر الجرسون ووضع أمامها مشروبها  
فقالت علي الفور :

- ممكن شاليموه ؟

أحضر لها طلبها وذهب سريعا بينما نظر إليها إسلام باستنكار وقال مازحا :

- شاليموه؟! الله يرحم

ضربته علي كفه بخفه وقالت :

- إسلام بس بقي الله

ضحك وهو يقول :

- خلاص خلاص والله

ثم نظر لها بجديه وقال :

- عاوز أحكيتك حدوته ممكن ؟ بقالي كتير أووووي مستني اليوم ده علشان أقولها

إبتسمت قائله :

- ممكن طبعا

تنهد بسعاده وقال :

- كان في مره شاب عايش كده بدون هدف ومالوش أي لازمه في الحياه ، الشاب ده فضل علي  
الحال ده كتير اووي لحد ما حصله ظرف معين كده خلاه يعيد ترتيب حياته ويغير خطط مستقبله كلها  
، بدأ يقرب من ربنا ويبقي عايش صح شويه يعني

ثم نظر لها بكل حب وقال :

- وفي مره الشاب ده كان واقف في البلكونه ولقي بنت أوزعه كده معديه من تحت البلكونه هي  
ومامتها وكان لسه هيمسك طوبه علشان يحدفها بيها زي ما كان بيعمل زمان بس فجأة كده إفتكر إنه  
كبر خلاص فراح غاضض بصره وراجع لورا علطول

قاطعته سلمى بمرح وقالت :

- طوبه يا اسلام طوبه !!؟

رفع حاجبه قائلا :

- بطلي تقاطعيني زي العيال الصغيرين كده يا اوزعه إنتي ماشي ؟ المهم إن الشاب ده بقي حس فجأة بحاجه غريبه تجاه البنت دي فراح لأخته وقعد يدحلبها في الكلام لحد ما عرف كل حاجه عن البنت دي وفضل يدعي ربنا كتير إنه يبسرله الأمور ويجعلها من نصيبه .  
بعد كده بقي راح إتقدملها وكان كل ما يتكلم معاها مره يحبها أكثر وأكثر ويحترمها أووي ويحس أد إيه ربنا كريم علشان رزقه بنعمه زي دي ، بس الشاب ده مع الوقت بقي لقي نفسه بدأ يتعلق بيها أووي وخاف إنه يقولها في لحظة شيطان حاجه تغضب ربنا فقعد يدعي ربنا كتير إنه يحفظله قلبه ويبعد عنه كل شيطان ، بعد كده راح قالها إنه مش هيزورها كتير علشان دراستها وكده وهي تفهمت ده جداا ووافقت ومعملتش أي مشاكل لأنها حست باللي هو عاوز يقوله ، وعلي أد ماكان بيبيقي نفسه يشوفها أووي علي أد ماكان بيبيقي خايف يغضب ربنا فربنا يبعتها عنه بسبب ذنوبه .

المهم بقي يا ستي إن الشاب ده كتب كتابه عليها النهارده وهو حاسس إنه طابير أصلا ، مش مصدق إن البنت دي بقت مراته خلاص قدام الناس كلها ، نفسه يصرخ بأعلي صوته ويقولها بحبك أووي ياسلمى ونفسه الناس كلها تعرف هو تعب أد إيه علشان يوصلها ، نفسه يقول للناس كلها إنه عمل ذنوب كتير في حياته ومكنش يتخيل إن ربنا هيرزقه بهديه زي دي ، لكن علشان ربنا كريم رزقه بأحسن بنت في الدنيا ، نفسه يقول لكل الشباب حافظوا علي نفسكم وعلي خطيبتكم أووي علشان تحسوا الإحساس اللي أنا حاسه دلوقتي ، إحساس أول كلمة بحبك وإحساس أول ماسكة إيد في الحلال أكبيد ليها طعم تاني .

نفسى تحبيني زي ما بحبك ياسلمى ، قصدي يا رفيقتي إلي الجنه

نظر إليها بكل حب وقال :

- الكلمة اللي من أول يوم خطوبه سميتك بيها علي موبايلي وكنت مستني اليوم اللي أقدر أقولها لك فيه علي الحقيقه ، علي أد ما تعبت جدا وصبرت كتير ، علي أد ما ربنا رزقني فرحه دلوقتي ، أنا حاسس إنى مش عايز حاجه من الدنيا تاني والله ، يارب يقدرني وأسعدك زي ما بتسعديني.

إنتهى من كلامه فرأى سلمى قد وضعت يدها علي فمها وقد أغرقت خمارها بالدموع فتبسم لها قائلا:

- ياه يا سلمى لو تعرفي الـ ١٠ شهور دول عدوا عليا إزاي ؟ اللهم لك الحمد بجد مش مصدق إنك بقيتي مراتي خلاص ، ربنا يقدرني وأخذ بإيديكي للجنه زي ما إتفقتا ، وسامحيني علي أي حاجه عملتها قبل ما أعرفك ♥

حاولت إستيعاب كل ما يحدث وظلت صامته لبعض الوقت ثم تنهدت بحنان وقالت مبتسمة :

- عارف بقي نفس البنت خطيبة الشاب اللي بتقول عليه ده ؟ والله العظيم كانت شايلاله جواها حاجات كده أكبر من الحب بكثير ، حاجات بريئه اووووي وجميله وماينفعلش تتعاش إلا في الحلال ، كانت دايمًا بتأخذ بالها من كلامها معاه وتكون جد اووووي وكلامها قليل علشان ميكونش فيه خضوع بالقول وتقع هي وهو ، كانت دايمًا بتتمني اليوم اللي تكون فيه مراته علشان تفتخر بيه كده قدام كل الناس وتقول بأعلي صوتها :

- انا إتجوزت راجل

كانت بتقعد دايمًا تدعي ربنا في القيام إنه يحفظه ويسهله اموره وباباها يقلل طلباته شويه ، كانت لما بتسمع من أخته أي كلمة عنه قلبها بيرفرت لوحده وتبقي نفسها تكلمه بس بتمنع نفسها علشان رضا ربنا ، كانت عارفه إنه مسميها علي موبايله " رفيقتي إلي الجنه " وأخذت عهد علي نفسها إنها تحاول بقدر الإمكان تحقق الحلم ده ، رغم إن فترة الخطوبه كانت طويله أووي عليها إلا إنها أخيرا إتجوزته بقي وهتقوله كل اللي جواها من غير خوف ولا تأنيب ضمير ، هتقوله كل كلمة وهي حاطه في نيتها إنها ترضي ربنا برضا جوزها عليها ، هتعمل كل اللي تقدر عليه علشان تسعده ومتخليهوش يشيل هم أبدا وهتفضل واقفه معاه لحد ما يقف علي رجلية ومستواه يتحسن شويه .

وهي بقي دلوقتي مبسوطه أووووي والفرحه مش سيعاها أصلا

نظر له بتأثر وقال :

- سلمي إنتي حقيقه ؟

أومأت برأسها إيجابا ولم تتحدث فقال بإصرار :

- بإذن الله يا سلمي هحاول أعمل كل اللي أقدر عليه علشان أسعدك ، بجد إنتي تستحقي أكثر من كده بكثير وعمرى ما تخيلت إن ربنا يرزقني بواحده بالنقاوه دي ، سامحيني تاني لو غلطت في حقك من وراكي !

إنتهي اليوم علي خير وعاد كل إلي منزله ، مر إسبوع وفي صباح الإسبوع التالي إتصلت سلمي علي إسلام لتخبره بأمر هام ، بدأت حديثها قائله :

- صباح الخير علي الناس اللي مبتسنلش

أجابها بمرح :

- صباح الخير يا بطتي ، إزيك عامله إيه ؟

- الحمد لله تمام ، كنت عاوزة اقولك حاجه مهمه

- تفضلي أيتها الأوزعه

- إسلام بطل بقي الله ، المهم ، إحنا نازلين النهارده نجيب الفستان وإنت لازم تيجي معناا علشان تختار اللي يعجبك

إبتلع ريقه بتوتر وقال :

- مش هينفع يا سلمي ، روعي إنتي إختاريه وأنا متأكد إنه هيعجبني

زفرت بضيق وقالت :

- ليه بس يا إسلام ؟ أنا عاوزاك انت اللي تختاره

- والله أي حاجه تجيبها حلوه

قالت بعصبيه :

- إسلام أنا مبقيتش فاهمه حاجه ؟!! من ساعة كتب الكتاب وأنا مشوفتكش خالص وكل شويه تتحجج ومش عاوز تيجي تشوفني !! فهمني طيب لو زعلان مني في حاجه ؟

- والله ما زعلان منك في حاجه ، بس هقولك بعدين

- هتقولي إيه بس !! ده إنت من بعد الكلام اللي قولتهولي يوم كتب الكتاب قلت خلاص ده هيفضل عندك ومش هيفارقك أبدا ، إيه اللي حصل طيب ؟ لو أنا ضايقتك في حاجه قولي وأنا هعتذر والله

- يا اوزعتي والله ما متضايق منك في حاجه ، إصبري بس وأنا هعرفك بعدين والله

تنهدت بضيق وقالت :

- ماشي يا إسلام براحتك

ثم أغلقت الهاتف بضيق بينما جلس هو علي حافة فراشه ونظر للمرآه وقال :

- معلى يا سلمى إستحملى ، بس لازم أعمل كده!!

ذهبت سلمى وأحضرت الفستان بدون إسلام ولكنه إتصل عليها فى لىطنن عليها فبدأ حديثه قائلا :  
- السلام عليكم ورحمة الله وبركاته

- وعلكم السلام ورحمة الله وبركاته يا سيدى

- آل ياختى بيقولوا كده والله أعلم إنك جبتي فستان تحفه وشكك فيه كيوته أصلا

- اه بيقولوا ، كتر خيرك يا إسلام

- يا بنتى متبقيش رخمه بقى ، والله هقولك بس مش دلوقتى

- ماشى هستحمل وأمرى لله

- قوللى بقى مش هنتفق هنعمل إيه فى الفرع ؟

- هنتفق فى التليفون يا إسلام ؟ إنت بتهرج ؟!! لأ لما تيجى بقى هتفق معاك وكمان علشان فى قرار مهم عاوزه أقولك عليه

قال بلهفه :

- قرار إيه خير ؟

أجابته على الفور :

- لأ لما تيجى هقولك

- لأ قولى دلوقتى

- يابنى لما تيجى علشان الموضوع ممكن يطول ومش هينفع فى التليفون

أخذ يتحسس ذقنه بتوتر وقال بصوت متقطع :

- ماهو أنا مش هينفع أجي الإسبوع ده كمان !!

ضرخت به قائله :

- لاااا بقي ده الموضوع باين عليه كبير ، أنا لازم أعرف حالا

- تؤ تؤ مش دلوقتي

قالت بخوف :

- إسلام او عي يكون جراك حاجه وأنا معرفش ؟ ده أنا حتي بقف في البلكونه في وقت الصلاة ومش بلاقيك نازل زي الأول ، في حاجه ولا إيه !!؟

- لا والله كويس متقلقيش

- إسلام انا بدأت اتجنن ، سلمي اللي عمرها ما إتعصبت بدأت تتعصب والموضوع كده مش لطيف وانا داخله علي فرح حرام عليك

- أنا عارف والله إنك مستحمله بقالك كتير بس معلىش تعالي علي نفسك الإسبوع ده كمان وبعدين هقولك علي كل حاجه

- طيب والموضوع اللي عاوزه أكلمك وأخذ رأيك فيه والفرح هنتفق عليه إمتي ؟

- بصي خلال الإسبوع ده هكلمك ونتفق علي كل حاجه

- ماشي يا إسلام ، يلا سلام عليكم

إرتمت سلمي علي فراشها وظلت تنظر لسقف الغرفه بخوف وتقول :

- يارب أنا مش عارفه إيه اللي حصل بس وليه مش عاوز يشوفني كده !!؟ معقوله كرهني أوي كده بعد كتب الكتاب ولا إيه ؟ طب بس انا معملتش حاجه أصلا !!! يارب صبرني وعدي الموضوع علي خير .

---

- فرحنا بعد ٣ أيام يا سلمتي بقي

قالها إسلام عندما إتصل علي سلمي في الصباح الباكر ليمرح معها قليلا قبل ذهابه للعمل ، أجابته علي الفور :

- سلمتك قاعده زعلانه بقالها ١٠ أيام علشان مش بتشوفك يا أستاذ؟ تكتب الكتاب وتختفي كده يعني؟ ماشي ماشي والله لما أشوفك

أخذ يضحك قليلا ثم قال :

- سلمتي شكلها كده قلبها بني أو إسود لسه مش محدد بصراحه ، بس أوعدك لما أشوفك يوم الفرح هنسيكي كل حاجه ضايقتك بإذن الله ، المهم يا ستي بقي أنا إتصلت دلوقتي علشان أخذ منك شحنة سعاده وتفاؤل كده قبل ما أروح شركتي الغاليه اللي نفسي أفجرها دي

تنهدت بسعاده وقالت :

- ربنا يكرمك يا إسلام ويرفع قدرك ويسعدك دائما يارب

إبتسم للمرأة قائلا بأريحيه :

- إديلي كتير أوي يا سلمى الله يخليكي

- بدعيلك من غير ماتقول والله

- قشطه بقي ، يلا همشي بدل ما أتأخر والمدير يلسوعني وأجيلك الفرح متلسوع والناس تضحك عليا وعيب كده أصلا وهيكون شكلي وحش والناس ...

قاطعته علي الفور وقالت بمرح :

- إسلام .. إيه مالك يابني؟ إنت كويس؟! وبعدين يلسوعني دي كلمتي أصلا متقولهاش تاني بقي ٨٨

تنهد بتعب وأجابها بتأثر مصطنع :

- الحمد لله إنك لحقتيني يا سلمى ، الشريط سف باين وكنت هفضل كده للصبح ، اللهم لك الحمد ثم نظر في ساعته وقال علي الفور :

- الساعه ٩ إلا ربع بقي يادوب ألحق أمشي

إبتسمت قائله :

- ماشي يا إسلام خد بالك من نفسك ، ربنا يحفظك

- يارب يا سلمي ، مش عاوزه حاجه ؟

- لا شكرا ربنا يخليك

- طب مش عاوزه تقولي حاجه تاني ؟

- لا

- متأكده ؟

- اه

زفر بضيق مصطنع وقال ضاحكا :

- حد قالك قبل كده إنك رخمه ؟

ضحكت بخبث وقالت :

- هع كتيــــــــر ، إمشي بقي علشان كده هتترفد وهنقعد في الشارع ، يلا ياعم الحاج في أمان الله ♥

- كده بقي ظبطنا كل حاجه

قالها إسلام في اليوم الثاني عندما إتصل بسلمي ليخططا معا تجهيزات عرسهما فأجابته علي الفور :

- ماشي يا إسلام حلو كده ، بس برضو مش هتيجي يوم الحنه حتي ؟

إبتسم قائلا :

- الحنه أصلا بيكونوا الستات في بيتك والرجاله في بيتي يعني كده كده مش هينفع أجي ، بالله عليك ما تزعلي بقي هاه

- حاضر مش هزعل ، أمري لله هستني ليوم الفرح لما نشوف آخرتها معاك

- طيب مش هتقولي برضو القرار بتاعك ؟



- تو مش هقول حاجه ، في الفرحة بقي ياخويا أبقو أقولك

- بتعملي زي يعني ؟

- أيون والبادي أظلم بقي

- هيبيح ماشي هستني أنا كمان وأمرني لله

إبتسمت لنفسها في المرآه وقالت :

- يلا بقي إحق إجهز علشان المغرب هيأذن ، ولو شوفتك في الشارع هرش عليك مايه

ضحك بغرور وقال :

- تشوفيني ؟ هع هع والله إنتي طيبه ، اومال الشارع اللي وانا بيعمل إيه يا ماما

- إمشي يا إسلام من قدامي

- خلاص يا ست متزوقيش كده ، يلا سلام عليكم

- وعليكم السلام ورحمة الله وبركاته

---

وجاء اليوم المنتظر ، اليوم الذي لطالما حلم به كل من سلمي وإسلام ، اليوم الذي سيسرق فيه الفارس أميرته من منزل أهلها وينقلها إلي منزله ، اليوم الذي ظل يستعد له منذ شهور والآن فقط قد تحقق الحلم ، نعم إنه يوم عرسهما ..

ذهبت سلمي في الصباح الباكر إلي خبيرة التجميل لتعدها لهذا اليوم ، بينما صلي إسلام الفجر وجلس يقرأ قرآن ويدعو الله أن يتم له علي خير ويمتعه بزوجته في الحلال ثم أدي صلاة الضحي وذهب في النوم قليلا ، إستيقظ من نومه وذهب لمصفف الشعر هو الآخر كي يعدل له من هيئته حتي يظهر في أبهي صورة أمام زوجته والحاضرين ، إنتهي كل منهما من تجهيزاته واتصل إسلام علي سلمي ليخبرها بحضوره لصالون خبيرة التجميل بعد قليل ، فقال وهو يكاد يقفز من مكانه من السعاده :

- عروستي

إبتسمت سلمي بإحراج وقالت :

- نعم

تنهد بحراره وقال :

- جهزتي ولا لسه يا بطتي ؟

نظرت لنفسها في المرآه وقالت بسعاده :

- أيون خلصت ، يلا مستنياك تيجي تخطفني بقي

ضغط علي الهاتف بشده وهو يقول بتأثر بالغ :

- هيبيح بقي ، حاضر جاي حالا بإذن الله

وعلي الفور قام بركوب سيارة صديقه وحضر إلي صالون التجميل ، وقف في الأسفل وقام بالإتصال بها ليخبرها بأنه سيعود حالا فوافقت علي الفور ، سعد بحماس شديد والإبتسامه تملو شفثيه ولكنه إنتفض من مكانه عندما رأي فتاة بفتاة بفتان ضيق وشعر عار ، هبط للأسفل بسرعه وأخذ يتنفس بصعوبه وهو يقول بمنتهي الغضب والخوف :

- والله ما كان قصدي أشوفها ، والله ما كان قصدي أشوفها ، أستغفر الله العظيم وأتوب إليه ،  
يارب سامحني والله ما كان قصدي

ظل يستغفر لدقائق وهو في منتهي الغضب وأيضا الخوف من الله عزوجل ، هدا قليلا وقام بالإتصال بسلمي ليأمرها بالخروج حالا ولكنها لم تجب ، ضغط علي الأزرار بعصبيه وهو يتصل مره أخرى فأجابته بضيق :

- أيوه يا إسلام !!

قال بغضب :

- موقفتيش ليه علي الباب أول ما قولتلك !!؟

زفرت بضيق وقالت :

- إنت اللي مطلعتش ليه عطول !!؟

ثم أردفت بعصبيه :

- في واحد شافني دلوقتي يا إسلام وأنا والله العظيم قاعده همووت وماسكه نفسي بالعافيه بس  
عشان الميك اب مبيوظش ، لولا كده كان زماني إتفتحت في العياط

نظر للجانب الآخر بتعجب وقال :

- في واحد دلوقتي شافك ؟

أجابت بنفس العصبية :

- ماهو حضرتك قولتلي إنك طالع دلوقتي حالا وعلي هذا الأساس أنا وقفت علي الباب بس في حد  
طلع قبلك وشافني وأنا بالمنظر ده

إبتسم قائلا :

- هو إنتي لابسه إيه ؟

أجابت بضيق :

- لابسه فستان يا إسلام هكون لابسه إيه يعني ، والله ما وقت هزارك ده دلوقتي خالص لاني بجد  
همووت

إتسعت إبتسامته وهو يقول :

- طيب هو اللي شافك ده شكله إيه ؟

زفرت بغضب وقالت :

- يا إسلام متشلينيش ، مش وقتك دلوقتي والله !!!

قال بإصرار :

- قولي يلا شكله إيه ؟

تنهدت بملل وقالت :

- عادي واحد ملتحي كده ولابس بدله ، مشوفتش غير كده ، وبعدين هتفرق إيه يعني ماهو في الأول  
وفي الآخر راجل ومكنش ينفع يشوفني كده أصلا ، الله يسامحك بجد إنت السبب

أخذ يضحك كثيرا حتي إستشاطت غضبا فصرخت به قائله :

- إنت بتضحك علي إيه ؟!! بقولك واحد غريب شافني وأنا بالمنظر ده ؟!! إنت إزاي الموضوع مش فارق معاك كده ؟!!  
أجابها وهو مازال يضحك :

- ده أنا ياختي

عادت للخلف قليلا وقالت متعجبه :

- إنت إيه ؟!!

أجابها علي الفور :

- أنا الواحد الملتحي العسل اللي كان واقف ده

قفزت من مكانها كالأطفال وقالت بمنتهي السعاده :

- إنت بتتكلم جد يا إسلام ؟ أعفيت لحيتك هاه ؟ إحلف طيب

ضحك وهو يقول بمرح :

- أيوه أعفيتها أخيرا الحمد لله ، علشان كده يا ستي مكنتش باجيلك الفتره اللي فاتت دي ، يلا إطلعي بسرعه بقي عاوز أشوفك

قالت علي الفور :

- حاتر حاتر

قفزت من مكانها مهروله تجاه باب صالون التجميل ، وجدته واقفا أمامها فظلت تنظر إليه بدهشه ممزوجه بالسعاده بينما نظر إليها هو بمنتهي الحب وقال :

- إنتي حلوه أوي إزاي كده ؟

طأطأت رأسها خجلا وعادت للخلف قليلا ولم تتحدث ، أمسكها من طرف ذقنها ورفعها للأعلي وهو ينظر إليها متأملا ثم قال :

- الخمار كان مداري كثير اوووي

إنكمشت في نفسها من فرط إحراجها بينما ضحك هو وقال :

- وأخيرا بقي إتأكدت إنك مش قرعه ، أحمدك يارب

ضحكت علي أثر كلماته وقالت :

- يابني أنا شعري أطول مني انا شخصيا ، الحمد لله

ثم نظرت إليه بمنتهي السعاده وقالت :

- شكلك حلو اوووي في اللحيه يا إسلام ، أنا كده حبيتك أكثر والله

أخذ يعدل من هيئة رابطة عنقه وهو ينظر لها بغرور وقال :

- يا بنتي ده العادي بتاعي أصلا

ثم أمسكها من طرف يدها وقال بحماس :

- يلا نروح فرحنا بقي يا عروستي

كادت أن تذهب معه ولكنها توقفت فجأة وأخذت تضحك وتقول :

- ياعم إستني هنزل كده إزاي ، أصبر هدخل البس الكاب وأجي

نظر إليها بإحراج وقال :

- أيوه صح إيه العبط اللي إحنا فيه ده ، يلا بسرعه مستنيكي

تركته وغادرت وظلت بالداخل قليلا حتي إرتدت حجابها كاملا ثم خرجت إليه قائلة بحماس :

- يلا بينا يا عريسي

نظر إليها بتعجب وقال :

- إنتي مين يا حجه !!؟



وقتها ظهرت سلمي بأبهي صورة لها امام النساء ، تم إصطحابها إلي أريكتها من قبل النساء والأطفال يحفونها من كل جانب ويلقون عليها الورود الحمراء والصفراء ، جلست في مكانها كالمملكة وحضرت النساء لتباركن لها وسط فرحه عارمه وأحضان وقبلات ، بينما في الخارج وفي نفس اللحظة التي ترك فيها إسلام زوجته وجد أصدقائه يحملونه ويقذفونه لأعلي مرات عديدة حتي تعب الجميع وهبط إسلام وهو يقول لهم بمرح :  
- يا جدعان البدله إتبهدلت الله يسامحكم ، كده بوظتولي الشياكة ، أقابل عروستي بعد كده إزاي بقي

هبطت سلمي من مكانها وظلت تمرح وتلهو مع الفتيات ونفس الحال بالخارج مع إسلام وأصدقائه ، فتارة يمرحون وتارة آخري يستريحون ، وبعد الكثير من المرح هدأت الأناشيد قليلا فتعجب الجميع بينما نهض إسلام من مكانه وأخذ الميكروفون وقال بسعاده :

- السلام عليكم ورحمة الله وبركاته

إحم إحم ، مبدأيا كده أنا مش عارف أقول أي حاجه ومش فاكراي حاجه بس هقولكم علي اللي في قلبي واللي حاسس بيه وبس

أولا : أنا بحمد ربنا وبشكره علي إنه أحياني لحد ما أشوف اليوم ده ، اليوم اللي عمري ما كنت أتخيل إنني هعيشه أصلا ، اليوم اللي ربنا رزقني فيه بواحد من أحسن البنات علي وجه الأرض واللي عمري ما تخيلت إنني ممكن أتجوز واحد في إحترامها ولا خوفها من ربنا ولا أدبها ، واللي بإذن الله هحطها في عينا وهشيلها فوق راسي زي ما الرسول صلي الله عليه وسلم وصاني .

ثانيا : بشكر كل حد لبي الدعوه وحضر الفرح وفرحني معاه ، بشكر كل حد دعالي ربنا يتملي علي خير ودعائه استجاب .

ثم نظر لوالد سلمي بحب وقال :

- وبشكر حمايا أو أبويا الثاني إنه وافق علي إنني أخطف منه بنته ، وأوعده بإذن الله إنني هعمل كل اللي أقدر عليه علشان أسعدها واتقي ربنا فيها ويكون هدفي إنني أخذ بإيديها للجنه زي ما وعدتها

ثالثا : بشكر صديق عمري محمد الله يرحمه علشان هو السبب بعد ربنا في كل اللي أنا فيه ده وكمان بشكر حبيبي وأخويا فاروق لأن هو اللي أخذ بإيدي لحد ما بقيت إسلام اللي إنتوا شايفينه ده

وأخيرا بقي يارب الفرح يعجبكم وإدعولنا كثير ربنا يسعدنا في حياتنا ويرزقنا الذريه الصالحه

معلش كلامي ملخبط بس إنتوا عارفين بقي الفرحه بتعمل أكثر من كده

ترك الميكروفون وهم أن يغادر ولكنه سرعان ما أمسكه مره آخري وقال مازحا :

- اه صحيح نسيت أقول حاجه ، حان الآن موعد تلبيس الشبكه ، ومامتي حبيبتي هي اللي هتلبس عروستي الشبكه ، اللي هيتريق هاجي أظبطه واللي هيتضايق يشرب حاجه ساقعه وهو هيبقي كويس .. يلا سلام عليكم

ضحك الجميع بسبب أسلوبه المرح بينما تقدمت والدة إسلام نحو سلمي وأمسكت بالعلبه وقامت بتلبيسها الشبكه وسط نظرات السعاده والتصفيق من جميع النساء .

إنتهت والدة إسلام من تلبيس الشبكه فتقدمت هند ذات الفستان الوردي وولاء ذات الفستان الذهبي نحو سلمي وكل منهما تحمل علبة هدايا ، قدمت هند هديتها أولا وقالت بمرح :

- يارب تعجبك هيهيهيهي

شعرت سلمي بالسعاده وقامت بفتح العلبه ولكنها فوجئت بثمرة بطاطس وسكين !!

نظرت لها بتعجب وقالت :

- إيه ده يا هند ؟ بطاطس في الفرحة إزاي يعني !!؟

ضحكت هند بخبث وأخرجت لوحه قد خبأتها من قبل خلف أريكة العروس ورفعتها لأعلي بإتجاه النساء وكان مكتوب عليها :

- سلمي دلوقتي هتقشر البطاطس دي وإنتموا إحكموا عليها بقي ، يعني هتنتفع ست بيت شاطره ولا الراجل الغلبان اللي برا ده هيلبس في الحيط

نظرت سلمي حولها بتعجب وضحكت قائله :

- هند إنتي بتهرجي !!؟

رفعت حاجبها قائله بـ شر :

- قشري يا عروسه

نظرت سلمي أمامها فوجدت الجميع يلوح لها بحماس فإستجابت لهن وبدأت في التقشير ، إنتهت وقد ضحكت بهيستريا هي وكل الحاضرات ثم إستخدمت المناديل المعطره لتنظيف يدها والطاولة من أمامها ، إرتمت علي الأريكة لتستريح من هذا الموقف المرحج ، تقدمت منها ولاء وقامت بتقديم هديتها فنهضت سلمي بسعاده وقالت :



- حبيبتى يا لوءه

أمسكت بالهديه وفتحتها بكل حماس ولكن سرعان ما تحول حماسها إلي صراخ وهي تقول :

- إيـه ده ؟!! بامبرز !! لا بقي إنتوا بتهرجوا فعلا !!

أخرجت ولاء اللوحه التي قد أعدتها من قبل هي الآخري ورفعتها بحماس وكان مكتوب عليها :

- دلوقتي بقي اختي حبيبتى هتكلمنا علي أولادها المستقبليين ، ولو رفضت كلنا نهجم عليها نقلها وبرضو هتكلم بالعافيه . ولو طلعت هتربيهم غلط برضو هنقلها

ثم طلبت من فتاة الدي جي تقليل الصوت قليلا حتي يسمع الجميع ما سيقال ، أخذت سلمي تنظر للجميع بإحراج ممزوج بالسعاده وسرعان ما استسلمت وبدأت في التحدث

وعلي الجانب الآخر أخذ فاروق يتحرك نحو الشباب ويهمس لكل واحد منهم بقرار ما ، وسرعان ما إستجابوا جميعا وقاموا بالهجوم علي إسلام ودفعوه بتجاه الميكروفون ، نظر لهم بتعجب وقال :

- عايزين إيـه ؟!!

قالوا في نفس واحد :

- هتغني لعروستك

إشاح بيده رافضا وهم بالذهاب وهو يقول :

- بس ياعم الحاج إنت وهو ، أغني مين ؟!!

أحاطوه جميعا وقالوا بإصرار :

- هتغني يعني هتغني

ضحك قانلا :

- يا جدعان بطلوا إستعباط !! أنا صوتي مش حلو أصلا

دفعوه بقوه أكبر نحو الميكروفون و هتفوا بأعلي صوتهم :

- هتغني هيبيه ، هتغني هيبيه ، هتغني هيبيه

إنتبهت سلمى والفتيات من حولها لصوتهم فصمت الجميع بينما إستسلم إسلام وأمسك بالميكروفون وقال بمرح :

- أولا إسمها هتشد مش هتغني ، ثانيا محدش يتريق علي صوتي علشان كده عيب أصلا

تنهد بعمق وقال :

- يلا إستعنا بالله ، هقولكم انشوده " أجمل فرحه " لـ ماهر زين ، أغمض عينيه للحظات وهو يتذكر سلمى وبدأ قائلا :

أجمل فرحه هي  
يوم فرحنا دا شئ أكيد  
ذكريات الليله ديا  
حاضرة مش ممكن تغيب

احساس اليوم دا  
مين فينا ينساه  
على طول تجمعنا احلى حياه

اجمل فرحه ف حياتنا الليله  
حلوين والله  
الله الله  
ما شاء الله ،، ما شاء الله  
يا سلام يا سلام ما تباركوا يا اهل الله

إحنا على سنة نبينا  
جينا وكتبنا الكتاب  
وإحنا طايره الفرحة بينا  
والليلا دي القلب داب

احساس اليوم دا  
مين فينا ينساه  
على طول تجمعنا احلى حياه

أجمل فرحه ف حياتنا الليله  
حلوين والله  
الله الله  
ما شاء الله ، ، ما شاء الله  
يا سلام يا سلام ما تباركوا يا اهل الله

قولوا ما شاء الله ويارب تعيشوا أحلى سنين  
قولوا ما شاء الله ويا محلا زوجين صالحين  
ربنا يجمعنا ويا بعض في الجنة  
ربنا يجعلنا طول العمر متفاهمين

أجمل فرحه ف حياتنا الليله  
حلوين والله  
الله الله  
ما شاء الله ، ، ما شاء الله  
يا سلام يا سلام ما تباركوا يا اهل الله

ثم إبتسم قائلا :

- هيبيح تعبت ، محدش يتريق علشان صوتي مش حلو هاه ، أنا قولت أهو

صفق الجميع تصفيقا حارا وأخذوا ينثرون عليه سبراي الثلج حتي أغرقوه تماما وكاد أن يختنق من كثرة الضحك ، بينما دمعت عينا بعض النساء بالداخل وأولهم سلمي ، فهذه أول مره تستمع فيها لصوت إسلام في الإنشاد ، ورغم بن صوته لم يكن جميلا بالفعل ولكنها أحبته أكثر من أي صوت آخر

فقط لأنه صوت " زوجها "

إنتهي العرس سريعا بعدما حصل كل من سلمي وإسلام علي قدر كبير من المرح واللهو والضحك كل في قاعته ، إرتدت سلمي كابها وإقتربت من الستار بينما وصل إسلام إليها وهم أن يخرج بها ولكنه لاحظ شيئا أمامه فوقف ينظر له للحظات ، تعجبت سلمي من وقوفه وقالت :

- إيه يا إسلام مش هنمشي ؟

نظر بها بحب وقال :

- عاجبني أوي الكشكول ده ، هو محطوط هنا ليه ؟

ضحكت كثيرا ثم قالت :

- ده جيست بوك يا إسلام ، كشكول كده بنزينه ونحطه علي باب القاعه علشان الناس تكتبنا فيه مباركات وتكون ذكري حلوه معنا مع مرور السنين يعني

ثم نظرت له بفخر وقالت :

- وعلي فكرة أنا اللي عامله

أمسكت الدفتر بين يديها وأغلقتة وقالت بحماس :

- بص جبت تل وشيفون وورد وحاجات كده وعملت بيهم علي الغلاف بدلة وفستان ونقاب علشان يبقوا شبهنا ، لو كنت أعرف إنك هتبقى ملتحي كنت عملت العريس ملتحي والله

وضع يده علي الدفتر معها وقال بمرح :

- لأ والعروسه أوزعه والعريس طويل واخده بالك إنتي ؟

ضحكت قائله ببراءه :

- أيوه واخده بالي يا اخويا

انتزع منها الدفتر ووضعها علي الطاولة وأمسك بالقلم فأوقفته علي الفور وقالت :

- بتعمل إيه يا إسلام ؟

نظر لها بطيبه وقال :

- هكتب فيه

قالت متعجبه :

- بس ده للضيوف مش لينا

أجابها بإصرار :

- طالما مش حرام إني أكتب فيه يبقي هكتب وهتجنن وبراحتي بقي

ضحكت وقالت بإستسلام :

- ماشي براحتك

أمسك بالقلم وكتب بحماس :

- حبيبي يا أنا ، أنا فرحان اوووي ليا إني إتجوزت النهارده ، والف الف مبروووووك وربنا يتملي علي خير ، ويارب يسعدني مع عروستي ويرزقني بالذريه الصالحه .

بيقولوا يا أنا إني أخذت واحده زي الملاك ، حافظ عليها كويس أوي بقي مش هوصيني هاه ، ويارب يقدرني وأفرحها وأنسيها كل لحظه حزن عاشتها في حياتها .

لو فكرت في يوم يا أنا تزعلها هتلاقيني أنا جايلك برضو وبعاتبك لحد ما تصالحها وتصلح غلطك ، يلا الف مبروووك تاني وربنا يتملي علي خير .

إمضاء :

إسلام محمود

دمعت عين سلمي عندما رأت ما كتب ونظرت إليه بكل حب وقالت :

- أقسم بالله يا إسلام لعمل كل اللي أقدر عليه علشان أسعدك ، وسلمي بقي عمرها ما بتحلف كذب أبدا

أحاط ذراعها بذراعه وقال بحماس :

- وأنا متأكد من كده

ثم نظر لها بسعاده وقال :

- يلا بقي يا أوزعتي علشان نروح بيتنا

هبطا معا إلي الشارع وركبا السيارة التي تحركت بهم نحو منزلهم لأول مره ..

وصل إسلام وسلمي إلي منزلهما الجديد ، صعدا إلي الطابق الثالث وقام إسلام بفتح الباب ، وقبل أن يدخل قال بمرح :

- قولي ورايا يا بنتي الله يسترك

كانت سلمى تشعر بالخوف ولكنها ضحكت تلقائيا وقتما سمعت ماقيل وقالت :

- أقول إيه ؟

إبتسم قائلا :

- الرسول صلي الله عليه وسلم قال " من نزل منزلا ثم قال : أعوذ بكلمات الله التامات من شر ما خلق ، لم يضره شئ حتي يرتحل من منزله ذلك . رواه مسلم

وإحنا بقي هنقول كده ، وطبعا المقصود هنا لو منزل جديد يعني

قالا معا : أعوذ بكلمات الله التامات من شر ما خلق

ثم ضحك مره آخري وهو يقول :

- والآن مع دعاء دخول المنزل ، ردي معي يا صغيرتي بارك الله فيك

قالا في نفس اللحظة :

- اللهم إني أسألك خير المولج وخير المخرج ، باسم الله ولجنا ، وباسم الله خرجنا ، وعلي الله ربنا توكلنا

ثم أمسكها من يدها ودخلا معا ، أخذ ينظر للمنزل حوله بسعاده وقال بمرح :

- الله حلو البيت ده ، متعرفيش بتاع مين ؟

تركت يده وعادت للخلف بعض الشئ وقالت هامسه :

- بتاع ناس كده

نظر لها بحماس وقال :

- طيب قشطه ماتيجي نتفرج عليه ؟

إحس بعدم رغبتها فابتسم قائلاً :

- ولا أقولك بلاش لحسن صحاب البيت يشوفونا ويجروا ورانا بالشباشب

لم تتحدثت وذهبت إلي آخر الصاله وجلست هناك ، بينما جلس إسلام مكانه وصمتا بعض الوقت ،  
قطع الصمت مرة أخرى قائلاً بمرح :  
- سلمني بقولك إيه ؟ إبعتي راسك

تعجبت قائله :

- أبعث إيه !!؟

ضحك وهو يقول :

- إبعتي راسك يا حجه

نظرت له بعدم فهم ولم تتحدثت فأردف قائلاً :

- يا ست متبصيش كده طيب الله ، بصي يا اوزعتي مبدأيا كده من السنه إني أحط إيدي علي راسك  
وأقول دعاء معين كده وبعدين نصلي ركعتين مع بعض وانا أكون الإمام طبعاً

إبتسمت قائله :

- إنت اللي هتكون الإمام ؟ بجد والله !!؟

ضحك وهو يقول :

- انا عارف إنها معلومه خطيره بس قولت أفيدك بقي ، ربنا يجازيني عنك خير أيتها الفتاه الأوزعه

إبتسمت قائله :

- آمين يارب

ثم نظرت للأرض وصمتت مره أخرى ، أخذ يتحسس وجهه والإبتسامه لا تفارقه وقال مازحاً :

- يا سلمي ، طب راسك ؟ طب والدعاء اللي قعدت أحفظ فيه ؟ طب المليون مره اللي نسيته ورجعت حفظته تاني ؟ طب الصلاه ؟ طب مش هكون إمام ؟

وجدها تنظر للأرض بخوف ولا تتحدث فقال بمرح :

- طب خلاص ياختي مش عايز منك حاجه ، أنا هروح أفرح بالهديه اللي جبتها لك لوحدي وأبقي خلي راسك تنفعك بقي

قفزت من مكانها وقالت بلهفه :

- هديه

ضحك بغرور وقال :

- شوف البنبت ، أول ما سمعت إن في هديه نطت علي طول

ثم ضحك وهو يقول بحنان :

- أمري لله هروح أجيبها لك بقي ، أعمل إيه في طبييتي الزايدة دي بس ياربي

دخل لغرفة الأطفال وأخرج منها صندوق كبير الحجم كان قد أعده من قبل ، خرج إليها فوجدتها تنظر إليه بلهفه فوقف عند باب المنزل وقال ضاحكا :

- تحبي أرميهولك ولو لزق في وشك مليش دعوه ؟ ولا أجي اديهولك وتقدي ساكتة خالص وما تتحركيش من مكانك ؟

إبتسمت قائله :

- ماشي تعالي

أعطاها الصندوق ووقف ينظر إليها متأملا رد فعلها ، أمسكته بلهفه وقالت متعجبه :

- معلى سؤال بس ، هو الغلاف بتاعه ميت كده ليه ؟

ضحك قائلا :

- هقولك كل حاجه بس شوفي هتعجبك الأول ولا لا



فتحتها بلهفه وقفزت من مكانها عندما رأت ما بداخلها ، نظرت إليه والسعادة تطل من عينيها  
كالأطفال وقالت :

- الله كرتونه شيبسي ، كل ده ليا لوحدى هيببيح بقى

جلس بجوارها وهو ينظر إليها بحنان وقال :

- مكنتش أعرف إنك هتفرحى أوى كده ، بحب براءتك اووووي يا اوزعه إنتى  
تنهدت بسعادة طفولية وأمسكت بأول كيس وقامت بفتحه وبدأت فى تناوله بينما نظر لها بابتسامته  
المعتاده وقال :

- والآن حان موعد تفسير كل شئ

ضحك وهو يتذكر ماحدث وقال :

- يا ستي اللي حصل إنى روحت عادى أشتري الكرتونه بتاع الشيبسي دي مع عند بتاع الجملة ،  
بعدها روحت للمكتبه علشان أغلفها وكده يعنى فقلت للراجل بكل براءة :

- لو سمحت عاوز ألف دي لفة هديه

لقيته ببصلي وهو مستغرب كده وبيقولى :

- إنت هتهزر يا أستاذ

فقولته :

- مش بهزر حضرتك ، عاوز أغلفها عادى فيها إيه !!؟

لقيته لسه متضايق ومستغرب كده فقولته خلاص شكرا ومشيت ، روحت على مكتبه تانيه لقيت اللي  
واقفه بنت فقلت أكيد هتتريق هي كمان وخصوصا لأنى ملتحي بقى وكده فروحت مكتبه تالته بس قبل  
ما أوصل نزلت الكرتونه على الأرض جنبها كده وإشتريت غلاف هدايا عادى وحاولت أعملها انا بقى

ثم إبتسم قائلا :

- معلش بقى مش بعرف أعمله كويس يعنى ، هو ده اللي قدرت عليه

إتسعت عيناها وقالت بعدم تصديق :

- إنت عملت كل ده علشانى يا إسلام ؟

إبتسم قائلاً :

- أعمل إيه بس فى نفسى ، واحد عاوز يدخل الجنّه وياخد مراته معاه بقى ، وبعدين فرحتك عندي بالدنيا أصلاً

وقبل أن تتحدّث وجدته وضع يده على رأسها وقال بمرح :

- عارفه إن إتحرّكتى هتضربى ، أنا قولت أهو

وإبتسم وهو يقول :

- اللهم إني أسألك من خيرها وخير ما جبلت عليه ، وأعوذ بك من شرها وشر ما جبلت عليه

ثم دفعها مازحاً وقال :

- خلاص روجى بقى مش عايز منك حاجه ، وضحكت عليكي وقلت الدعاء برضو نيهاهah

وأثناء مغادرته للصلاه قال بسعاده :

- أنا هروح أتوضي عقبال ما تخلصي الكيس اللي فى إيدك هاه

ثم إلتف إليها وقال مازحاً :

- عارفه إن جيت ولقيتك لسه مخلصتش هعلقك فى المروحه دي ، أنا قولت أهو

ثم عاود النظر مره آخري للداخل وهو يقول :

- هيبيح بقى وأخيراً هبقي إمامك فى الصلاة

---

- مش متخيله البيت من غير إسلام يا ماما

قالتها هند عندما عادت من فرح أخيها ونظرت لغرفته الفارغة لأول مره ، تنهدت الأم بحزن وقالت :

- هي دي سنة الحياة يا بنتي ، دلوقتي ولا أبوكي موجود ولا إسلام ، وشويه كده هتتجوزي إنتي  
كمان وأنا هفضل لوحدني ، الحمد لله

إحتضنتها هند بحب وقالت :

- أنا مش هسيبك أبدا يا ماما

ضحكت بحنان وقالت :

- بس يا كدابه ، دلوقتي ياختي يجيلك واحد ابن حلال كده يخطفك إنتي كمان وأفضل أنا لوحدني بقي ،  
بس أنا عارفه إنكم هتكونوا معايا علطول ومش هتسيبونني لوحدني كتير لأنني عارفه كويس أنا رب بيت  
ولادي إزاي .

ضممتها هند أكثر وقالت :

- ربنا يخليكي لينا يا ماما

---

- صباح الخير يا عريس

قالتها هند عندما إتصلت بإسلام في الساعه العاشره صباحا لتبارك له علي زواجه وتخبره بأمر ما ،  
فأجابها علي الفور :

- صباح الخير يا هنوود ، وحشتيني والله تصدقي !

ضحكت وهي تقول :

- أيوه ياعم ماهو الواحد يتجوز وينسي أخته كده ماشي  
إبتسم لسلمي الجالس به جواره وقال :

- وهو في حد يبقي عنده أخت مجنونه زيك كده وينساها برضو

- يعني تبقي بقالك ٣ أيام متجوز ومفكرتش تكلمني مره وتقول مش ناسي ، روح يا كدااااب

أخذ يضحك بشده وغمز لسلمي وهو يقول بمكر :

- وأنا مالي يا هنوود ، ده الموبايل هو اللي كان مقفول

تنهدت بسعاده وقالت :

- ماشي ياعم وانا مسامحاك ، في حاجه بقي كنت عاوزه أقولك عليها

أجابها بجديه :

- خير

قالت علي الفور :

- إحنا هنجي نزورك النهارده ، خالتو وخالو وأولادهم ماشي

- ماشي تنوروا ، كمان إحنا متفقين إنكم هتيجوا تالت يوم يعني فأنا كده كده كنت عارف

- أنا قولت أقولك لحسن تكون ناسي ، وخالتو شكريه جايه معانا هاه ، فهم سلمى بقي

نظر لسلمى بإشفاق وقال :

- ماشي هقولها ، يلا طيري إنتي بقي

ضحكت قائله :

- ماشي ياعم العريس ، يلا سلام عليكم

- وعليكم السلام ورحمة الله وبركاته

---

نظر إسلام لسلمى بحنان وقال :

- ياه الواحد مشافكيش من ساعة صلاة الفجر

إبتسمت قائله بخجل :

- إسلام بطل

ضحك بخبث وقال :

- خلاص أسف أسف

إعتدل في جلسته وهو ينظر لها بجديه وقال :

- في حاجه مهمه بقي عاوز أقولك عليها

نظرت له بقلق وهمست :

- قول

- أهلي هيجوا يزورونا النهارده

إبتسمت بسعاده وقالت :

- ينورونا طبعاً

- لأ ماهو إنتي مش فاهمه ، أصل خالتو شكريه جايه معاهم

نظرت له بعدم فهم وقالت :

- ماشي أهلا وسهلا بيها ، مش فاهمه برضو إنت عاوز تقول إيه !!؟

تنهد بقلق وقال :

- بصي معلش عاوزك تستحملي أي حاجه هتحصل النهارده ، يعني خالتو شكريه دي طبيبه من جواها كده بس ممكن تلاقيها قالت حاجه تضايقتك او إتدخلت في حاجه كده ولا كده يعني ، فمعلش بقي إستحملي واوعي كلامها يآثر عليكي علشان أنا عارفك حساسه ماشي

أومات برأسها إيجاباً وقد تفهمت الموقف وقالت :

- حساسه اه بس قويه برضو متقلقش ، يعني اللي بيآثر فيا ضربات الناس القريبين مني ، إنما أي حد تاني عادي بعرف أتصرف ومش بزعل

ثم نظرت له ببراءه وقالت :

- شوفت بقي أنا طيوبه إزاي ؟

ضحكت وهو يقول :  
- طيوبه؟! وإنتي هتقوليلي ، عندما تجتمع الطيبه مع الأروبه في آن واحد

نظرت له بتعجب وقالت ضاحكه :

- وإنت لحتت تعرف إني أروبه ؟

نظر لها بتعالي وقال :

- يا بنتي أنا كشفتك من ساعة ما قعدتي تضحكي علي البت هند الغلبانه علشان تتأكدي إذا كنت  
بصلي في الجامع زي ما قولتلك ولا لا ، يعني فاهمك وحافظك من زمان أوووي يا ماما هاهاهاها

تحسست وجهها بإحراج وقالت :

- لا يا إسلام ده إنت طلعت خطر والواحد كده يخاف منك

ضحك بمكر وقال :

- ده انا خطر ونص ، بس عامل نفسي كيوت علشان متخضيش بس ، إنتي لسه شوفتي حاجه

ثم نهض من مكانه وقال بجديه :

- يلا يا ستي نقوم نشوف هنجهاز إيه للناس اللي جاينين دول

---

وفي المساء ، حضرت والدة إسلام وهند بصحبة كل من خاله عصام وخالته شكرية وأولادهما ، دخل  
الجميع بطيبته المعتاده بينما أخذت خالته شكرية تنظر للمنزل متأمله وتدقق النظر في كل مكان وكل  
شئ ، خرج إسلام وألقى التحية علي الجميع وحضن والدته بشده وسلم علي هند بحراره وأيضا علي  
خالته وخاله ، بينما عدلت سلمى من هيئتها وخرجت عليهم بعبائتها ونقابها وألقت التحية علي  
الجميع وسلمت علي النساء بحراره ، نظرت لها الحاجه شكرية وقالت :

- وده لبستيه إمتي ده يا سلمى ؟

إبتسمت سلمى بسعاده وقالت :

- لبسته يوم الفرح يا طنط

نظرت لها بوجه خالي من أي تعبير وقالت :

- طب وطالعانا بيه ليه يا بنتي؟! ده مفيش حد غريب والحاج عصام زي أبوكي يعني

ثم نظرت لها بجديه وقالت :

- إخليه يا بنتي وإقеди براحتك ، والله أنا ما عارفه لزمته إيه البتاع اللي قارفين نفسكم بيه ده

إبتلعت سلمى ريقها ونظرت لإسلام بإحراج فقال علي الفور :

- النقاب ده نعمه من عند ربنا يا خالتو ، وبعدين أنا حابب مراتي تكون لابسه كده ومحدث يشوفها  
غيري وربنا يجعله في ميزان حسناتها بقي

ضحكت بسخريه وقالت :

- كبرت يا واد يا إسلام وبقيت تعرف تتكلم ، إنت ربتي دقنك وهي لبستلي نقاب ، خلاص إنتوا حرين  
أنا مالي أصلا !!

إبتسم بحنان وقال :

- منورانا يا خالتو ، إيه رأيك في الشقه ؟

ضحكت قائله بملل :

- ياخويا وهو أنا شوفت حاجه علشان أقول رأيي

نهض من مكانه وقال بإبتسامته المعتاده :

- طيب تعالوا إتفرجوا علي الشقه

نظرت له سلمى بتعجب وقالت :

- طيب مش هنشرب حاجه الأول وبعدين نتفرج؟!؟!

نظرت لها الحاجه شكريه بوجه خالي من أي تعبير وقالت :

- نتفرج وبعدين نبقي نشرب ، وإحنا هنروح فين يعني

نهض الجميع من مكانه عدا الحاج عصام الذي ابتسم لهم ورفض الدخول معهم ، تحركت سلمي وخلفها الجميع ، وقفت الحاجه شكرية أمام النيش وفتحته لتري ما بداخله ، أعجبها الجزء العلوي بما يحويه من أكواب وأطباق مميزة بينما نظرت للجزء السفلي وقالت :

- وده بقي جواه إيه ؟

نظرت سلمي لإسلام وظهر علي عينيها التوتر ولم تتحدث بينما قامت الحاجه شكرية بفتحه علي الفور وقالت باستنكار :

- إيه ده !!؟ في نيش عروسه يكون فاضي كده !!؟

ابتلعت سلمي ريقها وقالت بإحراج :

- دي مكتبه يا طنط ولسه بنجهز فيها ، إن شاء الله مع الوقت تتملي كتب

أغلقتها بلا مبالاه وقالت :

- طيب وماله ، يلا تكمل

طافت بالمنزل كله والجميع معها ثم عادوا وجلسوا مرة آخري بينما ذهبت سلمي لتحضر العصير والحلويات ، مالت الحاجه شكرية علي اذن اختها والدة إسلام وقالت :

- البنت عروسة إبنك دي التسريحه بتاعتها فاضيه خالص كده ليه !!؟  
تعجبت والدة إسلام وقالت :

- فاضيه فين يا شكرية حرام عليكي

قالت بسخريه :

- ياختي العرايس بتكون التسريحه بتاعتهم مليانه علي الآخر كده ومش لاقيين حته يحطوا فيها باقي حاجتهم ، إنما مرات إبنك يادوب حطالي شويه حاجات في النص كده وخلص

نظرت لها بعدم إقتناع وقالت :

- ماهي العرايس اللي بتتكلمي عنهم دول مش بيلحقوا يخلصوا كل الحاجات دي وفي الآخر مدة الصلاحيه بتخلص ويبضطروا يرموها ، إنما سلمي مرات إبنني ماشاء الله عليها ذكيه وعارفه تجيب إيه وإمتي



مطت شفتاها للأمام وقالت بضيق :

- ماشي براحتكم ، هي مراتي ولا مرات إبنك يعني !!؟

حضرت سلمي وأحضرت معها العصائر والحلويات وتناول الجميع نصيبه وجلسوا قليلا بعدها ثم غادروا ، فور إغلاق الباب خلفهم إرتمت سلمي علي أقرب كرسي لها ورفعت نقابها قائلة :

- أنا كنت قربت أنصهر يا إسلام ، بجد إتكسفت أوووي

ربت علي كتفها بحنان وقال :

- معلش يا سلمي أنا كنت متوقع كده ، خالتو شكرية مربياني مع ماما وأنا بحبها جداا بس هي إسلوبها كده بقي متزعزعيش

إبتسمت قائلة :

- لأ مزعلتش والله عادي ، أي حاجة من ناحيتك أنا بحبها وواجبي أصلا أكون كويسه مع أهل جوزي بس فعلا إتحرجت اوووي

نظر لها بحب وقال :

- ربنا يخليكي ليا يا سلمي ويساعدنا علي بر أهلنا

---

وبعد إسبوع تقريبا كانت هند تجلس علي حاسبها كالعاده حينما وجدت رساله بالصدفه في صندوق الرسائل الأخرى ففتحتها بتلقائيه وقد كان محتواها :

- وأخيرا عرفت أجيب الأكونت بتاعك يا هند ، أنا كنت بشوفك في الكلية زمان وبصراحه حابب أتعرف عليك اوي وبعدين أتقدملك لاني حسيت أنك بنت محترمه ومن عيله كويسه ، ممكن أول ما تشوفي الرسالة دي تردي عليا علطول ؟

ضحكت هند بسخريه وهي تقرأ كلماته وقالت :

- طب جرب حاجه جديده طيب !!؟ كائنات مريضه

ثم أغلقت الرسالة بلا مبالاه وعادت لتتابع ماكانت تفعله

استيقظت سلمي من نومها قبل صلاة الفجر بقليل فلم تجد إسلام بالغرفة ، هبطت من علي الفراش بتثاقل وأخذت تتحرك ببطء شديد بحثا عنه ، نظرت أمامها فرأت باب غرفة الأطفال مغلق فانتابها الفضول وتحركت باتجاه الغرفة وفتحت جزء صغير من الباب وأطلت منه فوجدت إسلام جالسا في اتجاه القبلة ويعطيها ظهره فشعرت بالراحة لانه لن يراها وأخذت تنصت جيدا لما يقول :

- يارب أعني علي ذكرك وشكرك وحسن عبادتك ، يارب أنا عمري ما أكنت أتخيل أبدا إنني ممكن أعيش الحياه دي بعد كل اللي عملته في حياتي ده ، عارف إنني مستاهلش أي حاجه من اللي بتحسلي دي وإنني أقل بكثير من إنني أتجوز واحده في نقاء ولا براءة سلمي ، بس اللي عارفه أكثر إنك كريم ياربي وإنك أحن علينا من أي حد وإننت بس اللي مطلع علي القلوب وبتحاسبنا علي نوايانا مش علي حاجه تانيه .

يارب قدرني علي طاعتك وإرضي عني وإجعلني من أهل الجنه انا وسلمي وأمي وهند وكل شباب وبنات المسلمين يارب ، يارب إرزقني منها بالذريه الصالحه اللي تفيد الأمه دي بجد وتنشر الدين في كل مكان ، يارب إجعل اولادي من حفظة كتابك الكريم ، يارب قدرني علي تحمل مسئوليههم وإجعلني قدوة لأولادي وزوجتي وكل حد يشوفني ، يارب انا مهمما إتكلمت مش هعرف أعبر عن اللي حاسس بيه بس إنت عالم باللي جوايا ، يارب قربني منك أكثر وإغفر لي ذنوبي وذلاتي وإجعلني من عبادك الصالحين ، يارب ...

شهقت سلمي رغما عنها ثم وضعت يدها علي فمها بسرعه محاوله كتم صوتها ولكنها وجدت إسلام يلتفت لها بابتسامته الحنونه ويقول :

- إنتي جيتي إمتي ؟

أخذت تجفف وجهها من أثر الدموع وقالت بصوت متقطع :

- جيت من ساعه ما حسيت إنني بحبك اووي وبحمد ربنا مليون مره إنه رزقني بواحد زيك ، جيت من ساعه ماعرفت إنني بجد أقل بكثير من إنني أستاهلك يا إسلام ، جيت من ساعه ماعرفت أد إيه ربنا كريم إنه رزقني بالزوج اللي هياخد بايدي للجنه بإذن الله زي ما كنت بحلم ، جيت من ساعه ما قعدت أسمع كلام طول عمري بحلم إنني أسمع من جوزي وكنت حاسه إن ده مجرد خيال ومش هيتحقق ، جيت من ساعه ما شوفت الملاك اللي ربنا رزقني بيه بيدعيلي يا إسلام

نهض من مكانه وأخذ ينظر إليها بحنان ويقول :

- الإنسان اللي قدامك ده كان وحش اووووي زمان يا سلمي ، بجد أنا أقل بكثير مما تتخيلي

دمعت عيناها مره آخري وقالت :

- والإنسانه اللي قدامك دي كانت أوحش اوووي زمان بس كل اللي انا فيه ده دلوقتي نعمه وكرم من عند ربنا

أوما برأسه نفيا وقال :

- إسكتي يا سلمي إنتي متعرفيش حاجه ، حقيقي إنتي طيبه وبرينه اووي وبحمد ربنا كل يوم إنه رزقتي بواحد زيك

أمسكت كفه ووضعته بين راحتها وضغطت عليه بشده وقالت بتسامح :

- مش لازم أي حاجه ومش عاوزه أعرف أي حاجه ، أنا عاوزه إسلام بتاع دلوقتي وبس ، نفسي بفضل كده علطول يا إسلام

إبتسم قائلا :

- أوعدك إني هحاول أتقي ربنا فيكي علطول

ثم ضحك وهو يقول :

- بس ده ما يمنعش إننا نرخم علي بعض ونتخايق شويه يعني ، أهو تغيير برضو

أطلقت ضحكه عاليه رغما عنها وقالت :

- ماشي بس مش جامد هاه ، وإلا هتلاقي مقشآت وشباشب وحلل لو حابب

ثم نظرت له بمكر وقالت بنفس الطريقه :

- أهو تغيير برضو

رفع حاجبه قائلا بمرح :

- مقشآت وحلل ماشي ، إنما شباشب عيب ، دي مش أخلاقنا علي فكره !!

غمزت له بسعاده وقالت :

- قشطه إتفجنا

وقبل أن يتحدث سمع أذان الفجر فابتسم لها قائلا :

- يلا ياختي إتفضلي قدامي علي الحمام علشان تتوضي ، وبعد كده لو راحت عليكي صلاة القيام ثاني هشعلقك ، أنا قولت أهو

ضحكت قائله :

- حاضر والله

وقبل أن تغادر أمسكها من يدها وقال بجديه :

- ممكن أطلب منك طلب ؟

أومأت برأسها إيجابا وقالت :

- أكيد إتفضل

إبتسم وهو يقول :

- لما تلاقيني قافل علي نفسي الاوضه وبكلم ربنا بلاش تتعمدي تسمعي أنا بقول إيه ، بحب أفضفض براحتي وأقول اللي جوايا لربنا وبس ماشي ؟ نظرت للأرض بإحراج وقالت :

- ماشي أسفه

ربت علي كتفها بحنان وقال :

- معلش إنتي عارفه بقي الواحد بيحب دايمًا يقول كل اللي جواه لربنا علشان يرتاح ، وسعات كمان مش بيحب حد يسمع كلامه ده لأنها بتكون حاجات تخصه هو وبس ، حتي لو كان متجوز ومراته دي تعتبر روحه ، بس برضو دايمًا بتكون جوانا حاجات مش بنحب نقولها غير لربنا لان هو بس اللي هيحس بينا

شعرت بالراحة عندما سمعت كلماته وقالت بسعاده :

- حاضر مش هعمل كده تاني بإذن الله ، وعندك حق في حاجات كده الواحد مش بيحب يقولها غير لـ ربنا

أمسكها من يدها مره آخري وقال بحماس :

- يلا ياختي إنتي ماصدقتي ، هنتأخر علي الصلاه ، هستناكي لما تخلصي وضوء وبعدين أنزل المسجد ، بسرعه هاه

وفي المساء جلست هند علي حاسبها فوجدت رسالة من نفس الشخص ففتحتها وهي تقول بسخريه :

- هي الناس دي مش بتزهق ، سبحانك ياربني

أخذت تقرأ الرسالة وتضحك بشده ، فقد كان محتوى الرسالة :

- يا هند أنا عرفت إنك قرיתי الرساله ، بعد إنك ردي عليا أنا مش قصدي حاجه وحشه ، أنا بقولك شوفتك وعاوز أتقدمك فعلا بس بقول نتعرف الأول يعني قبل ما آجي البيت

أخذت تقرأ الرسالة عده مرات وهي تضحك بسخريه وتقول :

- شوفتك وعجبتيني وبعدين عاوز أتقدمك وبعدين نتعرف الاول وبعدين بحبك وبعدين طلعتنا مش مناسبين لبعض وبعدين انا أتمنالك واحد أحسن مني وبعدين إلبسي يا هند في الحيط ، لأ كيوت ياض تصدق !!!

أغلقت الرسالة بلامبالاه كالممره السابقه وعادت لما تفعل ولكنها وجدت رساله منه وصلتها علي الفور وكان محتواها :

- برضو شوفتي الرساله ومش عاوزه تردي ؟ طيب علشان تعرفي إن أنا بتكلم بجد ممكن تبعيتلي رقم والدك ؟ نأ بقي هتصل بيه علشان تصدقي إن أنا مش بكذب

تنهدت بعدم فهم وقالت :

- إيه حكايتك يا عم خالد الشريف إنت ؟!! ودي بقي لعبه جديده من الاعيب الشباب ولا بتتكلم بجد ولا إيه النظام ؟!!

أخذت تفرك وجهها بتفكير وقالت :

- طيب وهو لو بيهزر هيبعتلي يقولي هاتي رقم والدك!!؟

إنتابها الفضول فدخلت علي صفحته الشخصيه لتعرف عنه أكثر ، رأت صورته الجذابه فابتسمت  
رغما عنها وقالت :

- وإنت بقي علشان شكلك حلو بتلعب علي البنات يعني!!؟

ثم زفرت بملل وقالت :

- أنا مالي هو حر مش ناقصه وجع دماغ ، ولا هو فاكتر يعني إني ما هصدق الاقي عريس وأروح  
مدياله رقم إسلام علطول كده!!؟ ليه إن شاء الله مش لاقيه عرسان!!؟

نظرت للمرآه بصرامه وقالت :

- لو بيتكلم جد فعلا يبقي هيعرف يوصل لرقم إسلام زي ما عرف يوصل للأكونت بتاعي ، وبرضو  
مش هرد عليه ..

ثم أغلقت حاسبها وغادرت الغرفه ..

---

- إلحقي يا سلمى النتيجة بـانـت

قالتها هند عندما إتصلت علي سلمى بعد مرور مايقرب من الثلاث أسابيع علي زواجها ، قفزت سلمى  
من مكانها وقالت :

- قووولي بسرعه عملنا إيـه ، إـخرجنا ولا شيلنا حاجه ولا إيـه ؟

ضحكت هند بإستفزاز وقالت :

- عملنا حلو

صرخت سلمى بها وقالت :

- يا بت إنطقي بقي عملنا إيـه ؟

قالت هند بهدوء مستفز :

- فاطمه نجحت

وصمتت .. صرخت سلمي بصوت أعلي :

- هاهah

أجابتها بنفس الإستفزاز :

- وهند نجحت

صاحت بسعاده طفوليه وقالت :

- أيوه بقي الحمد لله ، ونا عملت إييه طيب ؟

تصنعت هند الحزن وقالت :

- بصي ما تزعليش هاه

زفرت بضيق وقالت :

- يا هند خلصي حرام عليكي ، أعصابي سايبه وعماله أترعش ومش هعرف أفتح الكمبيوتر

قالت بصوت جهوري :

- نجحتي يا بنت الإييه وجبتي أعلي تقدير يا حظك  
قفزت سلمي من مكانها وصرخت وهي تقول :

- يا ربك الحمد يا ربك الحمد ، جبت تقدير إييه يا هند ؟

أجابتها بسعاده :

- جيد جدا يا ستي ، وانا وفاطمه جبنا جيد الحمد لله

أخذت تلتقط أنفاسها وهي تقول بأريحيه :

- وأخيرا بقي إتخرجت الحمد لله ، وبتقدير كمان ، اللهم لك الحمد

ثم قالت لهند بحماس شديد :





- بفكر !!

تعجبت أكثر وقالت :

- بتفكر في إيه ؟

رفع حاجبه قائلا بخبت :

- مراتي نجحت وجايلها هديه بره بس خايف أشيلها لوحدي إيدي تتكسر فمش عارف أعمل إيه بقي ، عندك حل يا مدام الله يسترك ؟

شهقت رغما عنها وإتسعت عيناها وقالت بمنتهي السعاده :

- إسلام إنت جيتلي هديه ؟ وتقبله اوووي كده كمان !!؟

أخذ يحك رأسه وكأنه يفكر وقال بمرح :

- في الواقع إحم إحم هي مش تقبله خالص ، بس برضو الواحد لازم يخاف علي عضلاته يعني

جذبتة من يده بحماس وقالت :

- طيب تعالي هساعدك

وهولت بإتجاه الباب لتفتحه ، لحق بها قائلا بمرح :

- يا مجنونه هتطلعي كده قدام الناس !!؟ روعي ياختي إلبسي النقاب وتعالي

نظرت لملابسها بذهول ثم ضحكت تلقانيا وقالت :

- حاضر إستني ثواني

وهمت بالدخول بالفعل لترتدي نقابها بينما أوقفها إسلام مره آخري وقال ببراءه مصطنعه :

- خلاص إستني إستني انا هجيبهاك وأمري لله

ثم رفع يده للسماء وقال :

- يارب صبرني علي المجنونه دي بقي

وبالفعل قام بفتح الباب بينما إختبأت هي وراء الباب ونظرت له بطرف عينيها لتتابع مايفعل ، عاد إليها بحزن وقال :

- إيه ده هي فين ؟!!

نظرت له بتعجب وقالت :

- فين إيه ؟!! لأ يا إسلام مافيناش من كده

حاول كتم ضحكاته وقال بجديه :

- تفتكري الواد بندق اللي ساكن في أسوان جه أخذها وراح عند مامته تاني ؟

ضربته بضيق وقالت :

- ياعم بندق مين دلوقتي ، يلا يا إسلام بجد بطل رخامه

أخذ يلعب في لحيته بعض الوقت حتي إستشاطت غضبا فضحك قائلا :

- تصدقي أنا طلعت مخبيها في الدور اللي فوق ، معلش بقي يا بنتي الواحد لسه راجع من الشغل ومركز

قالت بتلقائيه :

- مش مركز قصدك ؟

أوما برأسه نفيا وقالت :

- لأ مركز ، هكذب يعني ؟

ثم صعد للطابق العلوي وأحضر الهديه وعاد سريعا ، دخل للمنزل بحماس وألقى الهديه في وجهها بمرح فقفزت من مكانها كالأطفال وصرخت به قائله بذهول :

- إيه ده كله ، الله بقي حلووويين اوووي ، بس حرام عليك يا إسلام هلم ده كله إزاي بس ؟

ضحك بسخريه وقال :





- أنا عندي ٢٦ سنة وبشتغل محاسب زي ما قلت لحضرتك ، عندي شقتي الخاصه وعلي التشطيب بس ، ومرتبتي كويس الحمد لله

- طيب يا أستاذ خالد هسأل صاحبة الشأن وأبلغ حضرتك بكره بإذن الله ، لو وافقت هنتقابل الأول علشان نتعرف أكثر

- لالالا مش هينفع نتقابل دلوقتي خالص علشان مسافر ، بإذن الله لما أرجع من السفر هكلم حضرتك ونحدد ميعاد للمقابله

- طيب يا أستاذ خالد يبقي كده أنا مش هقدر أوعدك بحاجه لحد ما تيجي من السفر وربنا يقدم اللي فيه الخير إن شاء الله

- بإذن الله يا أستاذ إسلام ، سعدت بالتعرف علي حضرتك !

- انا أسعد ، السلام عليكم

---

أغلق إسلام الهاتف وهو ينظر له بعدم فهم وضحك قائلا :

- أومال هو بيكلمني دلوقتي ليه أصلا !!؟

لاحظت سلمى إنتهاء المكالمه فحضرت وقالت بفضول :

- عريس ده ولا إيه ؟  
إبتسم قائلا :

- اه يا ستي

قفزت من مكانها بسعاده وقالت :

- قشطه بقي ، ربنا يتملك بخير يا هند ، طيب يلا نقولها بسرعه

ضحك عندما شاهدها علي هذه الحاله وقال :

- هما اللي بيجيلهم عرسان بيعملوا كده ؟ أومال بقي لما إسلام بذات نفسيته إتقدمك عملتي إيه ؟  
نطيتي من البلكونه

ضربته علي يده باستنكار وقالت :

- بس يا رخم ، يلا يلا نقولها بسرعه

جذبها من أنفها بمرح وقال :

- بطلي زن يا أوزعه ، مش هقولها دلوقتي حاجه خالص طبعاً

تعجبت قائله :

- ليه بس !!؟

نظر لها بجديه وقال :

- واحد بيتصل يعرفني بنفسه ويطلب إيد أختي وأول ما قولتله نتقابل قالي مسافر ، خلاص بقي لما يبقي يرجع من السفر نبقي نشوف

نظرت له بعدم فهم وقالت :

- طيب يا إسلام ماهو يمكن مسافر فعلاً ، بتظلمه ليه بس !!؟

إبتسم قائلاً :

- أستغفر الله مش قصدي أظلمه خالص والله ، بس برضو مش عارف هو متصل ليه لما هو مش جاهز !!؟ يعني أكيد مش هحجزله أختي لحد ما يرجع من السفر

ثم أجابها مؤكداً :

- أنا هعتبر إن المكالمه دي لم تكن ومش هقول لهند حاجه علشان دماغها متتشغلش بالموضوع ، لو كلمني تاني خير وبركه مكلمنيش يبقي خلاص !

- ماشي يا إسلام اللي تشوفه

---

وفي منزل هند وأثناء جلوسها علي حاسبها وصلتها رسالة من نفس الشخص وكان محتواها :

- أنا كلمت أخوكي وطلبتك منه خلاص ، ممكن تردي عليا بقي ؟

إبتسمت عندما رأيت الرسالة ، لا تعرف لماذا ؟ هل لانه صادق ؟ أم أن ملامحه أعجبتها والآن تأكدت أيضا انه يريد بها بالفعل ؟ أم انها أحببت فكرة كونها زوجها لهذا الشخص الوسيم ؟ صمتت قليلا ثم سألت نفسها لماذا لم يخبرها إسلام بالأمر ؟ هل قام برفضه ؟ ام حدثه علي الفور ولم يلحق إخبارها ؟

تنهدت بضيق وقالت :

- وبعدين بقي في وجع الدماغ ده ، إيه حكايته عم خالد الشريف ده كمان ومش عايز يسبيني في حالي ليه بس !!؟

ثم نظرت للجانب الآخر وقالت بتفكير :

- طيب ماهو ممكن يكون عاوزك فعلا يا هند ، وبعدين ماهو الراجل دخل البيت من بابيه أهو يبقي إيه المشكله !!؟

تنهدت بعدم فهم وقالت :

- أنا أحسن حاجه أروح أتصل بإسلام وأعرف كلمه فعلا ولا لأ علشان أرتاح ، يووووه بقي بس هقوله إيه يعني !!؟

ثم نظرت للمرآه وإبتسمت بسخريه وقالت :

- اومال نكاه هند راح فين بقي !!؟

وبالفعل قامت بالاتصال علي إسلام وقالت بلووم :

- الو

ضحك قائلا :

- يا بنتي ماقولنا إسمها السلام عليكم ، عموما يا ستي وعليكم السلام ورحمة الله وبركاته ، هاه عاوزه إيه ؟

قالت بدلع :

- كده يا إسلام يعني ماينفعش أتصل بأخويا حبيبي علشان أتطمئن عليه ؟

إبتسم قائلا :

- هند ، أنا مربيكي علي إيدي وفاهمك كويس ، إنجزي عاوزه إيه ؟

قالت بإحراج مصطنع :

- بما إنك دايمًا فاقسني كده هقولك علي طول ، في واحده صاحبتني من أيام ثانوي بتقولي إن واحد قريبها شافني في الجامعه ودلوقتي عاوز يتقدملي وأنا قولت أقولك علشان لو إتصل بيك ولا حاجه يكون عندك علم بالموضوع يعني

رفع حاجبه متعجبا وقال بتلقائيه :

- شافك في الجامعه ؟ أومال هو مقاليش كده ليه !!؟

إبتسمت بخبث وقالت :

- هو مين ده يا إسلام ؟

إنتبه لحديثه علي التو وقال مستسلما :

- هو فعلا إتصل بيا من شويه وقالي إنه عاوز يتقدمك ، عموما هو مسافر حاليا ولما يرجع نبقي نشوف الموضوع ده  
ثم قال مؤكدا :

- متشغليش بالك بالموضوع ده دلوقتي يا هند لاتنا لسه مش عارفين هو جاد ولا إيه ، ربنا يقدم اللي فيه الخير إن شاء الله

إبتسمت قائله :

- لا وأنا أشغل بالي ليه يعني ، أنا قولت أقولك وخلص ، يلا عاوز حاجه يا عريس ؟

- تسلمي يا هند ربنا يخليكي

أغلقت الهاتف ونظرت للمرأة نظرة إنتصار وقالت :

- كده بقي أنا إرتحت !



ثم نظرت لها تفها بحزن وقالت :

- معلى يا إسلام مش بحب أكذب عليك بس دي كدبه بيضا بقي علشان أعرف إيه حكايته الراجل ده ، دلوقتي بس عرفت إنه صادق وإرتحت

- سلمى إلحقي بيقولوا في تقديمات في مديريه التربيه والتعليم

قالها إسلام عندما كان يقرأ جريدته الصباحيه قبل ذهابه للعمل ، حضرت إليه علي الفور وقالت بلهفه

- بجد في تقديمات ؟ طيب تعالي نروح نلحق بسرعه يمكن أعرف أشتغل

جذبها من يدها وأجلسها بجواره وقال بحنان :

- حاضر من عونيا ، جهزي ورقك وبكره إن شاء الله نروح نقدم

تنهدت بسعاده وقالت :

- يارب يا إسلام الأقي شغل

إبتسم قائلا :

- بإذن الله هتلاقي ، هما هيلاقوا زيك فين يعني !!؟

ثم تنهد بحزن وقال :

- رغم إني برضو مش مبسوط من حكاية الشغل دي بس مش هينفع أمنعك طالما هدفك تساعدي الاطفال دول

إبتسمت بسعاده وقالت بصوت طفولي :

- والله يا إسلام هحاول أوفق بين الشغل والبيت ، بس إنت تساعدي ومتقعدش تتلرز عليا هاه

ضحك بسخريه وقال :

- تتلرز !! يخرم بيت أفاظك يا شيخه

ضربته علي كتفه بقبضتها الصغيره وقالت بجنون :

- أيوه ياخويا تتلرق ، يعني كل شويه تقولي يا سلمي إلحقي في ترابه هنا ، يا سلمي إلحقي عندك شعرايه منكوشه ، يا سلمي إلحقي في كوبايه علي الحوض ، يا سلمي إلحقي في حاجه وقعت مني علي الأرض ، يا سلمي إلحقيني عطشان وهموت ، إييه لــــأ مش هسمح بكده أبدا

سقط علي الأرض من كثرة الضحك وقال :

- خلاص والله ما تصوتيش كده ، مش هقولك علي حاجه أنا مالي أصلا

ثم نظر لها بجديه وقال :

- بجد بجد بإذن الله هحاول أساعدك بقدر الإمكان في شغل البيت زي ما كان النبي صلي الله عليه وسلم بيعمل مع أهل بيته .

ثم غمز لها قائلا بسعاده :

- رفيقتي للجنه بقي وكده

---

وفي المساء فتحت هند حسابها علي موقع الفيس بوك ولكن هذه المره بنية مختلفة ، فقد كانت تنتظر منه رسالة آخري وكأنها إعتادت علي ذلك ، بالإضافة إلي كونها فخوره به بعدما إتصل علي إسلام كما قال ، وبالفعل وجدت منه رسالة وكان محتواها :

- طيب قوليلي أعمل إيه تاني علشان أثبتك إنني فعلا عاوز أتقدملك ، يعني كلمت أخوكي وطلبتك منه وإنتي برضو مش راضيه تردي عليا ، قوليلي أي حاجه وأنا هعملها صدقيني ، وعلي فكره أنا هفضل وراكي لحد ما تردي وبرضو مش هسيبك .

من الآخر يا هند انا حطيتك في دماغي ومش هستسلم !

كانت هند تنظر للرساله بمشاعر مختلطه ، فهي ما بين السعاده لتمسكه بها والخوف والقلق من المجهول ، همت أن ترد علي الرسالة وبالفعل كتبت أول حرف ولكنها تراجعته بخوف ومسحته .

ظلت تفكر قليلا ثم قالت :



قالتها سلمي عندما عادت من مكتب التقديمات بوزاره التربيه والتعليم ، أجابها علي الفور :

- جددي النيه بس إنتي وبإذن الله هنتقبلي

أغمضت عينيها بسعاده وقالت :

- حاضر

ثم إبتسمت له قائله :

- يلا إرجع إنت علي شغلك بقي وأنا هروح

أوما برأسه نفيا وقال :

- لأ هوصلك الأول وبعدين أروح

قالت بثقه :

- متخافش عليا ده انا بـ ١٠٠ راجل ، يلا علشان البريك بتاعك هيخلص والمدير ممكن يعمل معاك مشكله

نظر في ساعته بحيره وقال :

- خلاص بصي أنا هركبك وبعدين أمشي ، إبقى رني عليا اول ما توصلي ماشي ؟

- حاضر

مر حوالي إسبوع وتوطدت العلاقه قليلا بين هند وخالد ، رغم أنها لم تحدثه كثيرا عن نفسها إلا أنها احبت كلماته حقا ، احبت حديثه عن نفسه ، احبت إعجابه بها ، احبت الإهتمام الذي فقده منذ زواج إسلام ، احبت كونها زوجه لهذا الرجل الوسيم الذي تتمناه كل فتاه .

لا تعرف لماذا كانت تنتظر رسائله اليوميه ، لا تعرف أكان ما تفعله صوابا ام خطأ ، كل ما تشعر به هو سعادتها و فقط ، كانت تشعر دائما بالذنب وتائب الضمير ولكنها حاولت كثيرا تحاشي هذا الشعور عن طريق ترديدها يوميا جملتها المشهوره :

- وفيها إيه يعني لما أتعرف عليه ؟ طالما هتخطبله لما يرجع من السفر يبقى لازم أكون أعرفه كويس  
طبعاً ، أو مال هتخطب لواحد معرفش عنه حاجه يعني !!؟ وبعدين الراجل شاريني ومفيهوش غلظه  
يبقى لازم أديله فرصه !!

وفي صباح اليوم التالي هرولت سلمي بإتجاه غرفة نومها بسرعه رهيبه وأخذت تحرك ذراع إسلام  
حتى إستيقظ وصرخت به قائله :

- إسلام إلحقتي بسرعه في مصيبه

فتح عينيه ببطء وقال :

- هاه ؟ إيه خير

أمسكت بشئ ما ووضعتة أمام وجهه وقالت :

- بص بسرعه ، هو ده حقيقي ولا إيه !!؟

ظل يفرك عينيه للحظات وقال بنعاس :

- إيه ده ؟

قالت علي الفور :

- ده تحليل منزلي يا إسلام ، كنت بجرب عادي وطلع إيجابي ، هو ده حقيقي ولا كرتون ولا إيه !!؟

نظر لها بلا وعي وقال :

- جبتي التحليل ده بكام ؟

ضحكت رغماً عنها وضربتة بالوساده وقالت :

- بكام إيه يا إسلام حرام عليك ، بقولك التحليل طلع إيجابي يعني كده أنا حامل صح ولا إيه ،  
ياخراشي يا جدعان معقوله

وضع الوساده فوق رأسه وقال :



- أيون بقي

إتسعت عيناه أكثر وهو يقول بعدم تصديق :

- إنتي بتتكلمي بجد ؟ إنتي حامل والله ؟ طب عرفتي منين

أمسكت بالتحليل ووضعته أمام عينيه وقالت ببراءة :

- عرفت من ده ، بس برضو هروح المعمل أتأكد إن شاء الله

أخذ ينظر إليه بذهول بضع لحظات حتي استوعب الأمر ثم قفز من مكانه وأخذ يهرول في جميع أركان المنزل ويصعد ويهبط علي كل شئ أمامه ويصرخ بأعلي صوته ويقول :

- وهكـون أب يـا نـاس هـكـون اب

اللهم لك الحمد .. اللهم لك الحمد

وعلي الفور إرتدي كل منهما ملابسها وهبطا سريعا لأقرب معمل تحاليل ، دخلا بكل بحماس وقابلا الطبيبه المتخصصه التي أخذت من سلمى عينه الدم المطلوبه ثم إبتسمت قائله :

- النتيجة هتظهر علي الساعه ٨ بليل إن شاء الله

قالت سلمى علي الفور :

- لالالا إحنا عاوزينها مستعجله

نظرت لها بتفهم وقالت :

- طيب حضراتكم ممكن تتفضلوا تستريحوا هنا وبإذن الله أقل من ساعه وهتكون جاهزة

إبتسمت قائله :

- ماشي

غادرت الطبيبه ونظرت سلمى لإسلام وقالت بسعاده :

- روح إنت بقي الشغل وأنا هستني هنا وأول ما تظهر هتصل أقولك الأخبار بإذن الله

أجابها علي الفور :

- لأ طبعا أنا قاعد معاكي

- يا إسلام متخافش هقولك والله أول ما تظهر

أوما برأسه نفيا وقال :

- متحاوليش ، أنا مش رايح النهارده ومتخافيش الأجازات بتاعتي لسه مخلصتش ، وبعدين يعني لو انا مغيبتش علشان حاجه زي دي هغيب إمتي بس ؟

ثم تنهد بسعاده وقال :

- ادعي إنتي بس التحليل ده يطلع زي التاني

- يارب

وبعد أقل من ساعه وجدت سلمي الطبيبه آتية إليها ومعها التحليل فنهضت من مكانها وأسرعت الخطي بإتجاهها وقالت بحماس :

- هاه إيه الأخبار

إبتسمت قائله :

- مبروووك يا مدام إنتي حامل

لم تشعر بنفسها إلا وهي في حضن الطبيبه ، ضمته بشده وأغمضت عينيها بفرحه وقالت بهمس :

- الحمد لله

إبتسمت لها الطبيبه وغادرت الغرفه بينما نظر لها إسلام وتحدثت عيناه قبل أن يتحدث لسانه ، إقتربت منه سلمي ووضعت التحليل في يده وضغطت عليها بشده وهي تقول :

- إسلام إنت حاسس باللي انا حاسه بيه ؟



نظر لها بعين ممتلئه بالحنان والحب وقال :

- إسلام مش حاسس بنفسه أصلا ، إسلام حاسس إنه في حلم جميل وخايف يصحي منه ، يارب ديمها علينا نعمه وتم لها حملها علي خير

استيقظت هند من نومها وعلي الفور تذكرت كلمات خالد الأخيره التي أشعرتها بالسعاده رغما عنها :

" انا قولتك إني ما صدقت لقيتك ومش ناوي أسيبك مهما عملتي ، هتردي كثير هتردي قليل مش هتردي خالص براحتك ، برضو وراكي وراكي يا هند لحد ما تقررني تتكلمي وتفوليلي اللي جواكي "

أخذت تلعب في شعراتها بهيام وقالت :

- وبعدهالك بقي يا عم خالد إنت ، مش ناوي تبطل كلامك ده بقي ؟

ثم نظرت للمرآه بحيره وقالت :

- وإنتي إيه حكايتك يا هند إنتي كمان ؟ إتعلقتي بيه ولا إيه ؟

تذكرت كلماته فقالت بسعاده :

- وهو بعد كلامه ده كله مش هتعلق بيه ، ده الراجل زي ما يكون هيموت عليا ومش مبطل مدح فيا

إنتبهت فجأة وقالت بخوف :

- بس اللي إنتي بتعمليه ده غلط يا هند ، مش أي واحد يقولك إنه بيحبك يبقي بيحبك فعلا ، إنتي لازم توقفي الشخص ده عند حده ، إنتي مش رخيصه ياهند وهو لو بيحبك فعلا هيجيلك لحد البيت

ثم نظرت للجانب الآخر وقالت هامسه :

- بس أنا ببقني مبسوطه وأنا بقرأ كلامه ، كمان أنا مش برد عليه كثير ومع ذلك هو مّصر يكلمني برضو ، يبقي أكيد بيحبني فعلا صح ؟

إعتدلت في جلستها وقالت بصرامه :

- برضو ما ينفعش ، إنتي مش حمل أي خبطه في قلبك يا هند ، لازم تتصرفي لازم !

- اقعدني هنا وماتتحركيش خالص

قالها إسلام عندما عاد إلي منزله وأجلس سلمي في غرفة الأطفال ونظر إليها بكل حنان بينما تنهدت هي وقالت :

- مش مصدقه نفسي يا إسلام ، حاسه إنني بحلم والله ، ده أنا من ساعة ما نزلنا من المعمل وأنا كل شويه أتأكد إن إسمي هو اللي مكتوب علي التحليل

إمسك كفيها بين راحتيه وقال بحماس :

- لأ مش حلم يا سلمي دي حقيقه ، عارفه ليه ؟ لأن ربنا كريم أوووي ، وزى ما كرمنا وعيشنا أحلي خطوبه في طاعة الله ، كمان هنعيش أحلي حياه في بيتنا الصغير ده وهيكون عندنا أولاد صالحين ينفعوا الأمة الإسلاميه ، ويأذن الله برضو هنعيش حياتنا الحقيقه سوا في الجنه

إبتسمت قائله :

- يارب يا إسلام

إعتدل في جلسته ونظر إليها بجديه وقال :

- والآن يا سيدتي إلكي ما سوف نفعله في الفتره القادمه

ضحكت سلمي وقالت :

- تفضل يا أخ العرب

ضربها علي يدها بمرح وقال :

- يا رخمه بوظتي البرستيح

ثم حاول إستعاده جديته مره آخري وقال :

- بصي يا ستي المفروض دلوقتي هنشوف دكتور كويس علشان تروحيله ، وكمان عاوزين نشتري كتب وحاجات كده عن تربيته الأطفال زي ما إتفقنا في الخطوبه



ضربها بالوساده وقال مازحا :

- ماشي يا ست الرخمه ، والله لولا إنك حامل كنت وريتك الرخامه علي حق ، يلا الطيب أحسن بقي

وفي المساء قررت هند أن تضغط علي قلبها ومشاعرها وتفعل ما تراه صحيحا ، نعم سيكون الوضع صعب بالنسبه لها ولكنها لن تسمح لأي شاب مهما كان أن يلعب بمشاعرها ، قامت بفتح حسابها علي موقع الفيس بوك في موعد وجوده ككل يوم ووجدت منه رسالة وكان محتواها :

- هنود أنا مستيكي أهو ، ياريت أول ما تفتحي تعرفيني

تنفست بصعوبه وكتبت بصرامه :

- شوف يا أستاذ خالد ، لو حضرتك فاهم إني بنت من إياهم تبقي غطان ، أنا بنت محترمه ومن عيله محترمه ومش هسمح لنفسي أبدا أتكلم أكثر من كده ، وياريت حضرتك تبطل تبعثلي حاجه عنك تاني ماشي ؟

قرأ الرساله بتعجب وكتب :

- إيه يا هند مالك ؟ ما إحنا كنا حلوين ؟ في حاجه زعلتك مني طيب ؟

- ده آخر كلام عندي ، وفعلا كانت غلظه إني رديت علي حضرتك من الاول وأديني بصلح غلطي أهو ، بعد إذتك بلاش تبعث حاجه تاني علشان مضطرش أعمل بلوك ، عن إذتك

- طب إستني يا هند هفهمك ..

أغلقت حاسبها علي الفور وهي مضطربه تماما ولكنها نظرت للمرآه وقالت بصرامه :

- هنشوف بقي هيعمل إيه ، لو إتقدم حقيقي ساعتها هصدق إنه بيحبني ولو هرب يبقي أنا عملت الصح قبل ما أتعلق بيه أكثر من كده

- بس دي طلعت جامده أوووي وعجبنتي والله يا واد يا عادل

قالها خالد أثناء مقابلته لرفيقه الوحيد عادل ، ضحك عادل بسخرية وقال :

- يا عم إنت مش بتزهق بقي ، ما تسيبك من البنات وقرفهم وخليك عايش برنس كده

ضربه بمرح وقال :

- ياعم لأ خلاص نويت أستقر بقي ، الشقاوة دي كانت أيام الكليه وراحت لحالها ، البنت فعلا عجباني  
وهتقدم لها إن شاء الله بس قولت أتعرف عليها الأول وأشوف هعرف اتأقلم معاها ولا لا ، بس بنت  
اللذينه طلعت جامده ومش راضيه تتكلم خالص

نظر إليه بخبث وقال :

- اااه قول كده بقي ، إنت ماشي بمبدأ طول ما اللين ببلاش عمري ما هشتري الجاموسه ، دلوقتي  
بقي البنت غلبتك معاها فقررت تشتريها

وكزه في يده بضيق وقال :

- جاموسه لما ترفسك يا بعيد ، ياض بقولك عجباني وهتجوزها فعلا سواء بقي كلمتني او لا ، كده  
كده حطيتها في دماغى ومش هسيبها

ضحك بسخريه وقال :

- ماشي ياخويا إتجوزها ، يارب فعلا تطلع محترمه علشان تعلمك الأدب شويه

- لا ياخويا متخافش لو علي محترمه فهي محترمه فعلا

- طيب وهتروح تتقدم لها إمتي بقي يا عم خالد ؟

أخذ يتحسس شعره بتفكير وقال :

- والله يا عادل لسه مش عارف ، أنا قولتلهم إنى مسافر علشان ألق أتعرف عليها الأول قبل ما  
أتقدم رسمي يعني ، بس لو فضلت معانده كده بقي هروحلهم وخالص

- ماشي ربنا يسهلك الأمور

وبعد ثلاثة أيام حضر إسلام من عمله وهو يحمل حقيبته كبيره بداخلها شئ ما ، وضعها أمام سلمى  
وقال بحماس :

- إتفضلي يا ستي دول شويه كتب حلوين كده عن تربية الأطفال ، بإذن الله لو خلصناهم هنجيب غيرهم بس في القبض الجاي بقي إن شاء الله

فتحت الحقيبته بحماس وأخذت تقلب فيها وهي تقول بسعاده :

- ماشي يا إسلام شكرا أوووووي ، هتقرأهم معايا بقي هاه

ضحك باستفزاز وقال :

- إبقى إقريهم وبعدين إحكي لي بقي ماشي  
ضربته علي كتفه بخفه وقالت :

- إسلام هتقرأهم يعني هتقرأهم ، أنا مش هربي لوحدي ياخويا

- خلاص يا ست متزوقيش كده ، نبقى نخصص كل يوم ساعه ولا إثنين كده ونتسلي فيهم بإذن الله

ثم نظر لها بحماس وقال :

- أنا قررت إنني أربي ولادي أحسن تربيته و بإذن الله عمري ما هسمح أبدا إنهم يكونوا زيي زمان ،  
إن شاء الله دول اللي هيكونوا السبب في دخولنا الجنة يا سلمي

تنهد بسعاده وقالت :

- يارب يا إسلام ، وبكده بقي هيكونوا دول أول مجموعته في مكتبتنا الصغونه

- يعني أنا لو جيت إتقدمتك هتصدقني فعلا إنني مش بضحك عليكي ؟ هو ده اللي هيرحك يعني يا هند

كتبها خالد كمحاولة أخيره منه للتعرف علي هند قبل ذهابه لمنزلها كما يزعم ، زفرت بضيق وفكرت  
قليلا ثم قررت أن ترد عليه لآخر مره فكتبت :

- أيوه

إبتسم قائلا :

- طيب هو أنا مش من حقي إنني أعرف أنا رايح أتقدم لمين ؟ يعني أنا كل اللي أعرفه عنك إنك  
خريجه تربيته إنجلش وإسمك هند وبس ، وإنتي عارفه عني كل حاجه ينفع كده بقي ؟

- الموضوع منتهي بالنسبالي يا أستاذ خالد ، دخلت من الباب هعرف إنك صادق وساعتها هتعرف عني كل حاجه ، قضيتها شات بيبقي البلوك هو الحل

- بلوك مين حرام عليكي ده انا غلبان ، طيب بصي هتفق معاكي إتفاق حلو

- إتفضل

- انا هرجع من السفر يوم السبت الصبح إن شاء الله ، يوم السبت بليل هتلاقي أخوكي بيقولك إني كلمته ، ماشي ؟

- ماشي

- علشان تعرفي غلاوتك عندي يا هند ، وإن خالد لما بيقول كلمه مش بيرجع فيها ، وهتشوفي بنفسك

أخذت تقرأ كلماته الأخيره بسعاده وتحدث نفسها بكل ثقه :

- إنتي كده صح يا هند ، إتأكدتي إنه مش كداب وبرضو خليتي نفسك غاليه قدامه ، والنهارده من يوم السبت مش بعيد

عاد إسلام من عمله وهو يحمل لسلمي خبر قد يسعدها أو يحزنها ، حقيقة لا يعرف بالتحديد ولكن لابد أن يخبرها به ، دخل منزله والإبتسامه تعلقو شفثيه وقال :

- سلمتي جاييلك خبر ، امم هما خبرين بصراحه واحد حلو وواحد وحش ، تحبي أبدأ منين ؟

إبتسمت قائله :

- قول الحلو الاول طيب ، وربنا يستر من الوحش ده بقي

نظر لها بسعاده وقال :

- قبلتي في الشغل يا سلمتي بقي مبروووووووك

نظرت له بذهول ووضعت يدها علي فمها وهي تقول بعدم تصديق :

- إنت بتتكلم بجد يا إسلام ؟

أوما برأسه إجابا وقال :

- أيوه والله

قفزت من مكانها بسعاده وقالت :

- أيوه بقي أخيرا الحمد لله

إبتسم لها وصمت بينما قالت هي بتساؤل :

- طيب وإيه الخبر الوحش ؟

تنهد بحزن وقال :

- تعيينك جه في مدرسة عزمي فؤاد

نظرت له بعدم فهم وقالت :

- دي فين دي ؟ بعيده يعني ولا إيه ؟

تحسس وجهه بضيق وقال هامسا :

- في قرية الزهري

نظرت له بتعجب وقالت :

- قريه !!؟

أوما برأسه إجابا وقال :

- أيوه للأسف ، هو ده النظام حاليا ، في الغالب أي تعيين بيكون في أرياف كام سنه كده في الأول  
وبعدين ممكن تيجي هنا لان المدارس هناك بتكون محتاجه مدرسين يعني ، بس طبعا لو معاكي  
واسطه الموضوع ممكن يختلف  
قالت علي الفور :

- لأ يا عم واسطه إيه وبتاع إيه !! طيب هي فين المدرسة دي ؟ أو قصدي يعني المسافه أد إيه ؟



إبتسم قائلاً :

- المسافه من هنا لهنالك حوالي نص ساعه ، والله أنا بحمد ربنا إنك مروحتيش أبعد من كده وكمان القرية دي نضيفه عن غيرها

نظرت له بعين لامعه وقالت بثقه :

- خلاص وأنا موافقه ، أكيد الأطفال هناك محتاجين حد يحببهم في التعليم ، وبإذن الله ربنا يقدرني علي المواصلات أثناء الحمل

نظر لها بفخر وقال :

- كنت متأكد إنك هتعملي كده ، رغم إني خايف عليك بس جدي النيه وإدعي ربنا يستخدمك وبإذن الله خير

---

كانت سلمي في المطبخ تنهي تنظيف أطباق الغداء عندما سمعت إسلام يضحك بشده فإنتابها الفضول وحضرت علي الفور وقالت بتساؤل :

- بتضحك علي إيه يابو الكباتن ، طب ضحكني معاك طيب

خرجت الكلمات متقطعه من بين ضحكاته وقال :

- كل أما أفكر شكل هند ساعة ما عرفت إنك حامل أبقي هفطس من الضحك ، بت فظيعة بجد ، آل وإيه تقول إننا هنطلع الواد معقد وهي اللي لازم تربيته ، تبقي توريني تربيتها الفالحه

ضحكت هي الآخري وقالت :

- ولا ولاء لما عرفت ، تقولي موتي العيل ده مليش دعوه مش عاوزه أكبر أنا ، مش عاوزه أبقي خالتو دلوقتي موتيه موتيه

ثم تنهدت بسعاده وقالت :

- بس عارف إيه أكثر موقف أثر فيا ؟

- إيه ؟

- ساعة لما ماما عيظت ، مكنتش متخيله أبدا إنها تفرح أو تتأثر كده ، ولا بابا وفرحته ، رغم إنني كنت دايمًا بحس إنه شديد بس اليوم ده حسيته مختلف ، هو صحيح يا إسلام أعز الولد ولد الولد زي ما بيقولوا ؟

إبتسم بحنان وقال :

- أكيد يا سلمي ، تخيلي كده لما تتعبي في ولادك أوووي وتكبريهم وبعدين كمان تشوفي ولادهم ، تشوفي اللي تعبت فيهم بقوا هما كمان أبهات وأمهات وعندهم مسئولية ، أكيد طبعا هتحسي بالفرحه

ثم تذكر والدته وقال بشوق :

- الحضان اللي أخذته من ماما ساعتها مش ممكن أنساه ، حسيت إنها كان نفسها تفرح أوووي من زمان والموضوع ده جالها في وقته المناسب

ثم أمسك بيدها وقال بحب :

- ربنا يديمها علينا فرحه يا سلمي ويقومك بالسلامه

أغمضت عينيها وقالت برجاء :

- يارب يا إسلام

ثم قفزت من مكانها وكأنها تذكرت شئ ما وقالت علي الفور :

- تصدق نسيت أقول لفاطمه لحد دلوقتي ، مش عارفه هند قالتها ولا لسه بس هروح أتصل بيها بقي وأبلغها بالموضوع علشان تفرح معايا

إنتبه فجأة هو الآخر وقال :

- تصدقي أنا كمان لسه مقولتش لفاروق ، يارب بس يرد عليا وإلا هضطر بقي أروحله البيت أشوف إيه حكايته

نظرت لها بتعجب وقالت :

- طيب وهو مش هيرد عليك ليه يعني ؟

تنهد بحزن وقال :

- مش عارف والله يا سلمي ، أنا مشوفتوش من ساعة فرحي وكل أما أتصل بيه ميردش خايف يكون  
حصله حاجه لا قدر الله

نظرت له بضيق وقالت :

- لا يا إسلام ملكش حق ، كان لازم تروح طبعا تشوف ماله ، يلا إتصل بيه ولو مردش روحه البيت  
بسرعه وإن شاء الله ميكونش حصل حاجه

تنهد بإحراج وقال :

- عندك حق كانت غلطه مني ويارب يسامحني عليها بقي ، مش عارف الفتره اللي فاتت دي  
إتشغلت جداا ومعرفتش أروح ، علي العموم هتصل دلوقتي وأشوف

وبالفعل ذهبت سلمي لتحدث صديقتها بينما إتصل إسلام علي صديقه ومن حسن حظها أنه أجاب  
أخيرا وقال :

- السلام عليكم ورحمة الله وبركاته

- أخيرا يا فاروق ، وعليكم السلام ورحمة الله وبركاته يا سيدي ، فينك يا فاروق حرام عليك  
خضنتي عليك

إبتسم قائلا :

- موجود أهو يا إسلام

زفر بضيق وقال :

- طيب ومش بترد ليه يا عم ده كله ، حرام عليك والله

قال معتذرا :

- معلىش يا إسلام والله برجع من الشغل ميت وبنام لتاني يوم

رفع حاجبه قائلا بتعجب :

- إيه يا عم منا برجع من الشغل الساعه ٥ زيك ومش ميت أهو لا حاجه

- لا يا إسلام الشغل هنا متعب أو ووي فوق ما تتخيل ، ده انا كمان ساعات بفضل في الشركه لـ ٨ أو ١٠ بليل علشان الضغط ، يلا ربنا يقوينا

نظر إسلام للفراغ بعدم فهم وقال متسانلا :

- هنا فين !!؟

ضرب جبهته بيده ثم قال ضاحكا :

- يبيبيي تصدق نسيت أقولك ، أنا في إسكندرية يا إسلام ، كانوا محتاجين مهندسين كهرباء في فرع الشركه اللي هنا وجيت بقي وأمري لله علشان في مكافئة حلوه في الموضوع ده وأنا محتاجها بصراحه علشان أخلص الشقه بتاعتي ، إدعيلي بقي ربنا يعدي الفتره دي علي خير علشان بجد تعبت

- إسكندريه يا فاروق !!؟ طيب ما قولتش ليه وروحت إمتي وكده ؟

- إتصلت بيك والله بعد فرحك بكام يوم كده لكن إنت مردتش فبصراحه إتحرجت أتصل تاني بقي ، وبعدها الوضع زي ما إنت شايف كده ، بس عارف ؟ المرتبات هنا أحسن من هناك بكتيير وبفكر أصلا أنقل نفسي هنا ، مش عارف بقي ربنا يبسر

- ربنا يعينك يا فاروق ، طيب صحيح مقولتليش إيه أخبار خطيبتك وفرحك قرب ولا لسه ؟

ضحك فاروق بتأثر وقال :

- متفكرنيش يا إسلام بقي علشان إنت عارفني بتأثر بسرعه من الحاجات دي

قال بحماس :

- مالك يا وحش ؟ إجمد كده اومال

إبتسم قائلا :

- يا عم منا جامد أهو أنا إتكلمت ، الشقه يا سيدي قربت تخلص وواقفه علي كام ألف كده هتصرف فيهم إن شاء الله ، وبالنسبه لنهي فهي كويسه الحمد لله رغم إني مش بكلمها إلا قليل خالص ، بس باباها بيظمني عليها دايمًا يعني

تعجب قائلا :

- طيب وليه مش بتكلمها طالما باباها بيكون موجود يعني

أغمض عينيه وقال بكل صدق :

- علشان أنا أخذت قراري إني هحافظ عليها من نفسي يا إسلام ، وهي عارفه كده ومش بتزعل الحمد لله

ثم ضحك وهو يقول :

- وبعدين ياعم أخوك مشاعره فياضه اليومين دول فخليني ساكت أحسن

ضحك إسلام من طريقة حديثه ثم قال متسائلا :

- طيب وليه ما تكتبش الكتاب وتريح نفسك يابني ؟

- هكتبه قريب جدا إن شاء الله ، أول ما أرجع والشقه تكون جهزت هنكتب الكتاب وبعدين نشوف بقي هنعمل فرح ولا هنطلع عمره ولا إيه ، ربنا يبسر

- ماشي يا فاروق ربنا يوفقك ، والله إنت تستاهل كل خير وأنا متأكد إن ربنا هيكرمك علي الآخر بسبب صبرك ده

- حبيبي يا إسلام ربنا يرضي عنك

- معلىش بقي عطلتك بس كان لازم أتصل علشان أقولك علي الخبر ده ، يلا تصبح علي خير

قال متعجبا :

- خبر إيه ؟

إنتبه إسلام علي التو وضحك بشده ثم قال :

- تصدق نسيت أقولك أنا متصل ليه أصلا ، أخوك يا سيدي هيكون أب بعد ٩ شهور إن شاء الله

قفز فاروق من مكانه وقال بسعاده :

- بجد والله يا إسلام ؟

- أيوه الحمد لله

- ربنا يتم لمراتك علي خير يا إسلام ، جهز نفسك للمسئوليه بقي يا قدوه

ردد للحظات :

- قدوه

ثم إبتسم قائلا :

- حاضر

---

وفي يوم السبت قبل صلاة المغرب بنصف ساعة تقريبا رن هاتف إسلام برقم مجهول فأجاب علي الفور :

- السلام عليكم

- و عليكم السلام يا أستاذ إسلام ، أنا خالد الشريف اللي كلمت حضرتك قبل كده

- أهلا أهلا يا أستاذ خالد

- كنت بتصل بحضرتك علشان أقولك إني رجعت من السفر خلاص وكنت حابب أجي أزورك في البيت لو مفيش مانع

- طبعا تأنس وتشرف ، بإذن الله هقول لأختي النهارده علي الموضوع ولو في نصيب هكلمك علشان نتقابل بكره ونتعرف علي بعض أكثر

- ماشي يا أستاذ إسلام وأنا مستني تليفون حضرتك بإذن الله

- بإذن الله ، يلا سلام عليكم

- و عليكم السلام

وعلي الفور ذهب إسلام لغرفة نومه وبدل ملابسه وذهب لسلمي في المطبخ وقال بتفاؤل :

- سلمي أنا رايح لماما ، عاوزه حاجه وأنا راجع ؟

إبتسمت قائله :

- ترجع بالسلامه إن شاء الله ، بس خير في حاجه ولا إيه ؟

تنهد بسعاده وقال :

- العريس يا ستي اللي كلمني قبل كده إتصل تاني أهو وعاوز يبجي يتقدم ، أنا هروح دلوقتي بقي أقول لهند وبعدين أكلمه علشان نتقابل بكره ونتعرف علي بعض يعني

- هتقابله إنت ؟ ولا إنت وهند قصدك ؟

أجابها علي الفور :

- لأ طبعا لازم أقابله أنا الأول ، ماهو مش كل واحد هيقول عاوز أتقدم هدخله بيتي وأخليه يتفرج علي أختي ، لو لقيته مناسب ساعتها أبقى أدخله بيتي .

نظرت له بكل فخر وقالت :

- حقيقي أنا فخوره بيك يا إسلام ، يارب كل الشباب يببقوا زيك ويحافظوا علي إخوانهم كده

ثم دفعته بحماس وقالت :

- يلا يلا بسرعه علشان تيجي تظمني

أدي إسلام صلاة المغرب في المسجد القريب من منزل والدته وصعد علي الفور ، أخذ يطرق الباب بطريقته المضحكة فعرفت والدته أنه هو ، فتحت بإبتسامتها البرينه وقالت :

- وإنت إيه حكايتك بقي يا إسلام ؟ كل شويه تسبب مراتك وألأفيك ناططي كده ، عيب يابني ده انتوا لسه متجوزين وماينفمش تسببها لوحدها كده

دخل بسرعه وقفز علي الأريكة بحماس وقال :

- معلىش بقي يا حجه إبنك رخم ومش بيرضي يسببكم لوحدكم

إبتسمت قائله :

- يابني هند معايا هنا وبنونس بعض لكن مراتك لوحدها

نظر لها بتفهم وقال :

- حاضر والله شويه وماشي ، المهم أنا كنت جاي في موضوع كده

قالت بلهفه :

- خير يابني

إبتسم قائلا :

- كل خير إن شاء الله ، بس هي هند فين ؟

نادت عليها والدتها فخرجت هند بمرحها المعتاد وقالت :

- ياعم إرحمني بقي كل شويه ألاقك هنا

جذبها من يدها وأجلسها بجواره وقال بسعاده :

- أقعدي يا لمضه علشان عاوزك في موضوع مهم

قالت بحماس :

- إرغي

تنهد بطيبه وقال :

- العريس يا ستي اللي كلمني قبل كده ده كلمني تاني من شويه وقال لي إنه عاوز يتقدمك ، هاه أخليه  
بيجي ولا إيه النظام ؟ يعني صاحبك دي قالتك علي مواصفاته ولا إيه ؟ وكمان لو حابه تسألني عن  
حاجه قوليلي علشان لما أقابله أسأله  
إضطربت قليلا فلاحظ إسلام ذلك وقال بمرح :

- يا ستي إنتي هتعملي فيها مكسوفه ، إنجزي يا هند

إبتسمت قائله :

- ماشي خليه بيجي

- تحبي إمتي ؟



- عادي اللي يريحك

نظر لها بحماس وقال :

- خلاص أنا بكره هقابلة ولو طلع كويس كده هقوله يبجي يوم الخميس الجاي ، قشطه ؟

إبتسمت بإحراج وقالت :

- ماشي

وبالفعل إتفق إسلام مع خالد علي مقابلته في اليوم التالي ليتعرفا أكثر ، حضر إسلام بعد صلاة المغرب مباشرة إلي المكان المتفق عليه ، وقف أمام طاولة ٢٥ وإتصل بخالد قانلا :

- السلام عليكم يا أستاذ خالد ، أنا وصلت أهو إنت جيت ولا إيه ؟

- أنا داخل النادي خلاص أهو

- طيب تمام هتلاقيني قدام ترابيزه ٢٥ ولابس تيشيرت أخضر وبنطلون جينز

- تمام جاي حالا أهو

وصل خالد للمكان الذي يقف فيه إسلام ونظر له بتأفف وقال محدثا نفسه :

- إيه ده ؟ ده طلع شيخ !!

حاول إستعاده إبتسامته وحضر إليه قانلا بترحاب :

- إزيك يا أستاذ إسلام ؟

إبتسم إسلام عندما رأي هيئته الممتازة وقال بحماس :

- الحمد لله تمام ، إنت عامل إيه ؟

- كويس الحمد لله ، إتفضل إتفضل

جلس إسلام علي الطاولة وقال ببراءة :

- هند قالتلي إن قريبة حضرتك كانت زميلتها في ثانوي وهي اللي قالتك عليها ، بس معرفتش منها تفاصيل أكثر عن الموضوع يعني

إبتسم خالد بخبث وقال :

- مفيش داعي لحضرتك دي إحنا من سن بعض تقريبا ، وفعلا بنت بنت عم بابا تبقي زميلة الأستاذة هند من أيام ثانوي بس هما دلوقتي في السعوديه ، وهي قالتلي علي أخلاق الأستاذة هند وأدبها وأنا بصراحه شفتها مره في الجامعه وبعدين حببت أدخل البيت من بابہ علشان دي الأصول

إبتسم إسلام برضي وقال :

- جزاك الله خيرا يا خالد ، فعلا هي دي الأصول وإحنا بناتنا ما ينفعش يتدخلهم إلا من باب البيت

ثم بدأ إسلام يحدثه عن نفسه ووالده والدته وهند ، وكذلك فعل خالد ، شعر إسلام بالرضي تجاه مواصفات خالد كإمكانيات ومظهر وهكذا أشياء ولكنه لم يذكر أي شئ عن دينه ، حاول إسلام إستدراجه قليلا ولكن يبدو أن خالد يفهم جيدا ماذا يفعل ومتي يقول الكلمه ولمن ، ظل إسلام يحاول معه يمينا ويسارا ولكنه لم يخرج منه بأي شئ ، فكلامه كله يعبر عن شخص ذكي ، دبلوماسي ، يعرف جيدا ماذا يقول ، ظل إسلام يحدثه حتي أذنت العشاء فحاول أستخدام حيلته الأخيره .

فهل يا تري سينهض خالد للصلاة أم سيظل جالسا ؟

أذنت العشاء وإقتربت الإقامه وخالد مازال مستمرا في حديثه ، جلس إسلام معه لآخر لحظه قبل الإقامه ثم نهض من مكانه وقال مبتسما :

- الصلاة يا خالد ، نصلي ونرجع نكمل إن شاء الله

إبتسم خالد بذكاء وقال :

- يلا بينا ، أنا فعلا كنت هقولك حالا

---

إنتهت الصلاة وجلسا قليلا مع بعضهما البعض ثم عاد كل إلي بيته ، إتصل إسلام علي هند وأخبرها بأنه سيأتي لها فور عودته من العمل في اليوم التالي ليقص عليها ماحدث بينما عاد خالد إلي منزله وفتح حسابه علي موقع الفيس بوك وأرسل رسالة لهند وكان محتواها :

- بقي كده يا هند ماشي ، عامل نفسك ثقيل يا باشا أتاريك مضطرب كل حاجه ، عموما يا ستي أنا قولت لأخوكي إن البنت اللي انتي قولتيله عليها دي تبقي بنت بنت عم بابا ، وقولتله كمان إنها مسافره السعوديه علشان ميحصلش مشاكل في أي وقت ويسأل عنها ولا حاجه ، إحفظي كويس بقي علشان لو سألك هاه

وبعد كده متعملش نفسك ثقيله علشان إتفقتي خلاص ، يلا يا هند هنتقابل خلال الإسبوع ده بقي إن شاء الله ، مستني مكالمه أخوكي اللي فيها الميعاد بفارغ الصبر

ثم أغلق حاسبه ونظر للمرآه بانتصار وقال :

- وهتجوزك برضو يا هند ، مش أنا اللي بنت تغلبنى أبدا

وفي اليوم التالي عاد إسلام عن عمله علي منزل والدته كما وعد هند بالأمس ، دخل عليهما بكل حماس وجلس في منتصف الأريكة بجوار هند ووالدته وأخذ يقص عليهما ما حدث فقال بحماس :

- بصي يا ست هنود ، الولد كمظهر حلو جدااا الحمد لله ، يعني وسيم وشيك وذوق كمان ، ك مواصفات برضو كويس جداا يعني شغلانته كويسه وعنده شقه وكده ، ك دين بقي مش عارف ، يعني هو باين عليه كويس بس برضو معرفتش أطلع منه باللي أنا عايزه

ثم أردف قائلا :

- إحساسي بيقولي إنه مش ملتزم أوي يعني ، بس برضو محسيتش إنه مش محترم ، بصراحه غلبت معاه بس اللي إتأكدت منه إنه ذكي ومش بيوقع بسرعه وأنا بقلق من الناس دول

ثم إنتبه فجأة وقال علي الفور :

- اه صحيح في حاجه مهمه نسيت أقولها ، أنا ساعة صلاة العشاء فضلت مستني كتير لحد ما الإقامه تقريبا كانت هتبدأ وهو برضو مقاليش يلا نصلي وبصراحه الموضوع ده مش مطمئني ، أنا لازم أجوزك يا هند لواحد بيعرف ربنا وعلي الأقل محافظ علي فروضه

إبتسمت قائله :

- طيب ماهو يمكن كان مكسوف يقولك ولا حاجه ، علشان يعني إنت ملتحي وكده

تنهد بتفكير وقال :

- مش عارف ، بس برضو ده مش مبرر ، لكن الحق يتقال هو أول ما قولتله يلا نصلي قام علطول  
وقالي كنت لسه هقولك ، فأنا مش عارف بقي انا كده ظالمه ولا إيه

ثم نظر لها بحنان وقال :

- تحبي نعمل إيه ؟ نخليه يبجي وتشوفوا بعض وتصلي إستخاره وكده علشان منظموش ولا بلاش ؟

نظرت للأرض بإحراج وقالت :

- ماشي خليه يبجي ونشوف  
إبتسم قائلا :

- يوم الخميس كويس ؟

أومات برأسها إيجابا وصمتت بينما ضحك هو وقال :

- خلاص يا عم متعملش نفسك مكسوف كده ، هقوله يبجي يوم الخميس ولو مطلعش زي منا عاوز  
مش هوافق عليه

ثم نظر لها بحنان وقال :

- اوعي يا هند تفتكري إني كده بتدخل في حياتك !! أنا بس مسئول عنك ولازم أجوزك لواحد يشيلك  
في عينيه ، وبعدين لو أنا مأخدتش بالي من أختي الصغيره يعني مين هياخد باله !!؟

إبتسمت بسعاده وقالت :

- عارفه والله يا إسلام ، ربنا يخليك لينا

أحاطها ووالدته بذراعه وقال بمرح :

- ويخليكم ليا يا حلوين ، ونجيب سلمى والنونو بقي يقعدوا جنبنا ونفرح كلنا هيبويه

---

وفي المساء إتصل إسلام علي خالد وأخبره بأن المقابلة ستكون يوم الخميس القادم بعد صلاة المغرب  
مباشرة ، بينما جلست هند في نفس التوقيت علي حاسبها ورأت رسالة آتية من خالد بالأمس ولكنها  
لم تكن قد قرأتها بعد ، أخذت تقرأ كلمات الرسالة وعلامات الذهول والغضب تزداد علي وجهها مع  
مرور الوقت :

" بقي كده يا هند ماشي ، عامل نفسك ثقيل يا باشا أتاريك مظبط كل حاجه ، عموما يا ستي انا قولت لأخوكي إن البنت اللي انتي قولتيله عليها دي تبقي بنت بنت عم بابا ، وقولتله كمان إنها مسافره السعوديه علشان ميحصلش مشاكل في أي وقت ويسأل عنها ولا حاجه ، إحفظي كويس بقي علشان لو سألك هاه

وبعد كده متعملش نفسك ثقيله علشان إتفقتي خلاص ، يلا يا هند هنتقابل خلال الإِسبوع ده بقي إن شاء الله ، مستني مكالمه أخوكي اللي فيها الميعاد بفارغ الصبر "

ضربت هند الطاولة بقوه وقد كان الشرر يتطاير من عينيها ، لم تستطع الصمت أكثر من ذلك وأجابت بمنتهى الغضب :

- علي فكرة إنت متهميش في حاجه علشان أتقل ولا متقلش ، وحكاية صحبتي دي جات غصب عني ومقدرتش أفسر لإسلام بعدها ، ولو فاكّر إني متعوده أكذب علي أهلي تبقي غلطان يا أستاذ ، مش هند اللي تكذب علي أهلها علشان حاجه زي دي بس هي الكلمه طلعت لوحدها كده وخلص ، وبعد إذنك بقي إبعد عني وسبيني في حالي

ضحك خالد بسخريه عندما رأي الرسالة ثم كتب بلوم :

- حيلك حيلك يا ستي ، خلاص أنا أسف متزعلش أوي كده ، وبعدين ماينفعش أسيبك خلاص لأنني كلمت أخوكي دلوقتي أصلا وهاجيلكم يوم الخميس الجاي ، روقي بقي وامتزعلش مكنتش أقصد يا هنود

زفرت بضيق وأغلقت الرسالة ولم تجبه بينما نظر هو للمرآه وقال بخبث :

- حلوه مش بكذب علي أهلي دي يا ست هند ، ماشي ، بس برضو عجباني ومش هسببك

- بتعملي إيه يا سلمتي ؟

قالها إسلام عندما حضر إلي المطبخ الذي تقف فيه سلمي ، ضحكت بسخريه وقالت :

- سلمتك بتعمل المواعين ياخويا ، ماتيجي تغسلك طبقين كده ولا حاجه وأهو تساعد الغلبانه اللي واقفه دي

ضحك باستفزاز وقال :

- أنا أغسل مواعين ياي قرف

ألقت عليه بعض من الماء المتبقي في يدها وقالت بمرح :

- ياي قرف !! طب إمشي من قدامي يا إسلام بدل ما أعمل جريمه دلوقتي

ضحك قليلا ثم قال بجديه :

- بجد لو تعبانه أنا ممكن أعملهم مكاتك عادي

إبتسمت بطفوله وقالت بحماس :

- بجد يا إسلام ؟ بتعرف يعني ؟

رفع حاجبه وقال مستنكرا :

- ومعرفش ليه ياختي؟! ده حتي شوفي عندي صوابع زيك وأكبر كمان أهي

تنهدت بسعاده وقالت :

- خلاص بما إنك طلعت جدع كده أنا هعفيك من المواعين النهارده ، بس لما أتنفخ إنت اللي هتغسلها  
مكاني ماشي

- قشطه إتفجنا ، هل تريدين شيئا آخر يا سيدتي ؟

- توشكر يا حاج

تركها إسلام وغادر وفي خلال لحظات وجدته عائدا مره آخري فقالت بتعجب :

- إيه يا عم الحج ؟ إشتقت للمواعين ولا إيه ؟

أوما برأسه نفيا وقال :

- لأ بس العصر أذن

نظرت له بعدم فهم وقالت :

- ماشي منا عارفه ، وصلينا خلاص الحمد لله ، عاوز إيه بقي ؟

نظر لها بلوم وقال :

- الأذكار يا ست سلمي

- اوبس تصدق نسيت ، خلاص هخلص المواعين وهقوم أقولها علطول بإذن الله

إبتسم برضا وقال :

- لأ إستني هجيب ورقة الأذكار ونقولها سوا

وفي خلال لحظات عاد ومعه الورقة التي تحمل أذكار المساء وأسند كتفه علي حافة الباب وقال بحماس :

- يلا قولي ورايا

وفي يوم الخميس حضر خالد وأخيه الأكبر وجلسا مع إسلام وعمه بعض الوقت ليتعرف كل منهم علي الآخر ، بعد قليل خرجت هند وجلست في المقعد المقابل لخالد بينما تنحي إسلام وعمه وشقيق خالد جانبا بعض الشيء حتي يستطيعا التحدث مع بعضهما البعض ، نظرت هند للأرض ولم تتحدث بينما إبتسم خالد وقال هامسا :

- وأخيرا شوفتك يا مغلباني إنتي

شعرت بالإحراج وخافت أن يسمعها أحد فلم تجبه بينما ضحك هو وقال :

- خلاص خلاص هخليني مؤدب أهو عقبال ما تتعودي عليا ، المهم بقي إنتي عامله إيه ؟

قالت بخفوت :

- الحمد لله

قال بحماس :

- هاه يا ستي إديني جيت أهو ، وبما إنك عارفه عني كل حاجه فأنا كمان أحب أعرفك أكثر بقي ، يلا إعترفي بسرعه

إبتسمت قليلا وقالت :

- أعترف بإيه ؟

- إعترفي بكل حاجه بسرعه ، كلميني عن نفسك بتحبي إيه وبتكرهي إيه وبتعملي إيه في حياتك وأي حاجه تحبها بقي

أخذت هند تحدثه عن نفسها وهو يناقشها في بعض الأمور لبعض الوقت وأثناء حديثها رفعت رأسها بإتجاهه وشاهدته عن قرب لأول مره فأحست بالسعاده رغما عنها وشجعها ذلك علي مواصلة الحديث ، بعد قليل سمع أذان العشاء فنهض علي الفور وقال مبتسما :

- بعد إننكم يا جماعه هنزل أصلي وأجي تاني

ثم نظر لإسلام ببراءه مصطنعه وقال :

- ده لو مفيش مانع طبعاً يا أستاذ إسلام

نظر له شقيقه بتعجب بينما إبتسم إسلام بسعاده وقال :

- يلا هننزل كلنا إن شاء الله ونبقي نرجع تاني

إنتهي كل منهم من صلاته وعادوا معا إلي المنزل ، جلسوا قليلا ثم نهض شقيق خالد وإستاذن في الذهاب فغمز خالد لهند قبل أن يلحظه أحد وذهب علي الفور .

وفي الطريق قال شقيق خالد بتعجب :

- ومن إمتي بقي وإنت بتصلي الفرض بفرضه يا عم خالد

ضحك بسخريه وقال :

- يا عم ما إنت شايف أخوها شيخ وممكن يبوظلي الجوازه ، وبعدين أنا مش ناقص وجع دماغ فخليني أخده علي أد عقله وخلص

زفر بضيق وقال :

- بس إنت كده بتخدعهم حرام عليك

أشاح بيده غاضبا وقال :



- يابني أنا هتجوز البننت مش هتجوز أخوها ، وهي هتكون عارفه عني كل حاجه لكن أخوها ملوش دعوه بتصرفاتي بقي

قال بتأفف :

- وإنت بقي هتعرفها عنك كل حاجه فعلا

إبتسم بثقه وقال :

- أيوه هتعرفني كويس وبرضو هتحبني وهتشوف يا حسين ، وبعدين ده إنت مربيني يا أخي وعارف دماغي يعني !!

- هاه يا إسلام عملتوا إيه ؟

قالتها سلمي أثناء تبدل إسلام ملابسه ليرتدي ملابس النوم فقال بسعاده :

- عملنا كل خير يا سلمي الحمد لله

قالت بحماس :

- طيب إحكيلي بسرعه كل حاجه حصلت ، ومعلش والله لولا إني تعبانه كنت جيت معاك

جلس علي حافة الفراش وأجلسها بجواره وقال مبتسما :

- جه يا ستي هو وأخوه وقعدنا نتكلم شويه وبعدين هو قعد مع هند عند الترابيزه اللي في الصاله دي وقعدت أنا وعمي بقي نتكلم مع أخوه وكده

ثم نظر لها بأريحيه وقال :

- بس عارفه ؟ خالد ده عمل حته موقف عجبني جداااا بصراحه

إبتسمت بحماس وقالت :

- عمل إيه خير ؟

تنهد بفرحه وقال :

- أول ما العشاء أذنت قام بسرعه وقالنا انه هيروح يصلي ، يعني هو كده تقريبا باين عليه محترم ومواظب علي الصلاة ودي أهم حاجة ، شويه شويه بقي هحاول أعرف عنه أكثر بإذن الله

إبتسمت ببراءه وقالت :

- طيب وهد رأيا إيه ؟

- قالت هتفكر وتقولي ، معاها إسبوع بقي تصلي إستخاره وتفكر براحتها ، وربنا يقدم اللي فيه الخير إن شاء الله

- علي فكرة أنا موافق بقي ، مش هتقولي رأيك وتريحيني

أرسلها خالد بعد ثلاثة أيام من مقابلة هند فأجابت بإبتسامه :

- أنا مش قولتلك بلاش تبعت حاجة تاني .. علي الأقل قبل ما يكون في حاجة رسمي

- طيب يعني أعمل إيه في نفسي تاني علشان تصدقي إني عاوز أتجوزك بجد ، تقديم واتقدمت ، رؤيه شرعيه وعملت ، موافقه ووافقت ، أعملك إيه تاني بقي يا ست هند ؟

إبتسمت ولم تجبه بينما كتب هو :

- خلاص براحتك يا ستي بس عموما يعني مفيش حد هيكون بيلعب ويعمل ده كله ، وبعدين ده انا ٢٦ سنه يعني مش عيل علشان أضحك عليك والحوارات دي ، وكمان مش هتلاقي حد متمسك بيكي وبيحبك أدي ، بس برضو براحتك يا باشا أدينا مستنيين لآخر الإسبوع

ظلت تنظر للرسالة بسعاده ثم قالت في نفسها :

- يعني واحد بيحبك ومتمسك بيكي وكمان وسيم وجاهز من كله وكمان بيصلي ، هي الواحده هتحتاج إيه أكثر من كده بقي

ثم نظرت للجانب الآخر وقالت بحيره :

- بس ده كذب علي إسلام في موضوع قريبتة ده

تنهدت بضيق وقالت :

- طب ما إنتي كمان كدبتي يا ست هند ، يعني إنتوا الـ ٢ عملتوا نفس الغلطة

ثم نظرت للجانب الآخر مره آخري وقالت بتأفف :

- بس ده قالك بطلي تعملي ثقيله وإتفقتي وحاجات كده

دفتت رأسها بين كفيها وقالت بحيره :

- ياربى بقى مش عارفه ، بس عموما يعني هو باين عليه كويس وشاريني يبقي أرفضه ليه بقى  
!!؟

---

إتصل فاروق علي والد نهى ليخبره بآخر أخباره فقال بسعاده :

- السلام عليكم يا عمي

- وعليكم السلام ورحمة الله وبركاته ، إزيك يا فاروق

- الحمد لله يا عمي بخير والله ، حضرتك عامل إيه ونهى أخبارها إيه ؟

- الحمد لله يابني في أحسن حال

- كنت عاوز أقول لحضرتك إني راجع بعد إسبوعين إن شاء الله ، والحمد لله ربنا كرمني ورزقني بمكافئة حلوه كده وهحاول أتصرف في كام ألف معاها وأخلص الشقه اول ما أجي علطول بإذن الله

- ماشي يا فاروق أن شاء الله

- طيب بإذن الله نكتب الكتاب أول ما أرجع علطول ماشي ؟ بإعتبار إن الشقه قربت تخلص أهى

- ماشي يابني أنا معنديش مشكله ، خد كلم خطيبتك وشوف رأيها إيه

إبتسم فاروق بسعاده وقال :

- ماشي

حضرت نهى وأمسكت بالهاتف وقبل أن تجيب سمعها فاروق تقول بهمس :

- إستني يا بابا خليك هنا

أغض عينيه وقال لنفسه بكل صدق :

- هي دي حوريتي ، ياه يا نهي لو تعرفي صبرت أد إيه علشان أشوف اليوم ده ، حقيقي أنا فخور بيكي

إنتشلتة من تفكيره وهي تقول بهدوء :  
- السلام عليكم

أجابها علي الفور :

- و عليكم السلام ورحمة الله وبركاته

ثم قال بحماس :

- بصي بسرعة بسرعة كده علشان لازم أقفل دلوقتي علشان مش عارف بس برضو لازم أقفل ، كتب كتابنا هيكون بعد إسبوعين هاه ؟ موافقه صح ؟ طيب تمام جهزي نفسك بقي ، يلا سلام

ثم أخذ ينظر للهاتف وهو يضحك ويقول :

- معلى يا بنتي لو قفلت في وشك بس اعذريني بقي إحساس الهييج عندي عالي اليومين دول

ثم نظر للسماء عبر النافذه وقال :

- هانت ، كلها إسبوعين ، يارب تتملنا علي خير

- يلا يا إثم

قالتها سلمي في الصباح الباكر أثناء إرتدائها نقابها لتذهب لمدرستها لأول مره ، ضحك إسلام بمرح وقال :

- حاضر يا ست ام إسلام ، إلا ياختي سنتك القدامنيه راحت فين يا حبيبتي كفي الله الشر

نظر له باستنكار وقالت :

- قدامنيه !! طب والله منا راده

جذبها من يدها وقال بحماس :

- طيب يلا يامو العيال علشان هتتأخري علي مدرستك وهتأخر أنا كمان علي الشركه

ثم قال بتساؤل :

- هو صحيح إنتي هتروحي كل يوم ولا إيه النظام

أومات برأسها نفيا وقالت :

- اللي أعرفه إن المدرسين في الأجازة بيروحوا يوم أو إثنين بس في الإسبوع ، ومن أول شهر  
تسعه بقي بيروحوا بانتظام

تنهد بإبتسامه وقال :

- ماشي ، يا مسهل

وبالفعل ذهب معها لأول مره لمدرستها الجديده ، إستغرق الطريق ما بين الـ ٣٠ : ٤٠ دقيقه وإنتهي  
أخيرا علي خير ، هبطت سلمي من الحافله وقال لها إسلام بلهفه :  
- هاه تعبتي ولا حاجه ؟

إبتسمت برضا وقالت :

- لأ كويس الحمد لله ، يعني الطريق مستوي ومش متعب زي ما إنا كنت متخيله الحمد لله

أمسكها من يدها ودخل بها إلي المدرسه ، إطمئن عليها وذهب هو الآخر إلي عمله بعدما أخبرها أن  
تتصل عليه فور إنتهائها من عملها ليوصلها إلي المنزل مره آخري .

---

إنتهي الإسبوع المتفق عليه علي خير وحضر إسلام ليعرف رأي هند في الأمر ، بدأ حديثه بطيبه  
وقال :

- هاه يا هند قولتي إيه في موضوع العريس ده

نظرت له بتساؤل وقالت :

- إنت إيه رأيك فيه يا إسلام ؟

إعتدل في جلسته ونظر لها بجديه وقال :

- بصي بصراحه أنا شايف انه محترم وكويس وكمان لما سألت عليه في شغله لقيت صحابه بيشكروا فيه ومفيش بس إلا واحد اللي قالي إبعد عنه أفضل ليك ولأختك .

رغم إن كلام الراجل ده قلقتي لكن برضو لقيت إجماع علي إن هو كويس والكل بيحبه فقلت يمكن ده بيكرهه أو عامل معاه مشكله ولا حاجه ، كمان حتة إنه ملتزم فعلا دي لسه متأكدتش منها لكن اللي قدامي إنه لحد دلوقتي كويس .

ثم نظر لها وقال مؤكدا :

- علشان كده بقي قولت الإستخاره هي اللي هتحل الموضوع ، وبإذن الله برضو لو في نصيب هفضل وراه في الخطوبه وأحاول أكتشفه أكثر وأعرف طباعه ومستوي قربه من ربنا وكده

صمت قليلا ثم قال :

- بصي بصراحه أنا كنت حابب أجوزك لواحد أكون متأكد إنه ملتزم مليون في الميه مظهر وجوهر ، لكن برضو إفتكرت إني مشيت خطواتي واحده واحده فقولت بلاش أظلمه جايز هو كمان زيي زمان إبتسمت قليلا ثم قالت بحماس :

- خلاص أنا موافقه

نظر لها بحنان وقال :

- خلاص يعني أكيد ؟ صليتي إستخاره وفكرتي كويس ؟

أومات برأسها إيجابا وقالت :

- أيوه

ثم إنتبهت فجأة وقالت :

- لأ مصليتش إستخاره بس نا فكرت كويس وموافقه عليه يعني

نظر لها بلوم وقال :

- إسبوع كامل ولسه مصليتيش إستخاره يا هند !! ليه كده يا بنتي

- منا فكرت كويس خلاص وموافقه أهو ، ولو صليت إستخاره كنت هوافق برضو

تنهد بحزن وقال :

- لأ طبعاً يا هند ، عارفه لما تبقي بتصلي وإنتي بتقولي لربنا أنا معرفش مصلحتي فين وتوكلت عليك يارب لأنك الوحيد اللي عالم بالخير فين ، تبقي علي يقين إن ربنا هيختارك الصالح ، وتبقي مسلمه أمرك لله ، ساعتها بس تكوني مطمئنه لأن ربنا مش هيخذلك أبدا .

ثم نظر لها محذراً وقال :

- وطبعاً ما تدخلش هواكي في الموضوع ، يعني مش تلاقي حاجات وحشه عماله تظهرك في الطرف الثاني أو الموضوع مش متيسر وتقومي إنتي برضو تبقي مُصره تكلمي علشان علي مزاجك ، ساعتها بس يبقي إنتي اللي غلطانه .

صمت قليلاً ثم قال بجديه :

- أنا هعتذر لخالد وهقوله إنك محتاجه يومين كمان تفكري ، صلي إستخاره وإدعي من قلبك هاه

---

إستمعت هند لكلمات أخيها وقررت أن تؤدي صلاة الإستخاره كما قال لها ، وبالفعل صلت ودعت الله أن يختار لها الصالح ، وفي اليوم التالي جلست تفكر في الأمر بحيره وقالت لنفسها :

- قلبك مقبوض ليه يا ست هند ، هو ممكن يكون مش كويس فعلاً !!؟

تنهدت بضيق وقالت :

- طب وهو مش هيكون كويس ليه يعني !!؟ ما هو بيصلي وحلو أهو

نظرت للجانب الآخر وقالت بحزن :

- بس هو لو كويس مكانش أصلاً هيكلمك كده ، كان المفروض يعمل معاك زي ما إسلام عمل مع سلمى ويحافظ عليك من نفسه

وعلي الفور رفعت حاجبها وقالت بإعتراض :

- بس إسلام زودها مع سلمي أوي برضو ، يعني حتي خطيبته ومكانش عاوز يكلمها ولا يروحها  
ودايما مرعوب كده زي ما تكون هتاكله !!

زفرت بملل وقالت :

- طيب وبعدين بقى ، كمان كلامه معايا متساهل أوي وزى ما أكون اخته مش واحده غريبه  
صمتت قليلا وهي تتذكر كلماته ثم قالت بسعاده :

- طيب ماهو بيحبك يا هند وعاوز يتقدمك ودخل البيت من بابيه أهو ، خلاص بقى متكبريش  
الموضوع وبعدين ماهو إنتي كمان إتعلقتي بيه

إعتدت في جلستها ونظرت للمرآه بثقه وقالت :

- خلاص انا موافقه !

وبالفعل إتصلت علي إسلام وأخبرته بموافقتها ، بالطبع لم تخبره بحالة عدم الإرتياح التي تشعر بها  
ولم تخبره أيضا بمواقف خالد السينة وحديثه الخفي معها ، فمن الواضح أن رغبتها في الزواج منه  
كانت أقوى وجعلتها تتنازل عن كل شئ في سبيل الحصول علي لقب زوجة خالد الشريف .

---

عاد فاروق من سفره بعدما حصل علي مبلغ لا بأس به كمكافئة علي عمله في فرع شركتهم  
بالإسكندرية ، وعلي الفور ذهب لأحد أقربائه وقام بإقتراض المبلغ المتبقي وذهب به إلي والد نهى  
ليخبره بإمكانية الإنتهاء من تجهيز الشقة الآن .

وبعد طول إنتظار تم تحديد موعد كتب الكتاب ، حضر الجميع ولم يتأخر أحد ، جلس فاروق مع  
الرجال في المسجد بالأسفل بينما جلست نهى مع النساء في مصلي النساء بالأعلي .

لم يشعر فاروق بنفسه إلا عندما سمع المأذون يقول بأعلي صوته :

- بَارِكْ اللهُ لَكُمْ وَبَارِكْ عَلَيْكُمْ وَجَمْعَ بَيْنَكُمْ فِي خَيْرٍ

ظل ينظر حوله بدهشه ، هل هذا حلم أم حقيقه ؟ هل نهى أصبحت زوجته بالفعل بعد صبر كل هذه  
السنين ؟ هل أصبح بإمكانه الآن أن يخبرها بكل ما كان يكتمه طوال سنوات ؟ هل سيستطيع أن ينظر  
إليها وقتما شاء ويحدثها كيفما شاء ؟ مهلا مهلا .. هل هذا واقع بالفعل !!؟



انتشلته من تفكيره هذه الأصوات والمباركات الآتية من كل مكان ، شعر بإسلام وهو يحتضنه بشده ويبارك له علي هذا الزواج المبارك ، نظر لإسلام بتعجب وقال :

- إسلام هو ده حقيقي ؟ أنا إتجوزت نهى خلاص ؟ يعني هي دلوقتي بتاعتي أنا وبس ؟ يعني خلاص كده هتبقي معايا علطول ؟

ثم أمسكه من ذراعيه وأخذ يحركهما بشده وهو يقول :

- إسلام بجد بجد قولي إن ده حقيقه خلاص ، قولي إنت صبرت ونولت يا فاروق ، قولي إن تعب وصبر السنين خلاص راح ودلوقتي جات مكانه سعاده ورضا من ربنا علينا وكرم ، قولي أي حاجه يا إسلام

إحتضنه إسلام مره آخري وقال بمنتهي الحنان :

- هقولك علي حاجه أحسن ، أطلع يلا خد عروستك وإهرب بيها فأني حتة وقولها كل اللي إنت عاوزه

ثم دفعه بمرح وقال :

- يلا بسرعه ياعم إنت لسه واقف بدأ فاروق بإستيعاب الموقف ووجد والده ينظر لها بسعاده فإرتمي في أحضانه وقال بعدم تصديق :

- بابا نا إتجوزت خلاص

ضمه والده بشده وقال بحب :

- الف مبرووووك يا حبيبي ، الف مبرووووك يا أحسن ابن في الدنيا ، والله يا فاروق يعز عليا فراقك لكن دي سنة الحياة بقي

إبتسم فاروق والدموع في عينيه وقال :

- وأنا عمري ما هسيبكم أبدا يا بابا ، كل اللي أنا فيه ده بسبب دعائكم ليا أصلا ، ربنا يخليكم ليا

ثم ترك والده وذهب لوالد نهى وأحتضنه بحنان وقال :

- أوعدك يا عمي إنها هتكون في عينيا

ربت علي كتفه بحب وقال :

- وأنا متأكد من كده يا فاروق

ثم دفعه بخفه وقال :

- يلىا يابني إطلع خد مراتك من فوق

وعلي الفور تركه فاروق ذاهبا إلي مصلي النساء ، خرج من المسجد ثم توقف فجأة وقال بمرح :

- إنت رايح فين ياعم إنت كمان ، هتطلع مصلي النساء إزاي يعني !!؟

وقف يفكر للحظات ثم قرر الإتصال بنهي ليخبرها بانتظاره لها بالأسفل ، أجابت بخجل وقالت :

- السلام عليكم

أجابها علي الفور :

- وعليكم السلام ورحمة الله وبركاته

ثم صمت لحظة وقال بمرح :

- إستني إستني لما أظبط الأداء ، نشيل الصوت الرخم بتاع كل مره وننزل بالصوت الحونين بقي ،  
وعليكم السلام ورحمة الله وبركاته يا حلالي

إبتسمت ولم تتحدث بينما ضحك هو وقال :

- يا حيني إنتي إتكسفتي ، هو إنتي لسه شوفتي حاجه أصلا ، ده أنا معبي بقالي كتير ودلوقتي  
هنفجر بقي ، إنزلي بسرعه يلىا

قالت بخجل :

- أنزل ؟ طيب مش هتيجي تشوفني قبل ما ألبس النقاب ؟

تنهد بحنان وقال :

- إيه ده هو ينفع ؟

إبتسمت قائله :

- لو مش عايز بلاش ، بس أنا لو لبسته ونزلت مش هتعرف تشوفني النهارده تاني خالص ومتهيألي أصلاً إنت نسيت شكلي

أجابها علي الفور :

- لأ عايز طبعاً ده أنا مصدقت ، بس يعني مش هينفع أطلع علشان الستات اللي فوق دول

إبتسمت بإحراج وقالت :

- لأ ماهما هينزلوا كلهم وهيفضل مامتي ومامتك بس ، وبعدها بقي هلبس النقاب وأنزل معاك

تنهد بحماس وقال :

- هيبيح قشطه بقي ، يلا قوليلهم ينزلوا جري

وبالفعل هبطن جميعاً وتبقي فقط والدة نهي ووالدة فاروق ، سعد فاروق الدرج بحماس ووجد نهي واقفه أمامه بفستانها الزهري وحجابها القصير وتضع القليل من مستحضرات التجميل ، نظر لها فاروق بتعجب ممزوج بالسعادة وقال :

- إنتي مين ؟ أو يعني إنتي إزاي ؟ أو أي حاجه !!

إبتسمت بخجل وقالت :

- حلو كده ؟

ظل ينظر لها للحظات وقال بسعاده :

- طلعتي حلوه أكثر مما كنت أتخيل ، حقيقي عمري ما شوفت واحده بالجمال ده

عقدت ذراعيها أمام صدرها ورفعت حاجبها قائله :

- هنبداً فشر من أولها بقي

أوما برأسه نفياً وقال :

- حقيقي والله

ثم نظر لها بثقه وقال :

- بس عارفه ليه ؟ علشان ربنا محليكي في عيني أوووي وبجد شايفك أحلي واحده في الدنيا

نظرت له بتعجب ولم تفهم فابتسم قائلاً :

- عارفه لما يبقي إنسان طول عمره بيغض بصره عن بنات الناس خوفا من ربه ثم حفاظا عليهم من نفسه ، ساعتها بقي لازم يكون علي يقين إن ربنا هيكافنه أوووي وهيخلي مراته دي أحسن واحده في عينيه حتي لو شكلها عادي .

ثم نظر لها بحنان وقال :

- وده بالظبط اللي حصل معايا النهارده ، حقيقي حاسس إنني أول مره أشوفك

ثم أمسكها من يدها وقال بحماس :

- تعالي تعالي ده أنا هحكيلك حاجات ااد كده ، يا بنتي ده أنا مرتبط بيكي أصلا من قبل ما نتخطب

نظرت له بتعجب وقالت :

- يعني إيه !!؟

إبتسم قائلاً بحماس :

- تعالي وأنا هحكيلك كل حاجه

أفلتت ذراعها وتوقفت فجأة وقالت ضاحكه :

- يافاروق طب إستني هلبس طيب ، أكيد مش هينفع أنزل كده يعني

إنتبه هو الآخر وقال بتعجب :

- أيوه صحيح إنتي جيتي هنا إزاي باللبس ده ؟

ضحكت بثقه وقالت :

- عيب عليك ، الملحفة والنقاب جوا أهم وطبعا كنت لابسام فوق الفستان والطرحه

أشار بيده باتجاه عينيها وقال بضيق :

- طيب والألوان دي إيه موقعها من الإعراب ؟

نظرت للأرض بخجل لتوقع قلبه بينما قال هو بحزن :

- كنتي لابسه النقاب وعنيكي ملونه كده ؟ معقوله يا نهي !!

نظرت له بإستفزاز وقالت :

- طب وفيها إيه يعني يا فاروق ، هو حد شايف حاجه ؟ منا لابسه كله إسود في إسود أهو

زفر بغضب وقال :

- أيوه طبعا ممكن حد يشوف عنيكي وهي بالشكل ده ، مكنتش متخيل أبدا إنك تنسي حاجه زي كده  
يا نهي !!

أمسكت يده وأشارت بها إتجاهها وقالت بحنان :

- أنا تلميذتك يا فاروق ومش ممكن أبدا أنسي حاجه زي كده ، البيشه السوداء كانت علي عيني  
طبعا يا أستاذي ، ممكن بعد كده بقي متزعش تاني علشان كده عيب أصلا

ثم ضحكت بمرح وقالت :

- في راجل محترم يعطي صوته علي مراته ؟ وكمان أول يوم جواز ، أنا كده شكلي هغير رأيي بقي

تنهد بأريحيه وقال مازحا :

- يا ستي وهو أنا عليت صوتي فين بس ، ما أنا كيوت أهو

إبتسمت قائله :

- ماشي يا عم الكيوت إنزل بقي إستناني تحت وأنا هلبس الملحفة وآجي

إبتسم لها بحماس وقال :

- ماشي بس متأخرش ، وعلي فكره أنا كنت ناوي نخرج بره بس ممكن دلوقتي بقي نروح عندكم البيت لو حابه علشان تقعدني بالفستان يعني ، أصل بصراحه شكلك حلو فيه أووي

إبتسمت بخجل وقالت :

- ماشي نروح البيت ، يلا إنزل بقي

عاد إسلام إلي منزله والسعاده تملأ قلبه ، فتح الباب وإرتمي علي أول أريكه أمامه ونظر لسلمي بحماس وقال :

- كنت حاسس إنه كتب كتابي أنا النهارده ، حقيقي فاروق ده يستاهل كل خير ، لو تشوفي يا سلمي شكله بعد ما المأذون خلص ، تحسي إنه كان طائر من علي الأرض طير

تنهدت سلمي بسعاده وقالت :

- ونهي مراته دي أنا حبيتها أوووي ، بجد طيبه وبريئه كده ماشاء الله عليها ، ربنا يسعدهم ويرزقهم بالذريه الصالحه

إبتسم قائلاً :

- آمين يارب ٨٨

نهضت من مكانها وقالت بمرح :

- يلا بقي نتعشي يا عم الحاج علشان ننام بدري

ضحك وقال بصوت طفولي :

- أيوه علشان عندنا مدرسه الصبح

ضربته بمرح وقالت :

- لا يا ظريف علشان عندنا قيام ليل

ثم جذبته من يده قائله بحماس :

- يلا بقي جري ع المطبخ وأنا مستنياك أهو

عادت نهي إلي منزلها مع أسرتها وفاروق ، دخلت غرفتها وانتزعت نقابها وملحفثها وعدلت من هيئة فستانها وحجابها وخرجت علي الفور . تركهما والدها لأول مره وحدهما ، جلست أمام فاروق علي إستحياء وقالت :

- هاه بقي كنت عاوز تحكيلي إيه ؟

تنهد بسعاده وقال :

- كنت بقولك يا ستي إني مرتبط بيكي من قبل ما نتخطب ، من يمكن أكثر من خمس سنين كده ، لأ تقريبا عشره ، لالا ده من قبل ما أتولد كمان

ثم نظر لها بحنان وقال :

- من زمان أوي وأنا بشوفك وحسيت إني عاوز أكمل حياتي معاكي إنتي بالذات ، ساعتها قعدت أفكر كثير ولقيت إني مش هينفع أتقدمك إلا لما أكمل دراستي وأكون راجل وأد المسئوليه ، إتحمست أوووي وتعبت جامد في الكلية علشان أجيب تقدير وأقدر أشتغل وأعرف أجيك وأشرفك قدام أهلك

صمت قليلا ثم نظر لها بحب وقال :

- يمكن مش ده بس اللي تعبني ، اللي كان بيتعبني أكثر هو إزاي أحافظ عليكي من نفسي ، كنت دايمًا بشوفك قدامي وبسرعه أروح باصص في الأرض وأمد في مشيتي علشان الشيطان ميعرفش يوقعني في أي ذنب ، كنت دايمًا بسمع محمد الله يرحمه بيشكر فيكي من وقت اللتاني ويقول نهي شجعتني علي كذا وعملتلي كذا وكده ، يمكن مكانش بيكون قصده حاجه بس ساعتها كان بيبقي نفسي أقوله بطل تتكلم عنها قدامي بقي ، كان دايمًا عندي يقين إني علي أد ما هحفظ قلبي وهحافظ علي نفسي وعلي بنات الناس ربنا هيعوضني خير ، كنت متأكد إن ربنا هيرزقني بالزوجه الصالحه .

إبتسم لها وقال :

- مش لأن أنا شايف نفسي حاجه حلوه بقي وأستاهل زوجه صالحه ولكن علشان أنا متأكد إن ربنا كريم أووي ومش هيحرمني أبدا من حلمي في زوجه ورفيقه للجنه ، حقيقي يا نهي أنا فخور إني إتجوزتك

إمتلأت عيناها بالدموع وقالت :

- حقيقي يا فاروق أنا اللي فخوره بيك

ثم إبتسمت قائله بمرح :

- هتعلمني كل الحاجات اللي تعرفها بقي هاه ، وهتحفظني قرآن كمان ماشي ؟

تنهد بسعاده وقال :

- أنا عينيا ليكي ، هعلمك وهحفظك وهذاكرك كمان وبإذن الله تتخرجي السنادي بأحلي تقدير صمت قليلا ثم قال بكل صدق :

- أصلا أنا مصدقت

إبتسمت بخجل ولم تتحدث بينما قال هو بحماس :

- يلا بقي إنتي كمان كلميني عن نفسك وقوليلي علي اللي جواكي دلوقتي حالا

نظرت له بإبتسامه بريئه وقالت :

- يمكن إنت عارف إنني مكنتش ملتزمه زيك كده يعني ، بس كنت دايمًا عايشه علي الفطره ، يعني طول عمري مش بحب الأغاني ولا المسلسلات ولا الحاجات دي ، كمان مكنتش بقدر أمشي بلبس ضيق أبدا ولا ليا في كلام الولاد والحاجات دي خالص ، حتي لما دخلت الكليه الحمد لله فضلت في حالي ومحدث إتجرأ أصلا بيحي يكلمني ، كنت أنا ومحمد الله يرحمه أصحاب اوووي وبنشجع بعض علي حاجات خفيفه كده زي إننا نكون محترمين علطول ونحافظ علي نفسنا دايمًا وكده ، يمكن مكناش نعرف عن ديننا كتير وسعات كنت بقول لمحمد إننا نتفرج علي برامج سوا ونتعلم وكده لكن هو دايمًا كان مُصر يبدأ مع إسلام صاحبه ومش عاوز يسيبه أبدا لحد ما مات ...

صمتت قليلا ثم قالت بحزن :

- بعدها بقي بدأت أقرب من ربنا أنا كمان وأحاول أعرف عن ديني أكثر ، يمكن برضو لسه في حاجات كتير ناقصاني ومش عارفاها ..

ثم نظرت له بإبتسامه وقالت :

- بس لما إنت جيت وإتقدمتلي حسيت إن ربنا بيعوضني بيك ، بقيت بحاول أتقي ربنا فيك علي أد ما أقدر وبوافق علي كل حاجه بتقولها ، كنت دايمًا عارفه إنك عاوز تحافظ عليا وإنك بتخاف من ربنا قبل أي حاجه علشان كده كنت ببقي مبسوطه دايمًا بقراراتك ..



صمتت لحظات ثم ضحكت فجأة وقالت :

- حتي لما قفلت في وشي ساعة ما قولتلي علي كتب الكتاب برضو فرحت والله ، حسيت أد إيه إنت نعمه كبيره أووووي من ربنا وفعلا بتخاف منه وبتخشاه وبتدوس علي نفسك علشان تعمل الصح . دلوقتي يا فاروق أنا معاك أهو وبإذن الله عمري ما هسيبك وهنفضل سوا لحد ما نكمل حياتنا في الجنة ، إتفقنا ؟

تنفست بعمق وصمتت بينما صمت هو الآخر ، نظرت له بهدوء ثم قالت بدهشه :  
- إيه ده يا فاروق إنت دمعت !!؟

إبتسم بمرح وقال :

- هاتي منديل بقي بدل ما أغرق البدله دلوقتي ، حقيقي بقيت حاسس انه هيغمي عليا من الفرحة أصلا ، يــــاربي لك الحمد كما ينبغي لجلال وجهك وعظيم سلطانك

إبتسمت هي الأخرى وقالت :

- الحمد لله

صمت قليلا ثم تذكر فجأة وقال :

- صحيح متكلمناش عن الفرحة ، تحبي نعمله في أنهي قاعه ؟ ولا نروح عمره أفضل ، بصراحه أنا كان نفسي نطلع عمره سوا بس لو عاوزه فرح مفيش مشكله نعمل فرح ونطلع العمره لما ربنا يرزقنا

تنهدت بحماس وقالت :

- نطلع عمره

نظر لها بدهشه ممزوجه بالسعاده وقال :

- بتتكلمي بجد ؟

أومأت برأسها إيجابا وقالت :

- أيوه

تنهد بسعاده وقال :

- الله بقي ، خلاص يبقي نعمل زفه خفيفه كده ونطلع العمره بعد الجواز بشهر مثلا ، تمام ؟

- تمام جدا

وفي اليوم التالي إتصل إسلام علي خالد وأخبره بموافقة هند وتم تحديد موعد مقابلة الرجال للإتفاق علي المهر والشبكه وأشياء من هذا القبيل ، حضر خالد مع أهله وجلسوا مع إسلام وعمه وإتفقوا علي كل شئ ، غادر الجميع ودخل إسلام علي والدته وهند والإبتسامه تعلقو شفتيه وقال :

- خلصنا الحمد لله

قالت هند بلهفه :

- هاه إتفقتوا علي إيه ؟

إبتسم بسعاده وقال :

- هو قال إنه هيجيب كل حاجه وعاوزك بشنطة هدمك بس لكن إحنا قولنا لأ وفي الآخر إتفقتنا علي إنه هيجيب الاوض وإحنا هنجيب المطبخ والأجهزة الكهربائيه كلها

نظرت له هند بتعجب وقالت :

- طيب وفيها إيه لو جاب الحاجات كلها ؟ ده حتي هيوفرلنا يعني !!

إبتسم قانلا :

- بصي هو الصح أصلا إن الراجل يجيب كل حاجه طالما قادر ، لكن أنا مش عايزه يحس في أي وقت إننا فرحنا بيه علشان فلوسه ، وإحنا الحمد لله معانا يعني الفلوس اللي بابا سابها لك ولو إحتجتني أي حاجه تاني أنا هتصرف بإذن الله

- طيب وحددتوا ميعاد الخطوبه ؟

أوما برأسه إيجابا وقال :

- في الغالب هتكون الإسبوع الجاي إن شاء الله

- إن شاء الله

عاد إسلام إلي منزله ودخل غرفته بهدوء فوجد سلمي شاردة تماما ولم تشعر بحضوره ، تقدم بخفه وقال بحنان :

- مالك يا سلمي ؟  
إبتسمت ببراءة وقالت :

- مفيش ، أنا كويسه أهو

أوما برأسه نفيا وقال :

- لأ شكلك مش كويسه ولا حاجه ، مالك بجد ؟

تنهدت بتعب وقالت :

- حاسه إني مخنوقه شويه ، أو يمكن تعبانه ، مش عارفه بس يمكن لأن شهور الحمل الاولي دي بتكون صعبه شويه كده

جلس علي حافة الفراش وقال :

- تحبي نروح للدكتوراه ؟

أومات برأسها نفيا وقالت :

- لأ مش للدرجادي

صمت للحظات ثم قال :

- تحبي أقرالك قرآن ؟

ظهرت علامات البهجه علي وجهها وقالت بحماس :

- أيوه ياريت

إبتسم قائلا :

- طيب هغير هدومي وأجيك

وبالفعل ذهب لتبديل ملابسه وعاد علي الفور وفي يده مصحفه ، نظر لها بحنان وقال :

- تحبي نشغل الشيخ علي الموبايل ونسمع سوا ولا أقرالك أنا ؟

قالت علي الفور :

- لا إقرالي إنت

- بس صوتي مش هيكون حلو زي الشيخ يعني

إبتسمت بسعاده وقالت :

- بس أنا بحب القرآن بصوت جوزي بقي ومش عاوزه أسمع بصوت حد تاني

نظر لها بحنان وقال :

- طيب تحبي أقرالك سورة إيه ؟

- مريم

- ماشي

وبدأ إسلام في الترتيل بصوته الذي تعشقه سلمي ، ظلت تنظر له وهو يقرأ وإبتسامتها تتسع أكثر وأكثر حتي إنتهي فقالت علي الفور :

- ويوسف كمان

ضحك بمرح وقال :

- حاضر

وبدأ في قراءة سورة يوسف وهو ينظر لسلمي بين الحين والآخر ، شعرت بالراحة والطمأنينه بعدما سمعت تلك الآيات ، إنتهي من القراءة ونظر له بإبتسامه وقال :

- إرتحتي شويه كده ؟

أومات برأسها إيجابا وقالت بحماس :

- الكهف بقي كمان

إبتسم قائلا :

- حاضر يا ستي

وبدأ يقرأ آيات سورة الكهف حتي إنتهي منها فقالت سلمي علي الفور :

- البقره بقي

رفع حاجبه بمرح وقال :

- البقره ؟

أجابت ببراءه :

- أيوه

أمسك يدها ووضع فيها المصحف وقال بحماس :

- أقربلي إنتي بقي علشان نعست وحابب أنام علي صوتك ، البقره هاه

---

شعرت هند بالراحه بعدما علمت بجديه خالد لذلك صدقته ووثقت به تمام الثقه ، عادت لتحدثه مرة أخرى علي الفيس بوك لتتعرف عليه أكثر كما أقنعها هو بذلك ، أحببت كلماته وتعلقت به أكثر وأخذت تحدثه كل يوم من دون أن يعلم أحد بتلك المحادثات ، فقد كانت تشعر بالراحه لأنها تحدث خطيبها وليس شخص آخر ، فيبدو أنها لا تعرف أن هذا الشخص أمام الله كأي رجل آخر لا يفرق عنه شيئا ، فهو مازال أجنبي عنها ولا يجب أن تحدثه هكذا .

مرت الفترة المتفق عليها وجاء يوم خطوبة هند ، حضر خالد مع عائلته لمنزل والد إسلام ، كانت الجلسة عائليه جدا يحضرها القليل من الأصدقاء المقربين ، جلس خالد علي الكرسي المجاور لهند في منتصف الصاله وجلس الجميع بجوارهما من اليمين واليسار ، شعر خالد بالإستياء من الأجواء المحيطه به فقد كان يتوقع الأمر مختلف تماما ، فهو محاط بالجميع والكل ينظر له ووجد نفسه لا يستطيع التحدث بحريه كما كان يتوقع ، صمت قليلا ثم نظر لهند وقال هامسا :

- إيه الحاجات الغريبه اللي أخوكي مشغلها دي؟! أنا حاسس إنني قاعد في ميتم !

إبتلعت هند ريقها وقالت بإحراج :

- إسلام أصر إننا نشغل الأناشيد دي علشان عاوزنا نبدأ حياتها صح من الأول ومش عاوزنا ناخذ ذنوب يعني

زفر بملل وقال :

- ذنوب إيه وبتاع إيه هو أنا بقولكم هاتوا حد يرقص ولا يشرب خمره؟! دي أغاني عادي يعني مفيهاش حاجه

- خلاص معلى يا خالد مش مشكله يعني ، وبعدين لو ركزت في كلماتها هتجيبك علي فكره

نظر لها بتعجب وقال بضيق :

- أركز في كلماتها كمان ، وماله ما هو ده اللي ناقص

صمتت هند بينما ظل هو ينظر حوله بملل ولم يتحدث ، بعد قليل حضرت والدته وفي يدها علبة الذهب ، فتحتها أمامه بتلقائية وأمسك هو بأول خاتم وهم أن يمسك يد هند ليلبسها إياه ولكنه وجد إسلام أمامه يمنعه وهو يقول بضيق :

- إنت بتعمل إيه ؟ مش هينفع تلبسها يا خالد ، شوف واحده من البنات تلبسها بدالك

نظر له بتعجب وقال :

- طيب وملبسهاش ليه يعني ؟ هي مش خطيبتي ولا إيه ؟

حاول الإبتسام وقال :

- اه خطيبتك مقولناش حاجه ، بس برضو لسه أجنيبه عنك وما ينفعش تمسك إيديها أصلا

ضحك خالد بسخريه وقال في نفسه :

- أجنيبه عني ؟ إيه الملل بتاعه ده كمان !!

ثم إصطنع الإبتسامه وقال :

- ماشي هخلي والدتي تلبسها

إبتعد إسلام وجلس مكانه في ضيق بينما حضرت الأم وقامت بتلبيس الذهب لهند وظل خالد ينظر بين الحين والآخر لإسلام بإستنكار وغضب ، بعدما يقرب من الربع ساعة حاول خالد إستعادة إبتسامته والتأقلم مع الجو المحيط به ، تم توزيع العصائر والحلويات علي العروسين والمدعوين فنظر خالد لهند بحماس وقال :

- يلا قومي

تعجبت قائله :

- أقوم فين ؟

قال بتلقائييه :

- إيه مش هناكل بعض ونتصور وكده

إتسعت عينا هند وقالت علي الفور :

- لأ طبعا مفيش عندنا الكلام ده ، نأكل بعض إيه إنت بتهرج ؟

رفع حاجبه قائلا بضيق :

- إيه ده هو إنتي كمان معقده زي أخوكي ولا إيه ؟ كل الناس بتعمل كده يا هند عادي يعني ؟

أومات برأسها نفيا وقالت :

- لأ طبعا ما ينفعش ، ده إسلام يموتني

زفر بملل وقال :

- أنا زهقت من أخوكي ده علي فكره ، هو كل حاجه عنده لأ كده !! أومال هو بيعمل إيه في حياته مش فاهم يعني !!؟

إبتسمت قائله :

- والله إسلام ده مفيش منه أصلا ، رغم إنه ساعات بيعقدها كده بس برضو والله أجدع راجل في الدنيا  
وبجبهه جداداً!!!!!! ومش بيخليني محتاجه حاجه خالص الحمد لله

نظر لها بإستنكار وقال :

- ماشي براحتك ، أخوكي طبعا ولازم تحبيه !

وبعد ساعه إنتهي الحفل الصغير وعاد الجميع إلي منزله إلا خالد ، فقد تبقي ليسهر مع خطيبته كعادة  
الناس في زماننا هذا ، جلس بتفاؤل وراحه بعدها غادر الجميع ولكنه فوجئ بإسلام يجلس علي  
الأريكة التي تبعد عنهم بقليل ويلعب في هاتفه ، صمت قليلا حتي يغادر إسلام هو الآخر ولكنه وجدته  
لم يتحرك ، ظل ينظر إليه بين الحين والآخر بعدم فهم ثم قال لهند بصوت خفيض :

- هو أخوكي هيفضل قاعدلنا كده كتير ؟

قالت ببراءه :

- أيوه هيفضل قاعد طبعا

رفع حاجبه قائلا بضيق :

- هيفضل لحد إمتي بقي ؟

إبتسمت قائله :

- علطول

نظر لها بتعجب وقال :

- طيب ما أنا عاوز أتكلم معاكي

أجابت علي الفور :

- طب ما تتكلم !!

زفر بملل وقال :



- مش هينفع أتكلم براحتي وهو قاعد طول الوقت كده !! أومال أنا خطبتك ليه يا هند ؟!! ده أنا بتكلم معاكي علي الفيس براحتي أكثر من كده !!

نظرت له بغضب وقالت هامسه :

- وطي صوتك طيب ، إسلام قالي إنه لازم يكون قاعد علطول كده ومش هينفع يسبينا لوحدنا لأنه قاري كده في الدين ، وبعدين أنا كلمتك علي الفيس علشان متزعش بس لسه متكلمتش مع إسلام في الموضوع ده ، إستنيت لما نتخطب علشان أقوله .

تنهد بضيق وقال :

- يعني هي دي دماغ أخوكي ؟ طيب خلاص أنا هتصرف

ثم إبتسم فجأة وقال بصوت مرتفع :

- إلا صحيح يا إسلام متعرفناش كويس بقي ، يعني كلمني عن شركتك وشغلك وكده علشان أنا بحب الكلام في البيزنس أوووي

إبتسم إسلام بسعاده وإقترب من خالد وأخذ يحدثه عن نفسه وعن شغله وحياته وهكذا ، وفي وسط الكلام قال خالد ببراءه مصطنعه :

- علي فكره أنا مكنتش همسك إيد إختك طبعا ، ده كان مجرد إختبار بس إنت بوظتهولي بقي الله يسامحك

إبتهج وجه إسلام وقال بسعاده :

- ياراجل خضتني حرام عليك ، وأنا برضو إستغربت إنك إزاي محترم يعني وعارف ربنا ومش عارف إنك ما ينفعش تمسك إيديها قبل كتب الكتاب

إبتسم خالد بمكر وقال :

- أيوه طبعا يا شيخ منا عارف

ضحك إسلام بعدما شعر بالراحه وقال :

- أنا كمان عملت كده يوم خطوبتي علي فكره

ثم أخذ يقص علي خالد كيف تمت خطبته والضوابط التي أخذها وكيف كان عرسه وهكذا ، إنتهي من حديثه فإستأذن خالد وغادر علي الفور ، إرتمي إسلام علي الأريكة وقال بسعاده :

- لما كان هيمسك إيدك كنت هتشل وبجد كنت هعيد حساباتي في الموضوع ده ، بس لما وضحتي إرتحت الحمد لله .  
ثم نظر لهند بجديه وقال :

- بصي يا هند عاوزك تركزي أووي في تصرفاته وأي حاجة تحسي إنها مش عاجباكي قوليلي عطلول ، أنا لسه مقتنعتش بيه ١٠٠% يعني بس لما قولتيلي إنك صليتني إستخاره ومرتاحه الحمد لله قلت خلاص نتم الموضوع بقي لأن ربنا وحده هو اللي عالم الخير فين

إبتلعت هند ريقها بتوتر وقالت :

- اه طبعا

نظر لها بحنان وقال :

- يلا بقي هسيبكم أنا وأروح علشان تنامي براحتك لأنك أكيد تعبتي وسلمي كمان يا عيني تعبت جداااااا ، وبإذن الله بكره هجيك وأكلمك عن ضوابط الخطوبه بقي وأقولك تعملي إيه ومتعمليش إيه وكده ، وإنتي كمان إبقي إقرأي في الموضوع ياهند ماشي ؟ ربنا يرضي عنك ويحفظك من كل سوء

إبتسمت هند بوجع وقالت :

- يارب

---

وفي اليوم التالي عاد إسلام من عمله فوجد هند عنده في المنزل ، صافحها بحراره وقال بسعاده :

- هنود منوره الشقه والله

ضحكت قائله :

- ماما راحت عند خالتو وإنت عارف بقي لما بتروح مش بترجع إلا علي آخر اليوم فقولت خلاص أوصلها وأجي أقعد معاكم شويه بقي ، وبعدين أصلا إنت كنت جاي النهارده فقولت أجيك أنا أسهل

إبتسم بأريحيه وقال :

- والله فيكي الخير يا هند ، أنا فعلا جاي النهارده تعبان من الشغل وكمان عندي مصلحة هعملها لواحد صاحبي كده بعد المغرب ، كويس إنك جيتي علشان أقولك الكلمتين اللي عاوزهم وأوصلك وأرجع تاني  
قالت بحماس :

- قول يا باشا ، كلي أذان صاغيه

إنتشل وساده من علي الأريكة وضربها بمرح وقال :

- يا شيخه إتقي الله ، طب لما أكل الأول وأستريح كده نبقي نقعد نرغي ، بت فظيعة صحيح

نظرت له بإستنكار وقالت :

- ياعم مش إنت اللي قولت عاوز تتكلم !!

ثم دفعته للداخل بمرح وقالت :

- روح كُـل يا إسلام رووووح

وبالفعل إنتهي إسلام من تناول غدائه وجلس علي الأريكة بجوار سلمى وهند وقال بحماس :

- بصي يا هنود الموضوع بسيط جدا ، كل الحكاية إنك مطلوب منك تحافظي علي نفسك أوووي في فترة الخطوبه دي

ثم نظر لها بحزن وقال :

- للأسف في ناس كتير بيكونوا كويسين جداااا بس أول ما بيتخطبوا الشيطان بيعرف يضحك عليهم ويوقعهم في الحرام علشان كده لازم ندوس علي نفسنا أوي ونمشي علي الضوابط بتاع الخطوبه دي علشان نخرج منها بدون ذنوب

صمت قليلا ثم إبتسم قانلا :

- بصي يا ستي مبدأيا كده إنتي لازم تحطي في دماغك إن خالد ده زيه زي أي راجل غريب ، يعني مفيش حاجة إسمها خطيبي ومعرفش إيه؟! لا هو خطيبك اه بس برضو في الأول وفي الآخر راجل غريب ، علشان كده طبعا لما يبجي عندنا لازم أنا أكون قاعد معاكم علطول لان الخلوه لا تجوز ، كمان الكلام في التليفون يكون علي قدر الحاجه بس ، يعني مثلا لو حابه تسألني عن حاجه معينه أو

تعرفي حاجه وكده ويكون قدامي ولو أنا مش موجود يبقي قدام ماما وبسرعه بسرعه تخلصي كلامك  
وتقفلني مش عاوزين رغي هاه

نظرت له بتعجب وقالت :

- حتي الكلام في التليفون كمان ممنوع يا إسلام ؟ طب ليه !!؟

تنهد بحنان وقال :

- حفاظا عليكي والله يا هند ، أي كلام مع خطيبك لو زاد عن الضروره ممكن يتطرق إلي حاجات تانيه  
حرام لان غالبا أي إثنين مخطوبين بيكون بينهم مشاعر وبالتالي صعب يتحكموا فيها لو محطوش  
الضوابط دي ، وعلي فكره متقوليش ما إحنا محترمين ومعرفش إيه ، حتي المحترمين برضو لو  
سابوا الموضوع مفتوح كده ومن غير ضوابط الشيطان بيعرف يدخلهم عادي جداا ويوقعهم في  
الحرام

ثم إبتسم لها وقال :

- وعلي فكره الكلام ده عن تجربه ، ناس كتير جدا بدأوا في خطوبتهم بالتساهل وبعد كده وصلوا  
لمرحله إنهم بجد بقوا بيكرهوا حياتهم وحاسين دايمًا إن ربنا غضبان عليهم وسعات كتير مش  
بيعرفوا يناموا أصلا بسبب تأنيب الضمير ، علشان كده يا هند خدي بالك من نفسك أووي وما  
تفتحيش علي نفسك باب مش هتعرفي تقفليه تاني ، ماشي يا هند ؟

نظرت له بعدم إقتناع وقالت :

- طب والفيس ؟

أجاب بتلقائيه :

- نفس نظام التليفون برضو ، للضروره بس يا هنود

قالت بتفكير :

- طيب

ثم أخذ يتبادل معها ومع سلمى أطراف الحديث حتي سمع آذان المغرب فنهض علي الفور وقال :  
- هروح أصلي يا هند ولما أرجع هوصلك ماشي ؟

إبتسمت قائله :

- طيب تمام  
غادر إسلام ونهضت سلمي من مكانها هي الآخري وذهبت لتتوضأ ، أخذت هند تفكر في الأمر بحيره ، فلقد شعرت أن إسلام بالغ في الأمر بشده ، فهي تعرف نفسها جيدا وتتق بخالد أيضا فلماذا لا يتبادلا معا أطراف الحديث طالما كل منهما يعرف حدوده جيدا !!؟

إنتشلتها من تفكيرها سلمي عندما نادى عليها وقالت بحماس :

- يلا أنا خلصت يا هند

نظرت لها هند بتعجب وقالت :

- أيلافين ؟

إبتسمت بتلقائيه وقالت :

- يلا يا بنتي هنصلي

- هصلي لما أروح بقي يا سلمي علشان مش لسه هقلع الطرحه وبتاع

جذبته من يدها بحماس وقالت بمرح :

- يأما تقلعي الطرحه وتتوضي ونصلي سوا يأما هلسوعك ، أنا قولت أهو

إبتسمت بإستسلام وقالت :

- ماشي يا ستي يلا بينا

إنتهت سلمي من صلاتها مع هند وهمت بالنهوض ولكنها كادت أن تسقط فجأة فأسندتها هند بخوف بينما ضحكت سلمي وقالت :

- كنت هتدلق دلوقتي والواد ابن أخوكي هيتفحص ، الحمد لله ربنا ستر

ضحكت هند رغما عنها وقالت :

- يا بنتي حرام عليكي قصري ديل الإسدال شويه بدل ما تموتي الواد المره الجايه

إرتمت سلمى علي الكرسي المجاور لها وقالت بمرح :  
- يا ذكّيه أنا جايبه الإسدال طويل بمزاجي

نظرت لها هند بعدم فهم بينما أردفت سلمى قائله :

- من ساعة ما عرفت إن جمهور العلماء قالوا إن البنّت المفروض تغطي رجلها في الصلاة وأنا بقي بدوس علي طرف الإسدال كده وأنا واقفه علشان رجلي تتغطي وفي نفس الوقت محتاجش ألبس الشراب يعني كل شويه

ثم غمزت لها وقالت بحماس :

- يا أفكارك يا حجه سلمى

ضحكت هند وقالت :

- صدق اللي قال عليكي أروبه بجد ، حبيكي أنا يا سلمى والله

إحتضنتها سلمى بسعاده وقالت :

- وأنا كمان حبيكي أووووي بقي ، وحب أخوكي الطويل ده أووووي أووووي

---

إنتهي فاروق من وضع لمساته الأخيره علي شقته وإتفق مع نهي علي كل شئ بخصوص الزفاف وأيضاً قام بحجز تذاكر السفر للعمره علي أن تكون بعد شهر من زواجهما .

بينما جلست هند تفكر كثيرا في كلام إسلام واقتنعت بأنه ضغط عليها أكثر من اللازم لذلك قررت أن تتحدث دائما مع خالد ولكن بكلام " عادي " كما يقال ...

---

وبعد ثلاثة أيام عاد إسلام من المسجد بعد أداء صلاة العشاء مباشرة ، دخل منزله بهدوء ولكنه سرعان مع سمع صوت شهقات سلمى فحضر إليها علي الفور وقال بخوف :

- سلمى في إيه !!؟

نظرت إليه وقد إحمرت عيناها من كثرة الدموع وأشارت إلي التلفاز قائله بألم :



- إسلام .. أنا هتبرعلها بأول مرتب ليا كله ومش هاخذ منه جنيه واحد وبعد إنك متعارضش القرار ده ، مش عاوزه يحصل أي حاجة تخلي الشيطان يلعب في دماغي ويخليني أتراجع ، أنا قولت كلمتي ومش هرجع فيها بإذن الله وثواب الفلوس دي عندي أحسن مليون مره من أي حاجة حلوه كنت هجيبها بالمرتب ..

إبتسم إسلام قائلا :

- إنتي بتتكلمي بجد ؟

أومات برأسها إيجابا وقالت بصرامه :

- أيوه بجد ، عارفه إن لو حد سمع الكلام ده هيقول مجنونه أو كدابه أو معرفش إيه ، بس أنا يا إسلام هبقي أم وممكن في أي وقت لاقدر الله يحصل ماس كهربائي في البيت وابني برضو يحصله كده ، ساعتها هيكون إيه شعوري وأنا شايفه كل الناس حواليا بيصرفوا فلوسهم في كلام فاضي وأنا بموت كل لحظه وأنا شايفه إبنى بالمنظر ده ومحدش عاوز يساعدي ؟ حقيقي يا إسلام إحنا بقينا وحشين اوووي ومش بنحس ببعض ، بس أنا بقي مش هسمح بكده وهرجع لفطرتي النقيه اللي ربنا خلقتي عليها ، هرجع أحس بالناس دايمًا وأحط نفسي مكانهم ومش مشكله لو ضغطت علي نفسي شويه علشان سعادة اللي حواليا ، لأن أصلا فرحتنا بالفلوس عمرها ما هتكون أد فرحتنا لما نساعد حد ونشوف حد بيدعيننا ..

نظر لها إسلام بفخر وقال :

- وأنا معاكي يا سلمى

إتسعت عيناها وقالت بذهول :

- هتتبرع بمرتبك كله ليها ؟

إبتسم ببراءه وقال :

- مش هقدر أتبرع بيه كله علشان عندي إيجار ومصاريف بيت والتزامات تانيه ، لكن أوعدك إنى أول ما أقبض بعد كام يوم هديكي مبلغ معين ليها ، وكمان ممكن نروح مع بعض كل شهر البنك ونتبرع للمؤسسه دي وربنا يجعله في ميزان حسناتنا بإذن الله وكمان لازم نحط في بالنا كلام الرسول صلى الله عليه وسلم " ما نقص مال عبد من صدقة " رواه الترمذي ، يعني الموضوع مش محتاج إننا نفكر فيه كتير ، خليه علي الله ، وحتى لو هنقضيهها بحاجات بسيطه طول الشهر برضو هنحس بالرضا والفرحه باللي عملناه .



ثم نظر لها بحماس وقال :

- شجعتيني يا سلمي الله يرضي عنك ، إحم قصدي يا رفيقتي إلي الجنه

وفي المساء دخلت هند غرفتها وأغلقت الباب وبدأت تحدث خالد كالعاده لتتعرف عليه وتقترب منه أكثر ، وفي وسط الحوار سألته بتلقائيه :

- صحيح يا خالد إنت مقولتليش إنت بتحب ألوان إيه ؟

إبتسم بمكر وقال :

- ليه بقي ؟

قالت ببراءه :

- عادي يعني عاوزه أعرف !!

ضحك بخبث وقال :

- بحب الإسود جداااااااا ، عاوزك تجيبي كل حاجة في البيت سودا بقي هاه ؟ فاهماني طبعاً

قطبت حاجبها وشعرت بالضيق من لهجته الغير مريحه بينما ضحك هو بشده وقال :

- خلاص يا حبيبي ما تتكسفش أوي كده ، أنا أسف يا ستي

إنتفضت من مكانها بزعر وصرخت به قائله :

- خالد إيه اللي إنت بتقوله ده ؟ إحنا إتفقنا كلامنا كله يكون محترم علشان نتعرف بس ، حبيبتي وحشتيني والحاجات دي لأ طبعاً

تحسس شعره بسخريه ثم قال ببراءه مصطنعه :

- يا هنود ده أنا خطيبك ، هو أنا حد غريب يعني ؟ وبعدين لو أنا مقولتتش لخطيبتي اللي جوايا هقول لمين بس ؟

زفرت بضيق وقالت :

- وبرضو متقولش هنود دي ، حرام عليك يا خالد أنا مش عاوزه أعمل حاجه غلط ومن ورا أهلي ، قولنا كلامنا يكون محترم يأما بلاش

نظر للمرآه بمكر وقال :

- خلاص حاضر هحاول ، إحم بس موعديش يعني ، عموما متقلقيش شويه كده وهتاخدي عليا ومش هتتكسفي مني تاني

ضربت الأرض بقوه وقالت بمنتهي الغضب :

- خالد والله العظيم هقفل

إبتسم قائلا :

- خلاص بقي يا هنود متزعليش كده !!

ضغطت علي زر الإغلاق بعصبيه وقالت :

- أستغفر الله العظيم يارب ، وبعدين بقي فيك إنت كمان ، وكلامك ده من حقك فعلا ولا أنا اللي معقداها ولا إسلام اللي صح ولا إيــــه بقــــي !!!

أقلت الهاتف علي الفراش وظلت ما يقرب من الربع ساعه تفرك في يدها بعصبيه ويدور في داخلها صراع بين كلام خالد وكلام إسلام ورأيها المختلف عنهما ، تذكرت فاطمه فجأة وتذكرت أنها مخطوبه هي الأخرى فقررت الإتصال بها لتسأل عن أحوالها مع خطيبها وكيف تدور الأمور بينهما ، إتصلت بضيق وقالت :

- الو ، قصدي السلام عليكم

ضحكت فاطمه وقالت :

- وعليكم السلام يا ستي ، والله وإتعديتي من سلمى يا ست هند

- فاطمه معلش مش فايقه للهزار دلوقتي ، أنا بس عاوزه أسألك علي حاجه مهمه

- قول يا باشا

تنهدت هند بحيره وقالت :

- هو عادي لما حد يقول لخطيبته بحبك وكده

ضحكت بسخريه وقالت :

- نعم ياختي؟! أومال عاوزاه يقولها إيه يعني؟

قالت بتأفف :

- يا بنتي إخلصي ، ده عادي ولا غلط ولا إيه ؟ علشان خطيبي قالهالي النهارده وأنا قفلت في وشه

شهقت فاطمه بذهول وقالت مستكره :

- قفلتي في وشه علشان قالك إنه بيحبك ؟ إنتي هتشتغلي في النكد بتاع الستات ده من أولها؟!!

صرخت هند بغضب وقالت :

- يا فاطمه متعصبينيش زياده عن كده ، قوليلي عادي ولا إيه علشان أنا إتضايقت بجد ، يعني إنتي وخطيبك ممكن تقولوا الحاجات دي ؟

ضحكت لفته طويله حتي أغضبت هند أكثر ثم قالت :

- هههههههاي حاجات دي؟! يا بنتي ده الطبيعي في الخطوبه أصلا ، أومال لو الواحد مخرجش وإتفسح وطلع اللي جواه كله في الخطوبه هيطلعها إمتي يعني ؟

أجابت ببراءه :

- بعد الجواز

قالت بإستنكار :

- بعد الجواز؟! إنتي شكلك عايشه في العصر الجاهلي ، مفيش الكلام ده دلوقتي ياما ، الخطوبه دي فرصه ياما تعيشي فيها أجمل أيام حياتك ياما تنسي خالص السعاده والمفاجئات والحاجات دي

صمتت لحظه ثم قالت :

- طيب أحكيك علي حاجه حصلت لواحد صحبتي بخصوص الموضوع ده ؟

- ياريت

إبتسمت قائله :

- بصي يا ستي كان عندي واحده صحبتي اسمها سندس ، البنت دي فضلت مخطوبه حوالي سنه ونص ويأختي جاتلي مره بتقولي ده خطيبي محترم ومتدين وعمره حتي ما قالي بحبك ولا الكلام ده .

روحت أنا ساعتها طبعاً مصدقتهاش ، إزاي يعني سنه ونص وعمره ما قالها بحبك ، بس هي لما حلفتلي بقي إن ده حقيقه صعبت عليا وفضلت وراها لحد ما فسخت من الواد ده ، آل ودلوقتي زعلانه عليه وبتقول عمرها ما هتلاقي زيه تاني ، بنات آخر زمن !!

صرخت هند بزعر وقالت :

- حرام عليكي يا فاطمه خلتيها تفسح منه ليه !!؟

أجابت بثقه :

- يا بنتي ده واحد بخيل ، دي كانت بتقولي إنهم عمرهم ما خرجوا سوا يبقي بخيل طبعاً ، حتي مشاعره كمان بخيل فيها !!؟ أعوذ بالله يا شيخه

قالت هند بتعجب :

- بخيل في مشاعره ؟ هو في حاجه اسمها كده !!؟

قالت مؤكده :

- أيوه طبعاً يا بنتي ، إذا ماكانتش الواحده مننا تتأكد من حب خطيبها ليها دلوقتي هتعرف إمتي يعني ؟ وبعدين لو طلع قفل كده ومش بيتكلم خالص يبقي واحد معقد ومش بينطق وبلاش منه طبعاً

تنهدت بحيره وقالت :

- تفتكري ؟ يعني فعلاً كلام خالد ده دليل علي حبه ليا ؟ بس برضو أنا خايفه يا فاطمه وضميري مش مرتاح ، وكمان إسلام كان بيحب سلمي عادي لكن عمره ما قالها حاجه زي كده أبداً ولا عمره خرج معاها ودلوقتي مبسوطين أهو والحمد لله .

تنهدت بملل وقالت :

- يا بنتي أخوكي وسلمي دول حاله نادره ، كمان إنتي حره بقي لو عاوزه تطفشي خطيبك منك طفشيه ، انا عملت اللي عليا وخلص

رددت بتوتر :

- أطفشه ؟ لا مش للدرجادي إن شاء الله ، كمان أنا بدأت أتعلق بيه أصلا وبالذات لأنه متمسك بيا أووي كده ، عموما يا فاطمه هفكر في الموضوع تاني ، معلش لو ازعجتك

- ولا يهكم يا باشا

وجاء اليوم الذي لطالما حلم به فاروق منذ سنوات ، إستيقظ في الصباح الباكر وأعد نفسه ليكون في أبهي صورة أمام زوجته ، إنتهي من وضع لمساته الأخيره ونظر لأخيه الأكبر بحماس وقال :

- كده تمام يا أكرم باشا ؟

إبتسم أكرم بطيبه وقال :

- تمام جداااا يا فاروق ، ربنا يسعدك إنت وعروستك

تنهد فاروق بحب وقال :

- ويسعدك يخليك ولادك وتشوفهم عرسان أد الدنيا يارب

ثم أمسكه من يده بحماس وأخذ يتحرك باتجاه باب الغرفه وهو يقول :

- يلا بقي نشوف الحاج جهز ولا لسه

خرج مع أخيه وطرق باب غرفة والده وقال بهدوء :

- يلا يا باشا علشان منتأخرش

إبتسم الأب بوقار وقال :

- يلا يابني إحنا جهزنا أهو

هبطوا جميعا للأسفل بينما نظر فاروق للعربه بابتهاج وقال :

- إيه يا أكرم العربيه الجامده دي ؟ ولا الزينه بتاعتها فظيعة ماشاء الله

- دي حاجه بسيطه يا فاروق ، يارب تعجب مراتك بس ، مش كفايه إنكم مش هتعملوا فرح

تنهد فاروق بحماس وقال :

- العمره أحسن من مليون فرح ، وكمان إن شاء الله الزفه هتعجب نهي ، أنا متأكد

ركبوا جميعا العربيه ووصلوا إلي منزل نهي ، صعد فاروق للأعلي وألقي نظره سريعه علي زوجته قبل إرتداء النقاب ثم هبط بها لأسفل المنزل ، وقفا قليلا أمام المنزل والجميع يزفهما بالورود والألعاب الناريه والأناشيد ، بعد قليل إنتهوا من كل شئ فأمسك فاروق بيد زوجته وسار بها في إتجاه السياره ..

فتح لها الباب الخلفي وهمت أن تركب ولكنه فجأة أوقفها ونظر للكرسي الأمامي وقال بحماس :

- إنزل يا أكرم

نظر له بتعجب وقال :

- أنزل فين ؟ مش أنا اللي هسوق يابني ؟

نظر فاروق لنهي بسعاده ثم أعاد النظر لأكرم وقال :

- لأ هسوق أنا

أشاح بوجهه جانبا وهو يضحك ولم يهتم بينما قال فاروق علي الفور :

- يابني إنزل يلا

- يا فاروق متهرجش ، إركبوا يلا

- يا عم والله لسوق أنا ، إنزل بقي

ثم قال بتأثر طفولي :

- حرام عليك يا أكرم مش هقدر أصوم

هبط أكرم بإبتسامته الطيبة بينما أمسك فاروق بيد نهي واجلسها بجواره في الأمام ، جلس هو الآخر وأدار محرك السيارة وطار بها بعيدا والعربات تتحرك خلفه ..

نظر لها بحب وقال :

- إيه رأيك بقي ؟

إبتسمت بسعاده وقالت :

- حلوه الفكره المجنونه دي

تنهد بحماس وقال :

- ده أنا هلفك الدنيا كلها لحد ما تدوخي ، وكمان علشان نتكلم براحتنا من غير ما حد يسمعنا

إبتسمت بخجل وقالت :

- ماشي

ظل فاروق يدور بها لفتره طويله ويحدثها عن كل ما يشعر به وهي تسمع وتستشعر كلماته وتبتسم فقط حتي وجدته توقف فجأة فقالت بتعجب :

- وقفت هنا ليه ؟

إبتسم ببراءه وقال :

- ثانيه واحده

هبط من السيارة وذهب للخلف وأحضر صندوق كبير الحجم وحضر علي الفور ، أعطاه نهي وهمت أن تفتحه ولكنه أوقفها وقال بإصرار :

- إستني لما أركب وإقلي الشباك كمان

نظرت له بقلق وقالت :

- طب ليه ؟

إبتسم قائلا :

- إسمعي بس اللي بقولك عليه

ركب السيارةه وأخذ يتحرك بها كمان كان يفعل بينما فتحت نهي الصندوق وفوجئت بالكثير والكثير من القصاصات الملونه واللامعه تنطلق في وجهها ، ضحكت رغما عنها وقالت :

- يا فاروق حرام عليك الفستان باظ ، لأ وكمان قافلته الشباك علشان كله يطير في وشي ، ماشي ماشي ياعم فاروق الله يسامحك بقي

ضحك فاروق بمرح وقال :

- يجب أن نحافظ علي نظافه الشارع يا سيدتي ، أما الفستان فلا بأس أن يبوظ قليلا

رفعت حاجبها قائله بمرح :

- أن يبوظ قليلا !! واضح يا أستاذ فاروق إنك محتاج ترجع أولي إبتدائي من أول وجديد

أجابها بنفس الطريقه :

- حسنا يا سيدتي فلنعود معا إن شاء الله ولكن أرجوكي لا تحدثيني أثناء القيادة حتي لا أخط في أي عمود نور

ضربته علي يده بخفه وقالت ضاحكه :

- برضو !! واضح كده إنك محتاج تقعد معايا أعده طويله أظبطك اللغه اللي ضايعه دي ، بس سوق دلوقتي بقي حتي لا نخط في أي عمود نور

ظل يدور بها في كل مكان حتي وصل إلي منزله وصعد هو وزوجته ، لقد كانت الزفه صغيره بالفعل ولكنها أسعدت نهي كثيرا وذلك لكونها قنوعه كما كان يتوقعها فاروق تماما

---

وبعد إسبوع ذهب إسلام بصحبة سلمى لزيارة فاروق وزوجته ، صافح إسلام فاروق بحراره وإحتضنه بشده وهو يقول بمنتهي السعاده :

- مبروك يا عريس

إبتسم فاروق بحب وقال :



- الله يبارك فيك يا إسلام ، إتفضل

دخل إسلام وجلس مع صديقه في الصاله بينما دخلت كل من نهي وسلمي إلي الغرفه ليتحدثا معا علي راحتها ، قال إسلام بحماس :

- هاه يا سيدي مبسوط

تنهد فاروق بقوه وقال بسعاده :

- هيبيح بقي الحمد لله ، أخيرا يا إسلام أخيرا ، أنا مش مصدق نفسي لحد دلوقتي أصلا ، الحمد لله الحمد لله

ربت علي كتفه بحب وقال :

- إنت صبرت كتير يا فاروق ولازم تاخذ جزاء صبرك ده

إبتسم فاروق ثم قال بحماس :

- إسلام قولي أتعامل مع مراتي إزاي ؟ بما إنك متجوز قبلي يعني فقولني إزاي أخليها أسعد واحده في الدنيا وإزاي نحل مشاكلنا وكده

ضحك إسلام رغما عنه وقال :

- أنا اللي هقولك برضو ، يابني ده أنا بتعلم منك أصلا

ثم نظر له بفخر وقال :

- إنت عارف الدين كويس يا فاروق وأنا متأكد إنك هتحاول بقدر الإمكان تعامل مراتك زي ما كان النبي عليه الصلاة والسلام بيعامل زوجاته ، وبعدين طالما في بينكم حب يبقي بإذن الله هتقدروا تتغلبوا علي أي حاجه

نظر له فاروق بتفكير وقال :

- مش حاسس إن اللي بينا ده يبقي حب يا إسلام ، أعتقد إنها حاجه أكبر من كده بكتير

نظر له إسلام بتعجب وقال :

- حاجة زي إيه ؟

تنهد بحيره وقال :

- مش عارف ، بس أكيد هعرفها ...

---

عادت سلمى إلي منزلها وهي مرحة بشده ، سألتها إسلام عن السبب فأجابت بسعاده :

- نهى دي بجد أنا حبيتها أووي وخلص بقينا أصحاب ، قعدنا نتكلم في مواضيع كتير جدااا وأكثرها عنك إنت وأستاذ فاروق

إبتسم إسلام قائلا :

- إتكلمتوا في إيه عننا بقي ؟

قالت بحماس :

- قعدت أنصحها بقي بما إني متجوزه قبلها وكده ، قولتلها إن الزوجه ما ينفعش تكون نكديه أو تضغط علي جوزها أكثر من اللازم ، يعني ما ينفعش كل ما تشوف وشه تقعد تشكيله من كل كبيره وصغيره ، وكل ما تلاقي ظروفه مش أد كده تقعد تفضحه قدام أهلها وقدام كل الناس ..

الست اللي تلاقي جوزها بيعاملها بما يرضي الله لازم تشيله في عينيها ، حتي لو مستواه مش أد كده لازم تستحمل وتعيش علي أدها ، بلاش بقي منظره وحاجات ملهاش أي لازمه علشان نرضي الناس ،

قولتها كمان إن أسرار البيت ما ينفعش حد يعرفها أبدا ، يعني مثلا لو حصل بينها وبين جوزها مشكله ما ينفعش تقول لحد لأنهم في الآخر هيتصالحوا بس الأهل بيفضلوا شايلين جواهرهم ومش بينسوا ، كمان قعدنا نتكلم بقي عن تربيته أولادنا وقولنا إن أولادنا إن شاء الله هيكونوا أصحاب وهنشجعهم يتعلموا ويحبوا دينهم سوا وحاجات كده يعني ..

نظر لها إسلام بفخر وقال بمرح :

- زيدي يا زيدي ، عندما تجتمع زوجة فاروق مع زوجة إسلام يكون الناتج أعدة نيميه ، إحـم قصدي دميه ، إحـم قصدي يعني حاجة جميله خالص ماشاء الله عليكم

تنهدت سلمى بحماس وقالت :

- والله كانت أعده جميله فعلا ، عاوزين نكررها تاني يا إسلام إن شاء الله

أوما برأسه إيجابا وقال :

- اه طبعا بإذن الله

ثم تنهد بحماس وقال :

- يلا ننام بقي علشان متأخرش علي الشغل الصبح ، يارب التثبيت بكره يكون من نصيبي بقي ده  
أنا مصدقت السنه عدت علي خير

إبتسمت سلمي بحماس وقالت :

- بإذن الله تتثبت يا إسلام ويكون التثبيت ده رزق النونو اللي جاي

---

وبالفعل إستيقظ إسلام من نومه بحماس وإرتدي ملابسه وذهب لشركته علي الفور ، دخل مكتبه  
بسرعه فوجد مروان صديقه جالسا وعلامات الضيق علي وجهه فقال بتوتر :

- في إيه يا مروان ؟ نتيجة التثبيت طلعت ولا إيه ؟

مط شفتيه للأمام ونظر له بحزن ولم يتحدث بينما أمسكه إسلام من ذراعيه وقال علي الفور :

- يا باشمهندس قول بسرعه قلقتني

زفر مروان بضيق وقال :

- بيقولوا التثبيت السنادي إتأجل للشهر الجاي !!

نظر له إسلام بعدم فهم وقال :

- إزاي يعني ؟ اللي أعرفه ان الشركه بتثبت الموظفين طول عمرها في شهر تسعه ، إشمعني  
السنادي بقي هيكون شهر عشره يعني !!؟

عقد ذراعيه أمام صدره وقال بضيق :

- العلم عند الله بقي ، لما نشوف أخرتها معاهم !!

إرتمي إسلام علي الكرسي وقال بملل :

- طيب وبعدين يعني !! ماهو كده كده المفروض التثبيت يرسى علي واحد مننا إحنا التلاته يبقى  
تأخروا ليه بقي !!؟

ثم تنهد بقوه وقال :

- بإذن الله خير يا باشمهندس

وفي نفس التوقيت كانت سلمى تنهي ما تبقي في مطبخها من أطباق وفور إنتهائها قررت الجلوس قليلا علي حاسبها لتعرف آخر الأخبار ، فتحت حسابها علي موقع الفيس بوك وألقت نظره سريعه علي الرسائل ولكنها سرعان ما شهقت بشده ونظرت للشاشه بذهول لعهده لحظات ثم قفزت من مكانها بسعاده وقالت :

- حفصه ؟ أخيرا بقي !!

وعلي الفور قامت بفتح الرسالة وكان محتواها :

- السلام عليكم ورحمة الله وبركاته

سلمى وحشتيني وحشتيني وحشتيني فوق ما تتخلي ، عاوزه أقولك إني أخيرا عرفت أقعد علي انت بعد الفتره دي كلها وقريت كل الرسائل اللي إنتي كتبتها طول المده دي ، انا تقريبا سهرت علي الرسائل بتاعتك طول الليل والبنت نامت علي حجري وأنا برضو مُصره أقعد لحد ما أخلصهم كلهم قبل ما أنام ، اه صحيح نسيت أقولك ، أنا معايا دلوقتي مسلم عنده سنه ونص و معايا رودينا عندها ٣ شهور الحمد لله ، شوفتي ياختي كبرنا إزاي وبقينا أمهات ، هاه إنتي قوليلي أخبرك إيه ؟ آخر حاجه عرفتتها إنك إتجوزتي وبعدها بقي مبعثيش حاجه ، قوليلي في حاجه جايه في الطريق ولا شو ؟

كمان عاوزه أقولك إني كنت بعيظ طول مانا بقرأ الرسائل بتاعتك ، حقيقي مش متخيله إنك وصلتني لكده ، مبسووطه فوق ما تتخلي ، حاسه بجد إني ممكن أدخل الجنه بسببك زي ما قولتلك زمان ، طمنيني عليكي يا سلمى وقوليلي أخبرك إيه ؟ مبسووطه في جوازك ولا الدنيا ماشيه معاكي إزاي ؟ ربنا رزقك بالزوج الصالح اللي كنا دائما بنتكلم عنه ولا لا ؟

أنا بالنسبالي الحمد لله جوزي شاييني في عينيه ، طبعا الموضوع ميخلاش من شويه مشاكل كده  
وكمان هنا الظروف وحشه أووي والغربة صعبه لكن الحمد لله كل حاجه بتعدي طالما إحنا الإثنين  
بننقى الله في بعض ..

معلش لو طولت عليكي بس قولت بقي لازم أرد علي الرسايل بتاعتك قبل ما أنام ، بإذن الله نرجع  
نتكلم تاني بس معلش بقي العيال مطلعين عيني ومش هعرف أفتح كتير زي الأول ، يلا سلام بقي يا  
حبيبتي علشان لو قعدت أنوح أكثر من كده الراجل هيطلقني .. في حفظ الله

دمعت عين سلمي عندنا قرأت الرسالة وابتسمت بحنين وقالت :

- ياه يا حفصه ، وحشتني رسايك وكلامك أووي ، وحشتني نصايحك اللي كانت بتساعدني علشان  
أواجه أي حاجه ، حقيقي إرتحت لما إتطمنت عليكي

ثم بدأت سلمي تكتب رساله جديده لحفصه وتقص عليها حياتها الجديده بكل تفاصيلها ..

---

إنتهي فاروق من غدائه وجلس بجوار زوجته وتبسم لها بحنان وقال :

- تفتكري يا نهى اللي بينا ده إسمه إيه ؟

أجابت علي الفور :

- حب طبعا ، حب جامد أووي كمان

عاد للخلف قليلا ونظر لها متأملا بضع لحظات ثم ابتسم قائلا :

- قعدت أفكر كتير في السؤال ده لحد ما لقيت إن اللي بينا مش مجرد حب  
قاطعته بتعجب :

- أو مال إيه ؟

إبتسم بثقه وقال :

- اللي بينا ده مودة ورحمة

نظرت له بعدم فهم وقالت :

- طيب وايه الفرق ؟ ما طبيعي لو بنحب بعض هيكون بينا موده ورحمه ، الموده دي اللي هي الحب واللي بيحب حد أكيد هيكون رحيم بيه !!

أوما برأسه نفيا وابتسم موضحا :

- المودة والرحمة أعم وأشمل بكتير من الحب ، عارفه لما امرأة العزيز حبت سيدنا يوسف حصل إيه ؟

بصي الآيه دي " وَقَالَ نِسْوَةٌ فِي الْمَدِينَةِ امْرَأَتُ الْعَزِيزِ تُرَاوِدُ فَتَاهَا عَنْ نَفْسِهِ قَدْ شَغَفَهَا حُبًّا إِنَّا لَنَرَاهَا فِي ضَلَالٍ مُّبِينٍ "

شوفتي قد شغفها حبا ومع ذلك لما تعفف سيدنا يوسف وحاول يبعد عنها تحول حبها ده لعنف وقسوه وسجن .. شوفي قالت بعدها إيه " قَالَتْ مَا جَزَاءُ مَنْ أَرَادَ بِأَهْلِكَ سُوءًا إِلَّا أَنْ يُسْجَنَ أَوْ عَذَابٌ أَلِيمٌ "

وبالفعل سيدنا يوسف قال وقتها " قَالَ رَبِّ السِّجْنُ أَحَبُّ إِلَيَّ مِمَّا يَدْعُونَنِي إِلَيْهِ " وفضل إنه يدخل السجن وقتها علي إنه يعمل أي حاجة تغضب ربنا

ثم إلتفت لها بكامل جسده وقال :

- علشان كده يا نهي لو كان اللي بينا ده مجرد حب ف ممكن مع أقل مشكله يتحول الحب ده لـ كره أو قسوه أو ما شابه ، لكن من عظمة القرآن الكريم وإعجازه إن ربنا لما ذكر الزواج ذكر السكن والمودة والرحمة .. شوفي الآيه المريحه دي " وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ أَزْوَاجًا لِتَسْكُنُوا إِلَيْهَا وَجَعَلَ بَيْنَكُمْ مَوَدَّةً وَرَحْمَةً "

ربنا لما خلق سيدنا آدم مخلقش ليه أخ أو اخت ولكن خلق زوجه ، خلقها من ضلعه كمان ، علشان الزوجه دي بتكون أقرب واحده في الدنيا لجوزها وبيلاقي معاها سكنه وراحته وإستقراره .. كمان ربنا جعل بيننا المودة والرحمة ، الإثنين مع بعض ، يعني عارفه ؟ إحنا دلوقتي مثلا بيننا مودة اللي هي المحبه لكن أول ما أحس إنك تعبتي أو ضعفتي شويه هيجي دور الرحمة .. الرحمة اللي بتحمل جواها حاجات كتير جدااا زي التضحية وإنكار الذات والتسامح والعطف والكرم ..

عرفتي بقي يا نهي ؟ شوفتي أد إيه القرآن فيه إعجاز ؟ سبحانك ياربى ، حقيقي لو كان بين أي زوجين مجرد حب كانت كل العلاقات هتنتهي مع أول خناقه كبيره شويه ، لكن من كرم ربنا علينا إنه جعل بيننا مودة ورحمة علشان نقدر نكمل حياتنا سوا مهما واجهنا مشكلات ف علي الأقل هتكون بيننا الرحمة اللي تخلينا نرجع تاني نحن لبعض ونحل كل مشاكلنا ..

إبتسمت نهي بفخر وقالت :

- حقيقي يا فاروق إنت جميل اووي ، نفسي كل شويه تكلمني عن حاجات من دي علشان أفهم ديني أكثر

ضحك بمرح وقال :

- أنا جميل ؟ يا خلاشي عليا لما أكون عاقل وحلو كده

ضربته علي يده بخفه وقالت مازحه :

- إنت ما صدقت ولا إيه ؟ يا بباي علي الرجاله دوول .. ما بتصدقوا إنتوا تلتزقوا في أي حاجه كده !!؟

عقد ذراعيه أمام صدره ورفع حاجبه قانلا :

- رجاله ؟ رجالة مين دول يا أستاذه ؟

ضحكت بإستفزاز وقالت :

- إنتي بتغيري يا فاروعه ؟

دفعها من علي الأريكة فسقطت علي الأرض بينما نظر لها هو بشماته وقال ضاحكا :

- علشان تبقي تقولي يا فاروعه تاني

ثم نظر لها بإشمزاز وقال :

- يـع فاروعه إزاي يعني ، ده حتي طعمه وحش ، وبعدين خدي بالك يا حجه بدل ما تتحسب من التشبه بالنساء وتتلغني بقي

تنهدت بإستسلام وقالت :

- خلاص يا عم فاروعه إحم قصدي يا فاروق مش هقول كده تاني ، وبعدين الله يسامحك بقي الوقعه وجعتني

قفز من مكانه بمرح وجلس بجوارها علي الأرض وقال مازحا :

- أنا أسف يا ستي ، ايام سوري ، جو سوي ديزولي ، وربنا لو إعرفها بالصيني كمان كنت قولتها  
ضربته بالوساده بخفه وقالت :

- ماشي وأنا مسامحاك ، بس بعد كده إبقى أعرفك لغات جديده بقي الحاجات دي قدمت خلاص  
نظر لها بإستنكار وقال :

- طب وربنا أنا اللي غلطان ، آل لغات تانيه آل ، يا بنتي أنا معايا العربي وكام كلمة إنجليزي علي كام  
كلمة فرنساوي والحمد لله علي كده ، إحنا مشغولين دايمًا يا سيدتي ولا يوجد لدينا وقت لمثل هذه  
التفاهات

- حتي العربي كمان خربان يا فاروق ، لالا الموضوع ده ميتسكتش عليه أكثر من كده  
تنهد بحماس وقال :

- ماشي يا ...

ثم نظر لها بحيره وقال :

- أيوه صحيح هما بيدلعوكي يقولوك إيه ؟

إبتسمت ببراءه وقالت :

- نهانيهو

- ماشي يا نهانيهو عاوزك تطبطيلي العربي بتاعي بقي ، ربنا ينفع بيكي الأمه يا بنتي  
ثم إنتبه فجأة وقال متعجبا :

- نعم ياختي !! نهانيهو إزاي يعني ؟

- حلو مش كده ؟

نظر لها بإستنكار وقال :

- حلو ؟ طب تصدقي بالله ؟ أنا حاسس إني كرهت أسماء الدلع باللي فيها ، بقولك إيه ما تيجي  
نكمل موضوعنا ونسيبنا من أسماء الدلع دي خالص ، أصلا أصلا عيب



- أيوه ياخويا علي رأيك ، الحاجات دي عيب أصلا

إبتسم لها فاروق ثم صمت للحظات وإستأنف قائلا :

- عارفه يا نهي ؟ إحساس الرحمه ده عالي عندي أووي اليومين دول

ثم غمز لها بحب وقال :

- كان زمان عندي إحساس الهيبيح بس دلوقتي بقي عندي الرحمه

رفعت حاجبها قائله بمرح :

- فاروق إحنا كنا لسه بنقول إيه ؟ عيب عيب عيب

مط شفتيه للأمام وقال بخوف طفولي :

- خلاص يا طنط متزعقش كده علشان بخاف الله ، طنط وحشه وشريره أصلا

- فاروووووووق

- علي فكره إنتي رخمه ، خلاص هكمل أهو

ثم إعتدل في جلسته وقال بسعاده :

- كل ما بتخيل إني أخذتك من بيت أهلك كده علشان تعيشي معايا وإنتي متعرفيش عني أي حاجه ومع

ذلك واقفتي بحس بالرحمه من ناحيتك أوووي ، بحس إنك أكثر من بنتي وإني لازم أدكي الحنان

والأمان علشان تتعودي علي الجو ومتحسشيش في أي وقت إنك خايفه أو قلقانه مني

ثم نظر لها بحزن وقال :

- مش عارف إزاي ممكن راجل يجيله قلب يمد إيداه علي مراته أو حتي يجرحها بالكلام ، اه ممكن أي

راجل يتناقش أو يتخاطق مع مراته وده شئ طبيعي إنما انه يضربها دي صعبه اووووي ، ده الرسول

صلي الله عليه وسلم قال " استوصوا بالنساء خيرا " صحيح مسلم

حقيقي مش فاهم ؟ إزاي يبقي الرسول موصينا عليكم وييجي واحد يضربكم أو يجرحكم بالطريقه دي

!!؟

طب إنتي عارفه يا نهي ؟ أنا ساعات بيصعب عليا أوي إنني أخذتك من بيت أهلك وإنتي لسه مكملتيش دراسه ، بقول إزاي هتسد علي الدراسه والبيت مع بعض ، علشان كده بإذن الله أنا هساعدك علي أد ما أقدر في دراستك وكمان مش هحملك فوق طاقتك ، يعني بجد أنا من النوع أصلا اللي بياكل أي حاجه ويحمد ربنا لأنني بعتبر الأكل ده مجرد وسيله علشان نعيش فالموضوع مش مستاهل يعني إنني أتخافك علشان إنتي تعبتي في يوم ومعملتيش أكل أو معرفتيش تعلمي كذا صنف والحاجات دي وكمان لبسي وحاجاتي بعرف أعملها لنفسني فمش هحتاج أتعبك فيها ، بإذن الله هكون الزوج اللي إنتي بتحلمي بيه وأكثر كمان

إبتسمت بسعاده وقالت :

- بجد يا فاروق ؟

أوما برأسه إيجابا وقال :

- بجد يا نهي

ثم ضحك قانلا :

- بس لو موضوع الأكل ده إتكسر أكثر من ٥ مرات في الشهر هروح أجيب لنفسني دليفري وإنتي اللي هتدفعي الحساب مليش دعوه ، وقد زعتر من بعتر بقي

---

إقتنعت هند بوجهة نظر فاطمه وخافت أن يعتقد خالد أنها لا تحبه لذلك وافقت علي الإفصاح عن مشاعرها له ولكن في حدود الأدب كما قالت ، بينما سعد خالد بذلك لأنها بدأت تستجيب له ولرغباته وشعر بالإنتمار والفخر ..

سافر فاروق ونهي إلي رحلة العمره الخاصه بهما وذاقا معا لذة القرب الحقيقي من الله عزوجل ، لقد كانت الراحة التي شعرا بها في هذا المكان المبارك أفضل بكثير من مجرد فرح مؤقت ، شعرت نهي بالسعاده من قرار فاروق بخصوص الفرح وإستبداله بما هو أفضل بكثير .. زيارة بيت الله الحرام

---

بدأ العام الدراسي الجديد علي خير وذهبت معلمتنا المتميزة إلي مدرستها لأول يوم كمعلمه حقيقيه وليس مجرد تربية عمليه ، كانت تشعر بالحماسه الشديده لذلك جدت نيتها وبدأت في تنفيذ كل الخطط التي وضعتها في هذه الفترة للحصول علي تعليم أفضل ونتائج أكبر

مر إسبوع ثم الثاني وبدأ شهر عشرة ، هذا الشهر الذي إنتظره إسلام طويلا ، فهل ياتري سيحصل علي التثبيت أخيرا أم مازال الحلم بعيدا ؟

إستيقظ من نومه بحماس كالعاده وإرتدي ملبسه وذهبت لشركته علي الفور ، من الواضح أن سلمي لم تتذكر موعد التثبيت الجديد وإستغل إسلام هذه الفرصه ولم يخبرها حتي لا تقلق بشأنه وتستطع التركيز في شرحها فقط ، وصل إلي شركته وبدأ عمله حتي ينتهي الإجتماع الذي عقد بشأن إختيار المهندس الذي يستحق التثبيت .

وفي الواحده مساءا بالتحديد علم إسلام بإنتهاء الإجتماع ولكن أحد لم يأتي ليخبرهم بالنتيجه ، تعجب إسلام من ذلك وذهب لمكتب مروان وقال :

- بقولك إيه يا مروان ، الإجتماع خلص باين ، ما تيجي نشوف عملوا إيه

نهض مروان بتثاقل وهم بالخروج من المكتب مع إسلام ولكنهما وجدا رامي يدخل إلي المكتب بسعاده فسألاه بلهفه :

- ما سمعتش حاجه كده ولا كده يا رامي وإنت جاي من بره ؟

إبتسم بثقه وقال :

- أنا اللي أخذته

أمسك إسلام بيد مروان وهم بالخروج وهو يقول بإستهزاء :

- يا عم ده بيهرج وإحنا مش فاضينله دلوقتي ، لسه مشغول من إسبوعين وعاوز يتثبت قبلنا ، والله ده اللي ناقص كمان

ضحك رامي بسخريه وقال :

- بقولك أنا اللي أخذته يا باشمهندس ، ولو حابب تتأكد بنفسك روح !!

نظر له إسلام بغضب وقال :

- إنت بتقول إيه !!؟

تنهد بملل وقال :

- بقولك أنا اللي أخذت التثبيت !! إيه مش مفهومه دي كمان !!؟

صرخ به قائلا :

- أخذته إزاي يعني؟! وإحنا بنعمل إيه هنا بقي بقالنا سنين؟ وبعدين تاخده إزاي يعني وإنت لسه يادوب مشتغل جديد؟ وأصلا أصلا التثبيت بيكون في شهر تسعه يعني قبل ما إنت تشتغل

إتسعت عيناه فجأة وقال بدهشه :

- ثانيه ثانيه ، إنت عاوز تقولي إن التثبيت إتأخر السنادي بالذات علشان تكون إشتغلت معنا خلاص وتاخده ليك؟

أومات برأسه إيجابا وقال بسخريه :

- بالظبط كده ، أديك عرفتها لوحدك ، ذكي من يومك يا باشمهندس

هم إسلام أن يشتبك معه بسبب أسلوبه السيء ولكن مروان حاول إيقافه وقال لرامي بغضب :

- طيب وإشمعني إنت بقي اللي تتثبت؟ إنت زيك زينا يعني وكمان أصغر مننا؟ ما تفهمنا ياعم المتثبت

إبتسم رامي ببرود وقال :

- ببساطه كده سلوي بنت الأستاذ شوقي تبقي خطيبتي وأنا لسه راجع من السفر من إسبوعين علشان كده خلينهم يأجلوا التثبيت بقي لحد ما آجي ، بس ماتزعلوش أوي كده ، الشركه دي في يوم من الأيام هتكون بتاعتي وهبقي أثبتكم يا باشمهندسين

لم يستطع إسلام التحمل أكثر من ذلك فهرول باتجاه غرفة أستاذ شوقي ودخل من دول إستندان وقال :

- يعني إييه يا أستاذ شوقي واحد لسه شغال من إسبوعين ويتثبت قبلنا هاه ، هو إحنا بنلعب هنا ولا إييه؟ ما حضرتك شايفنا طالع عينينا في الشغل وراضيين بالمرتب الصغير ده وفي الآخر كمان مفيش تثبيت؟!

نظر له شوقي بحده وقال :

- أولًا يا باشمهندس صوتك يوطي وإلا هيكون ليا تصرف تاني ، ثانيا دي شركتي وأنا أكثر واحد عارف مين يستحق التثبيت ومين لأ ، ثالثا رامي مهندس ممتاز ومتعلم برا ويستحق عنكم طبعًا

ضحك إسلام بسخريه وقال :

- قصدك رامي يبقي خطيب بنت حضرتك وأفضل منا طبعاً

نظر له بوجه خالي من أي تعبير وقال :

- طالما عرفت تبقي ريحت نفسك وريحتي ، إتفضل بقي يا باشمهندس شوف شغلك وماتدخلش عليا بالطريقة دي تاني علشان متاخذش إجراء يزعلك ، ولو أليك نصيب هيكون التثبيت من نصيبك السنه الجايه إن شاء الله

نظر له بذهول وقال :

- سنه جايه ؟ وأنا لسه هستني للسنه الجايه كمان ؟ إنتوا بجد مش بتخافوا من ربنا إزاي كده ؟ لما يبقي واحد مطحون في الشركه وبيشتغل بما يرضي الله وكمان جايه عيل في الطريق ولسه بالمرتب ده هيعيش منين يعني هو وعياله ؟!! بجد حسبني الله ونعم والوكيــــــــــــل في كل ظالم

إنتفض شوقي من مكانه وضرب الطاولة بقوه وهو ينظر لإسلام بغضب وقال :

- إطلع برا مكتبي يا إسلام ، ومش عاوز كلمه زياده وإلا هتلاقي جواب رفدك في إيدك ، أنا ده كله مستحملك وبعاملك زي إبنني علشان بيعجبني شغلك ومش عاوز أمشيك من هنا لكن لحد كده وكفايه

نظر له بذهول وقال :

- جواب رفدي ؟ كمان ؟ صحيح مانتوا عمركم ما هتحسوا بحد ، ماشي يا أستاذ شوقي أنا ماشي خالص علشان أريحكم مني النهارده

قال بصرامه :

- لو مخلصتش الشغل اللي في إيدك النهارده هخصلك اليوم !!

ضحك إسلام بسخريه وقال :

- ماشي يا أستاذ شوقي أخصمه ، هي مباقيتش فارقه أصلاً

ثم غادر المكتب علي الفور وهو يتنفس بصعوبه ، قابله مروان بالخارج وحاول إيقافه ولكن إسلام صرخ به قائلاً :

- سبيني يا مروان في حالي علشان لو قعدت هنا أكثر من كده هكسر الشركه باللي فيها ، أنا أقسم بالله ماسك نفسي بالعافيه علشان الراجل أد أبويا الله يرحمه بس بجد قرفت من كتر الظلم قرفت

تركه مروان علي الفور عندما شاهده علي هذه الحاله بينما هرول إسلام باتجاه الشارع وظل يتجول في شوارع المدينه بلا هدف ، بعد قليل توقف مكانه ونظر في ساعته فزفر بضيق وقال :

- اووف بقي سلمي لسه مرجعتش من المدرسه ولو روحت لماما دلوقتي هتقلق من شكلي ولو رجعت البيت وقعدت لوحدي الله أعلم ممكن أعمل إيه بقي !!

ثم نظر في ساعته مره آخري وقال علي الفور :

- خلاص بقي عقبال ما أوصل للمدرسة تكون هي خرجت ونروح سوا

ثم إستقل أول سيارة أمامه ذاهبة إلي قرية الزهري وظل يستغفر طوال الطريق حتي يهدأ قليلا ...

وصل إلي المدرسة وصعد للطابق الثالث كما قال له العامل وبالفعل وجد سلمي أمامه ، ولكن يبدو أنه لم يعجبه ما وجدها عليه فوقف ينظر لها قليلا والشرر يتطاير من عينيه وهم أن يذهب لها ولكنه غير مساره فجأة وعاد سريعا إلي منزله .. !!

---

عادت سلمي من مدرستها وقامت بفتح باب منزلها بهدوء ودخلت ككل يوم ، إنتفت لتضع حقيبتها علي الأريكة وتجلس لتستريح قليلا ولكنها وجدت إسلام أمامها فإتسعت عيناها وقالت بسعاده :

- إسلام إنت جيت إمتي ؟ أخيرا بقي شوفتك جاي بدري يا راجل

قالت لها إسلام بحده :

- روعي غيري هدومك وتعالى علشان عاوزك في موضوع

إبتسمت قائله :

- طب يا عم بهدوء خضنتي ، قول يا باشا الموضوع وبعدين أغير مش مشكله

تنهد بغضب وقال :

- بقولك غيري هدومك وبعدين نتكلم يبقي تسمعي الكلام

نظرت له بقلق وقالت :

- إسلام طب في إيه فهمني ؟

- أستغفر الله العظيم يارب ، بقولك إمشي يا سلمى إخلصي

- حاضر يا إسلام بهدوء عليا طيب !!

ثم ذهبت وبدلت ثيابها بسرعه شديده ونادت عليه من الداخل قائله :

- خلاص يا إسلام تعالي أنا بعلق هدومي أهو ، او إستني ثواني وأنا جيبالك

حضر إسلام علي الفور ووقف أمامها مباشره وقال بصرامه :

- كنتي بتعملي إيه النهارده في المدرسه يا سلمى ؟

ضحكت رغما عنها وقالت :

- بشرح للعيال يا إسلام !! هكون بعمل إيه يعني !!؟

ضرب الكومود بيده غاضبا وقال بحده :

- مش وقت إستظراف دلوقتي !! إحنا لما قدمنا علي الشغل قولنا مفيش تعامل مع رجاله صح ولا لا ؟ ولو هيكون فيه يبقي للضروره القصوي وأخرك كلمتين وتمشي صح ولا بقول كلام من عندي ؟

أومات برأسها إيجابا وقالت بعدم فهم :

- أيوه صح !!

صرخ بها قائلا :

- أومال شوفتك النهارده عماله تضحكي وتهزري مع الرجاله ليه يا أستاذة ؟ هو ده الإلتزام بتاعك يا سلمى هاتم رمز العفه والحياء !!؟

ضربت علي قلبها ونظرت له بذهول وقالت :

- إيه اللي إنتي بتقوله ده يا إسلام؟! خد بالك من كلامك بعد إنك ، وبعدين رجالة إيه دول اللي ههزر معاهم إن شاء الله !!

- بقولك شفتك بعيني يا أستاذة ، هاه هكذب عيني كمان ولا إيه ؟

- شوفت إيه يا إسلام ؟

زفر بضيق وقال :

- كنتي واقفه بتعملي إيه مع الراجل ده قبل المرواح بشويه وعمالين تضحكوا هاه ؟

صرخت به قائله :

- متقولش بضحك يا إسلام حرام عليك إنتي كده بتظلمني ، الراجل ده يبقي المنسق بتاع الحفله اللي هنعملها للطلاب الأوائل بتاع السنه اللي فاتت وعرف بالصدفه إني كنت بعمل نشاطات وكده في التربيه العملي وكان جاي بيسألني علي حاجه وأنا قولت هرد عليه وأمشي وخلص ، بس هو بقي قعد يتكلم كتير ويقول مواقف من بتاعة حفلات السنين اللي فاتت وقعد يضحك وأنا كنت هتشل أصلا بس معرفتش أهرب إزاي

ضحك بسخريه وقال :

- معرفتيش تهربي ؟ لا حنينه والله

ضربت يدها بالآخري وقالت بحزن :

- يا إسلام بالله عليك ما تتكلم عليا كده ، إنت عارفني كويس وعارف إني مش بعرف أخرج حد ، أنا عارفه إني غلطت وأقسم بالله فضلت طول الوقت في العربيه النهارده بستغفر علشان الموقف ده وبإذن الله مش هيتكرر تاني

رفع حاجبه قائلا بعصبيه :

- يا سلام ؟ لأ شاطره والله

جلست علي حافة الفراش بتعب وقالت :



- يا إسلام أنا أول مره أتخط في موقف زي ده وفعلا كان نفسي أي حد بييجي ياخدني علشان مش قادره أقوله حاجه ، بس بجد خلاص مش هتتكرر تاني وبعد كده لو إضطريت أتكلم هتكلم بجديه تامه وأمشي علطول

نظر لها بغضب وقال بمنتهي القسوه :

- مش هتق فيكي تاني بعد اللي شوفته ده يا سلمي

إنتفضت من مكانها ووضعت يدها علي فمها وقالت بذهول :

- إسلام إنت واعي للي إنت بتقوله ده ؟ للدرجادي مصدقت تمسكلي علي غلطه ؟ قولتك عارفه إني غلظت وندمانه علي وقوفي معاه وبإذن الله عمري ما هكررها تاني واللي يتخرج يتخرج بقي مش مهم ، لكن مش لدرجة كلامك ده يا إسلام ؟

ثم صرخت به قائله :

- وبعدين مش إنت دائما بتقولي إنك بتحس بيا ؟ محسيتش بيا ليه وأنا واقفه هتشل كده ونفسي حد ينقذني هاه ؟ محسيتش إني مش بضحك إزاي هاه ؟ رغم إنك أصلا لو كنت ركزت لحظه واحده كنت هتلاقيني واقفه بعيد عنه وباصه في الأرض وهو بيكلم نفسه ، إنت عارف إني مش بقدر أخرج حد هقولهاك للمره الكام يا إسلام !! هقولك للمره الكام إني عارفه إني غلظت ومكسوفه من ربنا بس علشان سمحت لنفسي أقف وهو عمال يضحك كده عادي ، لكن إنك تشك فيا دي اللي مش هسمح بيها ابدا ، أقولك حاجه أحسن ؟ لو مش هتق فيا فعلا يبقي تطلقني أفضل ...

ثم نهضت من مكانها وقالت بضيق :

- بعد إذنك يا إسلام علشان هروح أجهز الغداء لأنني تعبت ومش قادره أتخانى أكثر من كده

همت بالذهاب ولكنها وجدته يمسك بذراعها ويجذبها للخلف وهو يقول بغضب :

- ما ينفعش تمشي وتسيبيني وأنا بكلمك كده

أفلتت ذراعها بضيق وقالت :

- سيبيني في حالي دلوقتي يا إسلام ، بعد إذنك

وهمت بالذهاب مره آخري ولكنها وجدته يدفعها للخلف بشده ويبدو أن دفعته كانت أقوى مما يتخيل فجعلتها تصطدم بحافة الخزانة وتسقط أرضا ، نظر لها إسلام بذهول وعلي الفور أمسك بها وأجلسها علي حافة الفراش وقال بخوف :

- سلمى إنتي كويسه ؟

أبعدته عنها بغضب وظلت تتأوه وهي تتحسس ذراعها الأيمن بألم بينما إقترب منها هو وقال :

- سلـ ...

قاطعته علي الفور :

- إمشي يا إسلام

حاول أن يلمسها ولكنها دفعت يده بعصبيه وقالت بصراخ :

- إسلام إمشي من وشي بقولك ، إمشي بقي كفايه كفايه

لم يحتمل صرخاتها أكثر من ذلك ويبدو أن غضبه كان أقوى منه فتركها وذهب لغرفة الأطفال وأغلق الباب خلفه بشده

إرتمت سلمى علي الفراش وسمحت لدموعها العبور علي خديها كالأنهار وظلت تتحسس ذراعها بألم وتقول :

- يارب ساعدني أنا مليش غيرك ، حتي إسلام طلع زيهم كلهم وميفرقش عنهم حاجه ، يارب ريح قلبي وصبرني علي الظلم ده

.. ظلت علي هذه الحالة ما يقرب من النصف ساعه حتي سمعت جرس الباب ، لم تهتم في البدايه ولكنها سمعته مره آخري ويبدو أن إسلام لا يسمع شيئا فنهضت بتثاقل وإقتربت من الباب ..

نظرت علي الطارق عبر العين السحريه فوجدته والدتها فزفرت بضيق وقالت :

- حرام عليكي يا ماما ، كان لازم تيجي دلوقتي يعني ، ياربي بقي

وعلي الفور جففت دموعها وحاولت إصطناع الإبتسامه وهمت أن تفتح ولكنها رأت أثار الدموع علي ملابسها فذهبت علي الفور للحمام وأغرقت ملابسها أكثر وكأنها كانت تتوضأ ثم قامت بفتح الباب ، إبتسمت لها الأم بسعاده واحتضنتها بشده وقالت :

- ازيك يا حبيبتي عامله إيه ؟ معلش جيت في وقت مش مناسب بس هقولك علي حاجه وماشيه  
عطول

- إيه اللي إنتي بتقوليه ده يا ماما ؟ تيجي في أي وقت طبعا ، البيت ده بيتك قبل ما يكون بيتي ،  
إتفضلي

سمع إسلام الأصوات بالخارج فقام بفتح باب غرفة الأطفال قليلا ليعرف ما سيحدث ، جلست الأم علي  
الأريكة وحاولت سلمي الجلوس علي الجانب الآخر حتي لا تري والدتها ذراعها ولكنها جذبتها بحب  
وأجلستها بجوارها ، إعتدلت في جلستها ونظر لسلمي بشوق وقالت :

- وحشاني يا ...

و علي الفور قطعت كلمتها وشهقت بخوف وقالت :

- إيه اللي في إيدك ده كله يا بنتي ؟

شعر إسلام بالتوتر بينما ابتلعت سلمي ريقها وحاولت الإبتسام قائله بمرح :

- إسكتي يا ماما ده إسلام ده عليه هزار رخم اوووي أعوذ بالله

نظرت لها بتعجب وقالت :

- هزار إيه ده يا بنتي اللي يعمل فيكي كده ؟

تتحنحت بإحراج وحاولت إنتقاء كلماتها حتي لا تحسب كذبه وقالت :

- معلش يا ماما إنتي عارفانا مجانيين وساعات كتير بنهزر بالمقشات والحلل والحاجات دي ، ده حتي  
من كام يوم كده كنت هدخل المخده في عينيه هعميه

زفرت الأم بضيق وقالت :

- مجانيين علي نفسك يا سلمي بس إنتي دلوقتي حامل وممكن الهزار الثقيل ده يتعبك

ثم قالت علي الفور :

- قومي ناديلي جوزك يا بنتي  
شعرت بالتوتر وقالت بصوت متقطع :

- هاه ، أقوم أناديه ؟ اه ماشي حاضر

نهضت من مكانها بتثاقل وأخذت تتحرك بتجاه الغرفة وهي غاضبه تماما لأنها لا تريد محادثته حتي ، وصلت للغرفة فوجدته واقفا مبتسما لها شاكرا علي ما فعلت فقالت بوجه خالي من أي تعبير :

- تعالي ماما عاوزاك

تحرك خلفها بهدوء وصافح والدتها ورحب بها فنظرت له بحزن وقالت :

- كده يا إسلام تزرق للبنبت إيدها كده ؟ حرام عليك يا بني دي حامل ومش هتستحمل هزار الرجاله الثقيل ده

نظر لسلمي معتذرا وقال :

- حاضر يا ماما مش هعمل كده تاني

أشاحت لسلمي بوجهها جانبا بينما إبتسمت الأم بطيبه وقالت :

- ربنا يسعدكم يا بني

ثم نظرت لهما بجديه وقالت :

- معلى أنا عارفه إني جيت في وقت مش مناسب بس انا عمالة أتصل بيكم وموبايلاتكم مقفوله فقولت بقي أجي أقولكم وبالمره أشوف بنتي ، المهم ، أنا جيت علشان أقولكم إن فرح حسناء بنت الحاج فوزي جارنا النهارده وأنا عارفه إن سلمى بتحبها وكانت دايم بتسألني عنها بس أنا نسيت أقولها علي حكاية الفرحة دي لما كانت عندنا ولما ولاء بتقولني هنروح الساعة كام إفتكرت بقي إني لسه مقولت لسلمي وهنزعل لو روحنا من غيرها

ثم إبتسمت لسلمي وقالت :

- هتروحي معانا ولا هتيجي إنتي وجوزك لوحدهم ؟

صمتت لحظات ثم قالت :

- لأيا ماما روحوا إنتوا علشان مش عارفه هقدر أجي ولا لا ، إنتي عارفه إني برجع من الشغل  
تعبانه وكمان مع الحمل فمش بقدر أنزل كتير بقي ، بإذن الله لو مجيتش النهارده هبقي أروح أباركلها  
في بيتها

إبتسمت الأم ببراءه وقالت :

- ماشي يا بنتي براحتك ، أستأذن انا بقي

أمسكتها سلمي من يدها وقالت بلهفه :

- لأيا ماما إستني إنتي لسه ملحقتيش تقعدني ، كمان لسه مشربتيش حاجه ، هقوم علطول أجييب  
العصير وأجي

نهضت من مكانها وإبتسمت بحنان وقالت :

- معلش يا سلمي وقت تاني ، يلا سلام عليكم

ودعتها سلمي وكذلك إسلام وأغلقا باب الشقه ، علي الفور إتجهت سلمي لغرفتها بينما توقف إسلام  
أمامها ليغلق عليها الطريق ونظر لها بأسف وقال :

- سلمي شكرا

نظرت له بحده وقالت :

- إحمد ربنا إن مامتي طيبه وعلي نياتها وبتصدق كل حاجه ، أو يمكن كمان مصدقتش بس عدت  
الموضوع بمزاجها

ثم دفعته جانبا وهمت بالدخول ولكنه وقف أمامها مرة آخري وقال :

- طب وريني إيدك علشان خاطري ، قوليلي الخبطة كانت جامده ولا إيه ؟

دفعته مرة آخري ودخلت وأغلقت الباب خلفها ، جلست علي الأرض وأسندت ظهرها علي الباب  
ودفنت رأسها بين كفيها وظلت تبكي بينما وقف إسلام علي الباب لايعرف ماذا يفعل ؟ هل يحاول معها  
مره آخري أم يتركها لتهدأ ؟ هل كان محقا بخصوص ما فعل أم أنه أعطي الموقف أكثر مما يستحق ؟

لم تستطع قدماه التحمل أكثر من ذلك فجلس علي الأرض وأسند ظهره علي الباب من الجانب الآخر  
وظل يفكر ، كيف له أن يكون بكل هذه القسوه مع سلمي ؟ وما ذنبها هي فيما حدث في الشركة ؟

وحتى وإن كانت قد أخطأت فكان لابد أن يوضح لها خطأها بكل هدوء حتى تتفهم الأمر ولا تعود لمثل هذا الخطأ مره أخرى !!

كيف له أن يمد يده علي الفتاة الوحيده التي أحبها بصدق ؟ الفتاة الوحيده التي إختارها زوجة له وعاهدها أمام الله أن يحفظها من نفسه ويضعها في عينيه

ضرب الأرض بيده بعصبيه وقال :

- غـبـي ، يعني شوف إنت عملت فيها إيه وهي راحت دافعت عنك قدام أهلها ، عايز إيه إنت هاه عايز إيه ؟ عايز تضيعها من إيدك دي كمان ؟ مش كفايه اللي عملته في ساره ومحمد ؟ كمان حب عمرك هتخليها تروح منك بسبب غبائك ده !!؟

أغمض عينيه بألم وأخذ يحدث نفسه قائلا :

- لأ وعاملي نفسك ملتزم أووي !! إلتزام إيه ده اللي يخليك تمد إيدك علي واحده ضعيفه بالشكل ده

تنهد بحزن وقال :

- بس أنا ممدتش إيدي عليك يا سلمي ، والله ما كان قصدي أخبطك كده ، إنتي اللي عصبتييني يا سلمي بس والله ما كان قصدي

ظل علي هذه الحاله لأكثر من ساعه ، فتارة يؤنب نفسه وتارة أخرى يوضح لنفسه أنه لم يكن يقصد ، سمعت سلمي أذان العصر فقامت بفتح الباب فوجدته جالسا أمامها ، ترددت قليلا ثم حاولت العبور سريعا لتذهب للوضوء ، إنتبه إسلام لوجودها فنهض بسرعه وأمسك بيدها قائلا :

- سلمي طب إستني هفهمك

أفلتت يدها بعصبيه وقالت :

- أو عي

ثم دخلت الحمام علي الفور وأغلقت الباب ، تحرك إسلام بإستسلام لباب الشقه وخرج لأداء الصلاه

---

أدي صلاة العصر وجلس مكانه لا يعرف ماذا يفعل ، ظل يسترجع ما حدث ويفكر للحظات حتي سمع الإمام وهو يقول :

- والآن مع موعد درس العصر ، الرجاء الانتباه يا أخواني

نظر إسلام للشيخ بتلقائيه ، لم يكن يستطيع التركيز في شئ سوي ما حدث ولكنه فعل مثلما فعل الجميع ، بدأ الإمام قائلاً بابتسامه :

- إن الحمد لله ، نحمده ونستعينه ونستغفره ونستهديه ونعوذ بالله من شرور أنفسنا ومن سيئات أعمالنا ، من يهّد الله فلا مضلّ له ومن يضلّ فلا هادي له . وأشهد أنّ لا إله إلا الله وحده لا شريك له وأشهد أنّ محمداً عبده ورسوله ، بعثه الله رحمةً للعالمين هادياً ومبشراً ونذيراً . بلغ الرسالة وأدى الأمانة ونصح الأمة فجاءه الله خيراً ما جزى نبياً من أنبيائه . صلوات الله وسلامه عليه وعلى جميع الأنبياء والمرسلين ، وعلى صحابته وآل بيته ، وعلى من أحبهم إلى يوم الدين .

درسنا اليوم يا إخواني بعنوان " لا تغضب " والدرس ده في غاية الأهمية ، بإذن الله هحاول مطولش عليكم بس ركزوا معايا والأطفال الحلوين كمان يركزوا علشان هيستفادوا إن شاء الله

نظر له إسلام بذهول ، فكان الشيخ يعلم ما يحتاجه بالفعل ، أو أن الله أرسله ليلقي هذه المحاضرة في هذا الوقت وعن هذا الموضوع تحديداً من أجل إسلام ، إعتدل في جلسته وأنصت له تمام الإنصات

قال الشيخ :

- هبدأ الدرس النهارده بموقف أو موقفين حدثوا في عهد النبي صلى الله عليه وسلم بخصوص موضوع الغضب ده ..

عن سليمان بن صرد قال : " استب رجلان عند النبي صلى الله عليه وسلم ونحن عنده جلوس ، وأحدهما يسب صاحبه مغضبا قد احمر وجهه ، فقال النبي صلى الله عليه وسلم : " إني لأعلم كلمة لو قالها ، لذهب عنه ما يجد ، لو قال : أعوذ بالله من الشيطان الرجيم " رواه البخاري ومسلم

وموقف آخر جميل جداً :

" عن أبي هريرة رضي الله عنه أن رجلا قال للنبي صلى الله عليه وسلم أوصني ، قال : لا تغضب فردد مرارا قال : لا تغضب " رواه البخاري

يعني موصاهوش بأي حاجة تانيه ولكن قاله " لا تغضب "

طيب ليه منغضبش ؟

ببساطه لأن الغضب ده من أقبح الأخلاق السيئه لأنه بيخرج الإنسان من طبيعته الإنسانيه إلي البهيمة وبيساعده علي ارتكاب تصرفات سيئة كتير جدا زي السب واللعن والشتم والضرب

والاعتداء والإتلاف والطلاق بل ربما والعياذ بالله يلفظ الإنسان بألفاظ توجب الردة ، وكمان الغضب  
ليه أثاره السيئة جدا على الفرد والمجتمع لأنه يفرق بين الأحباب وبيشتت أسر كانت مطمئنة .

علشان كده يا إخواني لازم نعرف إيه هو علاج الغضب علشان نحاول نتجنبه ونتصرف التصرف  
الصح لو غضبنا في أي وقت ..

اول حاجة : التعوذ بالله من الشيطان الرجيم أول ما نحس بالغضب

تاني حاجة : نغير الحالة اللي إحنا عليها يعني لو وافقين نقعد ولو قاعدين نضطجع ، كده الإنسان  
هيهأ أكثر ويبعد عن أي إنتقام ممكن يعمله في وقت غضبه

تالت حاجة : نسكت عن الكلام وبدل ما نقول أي حاجة نقعد نستغفر ونذكر ربنا

رابع حاجة : نتوضأ وممكن نصلي ركعتين وندعي ربنا يريح قلبنا ويهدينا

ولازم ناخذ بالنأ من حاجة وهي إن الغضب بيكون مذموم لو غضب الإنسان انتقاما لنفسه. أما إذا  
غضب غيرة لله لانتهاك محارمه أو دفعا للأذى عن نفسه وغيره في ذات الله فهذا غضب محمود  
شرعا وفاعله يثاب على ذلك .

فقد قالت عائشة رضي الله عنها : (ما انتقم رسول الله صلى الله عليه وسلم لنفسه في شيء قط إلا أن  
تنتهك حرمة الله فينتقم لله بها) . رواه البخاري

أسأل الله تعالى أن تدوم السكينة في قلوبكم والابتسامة على وجوهكم والسعادة في بيوتكم والصحة  
في أبدانكم والتوفيق في حياتكم والأمان في دروبكم والنور في وجوهكم وأن يغفر لكم و لوالديكم وكل  
عزيز لديكم ..

آمين يارب وصل اللهم وسلم علي سيدنا محمد وعلي آله وصحبه أجمعين .. أحبكم في الله والسلام  
عليكم ورحمة الله وبركاته ..

ظل إسلام بيتسم لفته وشعر بالراحه بعدما سمع كلام الشيخ ، نهض من مكانه وهم أن يذهب إليه  
ليقص عليه ماحدث ويطلب منه النصيحة ولكنه سرعان ما نظر للحيته وشعر بالإحراج فأثر الخروج  
من المسجد ومواجهه الأمر وحده بدلا من إحراج نفسه والإساءه للملتحين بسببه ..

عاد لمنزله وقد قرر الإعتذار لسلمي ومناقشه الأمر معها بهدوء تام ، فلقد أخطأت هي ولكنه واجه  
هذا الخطأ بخطأ أكبر ، إقترب من باب غرفتها فوجده مغلقا هذه المره أيضا ، طرق الباب بخفه بينما



لم تهتم هي وظلت ملقاه علي الفراش مابين البكاء وعدم التصديق من أن إسلام فعل بها هذا الفعل ، ظل يطرق الباب لعدة مرات وهو يقول :

- سلمي إفتحي بالله عليكي ، يا سلمي هفهمك طيب ، والله انا عارف إني غلطان بس إسمعيني حتي وبعدين إعملي اللي إنتي عاوزاه

إزداد بكأؤها رغما عنها فسمعه إسلام وقال علي الفور :

- سلمي والله لو مفتحتيش هكسر الباب وإنتي عارفه بقي إني مجنون وأعملها ، وبعدين أنا مش ماشي من هنا إلا لما أقولك علي اللي حصل ، حتي لو غلطان بس حتي إديني فرصه أذافع عن نفسي

دفتت رأسها بين كفيها بألم وقالت :

- ياربني بقي ، حتي إسلام كمان ؟ حتي الإنسان اللي كنت فاكراه إنه هيحطني في عينيه زي ما وعدني ؟ الإنسان اللي كنت فاكراه إنه هياخد بيادي للجنة ؟ معقوله كل ده كان كلام يا إسلام ؟ حقيقي أنا ماليش غيرك يارب

سمعتة من الخارج يقول بمنتهي الصرامه :

- سلمي طيب لو واقفه ورا الباب إبعدي علشان هكسره ، براحتك بقي

وبالفعل وجدته يضربه أول ضربه فنهضت من مكانها علي الفور وقالت بحده :

- خلاص إستني

قامت بفتح الباب وجلست علي الفراش ولم تتحدث ، جلس بجوارها وحاول الإقتراب منها ولكنها إبتعدت عنه بخوف وضيق فقال علي الفور :

- طيب خلاص خلاص خليكي ، ممكن تسمعيني بس ؟

سقطت دمعته من عينيها رغما عنها وقالت بتأثر :

- أسمع إيه يا إسلام ؟ أسمعك بتبررلي إزاي ضربتني ؟ ولا أسمع كذبك عليا كمان وكمان ؟ ولا أسمعك وإنت بتقول مش هضربك تاني زي ما قولت في الخطوبه إنك عمرك ما هتعملها وعملتها ؟ ولا أسمعك وإنت بتقولني عمري ما هقولك كلام يزعلك تاني زي ما قولت في الخطوبه وبرضو قولتها ؟

ثم نظرت له بحزن وقالت :

- بتتريق عليا يا إسلام وبتقول رمز العفه والحياء ؟ بقي عادي كده تطعن فيا هاه ؟ اه غلظت بس مش لدرجه إنك تطعن في عفتي وحيائي؟! مش لدرجه إنك تشك فيا يا إسلام ؟ ده أنا قولت يا راجل إنك خلاص عرفنتي طول الفترة دي وبقيت أكثر واحد في الدنيا فاهمني ؟ خلاص كده من أقل غلظه بقيت وحشه وأستاهل الضرب كمان ؟ يا—ا خساره يا إسلام يا خساره !!

ثم أمسكت بلحيته وجذبتها بضيق وقالت :

- ما إتكسفتش من دي يا إسلام ؟ ما إتكسفتش تكون بالشكل ده وتضرب مراتك الحامل كده ؟ ما إتكسفتش تكون المفروض ملتزم وتعمل كده هاه ؟ طب حتي يا راجل فهمني وقولي إنتي غلطانة ولو مسمعتش الكلام ساعتها إبقى إضرب لكن مش أول مره كده .. بس ثانيه ثانيه !! تضرب ليه أصلا ؟ هو في راجل بيخاف ربنا مايصدق يمسك علي مراته غلظه ويعمل فيها كده !!

ثم نظرت له بحده وقالت :

- قول يا إسلام اللي عندك ، قول براحتك خالص أنا مش همانعك ، قول كل اللي جواك وأنا مش هظلمك ، بس اللي جوايا بقي من ناحيتك ملكش دعوه بيه

أخذ يتحسس وجهه بتوتر وقال بحزن :

- طيب بصي يا سلمى ، أقسم بالله ما كان قصدي أمد إيدي عليكي ومتقوليش ضربتني دي لأنني مستحيل أعمل كده ، كلمتك دي بتقتلني أصلا ، أنا بس كنت بحاول أوقفك لما كنتي هتمشي وتسيبيني بكلم نفسي ومعرفش إيه اللي حصل ولقيتك واقعه علي الأرض بعدها ، مكانش ينفع تسيبني وتمشي يا سلمى ، كنتي حتي إستني لما أخلص كلامي وبعدين إمشي

قاطعته علي الفور :

- بقيت أنا اللي غلطانة دلوقتي يعني !!؟

أوما برأسه نفيا وقال :

- مش إنتي اللي غلطانة ولا حاجه ، أنا عارف إنني مكانش ينفع أعمل كده مهما عصبتيني بس أنا بقولك اللي حصل ، وكمان أنا بئق فيكي أكثر ما بئق في نفسي أصلا بس بجد مش عارف أنا قولت كده إزاي؟! انا أصلا مشوفتش حاجه غير الراجل أستغفر الله العظيم ده وهو عمال يضحك وكنت جايب أخري منه وهاجي أتخايق معاه بس قصرت الشر ومشيت وأنا بغلي لأنك عارفه أنا بغير عليكي إزاي فمعرفتش أمسك نفسي بقي ساعتها ، بصي أنا مش عارف أعتذرلك إزاي بس والله أي حاجه

هتقولي عليها أنا هعملها بس بالله عليك ما تزعلي .. أنا عارف إني بطلب منك حاجة صعبه ويمكن  
مستحيله بس لو عاوزاني أعمل في نفسي زي ما عملت فيكي أنا موافق ولو عاوزه أي حاجة تاني  
قوليلي عليها وأنا برضو هعملها

نظرت له بصرامه وقالت :

- هتعمل أي حاجة هقولك عليها يعني ؟

أوما برأسه مؤكدا وقال :

- أيوه

قالت علي الفور :

- إمشي

- إيه ؟

- بقولك إمشي !

زفر بوجع وقال :

- يا سلمى بالله عليك يا تعملي كده

نظرت للأرض وقالت بهمس :

- إنت مش قولت اللي عندك ؟ إتفضل بقي

قال علي الفور :

- طب قولي إنتي كمان اللي عندك ، أنا مش عايزك تشيلي جواكي حاجة من ناحيتي ، صوتي وزعقي  
وظلعي كل اللي جواكي بس بلاش تشيلي في نفسك وبعدين تكرهيني زي ما كنتي بتقولي في أيام  
الخطوبه

إبتسمت بألم وقالت :

- من أول مره شديت معاك فيها إتضربت !! لكن مع ذلك إتكلمت تاني أهو بس موعدكش إن ده  
هيحصل علطول ، مره في مره يا إسلام ومش هتلاقيني بتكلم خالص وهشيل جوايا وبس ، أنا قولتك

النقطة دي في الخطوبه لأنني أكثر واحده عارفه نفسي ، قوتلك إنني ببقى صافيه علطول بس مع القسوه بخاف ومش بعرف أتكلم بعدها لأن بالنسبالي الإنسان القاسي ده عمره ما هيحس بحد فبشيل جوايا أحسن

وأنا خوفت منك يا إسلام ، عارف يعني إيه خوفت منك ؟ يعني كنت حاسه إن اللي واقف بيز عقلي ده شيطان ، مش هو أبدا إسلام اللي لما بيثوفني تعبانه بيحن عليا ويقرالي قرآن ، حسيت إن اللي بيضربني ده واحد تاني غيرك ، مش ده الإنسان اللي إخترته ياخذ بإيدي للجنه ، مش إنت اللي عملت كده يا إسلام ، مش معقوله تكون إنت .

إقترب منها ووضع يده علي البقع الزرقاء الموجوده في أعلي ذراعها وقال بحزن :

- مش أنا اللي عملت دي يا سلمي ، والله ما كان قصدي ، أنا عارف إن الشيطان بيستغل الأوقات دي ويشعلها وبغبائي مشيت وراه وخليته عماني ومبقيتش حاسس أنا بعمل إيه

ثم حاول الإبتسام وقال :

- بس خلاص والله أنا عرفت هعمل إيه لو غضبت ، الشيخ النهارده قالي علي الحل وبعد كده لو إتضايقت هبعد عنك خالص وأقعد استعيذ بالله من الشيطان وأستغفر لحد ما أهدي وبعدين نكمل نقاشنا ، وإنتي زي ما طول عمرك بتساعديني يا سلمي عاوزه تساعديني في الحكاية دي كمان علشان أبطلها خالص ، لما تحسي إنني هبدأ أتعصب حاولي تهديني مش تزعلي زياده ونحاول بقدر الإمكان ننهي النقاش أو نأجله لوقت تاني ، ماشي يا سلمي ؟

صمتت ولم تتحدث بينما نظر لها هو بأسف وقال :

- سلمي إنتي وعدتيني إنك تاخدي بإيدي للجنه وإنتي عارفه إنني لسه في بداية طريق الإلتزام وعمري ما هقدر أغير كل حاجه جوايا في يوم واحد علشان كده أوعي تزعلي مني بالله عليك أو تحسي إنك مش هتقدري تكلمي معايا الطريق .. أنا عارف إن الخطبه كانت كبيره واني كنت قاسي بزياده بس كمان عارف إنك قلبك من جوه أبيض أووي وبتسامحي أي حد ، وعارف كمان إنك عمرك ما هتتسي الأيام الحلوه اللي عيشناها مع بعض ولا لذة القرب من ربنا اللي حسيناها سوا ولا كلامنا عن مستقبلنا مع بعض وعن ولادنا ، وعارف كمان إنك موجوعه مني بس أنا هفضل وراكي بقي لحد ما تسامحيني ويمكن تيجي عليك أي لحظه وتحسي إن كان ليا عذري ، وبعد إنك متقوليش كلمة ضربتني دي تاني علشان أنا إيدي تتشل قبل ما أفكر أضربك ، ماشي يا سلمي ؟ وأنا برضو هصلي كتير وأدعي ربنا يسامحني علي اللي حصل ده ويريح قلبك ويلقي محبتي في قلبك من تاني ومتأكد إن ربنا هيرجعنا أحسن من الأول بإذن الله ..

ثم أقترب منها ونظر لها بحنان ونهض علي الفور وهو يقول :

- أنا هروح الجامع وهسنتي المغرب هناك وهبقي أجي بعد الصلاة علشان أريحك مني شويه ، بالله عليك فكري في كلامي تاني وحاولي تفتكري كل حاجة حلوه عملناها سوا وبلاش تخلي الشيطان يبوظ حياتنا ، كفايه بقي إنه ضحك علينا وخلانا نعمل اللي حصل ده ، بس بجد مش هسمحله تاني يوقعنا في بعض وربنا هيقويني وهتحمل بإذن الله ، أنا واثق .. يلا يا سلمي سلام عليكم

- وحشتيني علي فكره

قالها خالد عندما إتصل علي هند بعد عودته من عمله مباشرة فأجابت بخجل :

- ربنا يخليك يا خالد

ضحك قائلا :

- لسه برضو بتتكسفي ؟ يابنتي ده أنا هبقي جوزك بعد كام شهر ، عيشي حياتك يعني وفكيها كده

إبتسمت قائله :

- منا فكاها أهو

قال علي الفور :

- طيب عاوزين نخرج سوا

قالت بسرعه البرق :

- لالالا خروج إيه ؟ إنسي الكلام ده خالص

أجابها بحزن مصطنع :

- ليه بس يا هنود ؟ إنتي بتخافي مني ولا إيه ؟

- متزعلش يا خالد مش قصدي والله ، وطبعاً بثق فيك وإلا مكنتش إتخطبتك ، بس إسلام مش هيوافق علي كده

- طيب ومين قالك إن إحنا هنقول لإسلام ؟ هو ماله بيكي أصلا ؟

تعجبت قائله :

- إنت بتقول إيه يا خالد ؟ إسلام أخويا الكبير وهو اللي مسئول عني

إبتسم بمكر وقال :

- توت توت إنتي بس اللي مسنوله عن نفسك يا هنود ، إنتي مش صغيره علشان تحتاجي حد يقولك  
تعملي إيه ومتعمليش إيه ، وبعدين إسلام أخوكي ده يادوب أكبر منك بسنتين يعني أنا أكبر منه أصلا  
وكمان هبقي جوزك يبقي المفروض تسمعي كلامي أنا مش كلامه هو !!

تنهدت بحيره وقالت :

- لأ برضو مش هينفع أعمل حاجه من وراهم يا خالد ، أنا اه بحبك بس مش لدرجه إني أعمل حاجه  
من ورا أهلي يعني

- طيب ما إنتي بتكلميني من وراهم يا هنود ، إيه الفرق بقي ؟

- خالد وبعدين ؟ ما تحاولش تحسني بالذنب ، أنا كلمتك علشان حقك تتعرف عليا وإسلام مش  
راضي لكن غير كده لأ

- ماشي خلاص يا ستي براحتك ، بس كمان أخوكي اللي بيفضل قاعدلنا ده وانا عندكم بيزهقتي

- ليه بس يا خالد ؟ وهو بيعملك إيه يعني ؟

- يا بنتي مش ببقي عارف أتكلم ولا أضحك حتي ، بحس إنه طابق علي نفسي

تنهدت بحزن وقالت :

- معلى بقي يا خالد إستحمل شويه ، وبعدين لما نكتب الكتاب هتبقي تقعد براحتك معايا ومحدث  
هيكلمك

- اه اه طبعا

أخذت تلعب في خصلات شعرها بدلال وقالت :

- بقولك إيه يا خالد ؟ ما تيجي نسرع موضوع كتب الكتاب ده علشان تيجي براحتك وكمان محسش  
بالذنب وأنا بكلمك من وراهم كده

- إيه يا هنود مش لما نتعرف علي بعض الأول

قالت باستنكار :

- نعم يا خويا ؟ وإحنا ده كله لسه متعرفناش يا خالد ؟ ده إحنا كل يوم بنسهر علي التليفون طول الليل !!

- إيه يا عم ده ، ما إنت طلعت شرس أهو وإحنا منعرفش ، ماشي يا عم الحاج نكتب الكتاب وماله بس برضو لما نتعود علي بعض الأول

- إمتي يعني ؟

إبتسم بخبت وقال :

- دي حاجه في إيدك إنتي بقي !!

---

بعد صلاة المغرب وجدت سلمي هاتفها يعلن لها وصول رسالة جديده ، أمسكت به ورأت الشاشة تنير بإسم " جنتي " فضحكت بسخريه وقامت بفتحها وكان محتواها :

" انا رايح عند ماما علشان أطمئن عليها هي وهند وكمان علشان أريحك مني شويه ، لو إحتجتني حاجه كلميني علطول .. وسامحيني "

تهتدت تنهيدة قويه أخرجت كل ما بداخلها وقالت هامسه :

- ربنا يسامحك يا إسلام

ثم ألقت هاتفها أمامها وجلست علي حافة الفراش وبدأت تقرأ في كتاب الله لترتاح قليلا ، أذنت العشاء فقامت بأداء صلاتها ثم فتحت حاسبها قليلا لتتحدث مع حفصه ، أرسلت لها رسالة قصيره وكان محتواها :

- حفصه أول ما تيجي كلميني بسرعه جدااااا الله يخليكي ماشي ؟ محتاجالك أوووي

وعلي الفور وجدت الرد :

- أنا موجوده يا سلمي ، قوليلي مالك خير ؟ هروح بس أضرب الواد اللي عاوز يصحي أخته ده وأجيبك علطول عقبال ما تكتبي ..

- جوزي ضربني يا حفصه وأنا موجوعه أووي ومش عارفه أعمل إيه

وبعد دقائق وجدت الرد :

- نعم !! ضربك إزاي يعني إن شاء الله ؟ إنتي مش بتقولي إن جوزك راجل كويس وبيخاف ربنا ؟

- بصي هو مش ضربني بمعنى ضرب يعني ، لكن أنا عملت حاجة غلط فكنا بنتناقش فيها وهو زعقلي فأنا كنت هسيبه وأمشي لقيته شدني وبيرجعني ورا جامد واتخبطت في الدولاب وإيدي إزقرت وكانت هتتخلع من مكانها تقريبا ، أنا دلوقتي مصدومه ومش عارفه هو عمل كده إزاي ؟ بجد خوفت منه أووي وحسيت إني بكرهه بس دلوقتي هديت شويه ولقيتني برضو لسه بحبه بس موجوعه منه وخايفه

- حبيبتي يا سلمى ألف سلامه عليكي ، طيب الحاجه دي تستاهل أوي كده ؟ وكمان هو كان قاصد ولا إيه ؟ يعني ممكن تكون لحظة شيطان وعدت ، أو ممكن يكون هو متضايق أصلا من حاجة وإنتي لما غطتي كملتي عليه ، كمان مكانش ينفع تسيبيه بيتكلم وتمشي كده لأنه طبعا ممكن يغضب أكثر زي ما حصل كده

- بصي بصراحه هو إعتذرلي كتير وأنا حاسه إنه مكانش يقصد خالص وفعلا أنا غلظت لما كنت همشي وأسيبه بس والله مكنش قصدي حاجة ، أنا بس قولتله نكمل بعدين لأنني تعبت ، وكمان الحاجه اللي أنا عملتها معتقدش إنها تستاهل إنه يضربني عليها يعني لأنني قولتله إني ندمت عليها وبستغفر ربنا وكده

- طيب إنت حاسه إنه صادق في الإعتذار ده ؟ وكمان مش يمكن في حاجة أصلا مزعلاه في شغله مثلا او مع أهله

- أيوه صادق جدا وأنا مصدقاه بس برضو مش قادره أسامحه ولا أنسي شكله وهو بيعمل فيا كده ، كمان مفيش مشكله في شغله ولا مع أهله ولا حاجة الحمد لله .

صمتت قليلا ثم كتبت :

عارفه يا حفصه لما تكوني بتحبي حد أووي وتحسي إن أخيرا ربنا عوضك بيه عن كل حاجة وحشه شوفتيها في حياتك وفجأة تلاقيه بقي قاسي اووي كده تحسي بجد إنك كرهتي كل حاجة بما فيهم هو

- لا يا سلمى إستهدي بالله كده ، لو كنتي فاكراه إنك هتعيشي حياة ورديه علي طول تبقي غطانه ، مهما كنتي كويسه وجوزك كمان كويس لازم في أي وقت يحصل بينكم مشاكل لأن الحياة مليانه ضغوط وساعات كتير الواحد مش بيقدر يستحمل فبيطلع غضبه كله علي أقرب الناس ليه اللي هي



مراته ، بس أهم حاجة انه يعرف غلظه ده وميكررهوش تاني وكمان يعتذر بصدق ويندم علي الحاجه دي

- يعني إنتي يا حفصه بيحصل بينك وبين جوزك مشاكل ؟

- بيبيبي كثير وخصوصا لأن هنا الظروف صعبه اووي وساعات كثير إيها ب يرجع من الشغل تعبنا ومش طايق أي حاجه لكن انا بقي بعمل حاجه حلوه تخليه يهدي خالص ويروق ويكلمني في اللي مضايقه بعدين بعد ما يهدي

- قولي بسرعه الله يخليكي

- انا بقعد ساعتها أدعيه كثير إن ربنا يجعل نعمته علي بردا وسلاما كما جعل النار بردا وسلاما علي إبراهيم ويلقي محبتي في قلبه ويحنن قلبه عليا ويجعلني من أقرب الناس إليه ،

لما تلاقيه بيتخاف معاكي إفضلي ادعي باستمرار وحاولي تكوني هاديه وبلاش تعصبية وبإذن الله عطلول هتلاقيه هدي ، بعدها بقي عاتبيه وقوليله إنتي زعلانه منه في إيه وكده .. ولو هو فعلا شخص بيخاف ربنا زي ما بتقولي هتلاقيه عطلول رجلك وإعتذر وكمان هتعلي في نظره أووي وبإذن الله ربنا يقربكم من بعض أكثر وترجعوا أحسن من الاول ..

- حاضر يا حفصه هحاول ، ربنا يخليكي ليا يارب ، ادعلي اعرف أعمل زي ما بتقولي كده علشان بجد موجوده منه أووي ومش متخيله لحد دلوقتي إن ده حصل بيني وبين الشخص الوحيد اللي حبيته في حياتي ، يلا الحمد لله

- ربنا يريح قلبك ياسلمي

- يارب يا حبيبي ، يلا بقي روعي شوفي الواد إبنك بدل ما يصحي أخته تاني ، وعلي فكره إسم مسلم ده حلو اووي ربنا يخليهولك

- آمين يارب

أغلقت سلمى الحاسب وجلست تفكر في كلام حفصه ، بعد قليل سمعت رنين هاتفها المحمول فأجابت علي الفور :

- السلام عليكم

- وعليكم السلام ورحمة الله وبركاته ، إزيك يا سلمى يا حبيبي عامله إيه ؟

- الحمد لله تمام ، مين معايا ؟



إرتمت سلمي علي الفراش وظلت تنظر للهاتف بذهول ، شردت قليلا ثم قالت هامسه :

- معقوله أنسي حاجه زي كده ؟!! طب يا تري حصل إيه ؟ طب هو ممكن اللي إسلام عمله النهارده ده كان بخصوص الموضوع ده ؟ طب بس هو إتخايق معايا علشان حكاية أستاذ سيد دي

نظرت للجانب الآخر وقالت بقلق :

- طب هو أصلا إيه اللي جابه المدرسه عندي ؟ وإيه اللي رجعه من الشغل بدري النهارده بالذات ؟ هو ممكن يكون متثبتش وعلشان كده خرج بدري ؟ طب بس حتي لو متثبتش إيه اللي هيرجعه بدري ؟

تحسست وجهها وقالت بتوتر :

- معقوله يكون إتخايق معاها بسبب الموضوع ده ؟ أيوه أكيد إتخايق معاها لأنه كان بيقلولي مش هستحمل الظلم أكثر من كده ، وممكن كمان يكون خاف بييجي البيت لوحده ليعمل في نفسه حاجه فقرر بييجي ياخدني وشاف اللي شافه بقي ..

تههدت بعمق ونظرت للمرآه قائله بصرامه :

- أيوه أكيد ده اللي حصل ، يعني هو متخايقش معايا بسبب موضوع أستاذ سيد ده لأنه بيقلولي مكانش شايف كويس أصلا ، أكيد من الضغط اللي عليه مقدرش يمسك نفسه لما شافني أنا كمان بعمل كده فراح مطلعاه فيا أنا بقي ، يياها يا إسلام شيلت ده كله جواك ومقولتليش ليه ؟ ثم نظرت لذراعها بحزن وقالت :

- هان عليك تعمل فيا كده يا إسلام ؟ هان عليك تخوفني منك بالطريقه دي ؟!!

صمتت قليلا ثم قالت هامسه :

- طب وهو كان هيعمل إيه يعني ؟ ما أنا برضو غلظت لما كنت هسيبيه وأمشي وهو مكانش قصده ، يوه بقي بس ده قالي كلام صعب أوووي ، بس برضو هو إعتذر وقال مكانش يقصد وبصراحه أنا مصدقاه

نهضت من مكانها وقالت بإصرار :

- أنا هروح أصلي دلوقتي وأدعي ربنا يصلح الحال ولما إسلام بييجي هكلمه تاني وأشوف

عاد إسلام إلى منزله ودخل غرفته فوجد سلمي جالسه علي الفراش ، إقترب من الفراش فوجدها تنهض من مكانها فقال علي الفور :

- خليكي خليكي أنا مش هعملك حاجه ، أنا هنام علطول مفيش داعي تطلعي

قفز من مكانه علي الفور وإستلقي بجوار الحائط وجذب الغطاء علي وجهه وأغمض عينيه وهو يقول بهمس :

- يارب تعبت

كانت سلمي ستحاول فتح الحديث معه لتسأله عما حدث ولكنها أيضا كانت تشعر بالوجع فأحست بالراحة مما فعل ونامت هي الأخرى

وفي الصباح إستيقظ إسلام من نومه وإرتدي ملبسه في هدوء تام وأمسك بمقبض الباب ليفتحه ويذهب لعمله ، سمع أصوات أقدام سلمي وهي تهول بإتجاهه فتوقف للحظه ، وقفت أمامه وإبتسمت وهي تمد يدها بشئ ما لتعطيه إياه ، نظر لها بتعجب وقال :

- ليه دي ؟

نظرت للأرض وإبتسمت قائله :

- اللحيه بتاعتك منكوشه .. سرحها

أمسك منها المشط وأخذ يمشط لحيته وهو ينظر لها بحنان ويقول :

- ربنا يخليكي ليا

إبتسمت وتركته وذهبت لغرفتها بينما أمسك هو بالمقبض مره آخري وغادر علي الفور ..

بعدها يقرب من العشر دقائق وجدته عائدا مره آخري فإنتابها الفضول ولكنها لم تسأل فوجدته يقول بمرح :

- نسيت حاجه بس .. متقلقيش

وضع يده في خزانته وأخرج منها شئ ما وذهب مره آخري ، إرتمت سلمي علي الفراش وظلت تتذكر كل موقف أحبته من إسلام كمحاولة منها لمسامحته ، بعد قليل نهضت لأداء صلاة الضحي وظلت تدعو الله أن يريح قلبها ويزل ما فيه من بغض ويجعلها من أقرب الناس لقلب زوجها ..

وبعد ساعه تقريبا عاد إسلام مره آخري فشعرت سلمي بالقلق والفضول معا ولكنها وجدته يقف أمامها مباشرة ويعطيها ورقة ما وهو مبتهج ، أمسكت بها بعدم فهم وقالت :

- إيه دي ؟

إبتسم قائلا :

- شوفيها

وعلي الفور قامت بفتحها ونظرت له بذهول مزوج بالسعاده وقالت :

- إيه ده ؟ إنت عملت صدقه باسمي ؟

أوما برأسه إيجابا وقال هامسا :

- حسيت إن أحسن حاجه ممكن أهديهاك هي الثواب ، وكمان غيببت من الشغل النهارده وهقعد معاك حتي لو مش هنتكلم خالص ، متزعليش بقي علشان بجد مبقيتش عارف أستحمل إيه ولا إيه ؟

ثم نظر لها بحب وقال :

- أنا متأكد إن الهديه دي هتفرحك وهتخليكي تسامحيني

أمسكته من يده وأجلسته بجوارها وأشارت إلي يدها الزرقاء وقالت :

- هعملك واحده زي دي وبعدين أسامحك

قفز من مكانه بفرحه وقال بسعاده :

- طالما قولتي كده يبقي سامحيتيني صح ؟

نظرت له بحنان وقالت :

- الحب اللي أنا شيلاهولك جوايا يا إسلام مش مخليني أعرف أحسن حاجه غير إني أسامحك ، رغم إني خوفت جدا منك إمبراح بس برضو مش عارفه أحسن بحاجه غير إني حباك ومصدقه كل كلمها

قولتها وحاسه إنها طالعه من جواك اوووي وإنك بجد مكنتش تقصد ، علشان كده أنا مش زعلانه  
وكمان أسفه لأنني عصبتك وضايقتك أكثر ما إنت متضايق

ثم إبتسمت وهي تقول :

- مسامحك يا رفيقي للجنه ومش هسيبك أبدا بإذن الله ، بس بالله عليك يا إسلام ما تعمل كده تاني  
علشان مش عاوزه أخاف او أبعد عنك بعد كده .. ماشي ؟

- ماشي يا رفيقتي للجنه

صمتت قليلا ثم نظرت له بحزن وقالت :

- ليه ما قولتليش إنك متثبتتش ؟ علي الأقل كنت أعذرك

زفر بضيق وقال :

- مكنتش عاوز أزعلك

ثم إنتبه فجأة وقال علي الفور :

- بس إنتي عرفتي منين صحيح ؟

إبتسمت قائله :

- نهني إتصلت بيا وكانت بتسأل علي تثبيتك وأنا إستنتجت بقي إنك متثبتتش علشان كده كنت متعصب  
بالطريقه دي

قال بسعاده :

- حبيبي يا فاروق ، حتي وانت هناك فاكروني

تنحنحت بإحراج وقالت :

- أنا أسفه إنني نسيت

ثم قالت علي الفور :

- يعني كل اللي حصل ده بسبب موضوع التثبيت مش بسببي أنا صح ؟

أوما برأسه إجابا وقال :

- أيوه للأسف الشيطان عرف يستغل النقطة دي كويس أووي وانا بغبائي مشيت وراه ، بس مش هسمحله يعمل كده معايا تاني بإذن الله

تههدت بأريحيه وقالت :

- يعني إنت لسه بتثق فيا صح ؟

مسح علي رأسها بحنان وقال :

- يا بنتي أنا مقدرش مثقش فيكي أصلا لأنني عارف إنتي أد إيه بتخافي من ربنا ومتأكد إن اللي حصل ده غلطه ومش هتكرريها تاني وكمان متأكد إنك ندمتي بجد وإستغفرتي

ثم رفع حاجبه قائلا :

- وبعد كده متقفيش مع الراجل ده تاني ماشي ؟

إبتسمت قائله :

- حاضر والله ، انا أصلا حرمت

ثم ضحكت وهي تقول :

- إحتمال لو الموضوع ده إتكور تاني تقتلني أصلا مش هتكون مجرد خبطه

نظر إليها وهو يشير للمروحة وقال محذرا :

- شايفه دي ؟ هتلاقيكي متعلقه عليها إنتي وإبنك

عادت للخلف قليلا وقالت بخوف مصطنع :

- حاضر يا حاض ظابط ، أنا أسف أباشا ، غلطه ولن تتكرر بإذن الله أحاطها بذراعه وهو يقول بكل سعادة :

- اللهم لك الحمد

بينما أغمضت هي عينيها بعدما أحست بالراحة وقالت :

- الحمد لله حتي يبلغ الحمد منتهاه

ظلا علي هذه الحالة بضع دقائق وكلاهما يحمد الله علي إنتهاء هذه المشكله علي خير ، بعدها بقليل قالت سلمي بإبتسامتها المعتاده :

- إحكيلي بقي بالتفصيل إيه اللي حصل في الشركه

إعتدل إسلام في جلسته وتنهّد بألم وبدأ يقص عليها ما حدث ، إنتهي من كلامه فوجدها تربت علي كتفه وتقول بمواساه :

- معلش يا إسلام ، قدر الله وما شاء فعل ، لو ليك نصيب فيه كنت هتاخده وإحنا راضيين بأي مرتب وحامدين ربنا وشاكرينه

تنهّد بوجع وقال :

- الحمد لله علي كل شئ ، بس برضو الظلم وحش أووي يا سلمي ، يعني أنا كنت بقول الحمد لله مرتبي هيزيد شويه علشان أعرف أصرف علي الطفل اللي جاي في الطريق ده وكنت متطمئن علي الآخر لكن الحمد لله مطلعش من نصيبي ، عارفه مش ده بس اللي يضايق ، ولكن كمان لما يجيلك واحد لسه ميعرفش حاجه في الشغل أصلا وياخذ حقك وكمان يبصلك بتعالى وغرور كده علشان هو معاه واسطه يعني ده اللي بيوجع اوووي ، انا متأكد إن رامي ده مش هيعرف يشتغل زي مروان ولا زيي بس هنقول إيه بقي حسبى الله ونعم الوكيل

أمسكته من ذراعيه ونظرت له بصرامه وقالت :

- إسلام قدوتي إيمانه راح فين ؟ المؤمن بجد بيتعرف في الاوقات دي يا إسلام وإنت إن شاء الله مؤمن ولازم تحمد ربنا مهما حصل وتعرف إن أي حاجه بتحصلنا فيها الخير لينا بس أكيد إحنا مش عارفين الحكمة فين ؟ كمان ربنا قادر يرزقنا بمصاريف الطفل ده لأن اللي خلقه قادر يحفظه ويقويننا علي تربيته ويرزقنا برزقه ، دي أول حاجه

- تاني حاجه بقي : بالنسبه للظلم ده ف للأسف الموضوع منتشر جداا في بلدنا بطريقه غير طبيعيه وإحنا المفروض نواجهه بس حقيقي مبقيتش عارفه هل الإنسان المفروض يواجه لوحده حتي لو هيموت باعتبار إن ده منكر ولازم نغيره ؟ ولا نسكت باعتبار إننا مش هنقدر نعمل حاجه لوحدها وننكر المنكر ده بقلبنا بس ؟



ثم نظرت له بحزن وقالت :

- أنت شايف إيه يا إسلام ؟ هتعمل إيه في الموضوع ده ؟

أخذ يمرر أصابعه بين خصلات شعره في حيره ثم قال :

- حقيقي مبقيتش عارف حاجه ، بس متهيألي مش هقدر أسكت أكثر من كده ، لو لقيت بديل هسيب الشركة دي فوراً ولو ملقيتش يبقي هفضل قاعد فيها وأحاول بقدر الإمكان أفهم الدنيا ماشيه إزاي وأتكلّم مع زمالي وكده يمكن نقدر نعمل حاجه ، أكيد هنقدر يا سلمي حتي ولو طال الزمن ، بس دلوقتي مش قدامي حاجه غير إني أروح بكره وأكمل شغلي عادي لأنني ملتزم بمصاريف ومش هينفع أسيب الشركة

إبتسمت قائله :

- ربنا معاك يا إسلام ، وعندك حق مهما طال الظلم هيجيله يوم وهيسقط

- يارب يا سلمي

صمت قليلاً ثم قال :

- في حاجه كمان بفكر فيها

- إيه هي ؟

- بفكر أروح أعتذر للمدير ، حاسس إني زودتها معاه أووي وخصوصاً إنه أد أبويا الله يرحمه ، حتي لو كان ظالمني بس برضو في الأول وفي الآخر اللي أنا عملته ده عمره ما كان من أخلاق المسلمين وأنا مكانش ينفع أتكلّم معاه كده أصلاً

إبتسمت بفخر وقالت :

- كنت هقولك تعمل كده أصلاً ، إحنا لازم نتعامل بأخلاقنا مهما واجهنا من صعوبات ، الجنه مش ببلاش بقي

- عندك حق ، الجنه مش ببلاش ، هروح أعتذرله بكره بإذن الله

ثم تنهد بإحراج وقال :

- أنا حاسس إنني كنت متوحش إمبراح ، حاسس إنني مكنتش أنا أصلا ، بجد مكسوف من نفسي أووي لأن دي عمرها ما كانت أخلاق المسلمين ، أسأل الله أن يغفر لي ويرحمني ويعفو عني

وبعد شهرين :

عاد فاروق من رحلة العمره وذهبت زوجته إلي جامعته وحاولت التوفيق بين الجامعه والمنزل بقدر المستطاع وكان فاروق يساعدها في ذلك ..

ذهبت سلمي للطيبه وعلمت أن المولوده ستكون فتاة بإذن الله فقررت أن تسميها " حياء " حتي تكون إسم علي مسمي ووافقها إسلام علي ذلك ..

إعتذر إسلام لمديره في العمل وإتخذ قراره بأن يتعامل بأخلاق محمدية ولا يسمح للشيطان أبدا أن يستغل أي موقف شده ويوقعه في الخطأ ..

تعلقت هند بخالد أكثر وأحبته بجنون لأنه علم جيدا المدخل الذي يستطيع من خلاله سرقة قلبها والسيطره عليه وعلي تفكيرها تماما ...

إمتلأ قلب خالد حقد وغضب علي إسلام بسبب جلساته المستمره معها ولأنه لا يستطيع أن يجلس بأريحيه كما يحب ولكن هل ياتري سيستمر الوضع طويلا ؟

- إسلام إحقني بسرعه

قالتها سلمي وهي تهرول بإتجاه غرفة نومها وتصرخ بفرع ، إنتفض إسلام من مكانه وقال بخوف :

- في إيه يا سلمي ؟

أخذت تتنفس بصعوبه وقالت بتوتر :

- ولاء بتقولي بابا تعبان أووي ولازم يروح المستشفى حالا ، أنا خايفه أووي يا إسلام

قفز إسلام من مكانه وهرول بإتجاه الباب وقال :

- حاضر هروح أشوفه حالا

أمسكته من يده بقوه وقالت :

- إستني أنا لازم أجي معاك

قال بهدوء :

- هروح أنا بسرعه وأبقي أتصل بيكي أظمنك إن شاء الله

- لا يا إسلام أنا لازم أروح معاك

جلس مكانه وقال بإستسلام :

- طب يلا إلبسي بسرعه بقي عقبال ما أعتذر لخالد

وبالفعل قام إسلام بالإتصال علي خالد وقال بتوتر :

- السلام عليكم يا خالد

- و عليكم السلام يا إسلام ، إزيك ؟

- الحمد لله تمام ، معلىش يا خالد أنا بعذرلك بس حمايا تعبان أوي ولازم أروح معاه المستشفى دلوقتي فمعلىش مش هينفع تيجي النهارده ، بإذن الله أول ما أرجع هتصل بيك ونحدد يوم بديل ماشي ؟

- الف سلامة عليه ، ماشي مفيش مشكله ، إبقي طمني

- بإذن الله ، يلى سلام عليكم

وعلي الفور قام بالإتصال بهند وأخبرها بأن خالد لن يأتي اليوم بسبب مرض والد سلمى وعدم إمكانية حضور إسلام للجلوس معهما ، طلب إسلام الإسعاف لوالد سلمى وأخذوه للمشفى وجلسوا جميعا هناك بانتظار تقرير الطبيب .. بعدما يقرب من الساعة إتصل خالد علي هند وقال بحماس :

- هنود باشا

إبتسمت قائله :

- أيون ، معلىش بقي مش هنشوف بعض النهارده ، ربنا يقوم بابا سلمى بالسلامه

ضحك بمكر وقال :

- إفتح الباب يا باشا علشان أنا واقف تحت

إتسعت عيناها وقالت بدهشه :

- تحت فين يا خالد ؟

تنهد بسعاده وقال :

- تحت بلكونتك يا ستي ، يلا إلسي بسرعه بقي وإتحيلي

شهقت بخوف وقالت :

- مش هينفع طبعاً يا خالد ، ما إنت عارف إن إسلام مش موجود

زفر بملل وقال :

- عارف يا ستي عارف ، بس كمان عارف إن مامتك موجوده يبقي قشطه بقي ، مفيش خلوه ولا  
مش عارف إيه زي ما بتقولوا كده

جلست مكانها وقالت بتفكير :

- ماما ؟ متهيألي لازم راجل يا خالد ، وبعدين إسلام لو عرف هتبقي مصيبه

قال بحزن مصطنع :

- كده يعني يا هند ؟ هتطرديني من بيتك بعد ما جيت ؟ وكمان هو أنا هعملك إيه يعني ؟ ماهو اللي  
كان بيحصل قدام أخوكي هيحصل قدام مامتك ؟ ولا إنتي بقي مش بتحبيني ومش واثقه فيا ؟

- يا خالد والله ما قصدي

- ماشي يا هند شكرا

- يـوه بقي يا خالد مش قصدي بجد ، بس خايفه إسلام يزعل

- خلاص يا هند براحتك ، إنزلي طيب خدي الهديه اللي جايبهالك وأطلي تاني ومش عاوز منك حاجه  
يا ستي

إبتسمت بسعاده وقالت :

- هديه كمان ؟ ربنا يخليك يا خالد ، طيب بص إستني هقول لماما

إبتسم خالد بانتصار بينما ذهبت هند لوالدتها وقالت بحيره :

- ماما خالد جه تحت وإسلام لسه مجاش أعمل إيه ؟ أخليه يطلع ولا يمشي ؟

نظرت لها الأم بتعجب وقالت :

- وده سؤال برضو يا بنتي ، أتصلي بأخوكي وإستعجيله بسرعه علشان خطيبك ميفضلش واقف في الشارع كتير

تنحنت بإحراج وقالت :

- ماهو إسلام إحتمال يتأخر جامد أو ميحيش أصلا علشان حماه تعبان وهو راح معاه المستشفى

شهقت الأم بخوف وقالت :

- تعب إمتي يا بنتي ؟ وماقولتيليش ليه ؟

- تعب من شويه وإسلام كلمني وقالني وإنتي كنتي بتصلي وبعدها نسيت أقولك

- لا حول ولا قوة إلا بالله ، طيب معلش يا بنتي إعتذري لخطيبك بقي وقوليله ييجي يوم تاني

عادت هند لغرفتها بملل وإتصلت بخالد وأخبرته بما قالت والدتها فإبتسم قائلا :

- طيب إلبسي إنتي وأنا هتصرف

ثم إستجمع شجاعته وصعد الدرج وطرق الباب بخفه ، إرتدت الأم حجابها وفتحت الباب فوجدته يبتسم لها بحنان ويقول :

- السلام عليكم يا طنط ، معلش أنا أسف لو أز عجتك

إبتسمت بإحراج وقالت :

- ولا يهكم يابني ، بس معلش إسلام مش هينفع ييجي النهارده علشان يقابلك يعني

أوما برأسه إيجابا وقال برضا :

- أنا عارف يا طنط ، أنا بس بستأذن حضرتك هستني هند لحد ما تطلع علشان تاخذ مني ده وبعدين همشي علطول ، ولو حضرتك هتضايقي أنا ممكن أستناها تحت عادي

قالت بتوتر :

- أصل ...

قاطعها علي الفور :

- حضرتك برضو ممكن تسيبي باب الشقه مفتوح لو تحبي

تنهدت بإستسلام وقالت :

- طيب إتفضل يابني

دخل خالد بسعاده وجلس في نهاية الصاله بينما دخلت الأم علي هند وقالت بغضب :

- إخلصي بسرعه روعي شوفي خطيبك جايبك إيه علشان يمشي مش ناقصين فضايح  
قالت هند بفرحه :

- هو دخل ؟

زفرت بضيق وقالت :

- أخرجني ومعرفيش أقوله إيه فدخلته بس إخلصي خليه يمشي علطول ميصحش كده

قالت علي الفور :

- حاضر يا ماما

خرجت بهيئتها الممتازة وجلست بجواره بينما نظر لها هو بحب ومد لها يده بباقة الورد وقال :

- إتفضلي ، كل سنه وإنتي طيبه

إبتسمت قائله بعدم فهم :

- وانت طيب بس بمناسبة إيه ؟

- من غير مناسبة ، ولا أقولك ؟ بمناسبة إني أخيرا هعرف أشوفك براحتي ، شكرا للحاج أبو سلمي !!

خرج الطبيب من غرفة والد سلمي وهول الجميع باتجاهه وسألوه بلهفه :

- خير يا دكتور طمنا ؟

إبتسم قائلا :

- متقلقوش يا جماعه الضغط علي عليه شويه ودلوقتي هيقوم يروح معاكم علطول إن شاء الله

تنهدت الأم بأريحيه وأخذت سلمي تحمد الله علي سلامة والدها بينما إصطحب إسلام الطبيب وذهب معه لإدارة المشفى لينهي الحساب ..

- مبسوط فوق ما تتخيلي

قالها خالد أثناء جلوسه مع هند بعدما قدم لها هديتها وأخذ كوب العصير الخاص به وجلس يرتشفه وهو يحدثها ، إبتسمت هند بطيبه وقالت :

- يارب أشوفك مبسوط دايما يا خالد

ظلت الأم تطرق بأصابعها علي المنضده بتوتر وتنظر للساعة بين الحين والآخر ، جلس خالد يضحك ويمرح مع هند مايقرب من الساعة والنصف ثم إستنذن في الذهاب وغادر ..

نظرت الأم لهند والشرر يتطاير من عينيها وقالت بحده :

- إيه اللي قعده ده كله وهو عارف إن أخوكي مش موجود هاه ؟ مصدق لزق مكانه ومعرفش يتحرك ولا إيه ؟

زفرت هند بضيق وقالت :

- ما تتكلميش عليه كده يا ماما بعد إنك ، وبعدين هو عمل إيه يعني ماهو قعد زي ما بيقعد مع إسلام عادي

صرخت بها قائله :

- وإنتي عايزاه يعمل إيه كمان يا ست هند ؟ ماهو أكيد هيقعد عادي بس برضو ميصحش يخش البيت ومفيش راجل كده

قالت وهي تغادر المكان :

- خلاص يا ماما حصل خير بقي ، وبعدين دي مره وعدت يعني !!

نادت عليها بصرامه وقالت :

- متقوليش لأخوكي إن خطيبك جه وهو مش موجود علشان منعملش مشاكل ماشي ؟

أوما برأسها موافقه ودخلت غرفتها ..

---

- حمدا لله علي سلامتكم يا بابا

قالها إسلام وهو يضع والد سلمي علي الفراش ويربت علي كتفه بحنان ، إبتسم الأب قائلا :  
- الله يسلمك يا إسلام ، معلش تعبتك معايا

تنهد بحزن وقال :

- ده كلام يا بابا ؟ هو مش أنا زي إبنك برضو ولا إيه ؟

نظر له بإمتنان وقال :

- لو كان عندي إبن مكنش هيعمل معايا زي ما إنت بتعمل كده

ثم نظر لسلمي بفخر وقال :

- حقيقي بنتي عرفت تختار

إبتسمت سلمي وأمسكت بالغطاء وأخذت تحيط به جسدها وهي تقول :

- حمدا لله علي سلامتكم يا بابا ، هنسيب حضرتك تستريح بقي ونقعد برا



أوما برأسه نفيا وقال بتعب :

- لأ يا بنتي روحوا إنتوا علشان عندكم شغل الصبح ، أنا هبقي كويس إن شاء الله

- خلاص يا خالد الفجر قرب ، يلا نقوم نجهز بقي

قالتها هند أثناء حديثها مع خالد فأجاب علي الفور :

- ماشي يا باشا لما يأذن نبقي نفقل

تنهدت بسعاده وقالت :

- حاضر

نظر للمرآه بفرحه وقال :

- بس إيه رأيك في اليوم النهارده ؟ مش كان حلو من غير أخوكي وعرفنا نتكلم براحتنا

- كان حلو اه بس إنسي إن ده يتكرر تاني

تنهد بحزن وقال :

- ليه بس يا هنود ؟ إنتي لسه بتخافي مني برضو ؟

أومات برأسها نفيا وقالت مؤكده :

- يا خالد وأنا إيه اللي هيخوفني منك ، بس برضو ميصحش تيجي ومفيش راجل في البيت

- طيب ما أنا راجلك يا هند

- معلىش يا خالد برضو لازم إسلام يكون موجود

إبتسم قائلا :

- طيب بصي تعالي فكر بالعقل ، دلوقتي إنتي بتتقي فيا وكمان إحنا بنحب بعض وكمان مامتك بتكون موجوده معناا يبقي إيه المشكله بقي لما أجي من غير ما أشوف أخوكي يعني؟! هيجصل إيه فهميني؟ وبعدين كلام الناس والحاجات دي مش هيهمنا لأننا مش بنعمل حاجه غلط

ثم قال بحزن :

- ولا إنتي عاوزاني أفضل زهقان كده كل أما أجي عندكم؟

تنهدت بحيره وقالت :

- لو فكرنا بالعقل هنلاقي إن مافيهاش حاجه بس برضو دي الأصول يا خالد

رفع حاجبه قائلا بصرامه :

- خلاص يبقي نخرج سوا ، مش قدامك غير كده يا هند علشان أنا مستحملك كتير وبصراحه زهقت ، متهيألي دي أبسط حقوقي يعني إني أتكلم مع خطيبتي وأشوفها براحتي ، ولا إنتي شايفه حاجه تانيه؟

زفرت بضيق وقالت :

- عارفه إن ده من حقك بس برضو مش عاوزه أعمل حاجه من ورا أهلي

صمت قليلا ثم قال هامسا :

- يعني ده جزاتي علشان بحبك يا هند؟ تعذبيني كده علشان بس عاوز أشوفك؟ ماشي يا هند براحتك ، يلا سلام

- يا خالد إستنى ..

لم ينتظر حتي تكمل الجملة وأغلق هاتفه ، همت أن تتصل به مره آخري ولكنها سمعت آذان الفجر فنهضت من مكانها وهو تقول بألم :

- ياربي بقي ، بجد مابقيتش عارفه أرضي مين ولا مين!!?

---

- ميس سلمى

قالها أحد الأطفال أثناء رؤيته لسلمي وهي تعبر الممر لتصل إلي الدرج وتهبط ، إلتفتت له وإبتسمت  
قائله :

- أيوه يا أنس

نظر لها ببراءه وقال :

- ينفع أقولك بحبك يا ميس ؟

إتسعت عيناها وتحسست وجهه بيديها بحنان وقالت مبتسمه :

- ينفع طبعا يا حبيبي ، وأنا كمان بحبك اوووي علي فكرة علشان إنت شطور خالص وبتذاكر  
كويس

إبتهج وجهه وتحمس أكثر وقال :

- ينفع أقولك حاجه كمان ؟

- ينفع طبعا

نظر لها بإبتسامته البريئه النقيه وقال :

- ينفع أقولك يا ماما ؟

عادت للخلف قليلا ونظرت له بذهول وقالت :

- ماما ؟

أوما برأسه إيجابا وهو لا يزال محتفظا بإبتسامته فادركت سلمى الموقف وإحتضنته بشده وقالت :

- حبيبي يا أنس ، قول طبعا اللي إنت عايزه

ثم نظرت له بتساؤل وقالت :

- هو إنت حاسس إني زي ماما يا أنس ؟

إختفت إبتسامته وقال بهمس :

- ماما مكنش في حد زيها خالص بس إنتي يا ميس بتعملي زيها وأنا بحبك ومش هقول لحد يا ماما غيرك

إنحنت لتصل لمستوي رأسه وقالت بخوف :

- ماما فين يا أنس ؟

عادت له إبتسامته عندما تذكرها وقال بسعاده :

- ماما راحت عند ربنا وأنا لما أبقى كويس هروحها إن شاء الله

تحسست شعره بحزن وقالت :

- مين اللي قالك كده يا أنس ؟

نظر لها ببراءة وقال :

- أنا قولت لنفسي كده ، علشان ماما اللي بحبها راحت وكمان تيته راحت يبقي كل الناس الحلوين بيروحوا عند ربنا وأنا لما أبقى حلو زيهم هروح أنا كمان

ثم أمسكها من يده وقال باسمها :

- وإنتي كمان هتروحي معانا يا ميس

إبتسمت رغما عنها وهي تتحسس شعره وقالت :

- إن شاء الله يا أنس ، إنت دلوقتي بقي لازم تكون كويس أووي وشطور علشان الأمهات بيحبوا دايمًا ولادهم يكونوا حلوين وشاطرين في المدرسة وبيسمعوا الكلام كده زي أنس

ثم ضغطت علي كتفيه وقالت مؤكده :

- توعدي يا أنس إنك هتبقي كويس عطول وتسمع كلام الكبار ؟

أوما برأسه إيجابا وقال :

- ماشي يا ميس

أخذت تتحسس وجنتيه بشوق وقالت هامسه :

- عارف يا أنس ؟ أنا شوية كده وهجيب نونه صغيره وهبقي أصولها وأخلك تشوفها ولما تكبر شوية كمان هبقي أجيبيها علشان تلعب معاها إن شاء الله

قفز من مكانه بسعاده وقال :

- هتجيبها كل يوم يا ميس ؟

أومات برأسها نفيا وقالت مبتسمه :

- لأ طبعا يا أنس مش كل يوم ، هجيبهاك مره واحده بس أو مرتين علشان عمو المدير ميز علش من ميس سلمي ، وبعدين مش هي هتبقي أختك وإنت هتخاف عليها لحسن تعيط لما تشوف صحابك وتخاف منهم ؟

قالت بصوت طفولي ممزوج بالسعاده :

- وهي مش هتخاف مني يا ميس ؟

أومات برأسها نفيا وقالت :

- لأ مش هتخاف منك ، مش إنت هتبقي أخوها ؟

تنهد بحماس وقال :

- أيوه صح هبقي أخوها

صمت قليلا ثم أخذ يقفز ويهرول باتجاه فصله حتي إختفي من أمام سلمي ، نهضت من مكانها بذهول وجففت دمعها الحائره وهبطت علي الدرج بخفه ..

---

- surpriseeeeeee

قالتها سلمي فور وصول إسلام للمنزل وأثناء غلقه لباب الشقه ، إلتفت لها وإنتفض من مكانه وهو يلتصق بالباب وينظر لها بذهول ويقول :

- إنتي مين يا حجه !!؟

ثم أشاح بيده عدة مرات وهو يقول بمرح :

- إنصرفي إنصرفي !!

إقتربت منه سلمي وأخذت ترمش بعينيها بطفوله وقالت ضاحكه :

- أنا ثلمي يا إثلام مالك ؟ إيه رأيك في النيولوك ده بقي ؟

عاد للخلف عدة خطوات ورفع حاجبه وهو ينظر لها بإشمنزاز وقال وهو يحاول كتم ضحكاته ؟

- إنتي مين اللي حرق شعرك كده ؟ وإيه اللي في وشك ده ؟ وجايبه الفستان العجيب ده منين ؟

عادت لترمش مرة أخري وهي تبتسم بجنون وتقول :

- حظيت ميقلب ولبست فستان معفن جميل وعملت قظتين بقي ، شكلي كيوت صح ؟

ضحك رغما عنه وقال باستهزاء :

- ميقلب وفستان معفن جميل ؟ وماله !! روعي يا سلمي يا بنتي حظيلي الأكل الله يرضي عنك

تنهدت بطفوله وقالت :

- حسنا يا سيدي

ذهبت للمطبخ وأحضرت الطعام بينما ظل هو يضحك طوال فترة تبديل ملبسه ، إنتهي من تبديل ملبسه فذهب للصالة ليأكل طعامه ، جلست سلمي أمامه وقالت بسعاده :

- كل فرخه جميله

رفع حاجبه قائلا بتعجب :

- إنتي بتتكلمي كده ليه ؟ ومين اللي كهرب شعرك كده ؟ وليه حطه توكتين غير بعض ؟ ومين حرق رجل الفرخه كده ؟ وإنتي إيه اللي جابك هنا أصلا ؟

ثم ضحك وهو يقول :

- ردي بسرعه بدل ما أطلبك السريا الصفرا

قالت بخوف مصطنع :

- حاضر حاضر أفندم ..

سؤال رقم واحد علشان أنا مبسوطه ، سؤال رقم إثنين علشان أنا نعسانه ، سؤال رقم تلاته علشان شكلي كده حلو أكثر ، سؤال رقم أربعة علشان أنا كان نفسي ألسوع حد وملقيتش غير دي قدامي فلسوعتها بقي ، سؤال رقم خمسة بيقولوا باين إنتي إتجوزت واحد مجنون كده وإتعلت منه الجنان بقي وجيت أعيش معاه هنا بقي وبس كده أسيدي بقي ، حول حول حول ..

ضحك بمرح وقال :

- إني أسمعك جيدا يا سيدي ، كم عدد الضحايا معك ؟

- خمسمائه سبعة وتسعون وتلتاشر وخمسين كمان زائد تلاته وعشرين وحط عليهم سبعتاشر كمان كده

ثم غمزت له قائله :

- حل بقي يا هندسه

ضحك وهو يمسك الملعقه بإحراج وقال محاولا تغيير الموضوع :

- الله الأكل ده جميل اوووي ، تسلم إيدك يا سلمي

- بقي كده ؟ ماشي يا عم الباشمهندس ، كل يا أخويا كل بالهنا والشفا

صمت قليلا وظل يأكل ما يقرب من العشر دقائق حتي وجدها تقول بسعاده :

- إسلام عاوزه أقولك علي موقف حصل معايا النهارده

إنتبه لها وقال :

- ليه علاقة بشكلك التحفه ده برضو ؟

أومات برأسها نفيا وقالت :

- لا يا إسلام والله بتكلم بجد ، إسمعني بقي

رفع حاجبه محاولا إستفزازها وقال :

- طيب هتتكلمي جد إزاي وإنتي بالمنظر ده بقي ؟ مش مهم مش مهم  
ألقت ملعقتها علي الصينيه وقالت بإصرار :

- لأ هتسمع بقي مليش دعوه ، وأصلا بسبب الموقف بتاع النهارده ده أنا مكنتش هعمل اللي إنت  
شايفه ده بس غيرت رأيي في آخر لحظه وقولت طالما نويت أعمل حاجه من إمبراح يبقي أعملها

نظر لها بعدم فهم وقال :

- حاجه ومش حاجه وإمبراح والنهارده ومين راح فين ؟ قولي يا ستي

تنهدت تنهيده قويه وأخذت تقص عليه ماحدث مع الطالب أنس ، ظل إسلام يستمع لها بإنصات وما  
إن إنتهت حتي قالت :

- شوفت بقي يا إسلام ؟ أنا لحد دلوقتي مش مصدقه أصلا إنه قالي يا ماما !! معقوله أكون قريبه  
لقلبه أووي كده ؟

أوما برأسه إجابا وإبتسم قانلا :

- إنتي حنينه أووي يا سلمى والأطفال أكيد بيحسوا بحنيتك دي ، ياريت كل المدرسين بيعاملوهم  
بما يرضي الله زي ما إنتي بتعملي كده ، أكيد منهم اللي أهله ميتين ومنهم اللي أهله مش حنينين  
عليه ومنهم أصلا اللي بيكره الدراسه والمدرسه بسبب المدرسين والضرب والواجبات الكثيره اللي  
بيعاقبوهم بدل ما يعلموهم بيها !!

حقيقي لو كل مدرس حط في باله إنه هيتحاسب علي كل طفل قدامه وإنه ممكن ببساطه جداا يستغل  
وجوده مع الأطفال دول ويغرس فيهم القيم والمبادئ ويحببهم في دينهم ويعرفهم عنه أكثر ، حتي لو  
هيخصص ٥ دقائق بس في نهاية كل حصه يحكيلهم فيها حدوته او يشجعهم علي حاجه او يعمل  
بينهم مسابقه او كده ، بجد كان زمان بلدنا بقت حاجه تانيه خالص ، حقيقي انا فخور بيكي يا  
سلمى وفخور بكل مدرس بيعمل زيك كده رغم قلتكم إلا إنكم موجودين الحمد لله وبإذن الله مع الوقت  
تكتروا اووي وأهدافكم وأفكاركم تنتشر في كل مكان وتقدم شويه بقي بدل الجهل والتخلف اللي إحنا  
عاشين فيه ده !!

تنهدت بألم وقالت :



- نفسي اوووي في كده يا إسلام ، نفسي التعليم يكون فيه إهتمام أكثر من كده ، نفسي كل مدرس يتعب شويه ويشوف أساليب جديده للتدريس ويجربها من طلابه ، والله هيسمتع جداااا بدل ما هو بيبقي ملان من الحصة هو والطلاب ، بجد نفسي في كده اوووي

نظر لها بتفكير وقال :

- طيب ليه مجربتيش تقولي لصحابك علي الأفكار بتاعتك دي ؟

ضحكت بسخريه ممزوجه بالحزن وقالت :

- جريت كتير يا إسلام ، منهم اللي كان بيتريق عليا ومنهم اللي بيقول بلاش وجع دماغ انا بشتغل علي أد مرتب الحكومه ومنهم اللي بيقول إنتي علشان مش عندك عيال ورايقه وحاجات كتير بقي من دي ، بس برضو في إثنين بدأوا يجربوا اللي انا بقوله وبإذن الله مش هستسلم وهحاول أنشر فيروس الإيجابيه في المدرسة كلها

- بإذن الله يا سلمي

إنتهي من طعامه ونهض من مكانه وهو يقول بارهاق :

- معلش يا سلمي هقوم أريح شويه لحد المغرب وإبقي صحيني علشان جسمي كله مكسر النهارده

إبتسمت قائله :

- سلامتك ، ماشي روح بس خد طبقين في إيدك دخلهم جوا

- ماشي يا ستي هاتي ، حكم القوي علي الضعيف بقي

أمسك منها الأطباق وأدخلها المطبخ وأثناء دخوله غرفته ضحك وقال :

- متحاوليش تعلمي مجنونه تاني علشان مش هتعرفي هاه ، الجنان ده ليه ناسه يا بطه

إبتسمت قائله :

- منا لقبك بقي متجننتش من زمان قولت أجرب حظي وأشوف

نظر لها بتأمل وقال :

- عند حق أنا حاسس إني عقلت جامد الفتره دي والموضوع ده قالقتي بصراحه وبفكر مروحش لدكتور يجنني تاني ، معلىش بقي يا بنتي ضغوط الحياة بس ولا يهكم هرجع أجنن من الأول بإذن الله

ثم دخل غرفته ونام بينما إنتهت سلمي من مطبخها ودخلت غرفتها ونظرت للمرآه وقالت بزعر ممزوج بالضحك :

- يا ماما؟! مين دي

ثم نظرت لإسلام الغارق في النوم وقالت بحنان :

- كله يهون علشان خاطرک يا إسلام ، ربنا يريح قلبك ويروق بآلك

---

وبعد ثلاثة أيام تقريبا إتصل خالد علي هند وقال بحماس :

- هندود ، أنا جايلكم النهارده

شبهت بخوف وقالت :

- جاي فين يا خالد ؟ ما إنت عارف إن إسلام بيروح عند حماه يوم السبت !!

ضحك قائلا :

- ماهو علشان كده هاجي

قالت بتوتر :

- مش هينفع يا خالد ماما مش هترضي

ثم تنحنحت بإحراج وقالت :

- قصدي يعني هتزعل وكده

تنهد بثقه وقال :

- هاتي بس إنتي أي شنطة هدايا وحتي فيها أي ورق وأنا هقولها إني نسيت عندك حاجه مهمه للشغل

قالت بصوت متقطع :

- طب بس مش هينفع يا خالد وكمان ليه عاوز تيجي النهارده بالذات يعني ؟

- وحشتيني أووي يا هند ولازم أشوفك النهارده !!  
قالت بإستسلام :

- طيب تعالي وأنا هتصرف ، علشان خاطر ك إنت بس ، لكن متعودش علي كده !

أغلقت هند الهاتف وحاولت الإبتسام وذهبت لوالدتها وقالت :

- ماما خالد جاي النهارده

صرخت بها قائله :

- نعم ياختي ؟ وده إيه اللي هيجيبه النهارده كمان إن شاء الله ؟

تحنحت بإحراج وقالت :

- أصله هياخد مني حاجه محتاجها في شغله يا ماما

زفرت بضيق وقالت :

- وبعدين بقي في وجع الدماغ بتاعكم ده ؟ إفرضي بقي أخوكي جه هيحصل إيه ؟

أجابتها علي الفور :

- لا ما هو إسلام النهارده عند حماه !

رفع حاجبها قائله بملل :

- لا والله ؟ ده إنتوا مرتبين كل حاجه بقي !!

عادت للخلف قليلا وقالت بتوتر :

- معلش يا ماما هياخد مني الورق ويقعد شويه ويمشي علطول

تنهدت بضيق وقالت :

- ماشي يا هند ، المرادي بس لما نشوف آخرتها معاكم

قفزت هند من مكانها وهرولت بإتجاه غرفتها واتصلت علي خالد وأخبرته بموافقة والدتها ..

بعد ساعة تقريبا حضر خالد وجلس مع هند في نهاية الصاله بينما جلست الأم في أول الصاله أمام التلفاز ، ظل يتحدث معها بكلامه المعسول كالعاده ولكن بصوت خافت ، بعد قليل نهضت الأم من مكانها لتذهب لدورة المياه وغمزت لهند لتدخل غرفتها هي الآخري حتي تخرج والدتها من جديد ، لم تهتم هند وقررت الجلوس لإكمال الحديث معه ولكنها علي الفور إنتفضت من مكانها وصرخت به قائله بصوت خفيض :

- خالد إنت بتعمل إيه ؟!!! إنت مجنون ؟!!!

تنهد بتأثر وقال :

- معش يا هند غصب عني !!

جحظت عينيها وقالت بغضب :

- قوم روح يا خالد ، أنا الغلطانه أصلا

أمسك بيدها وحاول إجلاسها ولكنها أفلتت يدها بضيق وقالت :

- سيب إيدي وإمشي يـا

نهض من مكانه ووقف أمامها محاولا تهدئتها ولكنها صرخت به قائله :

- بقـ ...

وقبل أن تكمل حديثها سمعت جرس الباب ، إنتفضت من مكانها وهرولت بإتجاه الباب لتتنظر من العين السحريه ، شهقت فجأة وضربت قلبها بيدها ونظرت لخالد برعب وقالت :

- يـالـهوي ده إسلام !

زفر خالد بضيق بينما ظلت هي تفرك في يدها بعصبيه بسرعه رهيبه ، ظلت تنظر له بخوف وكأنها تستغيث وعلي الفور جذبتة من ملابسه وألقتة في غرفتها وأغلقت الباب ، إقتربت من باب الشقه وهي تتحسس وجهها وتقول بخوف :

- إهدي يا هند إهدي يا هند مش هيحصل حاجه مش هيحصل حاجه إن شاء الله

حاولت أن تمسك مقبض الباب ولكن يدها ظلت ترتعش ، حضرت لها الأم ونظرت لها بتعجب وقالت بعدم فهم :

- في إيه يا هند مين اللي بيخبط ؟

تنفست بصعوبه وقالت بصوت خفيض :

- ده إسلام يا ماما ، أنا مش عارفه أعمل إيه ؟

ضربتها الأم علي يدها بضيق وقالت :

- الله يسامحك يا شيخه هقوله إيه بس ؟!! دلوقتي يقلب الدنيا علي دماغك وعلي !!

وأثناء إقترابها من الباب نظرت لخالد فلم تجده فإتسعت عيناها وقالت بذهول :

- أومال فين خطيبك ؟!!

قالت علي الفور :

- خبيته في أوضتي

شهقت برعب وتطاير الشرر من عينيها وقالت بغضب :

- يابنت إنتي مجنونه ؟!! في حد يعمل كده ؟!! أخوكي كان هيزعق وخلص دلوقتي إنتي هتلبسينا مصيبه ، أقول إيه بس ولا أعمل إيه ياربي ؟!!

ظلت تضرب الأرض بتوتر وقالت :

- مش عارفه بقي يا ماما مش عارفه ، ده اللي حصل وخلص

دفعتها الأم بقوه وقالت :

- طب أدخلي دلوقتي وأنا هتصرف

قالت بذهول :

- أدخل فين !!؟

صرخت بها قائله بهمس :

- إدخلي أوضتي ياختي خلصي ، أومال هتروحي فين يعني

ثم زفرت بضيق وقالت :

- حسابي معاكي بعدين يا هند

هرولت هند باتجاه غرفة والدتها كما أمرتها وأغلقت الباب خلفها

---

جلس خالد علي فراش هند وظل يتأمل في غرفتها وهو يقول بسخريه :

- دلوقتي أخوكي يبجي يولع فيا يا ست هند ، يلا بقي مش مشكله منا كنت متوقع إن ده هيحصل في أي وقت

ثم ضحك بمكر وقال :

- لأ بس طلعتي شاطره وبتعرفي تتصرفي والله ، الواحد كده ميقلقش عليكي أبدا

بينما ظلت هند تفرك في يديها بتوتر وتضرب الأرض بقدميها بسرعه رهيبه وهي تحاول إتقاط أنفاسها ولا تردد سوي :

- يارب إسترها معايا ، يارب إسلام ميعرف حاجه ، يارب خلاص مش هعمل كده تاني ، يارب متفضحنيش قدام أهلي وأنا مش هجيبه هنا تاني ، يارب نا مليش غيرك سامحني وإنقذني وعدي الموقف ده علي خير ، يارب أنا عصيتك بس إنت هتسترنني أنا حاسه بكده ، يارب إسلام ميعرف حاجه ، يارب إسلام ميعرف حاجه

---

إبتلعت الأم ريقها وحاولت الإبتسام وفتحت الباب وهي تقول :

- إسلام

إبتسم بحنان وقال :

- معلى يا ماما لو صحيتك من النوم ولا حاجه ، بس أصلي نسييت الإشاعه بتاع سلمى هنا إمبراح  
ومحتاجها علشان هنروح للدكتور بكره  
عادت للخلف قليلا وقالت :

- طيب يابنى أدخل شوف نسيته فى

ثم قالت على الفور :

- قصدي يعنى قولى نسيته فى وأنا هجيبهاك

تحرك بإتجاه غرفة هند وقال :

- خلىكي متتعبيش نفسك أنا هدور عليها ، تقريبا كنت بوريها لهند ونسيته عندها على الكومودينو

هرولت بإتجاهه وأمسكت يده وقالت بزعر :

- إستنى طيب أنا هجيبهاك علشان هند نايمه

أوما برأسه إيجابا وقال :

- طيب تمام شوفيه إنتى فى اوضة هند وأنا هدور عليها فى اوضتك

صرخت به قائله :

- مخلص يا إسلام مالك متسرع على إيه كده؟! قولتلك هجيبهاك أقعد بقى فى أى حتى عقبال ما  
أجى

نظر لها بتعجب وقال :

- مالك يا ماما؟ هو أنا زعلتك فى حاجه؟ أنا بس عاوزها بسرعه علشان سلمى واقفه تحت  
ومقدرتش تطلع السلم وتنزل تانى فى نفس الوقت

ثم أردف قائلا :

- معلى هي بتعتذرلك وبتقولك لو عاوزاها تطلع هتطلع بس علشان السلم بيتعبها الأيام دي

أومات برأسها نفيا وقالت :

- لأ خليها براحتها أنا عارفه إن السلم بيتعبها وكمان إنتوا كنتوا لسه عندي إمبراح يعني ، أقعد بقي وأنا هجيبهالك ومعلى علشان مبحبش حد يصحيني من النوم وأنا تعبانه

أبتسم قائلا :

- معلى أسف والله بس ظروف بقي

عبر الممر وجلس في الصاله حتى أحضرت له والدته الأشعه وذهب علي الفور ، تنفست الأم الصعداء وذهبت لغرفتها والشرر يتطاير من عينيها وقالت بغضب :

- قومي ياختي خلاص أخوكي مشي ، خلي خطيبك يمشي من هنا ولو عتب البيت ده تاني وإسلام مش موجود ههد البيت علي دماغك ودماغه ، أنا قولت أهو علشان دي أول مره أكذب كتير كده وكمان علي إسلام ، الله يهديكي ويسامحك يا شيخه ، أستغفر الله العظيم يارب

أمسكتها هند من يدها وقالت بلهفه :

- مشي خلاص والله ؟

أومات برأسها إيجابا وقالت بعصبيه :

- أيوه قولنا مشي خلاص ، قولي لخطيبك يمشي بقي بلا قلة حيا

حاولت هند النهوض من مكانها ولكنها لم تستطع فقالت بتعب :

- طيب معلى يا ماما مشيه إنتي ، بجد رجليا مش شايلاني ، الله يخليكي مشيه إنتي

زفرت بضيق وقالت :

- طيب ياختي



ثم ذهبت لغرفة هند وطرقت الباب بخفه وفتحته وقالت بوجه خالي من أي تعبير :

- إتفضل روح يا خالد ومتجيش تاني بعد كده وإسلام مش موجود حتي لو كنت محتاج حاجه ضروري زي ما قولت !! كفاية بقي اللي حصل

تتنحج بإحراج وقالت :

- ماشي يا طنط ، مع السلامه

أغلقت باب المنزل خلفه وهي تزفر بملل وتشعر بالإختناق ، ذهبت لغرفتها مره آخري وأمسكت بذراع هند وقالت بضيق :

- نفسي أفهم إيه اللي خلاكي دخلتيه أوضتك هاه ؟!! ماهو كان قاعد بإحترامه وخلص ولو إسلام كان شافه كان هيعمل مشكله وبعدين ممكن الموضوع يعدي إنما تخيلي بقي لو كان دخل أوضتك ولقاه كان هيحصل إيه يا أستاذة ؟!!

ثم أخذت تحرك ذراعيها بعصبيه وتصرخ بها قائله :

- إنطقي إيه اللي خلاكي تدخله جوا هاه ، ده لو حد مجنون مكانش هيعمل اللي إنتي عملتیه ده

ثم جلست علي فراشها بتعب وقالت :

- أنا الغلطانه إنني مشيت ورا عيال زيكم ، سامحني يارب وإسترها معايا ومع بنتي ، لا حول ولا قوة إلا بالله ، لا حول ولا قوة إلا بالله

قالت هند بندم :

- يا ماما والله ما كان قصدي ، هو ده اللي حصل بقي ، أنا خوفت إسلام يشوفنا وممكن يقتلني أو يعمل أي حاجه فيا وفي خالد

صرخت بها قائله :

- وهيقتلك ليه إن شاء الله ؟!! وهو إنتي كنتي بتعملي إيه أصلا علشان يقتلك ؟!! أنا كنت هقوله إن خطيبك نسي ورق مهم وجه علشان ياخده وأنا دخلته ، وكنت هقوله إنني عارفه إنني غلطت لما دخله وهفهمه الموضوع وحتى لو عمل مشكله هحاول نهديه وخلص بس مش نعمل إحنا مصيبه أكبر !!

إبتلعت ريقها بتوتر وقالت :

- مفيش يا ماما مفيش ، بعد إندك

ونهدت من مكانها مهولة بتجاه غرفتها وأغلقت الباب خلفها !

---

مر يوم تلو الآخر وخالد يتصل علي هند وهي لا تجيبه ، وفي اليوم الرابع قرر ألا يتركها إلا بعدما تجيب وبالفعل إتصل عدة مرات فأجابت بغضب :

- عايز إيه ؟!!

تنهد بحزن وقال :

- بقي كده يا هنود ؟ بقالي ٤ أيام بتصل عليكي وإنتي مش عايزه تردي

صرخت به قائله :

- ماتقولش هنود !! وبعدين هو إنت مش مكسوف من نفسك بعد اللي عملته ده ؟ بتكلمني عادي كده ولا كان في حاجة حصلت إزاي هاه ؟!!

زفر بملل وقال :

- يا هند ما قولتلك معلىش بقي كانت لحظة ضعف وراحت لحالها ، وبعدين يعني مانا عملت كده علشان بحبك ومكانش قصدي أضايك !!

ضحكت بسخريه وقالت :

- بتحبني ؟!! حب إيه ده بقي إن شاء الله اللي يدملك الحق تعمل كده ؟!! وكمان مش شايف نفسك بتعمل حاجة غلط وكان ده الطبيعي !!

إرتفع صوته وهو يقول :

- ما خلاص يا هند بقي اللي حصل حصل ، وبعدين يعني ما إحنا كلها كام شهر وهنتجوز يبقي قشطه بقي

صمت قليلا ثم قال :

- وبعدين ما إنتي كمان بتضعفي زيي ، يعني متحاوليش تطلعيني أنا الشيطان وإنتي البرينه اللي مش بتعمل حاجه غلط !!

أغمضت عينيها وضغطت علي أسنانها بقوه وقالت بغضب :

- إمشي يا خالد طيب بدل ما أعمل حاجه نندم عليها إحنا الإثنين  
قال معتذرا :

- طيب خلاص يا ستي بجد أنا أسف ومش هعمل كده تاني

رفعت حاجبها قائله بتعجب :

- مش هتعمل كده تاني؟! طب ماهو طبعا عمرك ما هتعمل كده تاني ولا عمرك هتدخل البيت أصلا  
وإسلام مش موجود

إبتسم قائلا :

- خلاص بقي صافي يا لبن ماشي ؟ ماهو مش معقول يعني يا هند من أول غلظه كده تمسكيهالي !!

زفرت بضيق وقالت :

- دي مش مجرد غلظه يا خالد !

ضحك قائلا :

- خلاص بقي قلبك أبيض يا عم ، سماح المرادي وبعد كده مش هاجي إلا لما أخوكي يكون موجود ،  
قشطه ؟

تنهدت بضيق وقالت :

- ماشي يا خالد بس إقفل بقي بجد علشان مش طايقه نفسي

- حاضر يا ستي ، يلا سلام

بعد مرور شهر تقريبا عاد إسلام من صلاة المغرب فسمع رنين هاتفه المحمول أثناء صعوده للدرج ،  
كان المتصل فاروق فأجاب بسعاده :

- فاروق باشا السلام عليكم

- وعليكم السلام ورحمة الله وبركاته يا إسلام ، أزيك عامل إيه يا بطل ؟

ضحك بطريقته المعتاده وقال مازحا :

- الحمد لله بخير والله ، إنت أخبارك إيه ؟ ومتصل ليه هاه ؟

إبتسم قائلا بمرح :

- يابني إكبر بقي ده إنت علي وش ولاده ، إحم قصدي يعني علي وش أبوه

رفع حاجبه قائلا بإستنكار :

- ولاده !! لا حول ولا قوة إلا بالله ، إمشي يا فاروق وما تتصلش بيا تاني

- منا متصل بيك علشان أقولك إن أنا ماشي أصلا

قال متعجبا :

- ماشي رايح فين ؟

تنهد بحيره وقال :

- رايح إسكندرية يا إسلام ، في مشروع هناك ومحتاجيني فيه وبصراحه المكافئه اللي بيدوها هناك  
بتيجي في وقتها الحمد لله ، رغم التعب اللي بشوفه بس برضو الواحد لازم يسعي بقي وربنا يرزقنا  
برزق عيالنا

ضحك بسخريه وقال :

- وهما فين عيالك دول ياخويا !!؟

تنهد بسعاده وقال :

- هيبيح بقي مش أنا كمان هبقي أب ، شكلي نسيت أقولك الموضوع ده كمان ، الواحد كبير في السن باين والذاكره بقت علي أدها ، معلش يابني متزعلش

إبتهج وجه إسلام وقال مباركا :

- الف مليون مبـروك يا فاروق ، ربنا يقوم مراتك بالسلامه إن شاء الله ، لو طلع ولد هيكون محجوز للبت حياء بنتي هاه ؟ إن شاء الله يعني

- ماشي يابو نسب وأنا موافق ، وأنا هلاقي زي بنتك فين يعني ، رغم إنها هتكون أكبر من الواد إبنـي بس مش مشكله برضو ، ربنا يقدرنا علي تربيتهم يا إسلام ويكونوا خير ذرية بإذن الله

- آمين يـارب

تنهد بشوق وقال :

- المهم دلوقتي أنا عايز أشوفك قبل ما أسافر علشان عارف إنك هتوحشني برخامتك دي

إبتسم بسعاده وقال :

- وإنت كمان والله يا فاروق ، خلاص نتقابل بكره بإذن الله بعد العشاء كده ، مناسب معاك ولا إيه ؟

- ماشي تمام كده ، يلا أشوفك بكره إن شاء الله ، السلام عليكم

- وعلـيكم السلام ورحمة الله وبركاته

وقبل أن يغلق إنتبه فجأة وكأنه تذكر شيئا ما وقال علي الفور :

- فاروق إستني !

- إيه يا عم الحج ؟ لحقت وحشتك كده ؟

ضحك قائلا :

- ياعم وحشتني إيه إنت ما صدقت ، أنا بس كنت عاوز أعرف هتقعد أد إيه هناك وإزاي هتسيب مراتك لو حدها كده لو إتأخرت أسابيع مثلا؟!!!

قال موضحا :

- مش عارف المده بالظبط بس مش أقل من شهرين تلاته كده بإذن الله ، ومراتي طبعا هاخدها معايا هناك ، الشركة مجهزانا شقه صغيره كده هنقعد فيها

نظر للجانب الآخر بتعجب وقال :

- طيب وكليتها يابني ؟

ضحك بمرح وقال :

- يابني متخافش إحنا مظبطين كل حاجه وهي هتذاكر هناك وننزل هنا لو إحتاجت أي حاجه وكده يعني ، وبعدين ياعم إنت مش هتخاف علي مراتي أكثر مني ، يلسا بقي روح شوف حالك

أبتلع ريقه بإحراج وقال :

- مش قصدي والله يا فاروق ، كنت بتظمن بس

إبتسم بحنان وقال :

- يابني بهزر معاك ده إنت أخويا ومراتي تبقي أخت محمد الله يرحمه يعني لازم أحطها في عينيا ، إدعيننا إنت بس هاه

- حاضر بإذن الله ، يلا السلام عليكم

- وعليكم السلام ورحمة الله وبركاته

---

- آه يا ظهري ياني ياما

قالها إسلام أثناء دخوله منزله وغلقه لباب الشقه ، ضحكت سلمي من طريقة حديثه وقالت :

- إيه يا إسلام مالك ؟

إرتمي علي أول كرسي أمامه وقال ببراءه :

- كنت بكلم فاروق

رفعت حاجبها قائله بتعجب :

- وهو الكلام مع صاحبك بقي بيوجع الظهر اليومين دول ولا إيه؟!

إنتبه لحديثه فقال ضاحكا :

- لأ قصدي يعني كنت قاعد علي السلم وأنا بكلمه فظهري إتكسر ، يلا ما علينا ، إنتي مش هتعملي  
أكل بكره صح ؟

أومات برأسها إيجابا وقالت :

- أيوه هناكل نفس أكل النهارده

إبتسم قائلا :

- قشطه

ثم أخرج كيسا من جيبه وألقاه لسلمي وقال بمرح :

- بكره أول ما تيجي من الشغل تقعدني تنفخي في دول لحد ما أرجع ماشي ؟

أمسكت بالكيس بتعجب وقالت :

- ليه البلالين دي كلها ؟ وبيجد إنت عاوزني أنفخ ده كله لوحدي ؟

تنهد بحماس وقال :

- ليه البلالين دي هقولك بكره ، وإنفخي اللي تقدرني عليه وأنا لما أرجع من الشغل هكمل معاكي

ثم أردف قائلا :

- وكمان عاوز أستلف منك كيس الحلويات اللي بتأخديه معاكي المدرسة ده ، معلش بقي كله بثوابه  
أسلمتي

- بتعملي إيه يا مامتي ؟

قالتها هند عندما دخلت الغرفة علي والدتها التي أجابتها بحنان :

- بقرأ قرآن يا حبيبة ماما

أمسكت منها المصحف وقالت بسعاده :

- وريني يا ست ماما بتقرأ في سورة إيه

نظرت للمصحف بتلقائيه ولكنها سرعان ما إنتفضت من مكانها وإرتعشت يداها عندما وقعت عيناها علي الآية :

" يَسْتَخْفُونَ مِنَ النَّاسِ وَلَا يَسْتَخْفُونَ مِنَ اللَّهِ وَهُوَ مَعَهُمْ "

أمسكت الأم المصحف بخوف وقالت بلهفه :

- حاسبي يا بنتي هتوقعي المصحف من إيدك

ثم ربتت علي كتفها بخوف وقالت :

- إنتي دوختي ولا إيه ؟

نهضت من مكانها وسارت بإتجاه غرفتها وهي تقول مؤكده :

- الظاهر كده ، أنا هروح أستريح شويه

وصلت لغرفتها وإرتمت علي كرسيها بتعب وظلت تردد :

" يَسْتَخْفُونَ مِنَ النَّاسِ وَلَا يَسْتَخْفُونَ مِنَ اللَّهِ وَهُوَ مَعَهُمْ "

" يَسْتَخْفُونَ مِنَ النَّاسِ وَلَا يَسْتَخْفُونَ مِنَ اللَّهِ وَهُوَ مَعَهُمْ "

" يَسْتَخْفُونَ مِنَ النَّاسِ وَلَا يَسْتَخْفُونَ مِنَ اللَّهِ وَهُوَ مَعَهُمْ "

ثم نظرت للأرض وقالت بألم :



- أيوه يا هند إنتي بتعملي كده ، إنتي بتخافي من إسلام وبتخافي من مامتك بس ليه مش بتخافي من ربنا !!؟

ثم نظرت للجانب الآخر وقالت بخوف :

- مش بتخافي من ربنا !!؟ لا يا هند أوعي تقولي كده تاني ، أوعي يا هند توصلني نفسك للمرحله دي ، أوعي يا هند تنسي إن ربنا شايفك ومراقبك دايمًا ، أوعي يا هند تنسي يوم الحساب ، أوعي تنسي اللحظة اللي هتكوني واقفه فيها قدام ربنا بتتحاسبي ومش عارفه تقولي إيه !!

نظرت للمرآه بغضب وقالت :

- حب إيه ده اللي يخليكي تقولي الكلام اللي بتقوليه ده !!؟ حب إيه اللي يخليكي عماله توطي في صوتك وخايفه حد يسمعك زي الحراميه ، حب إيه ده اللي يخليكي تتكلمي مع خطيبك كلام تستحوا حتي تقولوه قدام عيل صغير ، حب إيه ده اللي يخليكي تخوني أمك بعد ما تعبت فيكي السنين دي كلها وتخوني أخوكي اللي واثق فيكي دايمًا وفأكرك ماشيه علي وصاياه !!

ظلت تحرك رأسها يمينا ويسارا وقالت بخوف :

- لا يا هند لأ ، إنتي عمرك ما كنتي كده ، ولا هينفع تكوني كده ، كفاية بقي يا هند كفايه ، كفايه ذنوب وكفاية قرف لحد كده ، إنتي محترمه يا هند وماينفعلش تتنازلي عن إحترامك ده ، إنتي لازم تتكلمي مع خالد وتبطلوا اللي بتعملوه ده ، لــــاــــزم

قفزت من مكانها وأمسكت هاتفها بحماس واتصلت علي خالد وقالت :

- خالد .. إحنا لازم نتوب !

ضحك رغما عنه وقال :

- نتوب من إيه يا حجه ما تصلي علي النبي كده وبعدين مفيش مساء الخير حتي !!؟

قالت علي الفور :

- خالد أنا دلوقتي شوفت آيه وخوفت جدااا وحسيت إن ربنا أراد إنني أشوفها دلوقتي بالذات علشان نبطل اللي بنعمله ده

مط شفتيه للأمام ورفع حاجبه قائلا بتعجب :

- هو إيه اللي إحنا بنعمله ده بقي إن شاء الله ولازم نتوب منه بسرعه كده !!

زفرت بملل وقالت :

- يا خالد بطل بقي ، إنت مش عارف يعني إحنا بنعمل إيه !!؟

قال بعصبيه :

- اه مش عارف بنعمل إيه !!؟ قوليلي إنتي يا ست هند بنعمل إيه !!؟ يعني مش كفاية مش بنخرج ولا حتي عارف أشوفك براحتي ومستحمل ده كله وبقول جايز تتغيري وجايز مكسوفه وجايز معرفش إيه !! عاوزه إيه تاني هاه !!؟  
تنهدت بخوف وقالت :

- يا خالد لازم نبطل الكلام اللي بنقوله ده ، أنا حاسه إن كل ده حرام ومش مرتاحه خالص بجد وتعبانه وبقيت أتكسف روح عند إسلام او أبص في وشه حتي

تظاير الشرر من عينيه وقال بجنون :

- إسلام إسلام إسلام ، قرفتيني بإسلام يا هند ، مش عارف إيه حكايته إنتي وأخوكي !!؟  
ومش عارف إنتوا عايشين في أنهي زمن بالظبط !!؟ ما الناس كلهم مخطوبين وزى الفل أهو إشمعني إحنا يعني !!؟ ده أنا عندي كل واحد من صحابي بيدخل ويخرج مع خطيبته وكمان بيسافروا سوا ويروحوا شقتهم وبيعلموا كل اللي هما عاوزينه ومحدش بيقدر يكلمهم وإنتي كل ما أجي أقولك علي حاجه تقولي لأ علشان إسلام !!؟ أنا مش فاهم أنا هتجوزك إنتي ولا هتجوز إسلام !!؟ ومع ذلك برضو مستحملك خالص لحد ما تتعودي عليا وتمسك بيكي لأنك داخله دماغه لكن كمان تقعدني تقوليلي منتكلمش !!؟ أهو ده اللي ناقص والله !!!

نظرت للجانب الآخر وقالت بعدم فهم :

- يعني إيه داخله دماغك ؟ ويعني إيه بيسافروا سوا ويروحوا شقتهم !!؟

زفر بضيق وقال :

- مش يعني حاجه يا هند مش يعني حاجه ، عاوزه حاجه تاني ولا أقفل !!؟

تنهدت بحزن وقالت :

- يا خالد طب إستنتي الله يخليك ، أنا والله مش عاوزه أزعلك بس كمان خايفه يكون اللي إحنا بنعمله ده حرام ، ماهو طالما بخاف أعمله قدام حد وكمان دايمًا بعد ما بكلمك بحس إنني موجوده فأكيد كلامنا ده ميصحش

أغمض عينيه وقال بملل :

- هو إيه اللي ميصحش يا هند ؟ أنا خطيبك فاهمه يعني إيه خطيبك ؟ يعني كام شهر وهتكوني مراتي ، يعني الناس كلها عارفه إنك خلاص بقيتي بتاعتي ، عاوزه إيه ثاني بقي ؟

إرتمت علي الكرسي وقالت بتعب :

- يا خالد أنا خايفه ، بجد تعبانه وخايفه وكمان النهارده لما مسكت المصحف خوفت أكثر وحسيت إنني مستحقره نفسي أووي ، بالله عليك ساعدني نتوب ونبقي كويسين زي إسلام وسلمي كده ، هما كمان بيحبوا بعض بس مكانوش بيعملوا الحاجات دي في خطوبتهم

ضحك بسخريه وقال :

- وإنتي عرفتي منين بقي إنهم مكانوش بيعملوا كده في خطوبتهم ؟ كنتي قاعدالهم ٢٤ ساعه يعني ؟

نظرت للمرآه بذهول وقالت :

- عرفت منين يعني إيه يا خالد ؟ ماهو إسلام قالي كده وأنا كنت بشوف كده !!

إبتسم بعدم إقتناع وقال :

- يا هند إنتي غلبانه ومش فاهمه حاجه ، الناس اللي بيقدوا يقولوا قال الله وقال الرسول دول وعاملين نفسهم فاهمين في الدين أووي وبينصحوا الناس هما أكثر ناس بيعملوا الغلط أصلا ، اوعي تخلي المظاهر تخدعك ، أخوكي اللي بيقولك ما تتكلميش خالص ده تلقاه كان مقضيها أصلا وعایش حياته ، أنا مش بقولك كده علشان تكرهيه ، أنا بس بعرفك الحقيقه

صرخت به قائله :

- خالد إنت بتقول إيه !!؟

أجابها مؤكدا :

- روجي يا هند شوفي كام واحد مربيلى دقنه وبيضرب مراته ومبهدل أهل بيته ويكفر ده ويتكلم علي ده وفي الآخر عامل نفسه متدين ، ولا شوفي كام واحده لابسالي نقاب وعمالة تضحك في الشارع ومصحابي ده وده وتجيب في سيرة دي وتشتتم علي دي وفي الآخر تقولك إنها متدينه ، يا بنتي الناس دي معقدين أصلا وبيقعدوا ينصحوا في الناس كأنهم ملايكة وهما أصلا بيعملوا بلاوي بس من تحت لتحت

أخذت تحرك رأسها يمينا ويسارا بعدم تصديق وقالت :

- مستحيل اللي إنت بتقوله ده يا خالد ، أوعي تقول عليهم كده تاني ، إسلام وسلمي عمرهم ما يعملوا كده وكمان مش علشان شوفنا نموذج مش كويس يبقي نعمم علي الكل ، ياما في ناس ملتحين ومنتقبات وزى الفل ومش بيعملوا حاجه من اللي إنت بتقول عليهم دول ، وطبعا أكيد هتلاقي نموذج سئ ولكن الأغلب بيكونوا كويسين الحمد لله ، كمان اللي أعرفهم شخصيا زي إسلام وسلمي ونهي وواحد صاحب إسلام تقريبا اسمه طارق كلهم دول كويسين جدا!!! ومش زي ما إنت بتقول خالص ، حرام تظلم الفئه كلها وإنت متعرفش حد منهم أصلا !!

نظر للمرآه بملل وقال :

- خلاص يا هند مش موضوعنا ، إنتي حره في رأيك وأنا برضو مقتنع برأيي ، المهم يعني إن الناس دول معقدين الدنيا وبيقعدوا يحرموا كل حاجه وأنا مش عاوزهم في حياتي ، وبما إنك هتبقي مراتي يبقي تسمعي كلامي أنا مش كلامهم هما ماشي !!؟

- ماشي يا خالد أنا هسمع كلامك والله بس بلاش نتكلم في الحاجات دي علشان تعبت وخلينا نتكلم عادي وخالص

- يبقي إنتي كده مش بتحبيني يا هند

زفرت بضيق وقالت :

- يوه يا خالد هو أنا كل ما أقولك حاجه تقولي مش بتحبيني !!؟ أومال أنا بعمل ده كله علشانك ليه بس ؟

قال بإصرار :

- خلاص يبقي ما تتكلميش في الموضوع ده تاني ماشي ؟ إنتي خطيبتني ودي أبسط حقوقي ، وبعدين أنا مش خاطبك علشان نقعد زي الإخوات كده !!؟

- حقوقك ؟ حاضر يا خالد حاضر

- يا خلّاثي يا سلمي علي شكك ، بطوطه خالص

قالها إسلام بعدما عاد من عمله في اليوم التالي ونظر لسلمي وهي تجلس بمنتصف الصاله ومحاطه بالبالونات من كل جانب ، ضحكت سلمي وقالت :

- أنا إنتفخت يا إسلام ، قصدي فسيت ، أنا مبقاش فيا حيل أصلا ونفسي إتقطع ، تعالي كمل بقي  
علشان تعبت

نزع حذائه من قدمه وألقي الكيس الذي أحضره معه علي الأريكه وإقترب منها وظل يعد في البالونات وهو يقول بمرح :

- براوه عليك يا واد يا بليه ، طلعت أشطر مما توقعت

ضحكت بفخر وقالت :

- إحنا بنحب نخدم يا كبير ، هات عشه جنيه بقي

ألقي عليها البالونات التي كانت في يده وقال مازحا :

- عشه جنيه ؟ عامله نفسك روشه يا سلمي ؟ — ارضو مش لايقه ، وهتفضلي أوزعه وكيوت  
كده مهما عملتي

تنهدت بحزن كالأطفال وقالت :

- هفضل كيوت ؟ مفيش أمل يعني ؟ قشطه الكيوته حلوه برضو

رفع حاجبه قائلا بمرح :

- كيوته ؟ دي اللي هي علي وزن روشنه يعني ؟ ماشي يا كبيره يلا ناكل بقي علشان في مفاجئه  
قبل المغرب

إتسعت عيناها وقالت بحماس :

- مفاجئه إيه دي ؟ والكيس اللي علي الكنبه ده جواه إيه ؟ هاه هاه هاه

- بظلي زن بقي بظلي زن ، هقولك علي كل حاجه بس بعد الأكل إن شاء الله

إنتهي إسلام من غدائه ونظر في ساعته فإذا به يري المغرب بعد نصف ساعة تقريبا ، إبتسم لسلمي وقال بحماس :

- بصي إتوضي بقي والبسي نقابك وخليكي جاهزه ماشي ؟

نظرت له بعدم فهم وقالت :

- ألبس ليه وهنروح فين ؟

تنهد بحماس وقال :

- هتعرفي كل حاجه في وقتها ، ثم أمسك هاتفه وإتصل علي جاره الحاج أبو أحمد وقال :

- السلام عليكم

إبتسم بطيبه وقال :

- وعليكم السلام ورحمة الله وبركاته ، إزيك يا باشمهندس

- الحمد لله يا حاج كويس ، كنت عاوز حضرتك تبعثلي أحمد لو مفيش مانع يعني

زفر بضيق وقال :

- عمل إيه الواد ده تاني ؟ أستغفر الله العظيم دائما كاسفني مع الجيران كده !!

أوما برأسه نفيا وقال علي الفور :

- لأ يا حاج معملش حاجه متخافش ، أنا عاوزه في موضوع كده يعني

إبتسم قائلا :

- ماشي يا باشمهندس هبعثهولك حالا إن شاء الله

وعلي الفور حضر أحمد وطرق باب منزل إسلام ، فتح إسلام بمرح وقال :

- أحمد باشا اللي مغلب الشارع كله ، أزيك عامل إيه ؟

- الحمد لله يا عمو ، كنت عاوزني في إيه ؟ وبسرعه معلى علشان عاوز أمشي

ضربه علي رأسه بخفه وقال :

- يا ض مش هتبطل لماضه بقي ، المهم كنت عاوزك في مصلحه كده وليك من وراها هديه

أوما برأسه موافقا وقال :

- ماشي طالما فيها هدايا أنا معاك ، قول

ضحك رغما عنه وقال متعجبا :

- قول !!؟ إحم يلا ما علينا ، المهم يا سيدي تعرف تجمعلي صحابك كلهم ؟ ولو لقيت أي حد بيلعب تاني في الشارع هاته معاك

رفع حاجبه قائلا :

- أجمعه ملك ليه ؟

ابتسم قائلا :

- هنروح مشوار سوا لحد آخر الشارع ولما نرجع هوزع عليهم هدايا حلوه

نظر له بعدم فهم وقال :

- هنروح لآخر الشارع وبعدين ناخذ هدايا ؟ وده إزاي بقي ولا إنت بتضحك عليا يا عم إسلام ؟

- يا بني مش بضحك عليك ولا حاجه ، روح بس إعمل اللي بقولك عليه وتعالى بسرعه ماشي ؟

أوما برأسه موافقا وذهب علي الفور ، أحضر جميع أصدقائه ووقف أمام منزل إسلام ينتظر هبوطه ، في خلال لحظات هبط إسلام ووقف أمام الأطفال ونظر لهم بحب وقال :

- هتفق معاكم إتفاق ، إحنا هنروح دلوقتي نصلي المغرب سوا ماشي ؟ ولما نرجع هوزع هدايا عليكم كلكم إيه رأيكم ؟

أخذ كل منهم ينظر للآخر بعدم تصديق بينما قال أحدهم :

- هتوزع علينا هدايا فعلا ولا بتقول كده علشان نصلي ؟

إبتسم إسلام بثقه وقال :

- هتشوف بنفسك !

وبالفعل إصطحبهم إسلام للمسجد وهو في غاية السعادة ، أدوا جميعا صلاة المغرب وعادوا معه إلي المنزل ، وقف إسلام أمامهم وقال بحماس :

- إستنوني هنا

صعد الدرج بسرعه وقال لسلمي بسعاده :

- جاهزه ؟

أومات برأسها إيجابا وقالت بعدم فهم :

- لبست أهو بس مش فاهمه حاجه ؟

تنهد بحماس وقال :

- بصي إعملي اللي هقولك عليه وبعدين هفهمك كل حاجه ، أولا حظي البلالين دي كلها في البلكونه بس متخليش حد يشوفك هاه ؟ يعني وطى راسك وإنتي بتحطيمهم ، ثانيا أنا هطلع أحط اللعب دي في الدور اللي فوق وبعدين أنزل أرص الحلويات دي قدام بيتنا وجاي حالا

شبهقت بخوف :

- هترمي الحلويات علي الأرض يا إسلام !! وبعدين ليه ده كله ؟

- يا ستي هرميهم إيه حرام عليكي ، أنا هحطهم بشكل معين كده علشان حاجه في دماغى ، وهتشوفي عملت كده ليه

وبالفعل صعد إسلام الطابق العلوي ووضع الألعاب علي عدد الأطفال ثم هبط إلي طابقه وأخذ يضع بعض الحلويات علي الأرض بشكل مميز ثم دخل لمنزله ، زفر أحد الأطفال بضيق وقال :

- شوفت يا أحمد أهو جارك ضحك علينا أهو وطلع وسابنا وافقين كده

تنهد أحمد بملل وقال :



- أنا كنت حاسس برضو ، بس هو وعدني لما نشوف ، خلينا وافقين شويه كم... ..

وقبل أن ينهي جملته وجد الكثير من البالونات تتطاير عليه وعلي زملائه من كل مكان ، نظر للأعلي بذهول فوجد إسلام يغمز له بسعاده ، أخذ الأطفال يقفزون ويصرخون وكل منهم يحاول إمساك قدر ما يستطيع من البالونات ، ظلت سلمي تنظر لهم من وراء الستار بسعاده بينما خرج جميع الجيران ومعهم أطفالهم إلي نوافذهم ليروا سبب تلك الصرخات الطفولية ، تحمس عدد كبير من الأطفال وهبطوا سريعا إلي الشارع كمحاولة منهم لإلتقاط أي شئ ، بعد قليل نادي إسلام علي أصدقاء أحمد بصوت مرتفع وقال :

- إطلعوا بسرعه في حاجه كمان علي السلم

علي الفور سعد الجميع وكادوا أن يسحقوا بعضهم البعض من كثرة الإصطدام ، نظروا أمامهم فإذا بهم يروا عدد كبير جدا من الحلويات فأخذ كل منهم يجمع قدر ما يستطيع ويضع في ملبسه حتي أصبحت الأرض بيضاء تماما ، تنهد كل منهم بتعب وسعاده معا حتي قال لهم إسلام مرة أخرى :

- الهديه الأكبر بقي فوق

فور إنتهائه من جملته لم يجد أحد أمامه ، ضحك هو وسلمي وإنتظر حتي يهبط الجميع ، وقف إسلام أمامهم حتي لا يستطيعوا الهبوط للشارع وقال بحماس :

- مبسوطين ؟

أوما أحمد برأسه إيجابا وكذلك أصدقائه وقال بفرحه :

- شكرا يا عم إسلام ، الحاجات دي جميله أوووي والله وإحنا فرحاتين بيها

إبتسم إسلام وقال :

- الشكر لله يا سيدي ، أي حد فيكم هشوفه في الجامع بعد كده هيكون ليه هديه عندي ، إتفقنا ؟

قال الجميع :

- إتفقنا

ثم هبط كل منهم وهو ينظر للعبته تاره وبالونته تاره آخري ويحسر عدد الحلويات التي جمعها هذا اليوم ، أغلق إسلام باب منزله وإرتمي علي كرسيه بسعاده وقال :

- فرحت بفرحتهم والله ، شكلهم وهما عمالين يجروا ورا البلالين ويلعبوا بيها في الشارع كده  
حلوه اووي

ثم ضحك وهو يقول :

- ولا لما كانوا هيقتلوا بعض علشان ياخدوا الحلويات ، والله أعلم عملوا إيه فوق كمان بقي

صمت قليلا ثم قال بحماس ممزوج بالثقه :

- دي أول خطوه ، ولسه اللي جاي أكثر بإذن الله !

نظرت له سلمي بسعاده وقالت :

- ناوي علي إيه تاني يا إسلام ؟ بصراحه فعلا الموقف ده كان حلو اوووي ومتهيالي عمري ما  
هنساه

إبتسم قائلا :

- ناوي أحببهم في الصلاة في الجامع

ثم ضحك وهو يقول :

- معلىش بقي يا سلمي شكلنا كده هنقضيهها فول لآخر الشهر ، كله بثوابه بقي

نظرت له بفخر وقالت :

- ولا يهكم يا إسلام ، بس قولي هتعمل كده دايم ولا إيه ؟

أوما برأسه نفيا وقال :

- مش هقدر أعمل كده دايم وخصوصا إنهم أكيد هيقلوا للشارع كله إن شاء الله ، بس برضو  
هتصرف متقلقيش ، يعني مره حلويات بس ، مره بالونات بس ، مرة أقولهم اللي هلاقيه في كل  
الصلوات في نفس اليوم هياخد ، مره تانيه اللي هيواطب علي يومين ورا بعض ، كده يعني أسلمتي  
المهم يتعودوا بس ..

إبتسم قائله :

- ربنا يبارك فيك يا إسلام ويجعله في ميزان حسناتك

- أمين يارب

مر إسبوع تلو الآخر وإزدادت التجاوزات الهاتفية بين هند وخالد بشكل كبير ، ومع زياده التجاوزات إزدادت أيضا آلام هند ، فقد تحولت حالتها من مجرد شعور بتأنيب الضمير إلي شعور دائم بالإختناق والإحتقار ، كانت تستيقظ في الليل علي العديد من الكوابيس وأيضا تجد نفسها تبكي بلا سبب بل وتتهار من البكاء ، شعرت أنها تكره ذاتها بحق ولم تعد تري أحدا أو تخرج من غرفتها إلا للضرورة ..

كلما كانت تتحدث مع خالد وتخبره بما تشعر به من ذنب كان يضحك منها ساخرا ويكمل ما كان يفعله ، رغم ضعفها أحيانا إلا أنها دائما ماتشعر بالوجع فور إنتهاء مكالماته ..

ظلت علي هذه الحالة عدة أسابيع حتي وصلت إلي كره مكالماته ، لم تعد تستطع رؤية إسمه علي هاتفها أو حتي لقائه ، لم تعد تستطع أيضا رؤية إسلام وكانت دائما ما تتصنع النوم عند حضوره ..

ظلت تفكر كثيرا في طريقة تحاول بها الإحتفاظ بخالد وأيضا تتحاشي حالة الشعور بالذنب تلك ولكنها لم تجد ، أصبحت تحدثه تلك الفتره بلا روح ، تحدثه فقد حتي لا يغضب ولكنها لا تشعر بشئ سوي المراره والوجع ، كانت في بعض مكالماتها له تغضب عليه أو ربما تصرخ أو تغلق الهاتف في وجهه ولكنها تعود مرة أخرى وتعتذر وتكمل ما كانت تفعله ، مرت عليها الأيام وكأنها سنوات من الألم والإستحقار والضياع ..

ولكنها في يوم من الأيام وأثناء محادثتها له لم تستطع الصمت والتحمل أكثر من ذلك لأنها ضغطت علي ذاتها كثيرا وهو مازال مسترسلا في حديثه العفن ، صرخت به بأعلي صوتها قائلة :

- خالد كفايه بقي كفايه ، أنا تعبت وكرهت نفسي وكرهتك وكرهت الدنيا كلها ، عماله أقولك هموت وإنت مش حاسس بحاجه ، عماله أقولك حاسه إنني هدخل النار وإن خلاص ربنا مش هيفغرلي وإنت برضو ولا هامك حاجه ، عماله أقولك مش عارفه أطلع من اوضتي ولا أحط وشي في وش أهلي وإنت برضو ولا حاسس ، إييه بقي حرام عليك حرام

إرتمت علي فراشها وقالت بتعب :

- نفسي أرجع هند بتاع زمان بقي ، نفسي أرجع بعرف أضحك وأهزر تاني ، حرام عليك بجد إرحمني وساعدني ، ده أنا كانت أكبر مشاكلي إنني بسمع أغاني وأسلام ببيجي يزعقلي ، دلوقتي بقيت مقرفه أووووي أكثر من اللازم ، كرهت نفسي أوووي ومبقتيش عارفه أبص في المرايه أصلا ،

كرهت مكالماتك يا خالد ومبقتيش طايقاك ، بجد تعبت أووووي إرحمني بقي ، قولتك مليون مره نتكلم عدل وانت مفيش فايده ، قولتك تعبانه ومش مرتاحه وانت برضو تقول عادي ، قولتك كرهت نفسي وانت برضو مش حاسس بحاجه ، حرام عليك يا أخي إنت إزاي ما بتحسش أووي كده ، انا تعبت ومبقتيش قادره أستحمل كلمه كمان منك ، ياريتني ما كنت عرفتك ولا إتنيلت حبيتك ولا إتنازلت علشان أي حاجه ، ياريتني كنت سمعت كلام إسلام وريحت نفسي وريحتك ، بجد يا خالد وده آخر كلام عندي ، يأما نتكلم عدل زي النبي آدمين يأما كل واحد مننا يروح لحاله ، انا خلاص شويه كده وكنت هموت نفسي أصلا بما إني كده كده داخله النار بس برضو خوفت ، يــــار بـقي تعبت

صمت خالد قليلا ثم قال :

- خلصتي كلامك ؟

إتسعت عيناها وصرخت قائله :

- يعني إيه خلصتي كلامك ؟!! بقولك همووت وانت اللي عملت فيا كده ولازم تشوفلي حل تقولي خلصتي كلامك ؟!! عاوز إيه يا خالد هاه ؟ هتضحك عليا زي كل مره برضو ؟ هتاخذني علي أد عقلي تاني وتحاول تثبتلي إن اللي بنعمله ده عادي ؟ طب لو هو عادي أنا موجوعه كده ليه هاه ؟ لو هو عادي انا ببقي مكسوفه حتي أقف قدام ربنا في الصلاة ليه هاه ؟ لو هو عادي ببقي خايفه أمسك المصحف ليه هاه ؟ لو هو عادي انا حاسه إني هدخل النار ليه فهمني ؟!! إنت السبب في كل ده ولازم تشوفلي حل يأما والله أقول لإسلام واللي يحصل يحصل بقي حتي لو هيقطنني مش مهم المهم أرتاح !

زفر بملل وقال :

- السيده الفاضله خضرا الشريفه ممكن تقفلي دلوقتي علشان مش عاوز أقولك حاجه تزعلك ؟ لما تهدي إبقي كلميني علشان قرفت من نكدك ووزنك الأيام دي ، إستحملتك كتير يا هند بس بجد قرفت منك ، وهحاسبك بعدين علي كلامك وصوتك العالي ده معايا ، يــــا إمشي دلوقتي !

ضغظت علي أسنانها بغضب حتي كادت أن تحطمها وقالت :

- خضرا الشريفه ؟!! بتعايرني يا خالد ؟ اه يا أستاذ خالد الشريف أنا كمان كنت محترمه وشريفه قبل ما أعرفك وكل اللي حصل ده كان بسببك ولو فضلت بإسلوبك ده كتير أنا هروح لإسلام وأقوله علي كل حاجه وأخليه يتصرف بقي ويريحني منك

ضحك بسخريه وقال :

- تروحي لإسلام؟! تصدقي خوفت وكشيت في نفسي؟ إيه يا بنتي حنة العيل اللي هخاف منه ده؟  
انا مش بعمل حاجه غلط ومعنديش حاجه أخاف منها وحتى لو هخاف فمش هخاف من عيل أصغر  
مني!! روعي يا هند من قدامي ومتعصبينيش زياده عن كده علشان بجد مش عاوز أزعلك، إنتي  
الأيام دي زك كتر ونكدك بقي أكثر وانا إتخفت منك ..

زفرت بضيق وقالت :

- اه طبعا لازم تتخنى مني ، ماهو أنا مبقيتش هند الطيبه اللي بتسمع كل كلمه وتمشي وراك ،  
دلوقتي بقيت وحشه علشان فكرت أتعدل شويه وأمشي صح ، عموما يا خالد أنا خلاص أخذت قراري  
وهقول لإسلام إني مش عايزاك وأخليه يفسخ الخطوبه دي ويريحني منك علشان بجد قرفت !

إبتسم ساخرا وقال :

- وماله يا ست هند ، وأنا كمان برضو هقوله علي كل حاجه علشان يعرف كويس أخته البرينه  
المتربيه علي الأخلاق والقيم !!

شهقت بخوف ممزوج بالذهول وقالت :

- هتقوله علي إيه؟!!!

إبتسم بمكر وقال :

- هقوله علي كلامك الجميل ده اللي كنتي بتقوليهولي ومفيش مانع برضو لو شاف كام محادثه من  
بتوعك علي الفيس أو سمع كام مكالمه حصلت بيننا ، إنتي حبيبتني يا هنود وأنا بحب أسيبلك ذكري  
معايا دايما !

إتسعت عيناها ووضعت يدها علي فمها وقالت برعب :

- خالد إنت بتقول إيه؟! مستحيل إسلام يشوف حاجه زي كده؟! وبعدين إنت إزاي تعمل حاجه  
زي كده أصلا؟! معقول إنت منهم يا خالد؟!!!

نظر للمرآه بوجه خالي من أي تعبير وقال :

- منهم ولا مش منهم بقي متعيشيش الدور كتير ، أنا قولتك قبل كده إنك داخله دماغي وهتجوزك  
ولو زهقت منك برضو أنا اللي هسببك ، ولو حاولتي تتجنني وتعملي حاجه غير كده يبقي عليا وعلي  
أعدائي بقي وإبقي خلي أخوكي الشيخ يقيم عليكي الحد !

ثم ضحك ساخرا وقال :

- فهمتي يا هنود ؟ ولا أقول ثاني ؟

أغمضت عينيها بخوف وتنفست بعمق وقالت :

- يعني إيه ؟ يعني يأما أوافق علي كل اللي إنت عاوزه يأما تقول لإسلام علي اللي حصل بينا ؟ معقوله بتكرهني اوي كده ؟

- أكرهك إيه يا هنود ده إنتي حبيبتني ، أنا بس مش عاوز أزعل منك علشان زعلي وحش ، خلينا كده حلوين مع بعض وبلاش تزعليني منك هاه ، وأنا اوعدك يا ستي إني هحاول أتمم الجوازه بسرعه جدا بس خليكي حلوه كده اومال !

زفرت بغضب وقالت :

- بطل قرف بقي وبطل تكلمني بالإسلوب ده ، إنت إزاي مقرف ومابتحسش أوي كده ؟!! وإزاي انا مشوفتش الوش الثاني ده الفتره دي كلها ؟!! إنت عاوز مني إيه يا خالد ما تسيبني في حالي بقي !!

تنهد بملل وقال :

- يوه بقي يا هنود إنتي مبتزهقيش من السؤال ده ؟!! قولنا عجباتي وداخله دماغي وهتجوزك ، بس يا ستي الموضوع بسيط ، يلا بقي روعي إرتاحي كده وروقي دمك ونتكلم بكره ثاني ، مع السلامه

صرخت قائله :

- مفيش بكره يا خالد مفيش بكره ، أنا خلاص قرفت منك وإعمل اللي تعمله بقي علشان أنا خلاص كرهت نفسي أصلا وبرضو لو إسلام موتني هيكون أهون عندي من الإحساس اللي انا حاسه بيه ده ، ومفيش مع السلامه ، ربنا ينتقم منك !

ثم ضغطت علي زر الإغلاق بعصبيه وإرتمت علي فراشها وهي تتنفس بصعوبه وتتألم حتي تعبت ونامت ..

---

إستيقظت من نومها علي صوت هاتفها ، نظرت فيه بنعاس فوجدت إسم فاطمه صديقتها فأجابت علي الفور :

- السلام عليكم

ابتسمت قائله :

- و عليكم السلام يا هند ، إزيك عامله إيه ؟

تنهدت بحزن وقالت :

- الحمد لله ، إنتي أخبارك إيه ؟

- كويسه الحمد لله ، المهم أنا مش عارفه إتصلت بيكي ليه دلوقتي بالذات بس في حاجه جوايا عاوزه أقولها علشان أرتاح

قالت بلهفه :

- قولي

تنهدت بضيق وقالت :

- عاوزه أقولك لو خطيبك مش محترم إلحقي نفسك وإفسخي الخطوبه بسرعه وروحي إتخطبي لواحد من اللي كنت بقول عليهم معقدين دول علي الأقل هيحافظ عليكى ومش هياخد منك اللي هو عاوزه ويرميكي رمية الكلاب زي ما حصل معايا

إتسعت عيناها وقالت بذهول :

- رمية كلاب إيه ؟ إنتي إيه اللي حصل معاكي يا فاطمه إنطقي بسرعه

زفرت بملل وقالت :

- محصلش حاجه يا هند ، المهم أنا نصحتك وخلص وإنتي حره ، وكمان هحاول دايمًا أدعي لسندس ترجع لخطيبها علشان يكون ضميري مرتاح وكفايه اللي حصلي بقي

قالت بخوف :

- يا بنتي حصلك إيه قولي !!؟

ابتسمت قانلا :

- متخافيش يا هند ربنا سترها معايا المرادي والحمد لله إنها جات علي أد كده ، يلا معلى هقفل بقي  
علشان هنام ، مع السلامه

أغلقت فاطمه الهاتف علي الفور بينما ظلت هند تنتظر لها تفها بتعجب وتقول :

- هو إيه الحكايه بقي ؟ يعني أنا وفاطمه في يوم واحد ؟ هما كل المخطوبين بيحصل معاهم كده ولا  
إيه ؟ طب إشمعني إسلام وسلمي !!؟

ألقت هاتفها ونظرت لسقف الغرفة وقالت :

- أعمل إيه بس ياربي ؟ أنا مش مصدقه اللي خالد قاله ده أصلا ؟ معقوله علشان إتعصبت شويه  
وقولت كلام وأنا مش دريانه يطلع شايل جواه كل الحقد والقرف ده ؟ معقوله هو وحش اووي كده ؟  
طب إزاي انا مكنتش واخده بالي من ده كله ؟ معقوله عرف يضحك عليا بكلامه ويخبي نواياه السيئه  
عني وأنا زي الغبيه صدقته ؟ ياربي هقول لإسلام إيه ولا هعمل إيه بس ؟ يارب دبرني  
انا مليش غيرك

- بس يا ستي وبكده يبقي رصينا كل الهدوم مكانها ، في حاجه تاني بقي ؟

قالها إسلام في صباح اليوم التالي أثناء ترتيب ملابس إبنته حياء التي ستنير الدنيا بعد عدة أيام بأذن  
الله ، إبتسمت سلمي بسعاده وقالت :

- لأ تمام اووي كده ، بجد مش مصدقه إني خلاص كام يوم وهولد بقي وأشوف بنتي اللي مستنياها  
من زمان ، ربنا يخليك ليا يا إسلام بجد مش عارفه كنت هظبط ده كله لوحدي إزاي

جلس علي طرف الفراش وقال بسعاده :

- ويخليكي يا سلمي ، وبعدين إنتي تعبانه وجايبه أخرك أصلا وده واجبي ، يارب بقي تطلع شبهي  
كده

ضربته علي يده بمرح وقالت :

- شبهك إيه يا إسلام حرام عليك ، إنت عاوزها تعنس جنبنا

رفع حاجبه قائلا بإستنكار :





- معلى يا فاروق لو إتصلت عليك بدري كده بس بصراحه وحشتني وقولت أتصل أشوف أخبارك إيه  
قال علي الفور :

- يابني بدري إيه الساعه ١٠ الصبح وبعدين مانت عارف إني بصحي بدري أصلا وبفضل قاعد  
والنهارده بقي أجازة والواحد مانتخ علي الآخر ، يادوب هنزل في الجمعة وأوقات الصلاة وأجي أكمل  
راحه ، ربنا يقوينا علي الشغل ده بقي لحسن الواحد خلاص الحمد لله يعني

- أيون صحيح قولي الأخبار عندك إيه ؟ يعني الشغل عامل إيه وعارف توفق بينه وبين البيت  
وطلبات مراتك وكده ولا إيه ؟

أوما برأسه إيجابا وقال :

- أيوه الحمد لله ربنا بيقوي ، الشغل المرادي مش مرهق زي السفرية اللي فاتت الحمد لله ونهي لما  
بتحتاج كتب ولا حاجة بنزل أجيبها من الجامعه وأجي تاني عطول وأديني بحاول بقدر الإمكان  
أساعدها وأذاكرها لما تكون تعبانه ومتضايقه وكده ، والله يا إسلام ربنا بيقوي الحمد لله ، أنا مكنتش  
فاكر إني هقدر أسد علي ده كله بس ربنا كرمني بقي وبنعافر أهو

إبتسم بأريحيه وقال :

- الحمد لله يا فاروق ، ربنا معاك ويوفقك بإذن الله ، أنا كمان كلها كام يوم وبنتي تشرف للدنيا  
بإذن الله وهكون أب بقي ، ربنا يقدرني علي تربيتها علي الدين والأخلاق وبإذن الله تكون خير ذرية  
وتكون سبب في دخولي الجنة أنا وسلمي

- يارب يا إسلام ويقوم نهي بالسلامه وأكون أب أنا كمان بقي

- إن شاء الله يا فاروق ، أنا متأكد إنك هتكون قدوه لأولادك ، ربنا يجمعنا سوا في الجنة يارب

- آمين يارب

---

إنتهي إسلام من محادثه فاروق وذهب علي الفور إلي المطبخ وأحضر بعض الطعام ودخل به إلي  
غرفته ، إبتسم لسلمي بحنان وقال :

- إتفضلي يا ستي الأكل أهو ، أمري لله قلبي طيب وصعبتي عليا

أمسكت منه الصينيه وأخذت تقلب في الأطباق الموجوده عليها وصرخت به قائله :

- فين العيش يا إسلام!!؟

رفع حاجبه قائلا :

- إنتي بتصوتي كمان!!؟ طب قومي بقي هاتي لنفسك أنا الغلطان

نظرت إليه بتوسل كالأطفال وقالت :

- الله يخليك يا إسلام عاوزه عيش عاوزه عيش عاوزه عيش عاوزه ..

قاطعها بصراخ :

- خلاص ، إيه بلعتي راديو ، هجيبك عيش وكلي براحتك وغذي حياء كويس هاه ، كله  
بثوابه يا إسلام يابني معلى

ثم أحضر لها الخبز وجلس بجوارها وتهدد بعمق وقال مبتسما :

- إفتكرت حاجه دلوقتي فرحتني اوووي

نظرت له بلهفه وقالت :

- إيه؟

تنهد ببهجه وقال :

- فاكهه أول مره أخذت الولاد فيها الجامع علشان يصلوا معايا؟ فاكهه ساعتها لما قعدت أدعي ربنا  
كثير يعلق قلبهم بالمساجد ويكون ده في ميزان حسناتي؟

أومات برأسها إيجابا وقالت :

- فاكهه طبعا ، وهي دي حاجه تتنسي !

إتسعت إبتسامته وهو يقول :

- طيب فاكهه لما روحت تاني يوم ولقيتهم مستنينني في الجامع علشان أديهم بلالين؟ ولا فاكهه يوم  
ما نسيت أجيب معايا حاجه وكانوا ناقصين يموتوني ، ولا فاكهه لما قولتلهم إن الجوايز بقت علي

صلوات اليوم كلها وبرضو لقيت شويه منهم بدأوا يواظبوا مع إن أغلبهم إتشغل ومبقاش يبجي ؟ ولا فاكره لما أحمد بذات نفسه بقي يبجي كل يوم وحب الصلاة في الجامع وبقي هو اللي بيقول لأصحابه ويشجعهم علشان يروحوا ؟

تنهد بسعاده وقالت :

- وفاكره كمان لما الحاج أبو أحمد إتصل بيك وقالك إنت عملت إيه في إبنني ، وفاكره كمان لما جابنا علبة الحلويات وشكرنا علشان الولد بقي بيعامله أحسن من الأول وبطل لماضه شويه ، وفاكره لما إنت مروحتش مره الجامع وأحمد جه زعل عليك وقالك بتقولنا علي الصلاة وإنت مبتصليش !! وساعتها عرف إنك كنت في مشوار وصليت هناك

صمتت قليلا ثم قالت بحماس :

- أكثر حاجه فاكراها أووي بقي إنك ثوابك عند ربنا هيكون كثير جدا بإذن الله ، وإن شاء الله أحمد ده لما يكبر يفتكرك ويدعيلك علشان إنت اللي علمته الصلاة وحببته في المسجد ، وكمان ممكن تدخل الجنه بسبب الموضوع ده يا إسلام

أمسك يدها وربت عليها بحنان وقال :

- وأنا أكثر حاجه فاكراها أووي بقي لما لقيتك واقفه جنبي وبتشجعيني علي أي حاجه فيها ثواب ، واحده تانيه غيرك كانت هتقعد تقولي مرتبك صغير أصلا ومش مستحمل وهتروح ترميه لشويه عيال !! لكن إنتي غير كل البنات يا سلمي ، إنتي واحده عاوزه تدخل الجنه وتعمل كل اللي تقدر عليه علشان تنول رضا ربنا وبجد أنا فخور بيكي فوق ما تتخلي

إبتسمت بتأثر وقالت :

- الأكل الغالي ولا اللبس الماركات يا إسلام مش هيدخلنا الجنه !! لكن الحاجات الصغيره اللي بنعملها دي وخصوصا لما مرتبنا يكون صغير دي أكيد ثوابها كبير أووي عند ربنا ، يعني عارف زي واحد مثلا يكون فقير ويطلع صدقه ، ده أكيد ثوابه كبير جداااا بإذن الله لأنه ممكن يقول أنا أحق بالفلوس دي وخلي الأغنياء هما اللي يتصدقوا .. الجنه جميله أووي يا إسلام وتستهال نتعب شويه علشان ننولها ، وفي الآخر برضو مهما عملنا هيكون قليل جدا بالنسبه لنعم ربنا علينا ودخولنا للجنه هيكون من رحمة ربنا بينا مش من عملنا ..

- يارب ننولها يا سلمي يارب

إبتسمت سلمي بتمني بينما نظر هو لدبلته للحظات ثم قال مبتسما وهو يشير إليها :

- بقولك إيه يا سلمي ؟ أنا عاوز أقلع الدبله ، هتزعلي ؟

نظرت له بتعجب وقالت :

- ليه ؟

تنهد بطييه وقال :

- حابب أتقي الشبهات علشان أكون مرتاح ، وبعدين مش حته خاتم اللي هيربطنا ببعض بقي

ثم أمسك بيديها وقال بحماس :

- مش إحنا إتفقنا ندقق في كل تفصيله في حياتنا علشان مناخدش أي ذنب وإحنا منعرفش ، وافقي بقي يا رفيقتي للجنه وخليكي جدعه ..

أفلتت يدها بهدوء وقامت بخلع دبلتها وأعطته إياها وقالت برضا :

- إتفضل يا باشا ، ولا يهملك خالص ، أنا كمان بحب أتقي الشبهات في كل حاجه علشان أبقي متطمئه ، ربنا يجعله في ميزان حسناتنا بقي ٨٨

إستيقظت هند من نومها وظلت تفكر في كل ماحدث وتتساءل ، كيف لخالد إن يحمل بداخله كل هذا السوء ؟ وهل هو يحبها حقا ام ان غروره جعله يعتقد ان الفتاة التي يريدتها سيحصل عليها علي الفور وإن لم تفعل وتستجب ستكون الفضحيه من نصيبها !! وكيف لها ألا تدرك ذلك مبكرا ؟ وماذا عن كلمات فاطمه ؟ هل هي حقا صادقه ؟ نعم يبدو أنها صادقه وأخيرا إستفاقت من تفكيرها الخاطئ وذهابها وراء هواها ، ولكن ماذا ستفعل هند الآن ؟ هل تخبر إسلام بالأمر ؟ وماذا سيحدث بعدما يعرف ؟ وهل ستستطع والدتها تحمل سماع شئ كهذا ؟ وكيف ستعيش معهما بعد ذلك ؟ ظلت تفكر في الأمر كثيرا حتي ارهقت تماما ، نامت مرة أخرى ثم إستيقظت فجأة علي كلمة إسلام التي قالها لها من عدة شهور :

" إبقى إقرأي برضو عن ضوابط الخطوبه علشان تعرفي هتعيشي الفتره دي إزاي "

إنتبهت فجأة وقالت ببريق أمل :

- طب وليه أعرفهم وأفصح نفسي لما ممكن أحاول أنا أدور علي أي حل للمصيبه بتاعتي دي من غير ما حد يعرف ، قدامي أنت أهو ممكن أقرأ عن أي حاجه حتي التجاوزات اللي عملتها دي ونشوف حلها إيه في الدين ، يـارب يكون في حل علشان تعبت !

نهضت من مكانها علي الفور وجلست أمام حاسبها وكتبت في محرك البحث :

" حكم تجاوزات الخطوبه وكيفية التوبه منها "

ضغطت علي الزر فظهر أمامها العديد من النتائج ، فتحت بعضهم وظلت تقرأ عده فتاوي حتي وصلت إلي فتوي بها حديث النبي صلي الله عليه وسلم :

" كل أمتي معافى إلا المجاهرين، وإن من المجاهرة أن يعمل الرجل بالليل عملاً، ثم يصبح وقد ستره الله عليه، فيقول: يا فلان عملت البارحة كذا وكذا، وقد بات يستره ربه، ويصبح يكشف ستر الله عليه " رواه البخاري ومسلم

قالت بتفكير :

- يعني انا كده المفروض مقولش علي اللي حصل بقي لان ربنا سترني وانا ماينفعلش أفضح نفسي ، كمان الولد اللي سأل في الفتوي اللي فاتت وعمل أكثر مني بكتير الشيخ قاله مايقولش لحد ويتوب ويندم بجد من اللي حصل ده ويستتر علي نفسه ، انا كمان المفروض أعمل كده ولا إيه ؟

ظلت تفكر للحظات ثم قررت العوده وقراءة كيفية التوبه من جديد في الفتوي السابقه ، قرأت بصوت هامس :

" فالواجب عليك التوبة إلى الله بأن تندم على تلك المعصية وتعزم أن لا تعود إليها أبداً سواء مع تلك الفتاة أو مع غيرها، فإذا فعلت ذلك صحت توبتك وقبلت إن شاء الله تعالى، وقد قال النبي صلى الله عليه وسلم: التائب من الذنب كمن لا ذنب له. رواه ابن ماجه. "

" التوبة تكون بالإقلاع عن الذنب والندم على فعله والعزم على عدم العود إليه، مع الستر وعدم المجاهرة بالذنب "

" يَا أَيُّهَا الَّذِينَ آمَنُوا تَوْبُوا إِلَى اللَّهِ تَوْبَةً نَّصُوحًا عَسَىٰ رَبُّكُمْ أَن يُكَفِّرَ عَنْكُمْ سَيِّئَاتِكُمْ وَيُدْخِلَكُم جَنَّاتٍ تَجْرِي مِنْ تَحْتِهَا الْأَنْهَارُ "

" قُلْ يَا عِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْغَفُورُ الرَّحِيمُ "

" وَاللَّهُ يُرِيدُ أَنْ يَتُوبَ عَلَيْكُمْ وَيُرِيدُ الَّذِينَ يَتَّبِعُونَ الشَّهَوَاتِ أَنْ تَمِيلُوا مِيلًا عَظِيمًا "

" الَّذِينَ تَابُوا وَأَصْلَحُوا وَبَيَّنُّوا فَأُولَٰئِكَ أَتُوبُ عَلَيْهِمْ وَأَنَا التَّوَّابُ الرَّحِيمُ "

" وَإِنِّي لَغَفَّارٌ لِمَنْ تَابَ وَآمَنَ وَعَمِلَ صَالِحًا ثُمَّ اهْتَدَى "

" إِلَّا مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ يُبَدِّلُ اللَّهُ سَيِّئَاتِهِمْ حَسَنَاتٍ وَكَانَ اللَّهُ غَفُورًا رَحِيمًا "

وجدت هند دمعتهما سقطت رغما عنها وقالت بتأثر :

- ياه ياربي علي كرمك ، بعد كل اللي عملته ده ولسه برضو قدامي فرصه أتوب ؟ لسه برضو ممكن أرجع زي الاول ويمكن أحسن ؟ لسه برضو ممكن تغفرلي وكمان تبدلي سيناتي حسنات ؟ يارب خلاص انا قررت أتوب ، قررت أرجعلك يارب لاني مليش غيرك ، قررت أسيب خالد ده خالص لانه كان هياخد بإيدي للنار مش للجنه ، قررت أبقي إنسانه تانيه وأقرب منك وأعرف عن ديني أكثر ، قررت أقرأ وأفهم وأتطلع علي كل حاجه مش فاهماها وأبدا مع نفسي من جديد ..

تنهدت بحزن ممزوج بالثقة وقالت :

- انا عارفه يارب إني عملت حاجات حرام كتير لكن برضو عارفه إن كرمك ورحمتك اوسع ، انا خلاص هسيب خالد يارب ووثقه إنك هتسترني ، واثقه في كرمك وعطفك عليا وإنك زي ما سترتني وقت معصيتي هتسترني وقت توبتي ، انا خلاص أخيرا حسيت ببريق أمل لما قرريت الفتاوي دي ومش هسمح لنفسي أبدا إني أتنازل تاني ، ساعدني يارب علشان أقدر أقول لإسلام يخلصني من الموضوع ده وإسترني ولا تفضحني ، يارب رجعالك ومش هتنازل تاني بإذن الله

ثم أغلقت حاسبها علي الفور ونهضت من مكانها لتتوضأ وتصلي ركعتين توبه لله كما قرأت في الحديث الشريف :

" ما من عبد يذنب ذنبا فيحسن الطهور ثم يقوم فيصلي ركعتين ثم يستغفر الله إلا غفر له، ثم قرأ هذه الآية: وَالَّذِينَ إِذَا فَعَلُوا فَاحِشَةً أَوْ ظَلَمُوا أَنْفُسَهُمْ ذَكَرُوا اللَّهَ فَاسْتَغْفَرُوا لِذُنُوبِهِمْ وَمَنْ يَغْفِرِ اللَّهُ لَهُ إِلَّا اللَّهُ وَلَمْ يُصِرُّوا عَلَىٰ مَا فَعَلُوا وَهُمْ يَعْلَمُونَ " رواه الترمذي وأبو داود وأحمد

إنتهت من صلاتها وظلت تستغفر الله بكل صدق حتي أحست بالراحة بعض الشيء

بعد ثلاثة أيام قررت هند أخيرا الإتصال علي إسلام وإخباره برغبتها في فسخ خطوبتها من خالد حتي ترتاح كلية ، تعجب إسلام في بداية الأمر من طلبها وحاول الإستفسار أكثر ولكنها كانت دائما ما تهرب من أسئلته وتجيب بإجابات مبهمه ، ظل يحاول معها ولكنه لم يصل لشيء فطلب منها أن تصلي صلاة الإستخاره مره أخري وبعد ذلك تخبره برأيها النهائي ..

إستجابت هند لطلبه وبالفعل أدت صلاة الإستخاره وأخبرته في اليوم التالي بإصرارها علي فسح تلك الخطبه لأنها لاتشعر بالراحه أبدا من ناحية خالد ، كانت تشعر بالخوف قليلا من تهديد خالد ولكنها علي الفور كانت تتذكر ثقتها بالله فيطمئن قلبها ..

وفي نفس اليوم :

إتصل إسلام علي خالد وأخبره برغبته في مقابلته لمناقشه أمر هام ، أحس خالد بالغضب وتوعد لهند لأن مثلها لا تفعل بمثله هكذا وإلا ستندم ، وبالفعل حضرت هند لمنزل أخيها وأحضرت كل الهدايا التي أهداها إياها خالد وأيضا شبكته وكل شئ وقالت لإسلام بكل إصرار :

- خلصني منه بسرعه يا إسلام الله يخليك

تنهد بعدم فهم وقال :

- لو بس تقولي لي حصل إيه علشان أعرف أتصرف

قالت علي الفور :

- حسيت إن مش ده الزوج الصالح ليا يا إسلام ، وكمان أنا قولتلك إنني صليت إستخاره ومش مرتاحه وبكرهه ، هاه فاضل إيه تاني ؟

نظر لها بتعجب وقال :

- بتكرهيه ؟ للدرجادي ؟ طيب قوليلي عملك إيه الراجل ده بس ؟

جلست علي الأريكة بتعب وقالت :

- مش عاوزه أتكلم في حاجه يا إسلام ، بعد إنك خليه يمشي ويسيبني في حالي وخلص

تنهد بإستسلام وقال :

- حاضر يا هند هريحك وطالما إنتي صليتي إستخاره ومش مرتاحه يبقي أنا مقدرش أتكلم ، وبإذن الله ربنا يرزقك باللي أحسن منه لأنني كنت أتمالك واحد أكثر من كده إلتزاما

إبتسمت قائله :

- إن شاء الله يا إسلام



غادر إسلام المنزل وظلت سلمي تتحدث مع هند في حالتها هذه الأيام وتعبها وهكذا بينما لم تستمع هند لأي شيء وظلت تفكر فقط في ما يمكن حدوثه ، أحست بالتوتر قليلا فاستأذنت من سلمي وذهبت للغرفة الأخرى وظلت تدعو الله أن يمر الموقف علي خير ..

بعدما يقرب من الساعة والنصف سمعا جرس الباب معا ، ذهبت كل منهما إلي الباب وفتحت سلمي بإبتسامتها المعتادة ولكنها سرعان ما صرخت بزعر وقالت :

- إسلام إيه اللي عمل فيك كده !!؟

أزاح الباب بعصبيه ودخل مسرعا وإرتمي علي أول كرسي أمامه وظل يتنفس بسرعه شديده والشرر يتطاير من عينيه ، نظرت سلمي لهند وصرخت قائله :

- هند هاتي بسرعه علبة الإسعافات الأوليه من جوه

ثم نظرت لإسلام برعب وأمسكت يده وظلت تتحسسها بخوف وقالت :

- إسلام إنت كويس ؟ فهمني طيب حصل إيه وإيه اللي بهدلك كده ؟

ضغط علي أسنانه بغضب وظل يقبض علي يديه حتي كاد أن يعتصرها وأخذ يتنفس بصعوبه وهو مغمض العينين بينما أحضرت هند صندوق الإسعافات الأوليه وهي تنظر لأخيها بذهول وحاولت أن تظهر له الجروح ولكنه أشاح بيده غاضبا وصرخ بهما قائلا :

- سيبونني في حالي دلوقتي ومحدث يقرب مني خالص فاهمين !!؟

عادت هند للخلف بخوف بينما جلست سلمي بجواره وظلت تستغفر الله وتستعيذ بالله من الشيطان حتي يهدأ قليلا ، ظل يتنفس بكثره لعدة دقائق ثم إنتفض من مكانه فجأة وأخذ يضرب الكرسي بقبضته عدة مرات وهو يصرخ بأعلي صوته :

- حقيير حقيير حقيير حسبي الله ونعم الوكيل فيه وفي أمثاله

حاولت سلمي إيقافه وأمسكت بيده وصرخت قائله :

- يا إسلام حرام عليك إيدك بتنزف إسكت بقي ، إستعيذ بالله من الشيطان يا إسلام إستعيذ بالله ، أستغفر الله العظيم يارب ، أستغفر الله العظيم يارب ، أستغفر الله العظيم يارب ، أعوذ بالله من الشيطان الرجيم ، أعوذ بالله من الشيطان الرجيم ، أعوذ بالله من الشيطان الرجيم

أغض عينيه مرة أخرى وظل يتحسس وجهه عدة مرات وهو يقول بتعب :

- أستغفر الله العظيم يارب ، أستغفر الله العظيم يارب ، أنا مش متخيل إن لسه في كائنات بالقداره دي؟! بجد مش متخيل ، مش متخيل إن اختي اللي أنا مربيه علي إيدي يتقال عليها الكلام ده ومن مين؟! من كائن زي ده؟! أستغفر الله العظيم يارب وحسبي الله ونعم الوكيل

ظلت تربت علي كتفه بخفه وتقول :

- طب الله يخليك إهدي وما تعملش في نفسك كده

ثم دفعته للخلف بخفه وقالت :

- إسترخي وغمض عينيك وإستعيذ بالله من الشيطان علشان يبعد عنا إحنا مش ناقصينه دلوقتي

عاد للخلف كما أمرته سلمي وصوب نظره تجاه هند وظل ينظر لها لفته طويله وهو يستعيذ بالله من الشيطان حتي شعرت أنه سيلتهمها بعد قليل ، ظلت تفرك في يديها بخوف بينما نهض هو من مكانه علي الفور وأمسكها من ذراعها وقال بغضب :

- إنتي إزاي مأخديش بالك الفتره دي كلها إنه قدر اوي كده؟!!!

تراجعت للخلف قليلا وظلت ترتجف وهي تنظر له بخوف وتكاد تبكي ولا تعرف ماذا يجب أن تقول ، تنهد بضيق وإستغفر ربه مره أخرى وإرتمي علي كرسيه وهو يقول بتعب :

- وإنتي هتعرفي مين إنتي كمان ما هو كل كلامكم كان قدامي

ثم إنتبه فجأة ونهض من مكانه مره أخرى ونظر لها بحدده وقال :

- وممكن برضو متكونش كل حاجه كانت قدامي !!

أخذ يتحسس ذقنه بتفكير ثم نظر لها وهو رافعا لحاجبه وقال بصرامه :

- قوليلي بسرعه الواد ده حاول قبل كده يقولك حاجه وحشه علشان كده قررتي تسيبيه ؟ ولا إيه اللي حصل بالظبط ؟ ما هو أكيد مقالش كده من فراغ !!

توترت هند أكثر وأخذت حبات العرق تأخذ مسارها الطبيعي علي وجهها بينما صرخ بها هو وقال :

- إنطقي يا هند ، الواد ده كان عاوز منك إيه علشان كده كرهتیه فجأة كده ؟ وإيه اللي هيخليه يقول عليكي كلام زي ده إلا لو كان هو فعلا إنسان ..

ثم قطع حديثه فجأة وأعمق عينيه وقال بعمق :

- أستغفر الله العظيم يارب ، إمسك لساتك يا إسلام مش عاوزين ناخذ ذنوب علي واحد زي ده ظلت هند ترتجف أكثر بينما أمسكته سلمى وحاولت تهدئته وسارت به بإتجاه الأريكة وقالت :

- أقعد طيب يا إسلام وإهدي كده وهنعرف كل حاجه إن شاء الله ، وبعدين إنت عارف هند كويس ومربيها علي إيدك وأكد عمرك ما هتصدق عليها حاجه وحشه ، فهمنا بس إيه اللي حصل ؟

زفر بضيق وقال :

- طبعا عمري ما هصدق عليها حاجه لأنني عارف أختي كويس بس اللي مجنني إن الواد أول ما سمع إنها عاوزة تفسخ الخطوبه لقيته عمال يخبط في الكلام ويقول كلام أنا شخصا أستحي أقوله قدام نفسي وماحسيتش بنفسي بعدها إلا والناس بيجروني لورا وهو واقع علي الأرض وبينزف من بوءه وأنا بقي معرفش إيه اللي عمل فيا كده .. بس أحسن يستاهل علشان يبقي يتكلم كويس علي بنات الناس ، ربنا يريحنا منه ومن أمثاله ويبعدهم عن بناتنا !

قالت سلمى بخوف :

- ضربته يا إسلام ؟

نظر لها بحدده وصرخ قائلا :

- أو مال عاوزاني أعمل إيه يعني إن شاء الله ؟ عاوزاه يتكلم عن عرضي وأسكت ؟ ولا أقوله يا خالد يا وحش متقولش كلام زي ده علي أختي علشان هي كيوت ومؤدبه ؟ متهيألي دي أبسط حاجه ولو كان زود كمان كنت ممكن أموته فيها

ثم أمسكت بلحيته وقال بعصبيه :

- شايفين دي ؟ أقسم بالله أنا عامل إحترام ليها بس ومرديتش أعمل فيه أكثر من كده ، واحد زيه كان المفروض يقتل أصلا علشان يبقي يفكر مليون مره قبل ما يقذف بنات الناس بكلام زي ده

نظرت له سلمى بحزن وقالت :

- طب خلاص يا إسلام الله يخليك إهدي ومش كل شويه تقول كلمه قتل دي حرام عليك بقي متخوفنيش

نهض من مكانه مره آخري ووقف أمام هند وقال بصراخ :

- إنطقي دلوقتي حالا وقولي قال عليكي كده ليه؟! أنا متأكد إن الموضوع أكبر من مجرد إنه زعل علشان هتسيبيه فحب يشوه سمعتك أو يستفزني أو كده

أمسكها من ذراعها وظل يحركه بعصبية وقال :

- ياهند إنطقي ومش هعمك حاجه مهما كان اللي هتقوليه بس لازم أفهم ، لازم أعرف إزاي إتجرأ يتكلم عليكي كده وكمان الله أعلم كان ناوي يقول إيه تاني لولا العلقه اللي عطيتها له !! قولي يلا

إرتفع صوت بكاء هند وظلت تشهق وهي تقول :

- إسلام كفايه بقي حرام عليك ، أنا مش عاوزه أسمع سيرته تاني وعاوزاه يخرج من حياتي تماما علشان كرهته وكرهت نفسي وتعبت ، إسكت بقي يا إسلام الله يخليك كفايه قرف بقي كفايه

إنتزعت سلمي يده الممسكه بهند ووقفت أمامه وقالت بجديه :

- خلاص يا إسلام سيبها بقي ، أكيد هو قالها حاجه مش محترمه وعلشان كده هي كرهته وقررت تسببه وطبعاً يعني مش هتقدر تقولك قالها إيه ، خلاص بقي اللي حصل حصل والحمد لله إن الموضوع خلص لحد كده

نظر لهند مرة آخري وقال بهدوء :

- اللي سلمي بتقوله ده صح ؟ يعني فعلاً إكتشفتي إنه مش كويس ؟ قولي اه او لا ومش عاوز أسمع تفاصيل طالما مش هتقدري تتكلمي

نظرت له بخوف وأومات برأسها إيجاباً بينما قال هو بفضول :

- من إمتي الكلام ده ؟

نظرت للأرض ولم تتحدث فصرخ قائلاً :

- بقولك قولي من إمتي

لم تستطع هند تحمل الضغط عليها أكثر من ذلك وسقطت علي الأرض مغشيا عليها ..

بعد نصف ساعه تقريبا ..

كانت هند ملقاه علي الفراش وقد إستفاقت بينما جلس إسلام علي طرف الفراش من الجانب الآخر ووقفت سلمي أمامهما وقالت بمرح :

- علي فكره إنتوا بتهرجوا بقي ، يعني أنا خلاص قربت أولد وإنتوا اللي المفروض تخدموني ودلوقتي واحد جايلي متخرشم وعماله أعالج فيه والتانيه مغمي عليها ، إنتوا بتستعبطوا يا جدعان ولا إيه ؟ أنا مش فيا حيل للهرية دي كلها أصلا

ضحك إسلام رغما عنه وقال :

- والله إنتي رايقه يا سلمي الله يسامحك الموضوع مش مستحملك أصلا

ضحكت بمرح وقالت :

- يا راجل فكها كده وخليك حلو ، وإحنا هناخد إيه من الزعل يعني ، وبعدين كنت هتموت البت برا ومرتحتش إلا لما أغمي عليها ، إستني بقي ناخذ رست ونستريح شويه وبعدين نبقي نكمل خناق

نظرت هند لإسلام بحزن وقالت :

- أنا أسفه يا إسلام إني كنت السبب في ده كله

إقترب منها ونظر لها بحنان وقال :

- أنا اللي أسف إني ضغطت عليك أوي كده لحد ما أغمي عليك ، بجد يا هند كنت هتجنن من الواد ده وفي نفس الوقت مش عارف إنتي ماقولتيليش ليه

نظرت له سلمي بتأكيد وقالت :

- أكيد إتكسفت تقولك يا إسلام طالما بتقول إنه وحش كده وقال كلام مش محترم ، إقفلوا الموضوع بقي بالله عليكم كفايه كده علشان تعبنا وبجد الحمد لله إننا عرفنا حقيقته دلوقتي بدل ما كانت الفاس تقع في الراس وبعدين نندم

أوما برأسه إجابا وقال :

- عندك حق وهي كانت هتقولي إيه يعني؟! ده أنا نفسي أتكسف أقول الكلام اللي قاله ده ، يلا الحمد لله ربنا يبعد عننا الناس اللي زي دي ويحفظ بناتنا

ثم نظر لهند بحب وقال :

- بإذن الله يا هند المره الجايه هاخذ بالي من إختياراتي ، أنا اللي غلطان من الاول إني وثقت في واحد زي ده ودخلته بيتي ، لأ وكمان كان باين أصلا بس بسذاجتي صدقته وكنت فاكِر إن كل الناس زيي أنا وفاروق وفرحت لما لقيته بيصلي في الجامع وقلت أكيد كويس ومحترم

ثم ضحك بسخريه وقال :

- صلاة في الجامع إيه بقي ماهو تقريبا ده كله طلع تمثيل ، مش عارف إزاي كنت ساذج كده ولما لقيته قالي يلا نصلي صدقته رغم إنه أصلا المره اللي قبلها مفكرش يقوم !! ولا يوم الخطوبه لما قالي كنت بختبرها برضو بغبائي صدقته وإفكرت إنه عمل زيي !! ولا لما سألت عليه ف الشغل ووحد من زمايله نصحني أبعد عنه مفكرتش حتى أعرف منه السبب ومشيت علطول علشان صحابه كلهم شكروا فيه ومحطيتش ف بالي إنهم بيشكروا فيه علشان لسانه حلو وبيعرف يذوق كلامه

صمت قليلا ثم قال بندم :

- إزاي مفكرتش أروح أسأل عليه في الجامع اللي عند بيته؟! إزاي مفكرتش أشوف أخلاق أصحابه المقربين؟! إزاي مفكرتش أختبره كويس وأطلع عينه علشان أشوفه علي حقيقته؟! إزاي كنت برئ كده ونيتي صافيه وكنت بصدقته في كل حاجه؟! إزاي حقيقي أنا أسف إني عرضتك لحاجه زي كده يا هند بس خلاص أنا فهمت الدرس كويس ومش هتنازل بعد كده عن حد ملتزم بجد ، وإنتي كمان يا هند لازم تبدأي تتغيري وتكوني أقوي من كده علشان تستاهلي بجد واحد كويس

إبتسمت قائله :

- أنا بدأت بالفعل يا إسلام وبإذن الله أي حاجه بعد كده هتقولي عليها إنت أو سلمي هعملها فورا ، خلاص مبقاش في وقت أضيعه أكثر من كده

نظر لها بفخر وقال :

- ربنا يرضي عنك يا هند ويرزقك بالزوج الصالح

أقتربت منه سلمي فجأة وعقدت ذراعيها أمام صدرها وقالت مازحه :

- وأنا بقي ياخويا مليش دعوتين حلوين كده زي هند ؟

أوما برأسه نفيا وقال بمرح :

- لا مفيش

رفعت حاجبها قائله بتزمر :

- خلاص بقي رجعلي الشاش والقطن بتاعي يا عم ، أنا الغلطانه أصلا

ثم أشارت لهند وقالت بغضب مصطنع :

- وإنتي يا ست الميته إنتي قومي من علي سريري يلا وروحي هاتيلي برفيوم بدل اللي خلصتية ده

ضحكت هند بمرح وقالت :

- برفيوم مين يا ست إنتي ، تلاقيكي ياختي فوقتيني ببصل ، هبقي أجيبلك بصلتين من عند ماما حاضر

مطت شفيتها للأمام وأخذت تحول نظرها بين إسلام و هند وهي تقول بمرح :

- مش هترجعلي شاشي يعني ؟ وإنتي مش هتجيبلي برفيوم جديد ؟ ومحدث فيكم هيد عيلي أقوم بالسلامه كمان ؟ حسنا أنا حزينه وزعلانه وسيبوني لوحدني بقي يا رخمين

غمز إسلام لهند وقال ساخرا :

- دي منظر واحده هتكون أم بعد كام يوم إن شاء الله ؟ طب هتربي عيالي إزاي بقي ؟ ولا أنا هربيهم هما الإثنين ولا إيه

رفعت حاجبها قائله بمرح :

- تربي مين ياعم الحاج إنت ؟!! أصبر بس علي سلمى دي لما تولد ، إن ما شعلقتش بنتك دي علي التعب اللي تعبته فيها مبقاش أنا سلمى ، والله لوريها

أمسكها من يدها وأجلسها بجواره وإقتربت منه هند أيضا من الجانب الآخر وأحاطهما بذراعيه وقال بأريحيه :

- يارب قوم سلمى بالسلامه وأرزق هند بالزوج الصالح وقدرني علي مسئوليتهم وإحفظنا وإبعد  
عنا كل شر ..

- متجمعين في الجنة إن شاء الله

قالها إسلام عندما دخل مكتبه ووجد مروان وفوزي يجلسا معا ويضحكا بشده ، إقترب منهما وقال  
بمرح :

- بتعملوا إيه يا بشوات ؟

ثم نظر ليد مروان وقال بفرحه :

- يا موبايلا تـك يا عم ، الف مبرووك وعقبالنا بقي ، لأ وجايب من أحدث نوع ماشاء الله عليك

إبتسم مروان ببراءه وقال :

- لأ ده بتاع فوزي ، وكمان لقيه يا عم شوفت الحظ

وكزه فوزي بضيق بينما نظر له إسلام بتعجب وقال :

- لقيه إزاي ؟

نظر مروان لفوزي بإحراج وقال مستسلما :

- لقيه في الشارع وهو جاي

نظر لهما إسلام بحزن وقال :

- ياعيني ده تلقاه صاحبه هيموت عليه وخصوصا لأنه غالي ، طيب يلـا بسرعه دور في الأسماء  
وشوف حد من قرابيه وكلمه علشان تديهوله

أمسك فوزي الهاتف جيدا ولم يتحدث بينما نظر له إسلام بتعجب وقال :

- إيه ؟ معقوله تكون مش ناوي ترجعه ؟

تنهد بتوتر وقال :



- بصراحه كنت ناوي بس الموبايل حلي في عيني وهاخده بقي

نظر له إسلام بذهول وقال :

- لا يا فوزي ما ينفعش حرام عليك ، إنت بتهرج ولا إيه !!؟

تنهد بضيق وقال :

- خلاص يا إسلام بقي متحسسنيش بالذنب وتطفي فرحتي ، وبعدين عادي يعني واحد ولقي حاجه وأخدها إيه المشكله !!؟

جلس إسلام أمامه وقال مفسرا :

- علي فكره إنت لو أخذته هتأثم يا فوزي وكمان لا يجوز إنك تبقي عارف صاحبه وتأخده ليك ، الموضوع مش سهل زي ما إنت متخيل

أشاح بيده غاضبا وقال :

- خلاص بقي يا إسلام متكبرش الموضوع

تنهد بحزن وقال :

- والله يابو مريم بكلمك بجد ، بص كان في حديث كده عن النبي صلي الله عليه وسلم بخصوص الموضوع ده بس أنا مش فاكراه أوي ، هو فيما معناه يعني إن اللي يلاقي حاجه وهو مايعرفش صاحبها لازم يلف علي كل الأماكن اللي متوقع إنه ممكن يلاقي صاحبها فيها زي الاسواق والمساجد والمدارس والصحف والحاجات دي ويقولهم علي صفاتها وأول ما يبجي صاحبها يديهاله علطول ، ولو عدت عليها سنه وصاحبها مجاش ممكن ينتفع بيها عادي علي إنه يكون عارف صفاتها وأول ما يظهر صاحبها يديهاله او يديله قيمتها مثلا حتي لو بعد سنين ، وشوف الكلام ده كله لو متعرفش صاحبها أما بقي لو عارف صاحبها زي حكايتك كده وأخذتها لنفسك هيكون وضعك إيه !!؟

زفر فوزي بملل وقال :

- خلاص يا إسلام مش للدرجادي يعني ..

أوما برأسه نفيا وقال مؤكدا :

- لأ للدرجادي ، إستني طيب أنا هدخل علي النت وأجيبك الحديث بنفسي

ثم أمسك هاتفه وبحث سريعا عن الحديث وقال :

- بصي يا سيدي الحديث أهو " روى زيد بن خالد الجهني قال: سئل رسول الله صلى الله عليه وسلم عن لقطة الذهب والورق والفضة فقال: اعرف وكائها وعفاصها ثم عرفها سنة، فإن لم تعرف فاستنفقها ولتكن وديعة عندك، فإن جاء طالبها يوما من الدهر فادفعها إليه " متفق عليه

ثم أردف قائلا :

- والكلام ده برضو ينطبق علي الموبايل ، يعني ماينفعلش تاخده ليك كده لأنك هتأثم ، وبعدين يا فوزي تخيل نفسك مكان صاحبه يا عم وشوف شعورك هيكون إيه ؟ بالإضافة الي ان فرحتك بالموبايل دايمًا هتكون مكسوره ومصحوبه بتأيبب الضمير طول عمرك يبقي علي إيه بقي !!؟

نظر له بخوف ممزوج بالحزن وقال :

- يعني إنت شايف إني أرجعه أحسن يعني ؟ أصلا بصراحه العده جامده وعجباني أووي ومكنتش مصدق إنها حقيقه أصلا

أوما برأسه إجابا وقال :

- أيوه طبعا لازم ترجعها وإحتسب الأجر عند ربنا ، وبعدين فرحتك براحه ضميرك وبفرحة صاحبها هتكون أحسن منها وربنا ياعم يرزقك بالحلال وتعرف تجيب واحده زيها إن شاء الله

- منين بس يا إسلام ما إنت عارف مصاريف العيال ، وبعدين الحاجه المجانيه دي ليها طعم تاني

إبتسم قائلا :

- معلش بقي كله بثوابه ، يلا هات الموبايل ندور علي حد من قرايب صاحبه ونكلمه

أعطاه فوزي لإسلام وهو يضحك ويقول :

- خد ، بس أنا رميت الشريحه خلاص ، يبقي كده من نصيبي بقي صح ؟

زفر بضيق وقال :

- رميتها ليه بس يا فوزي ، طيب قول رميتها فين وندور عليها

قال بحزن :

- رميتها في الشارع يا إسلام ، يعني حلال عليا بقي

أمسكه إسلام من يده وقال بحماس :

- طيب تعالي ندور عليها

- يا إسلام طب والشغل ؟

ضحك إسلام وقال :

- الساعة ٩ إلا ربع يابو مريم باشا ، يعني لسه مفيش شغل دلوقتي ، يلا نلحق بسرعه بقى

وبالفعل هبطا معا وأخذا يبحثا في المكان الذي ألقاها فيه فوزي حتي وجدها إسلام فقال بسعاده :

- لقيتها يا فوزي تعالي خلاص

أقترب منه فوزي وقال بحزن :

- يعني خلاص كده مفيش أمل ؟

ربت إسلام علي كتفه وقال مبتسما :

- أولا كده جدد نيتك هاه وحط في بالك إنك كده بترجع الأمانه وبتدخل السرور علي قلب صاحبها  
وبتتبع كلام النبي عليه الصلاة والسلام وبتدوس علي هواك علشان رضا ربنا ، يعني ماتزعلش من  
حاجه زي كده ، أنا متأكد إنك جواك كويس وبرضو عاوز ترجعها بس هي حليانه في عينك شويه  
وبصراحه عندك حق بس عارف يا فوزي ؟

صمت قليلا ليجذب إنتباهه وقال بثقه :

- المؤمن اللي بجد ببيان في المواقف اللي زي دي ، ببيان درجة حبك لربنا وإيمانك في مواقف الشده  
والحاجات اللي زي كده علشان كده لازم تاخد بالك أووي وحتى لو الحاجه علي هواك دوس علي  
نفسك شويه علشان تعمل الصح

ثم ضربه بمرح وقال :

- إفرح بقي يا عم وإضحك كده الله ، ده إنت دلوقتي هتكون شخص أمين وهتشوف بنفسك فرحة  
صاحبها بيك

إبتسم قائلا :

- ماشي يا إسلام حاضر ، وعندك حق برضو رضا ربنا أهم ، وبعدين أنا مش هفرح يعني لو ربنا عاقبني مثلا وحد من ولادي حصله حاجه أو كده ، ربنا يحفظهمولي ويقدرني علي تربيتهم بالحلال

تنهد بسعاده وقال :

- يارب يابو مريم ، يلا بقي هات الشريحه علشان نحطها ونكلم صاحبها

أمسك بالشريحه ووضعها بالهاتف وأخذ يقلب في الأسماء ليختار المتصل بينما أمسكه فوزي فجأة وقال بحيره :

- طيب صحيح ما ممكن الشريحه اللي لقيناها دي تكون بتاع حد تاني خالص ولما يعرف الموضوع ياخذ هو الموبايل ليه

إبتسم قائلا :

- في الغالب مش هيجصل كده إن شاء الله لانها الشريحه الوحيده اللي لقيناها في نفس المكان لكن مع ذلك برضو انا مش هديهاله إلا لما يوصفها كويس وكده علشان أتأكد

بدأ إسلام يبحث في الأسماء مرة أخرى حتي وجد اسم **My sister** فإبتسم لفوزي وقال :

- لقيت رقم اخته او اختها أهي ، خد كلمها بقي وشوف

أمسك فوزي بالهاتف ولكنه سرعان ما أعاده إلي إسلام وقال مازحا :

- لأ خد ياعم كلمها إنت ، بصراحه مشاعري ما تستحملش أعمل حاجه زي كده

ضحك قائلا :

- صعبان عليك أوي إنك هترجع الموبايل يعني ، قولنا جدد النيه بقي يابو مريم

ثم أمسك بالهاتف واتصل علي الرقم وقال بجديه :

- السلام عليكم يا فندم

أجابت بلهفه :



- ده إنت طلعت صغير اوووي ، شوف أهو أنا بطولي ده كله ومش معايا نص العده دي ، يلا ياعم علي العموم ألف مبروك رجوعها وإبقي خد بالك منها بعد كده ، وماشاء الله يعني لا تقول بحسد ولا حاجه

إمسك كريم هاتفه وكأنه يحتضنه وقال بسعاده :

- شكرا اوووي يا شيخ ، أنا كنت ممكن أموت لو الموبايل ده ضاع مني

إبتسم إسلام بتلقائيه بينما قال فوزي متعجبا :

- للدرجادي يعني !!؟

أوما برأسه إجابا وقال :

- أنا بقالي سنين نفسي في موبايل جديد ومكانش في إمكانيه إني أجيب يعني علشان الظروف وكده وكمان لما عيبت وعلت العمليه بابا صرف كل اللي معاه عليا بس الحمد لله بقي ربنا رزقني بواحد من قرابيبي اللي في السعوديه ولما عرف إني علنت العمليه بعتهولي وكنت هظير من الفرحة ساعتها لدرجه إني قولت وقتها يا ريتني كنت علنت العمليه من زمان ، عموما شكرا اوووي بجد ربنا يجازيك خير وادعو لأخوكم بقي ثانويه عامه ومزنوق

إبتسم إسلام وقال بلهفه :

- عمليه إيه خير ؟ وكمان شكلك صغير اووي علي الثانويه العامه

تنهد برضا وقال :

- مش مهم بقي ، يلا الحمد لله علي كل شئ ، ربنا يجازيك خير يارب ويجعل فرحتي في ميزان حسناتكم ، بعد إنكم هروح بقي علشان عندي درس ١٠ الصبح

صافحه كل من إسلام وفوزي وغادر كريم بينما ظل كل منهما ينظر للآخر وقال إسلام براحه :

- إنت حاسس باللي أنا حاسس بيه ؟ شوفت فرحته كانت عامله إزاي ؟ ولا تخيلت لو كان ضاع منه فعلا بعد صبر السنين دي كلها كان ممكن يحصله إيه ؟ بجد الحمد لله إننا رجعناه في وقته

نظر فوزي لإسلام بحب وقال :

- شكرا يا إسلام علي كل حاجه ، حقيقي فرحت من اللي حصل ده ، الحمد لله علي كل شئ

ثم أخذ بيده وصعدا للشركة مرة أخرى ..

إنتهي إسلام من عمله وأثناء عودته إلي منزله إتصلت به سلمي فأجاب علي الفور :

- السلام عليكم

قالت بتعب :

- وعليك السلام ، إحققي بسرعه يا إسلام هموت ومش قادره يا إسلام إحققي ااااااه

قال بلهفه :

- إيه يا سلمي هتولدي ولا إيه ؟

صرخت قائله :

- هموت يا إسلام مش قادره إحققي بسرعه ، لا عارفه أفق ولا أقعد ولا انام ولا أعمل أي حاجة ، بسرعه يا إسلام اللي يخليك إعمل أي حاجة شكلي هولد دلوقتي فعلا

شعر بالخوف وقال أثناء عبوره للطريق :

- خلاص أنا علي اول الشارع أهو وجاي حالا معلى إستحم ..

يا أستاذ حاسب

يا أستاذ خد بالك العربيات

يا أستاذ

حاسب

حاسب

حاسب

طراخ ، بـوف !!





نظر إسلام لهاتفه بذهول وقال :

- محمد إزاي يعني ؟ هو إيه اللي بيحصل !!؟

ثم أمسك هاتفه وضغط علي زر الإتصال فوجد المتصل الأخير يدعي " أبو شعر مسبب " فانتفض من مكانه علي الفور وألقي الهاتف بخوف وقال :

- إيه ده في إيه ؟ محمد الله يرحمه أنا غيرت إسمه من زمان

ثم نظر لغرفته وقال متعجبا :

- هو أنا إيه اللي جابني هنا ؟

نظر بجواره وقال :

- وفين سلمي ؟

تحسس وجهه بتعب ثم إتسعت عيناه فجأة وشهق بخوف وقال :

- وفين اللحية ؟

أزاح الغطاء عن نفسه ونهض من مكانه ونظر للمرآه وقال :

- مين ده ؟ وإيه اللي بيحصل هنا ؟ وفين أيدي المتعوره !!؟

تذكر كلمات هند فعاد لفراشه مره آخري وأمسك هاتفه بخوف وإتصل علي " أبو شعر مسبب " ووضع الهاتف علي أذنه بتوتر وسمع شخصا يقول :

- علي فكره يا إسلام إنت بتستعبط وأنا غلطان أصلا إني فكرت أقولك علي حاجه ، عموما البرنامج هيتعاد الساعه ٢ بليل لو عاوز تتفرج إتفرج ولو مش عاوز براحتك وبرضو شكرا علي الإهتمام ، يلا سلام

إتسعت عيناه بشده وأخذ يحرك رأسه يمينا ويسارا حتي يستطيع إستيعاب ما يحدث وقال بصوت مختنق :

- محمد إنت عايش !!؟

زفر بضيق وقال :

- إسلام بطل إستعباط علشان والله العظيم متضايق ومش ناقصك ، ووجد أنا الغلطان إني فكرت أقولك نتغير سوا ، يلا روح كامل نوم وإبقي إعتذر لمامتك لو كنت ضايقتها ومش عاوز منك حاجه بعد كده

تنفس بصعوبه وقال بمنتهي التأثر :

- محمد إنت عايش بجد ؟

تنهد بممل وقال

- عايز إيه يا إسلام ؟

شهق بعدم تصديق وقال :

- محمد قولي إن إنت عايش الله يخليك ، بجد أنا تعبت اووي من غيرك ومكنتش أعرف إني بحبك اوووي كده

إرتمي علي كرسية وقال بضيق :

- أيوه عايش هروح فين يعني؟! عايز إيه إخلص وبلاش إستعباطك ده علشان أكلت منه كتير

ظلت ينظر للفراغ بذهول وعينية متسعيتين وقال بشوق :

- محمد أنا عاوز أسمع صوتك ، قولي أي حاجه ، زعقلي او إشتمني او هزر او صوت او إعمل أي حاجه ، بجد واحشني صوتك اووي ، محمد انا بحبك اوووي فوق ما تتخيل ، محمد انا تعبت اوووي من غيرك والله ، محمد بالله عليك قولي إنك لسه عايش وإني ممكن أشوفك تاني ، قولي إن ده بجد وان انا مش بحلم ، قولي إنك هتفضل جنبي يا محمد بالله عليك ، قول أي حاجه تعجبك بس إفضل كلمني كده هاه ، بجد وحشتني اوووي يا محمد ، يلا كلمني الله يخليك

شعر محمد بالخوف وقال :

- إسلام إنت كويس ؟

أوما برأسه إجابا وقال :

- كويس والله كويس ، بس عاوز أشوفك يا محمد ، عاوز أحضنك زي زمان ، عاوز أتكلم معاك تاني  
علشان وحشتني اووي ، بقالي كتير أوووي ما شوفتكش يا محمد

ضحك رغما عنه وقال :

- هنبداً في الإستعباط تاني بقي ، يابني ما إحنا كنا مع بعض النهارده في الجامعه ، وحشتك إمتي بقي  
؟ ولا ده نوع من أنواع الإعتذار زي ما بتعمل دايمًا بعد كل مُصيبه ؟

نظر للمرآه بعدم فهم وقال :

- جامعه ؟ جامعه إيه ؟ مش أنا إتخرجت خلاص ؟ ولا أنا في سنه كام ولا إيه ؟

ضحك بسخريه وقال :

- إيه يا عم إنت فقدت الذاكره ولا إيه ؟ إحنا في سنه تالته يابني وفي كلية هندسه كمان وربنا !

ردد هامسا :

- سنه تالته ؟ أيوه صح أنا كنت في سنه تالته !!

ثم قال بتساؤل :

- طب إنت طلعت عايش صح ؟ أو مال موتت إمتي ؟

- وده أجاب عليه إزاي بقي إن شاء الله !!؟

أخذ يحاول التركيز وقال :

- محمد مش إنت موتت وبعدين أنا تعبت وبعدها خطبت وإتجوزت وكنت هخلف وحاجات كده ؟

أطلق ضحكات عاليه متواصله وقال :

- وده في الأحلام بقي ولا إيه ؟ ولا تكونش خارق ياعم إسلام وإحنا منعرفش !!؟

ردد بتلقائيه :

- أحلام !!؟

ثم نهض من مكانه وذهب ليري التاريخ فوجده بالفعل نفس تاريخ وفاة محمد فقال لمحمد علي الفور :

- محمد هو انا كنت نايم صح ؟

- ياعم ده إنت كنت ميت مش نايم وبجد أنا إتضايقت جداااااا من الحركة دي

ضحك بذهول وقال :

- معقول ده كله كان حلم ؟ يـاه ياربي معقوله دي تكون رساله منك علشان أفوق بقي وأعيشها صح وأعرف يعني إيه إلتزام بجد ؟

سمع صوتا يضحك من وراء السماعه ويقول :

- حلم إيه ياـض إنطق ، وبعدين رسالة من ربنا إزاي يعني ؟ عرفت المصطلح ده منين يا إسلام ؟ طلعت عارف في الدين من ورايا ولا إيه ؟ ده فاروق قايلي علي الحكاية دي من شهر بس تقريبا

إبتسم للمرآه وقال :

- فاروق ؟ أنا طلعت بحب فاروق ده أووي

ضحك بإستنكار وقال :

- هنبدا في الكذب بقي !!

أوما برأسه نفيا وقال :

- لالالا والله بحبه أووووي

ثم قال علي الفور :

- انا عاوز أشوفك دلوقتي حالا يا محمد وهحكيتك كل حاجه

- تشوفني مين يا عم ما تبص في الساعه الاول !!

نظر في الساعه بتلقائيه فوجدها الواحده صباحا فقال بإبتسامه مشرقه :

- خلاص بكره هقابك في الجامعه ماشي وهحكلك علي كل حاجه

ثم تنهد بحماس وقال :

- ده أنا يا محمد عرفت حاجات كتير أوووي في الدين وهقولك عليها كلها قبل ما أنسي بقي ،  
وكم ان خلاص أنا هبقي زي ما إنت عايز وهنتغير سوا ماشي ؟

إبتسم محمد بإبتهاج وقال :

- بتتكلم بجد يا إسلام ؟ ولا زي كل مره ؟

أوما برأسه إجابا وقال :

- والله والله بتكلم بجد المرادي وبكره هقولك هنبداً منين ، انا خلاص يا محمد مستحيل أعيش  
بالطريقه دي أكثر من كده ، انا عرفت إنني موجود في الدنيا دي علشان أعبد ربنا وأحجز لنفسي  
مكان في الجنه ، عرفت إن مفيش أي حاجه في الدنيا تستاهل إنني أغضب ربنا علشانها ، عرفت إن  
الإلتزام ده مش حاجه صعبه بل بالعكس ده حاجه إحساسها حلو أوووي ، عرفت إنني لازم أكون  
مسلم بجد وأكون قدوه وأساعده غيري إنه يقرب من ربنا ، عرفت إن ربنا كريم أووي علشان بعثني  
الرساله دي قبل ما أموت وانا بالشكل ده ، بجد انا خلاص فهتمت الرساله كويس وهبدأ من دلوقتي ،  
هستناك بكره يا محمد علي أحر من الجمر

- كلامك بيفكرني بكلام فاروق والله ، هستناك الصبح الساعه ٨ ماشي ؟ ، يلا سلام يا عم إسلام ،  
وإبقي إتفرج علي البرنامج هبيجي بعد ساعه علي قناة الندي ماشي ؟

إبتسم قائلاً :

- حاضر هتفرج عليه بإذن الله ، ما تتأخرش بكره يا محمد الله يخليك علشان وحشتني أوووي ماشي  
؟

ضحك بسخريه وقال :

- ياعم إنت غرقت في أحلامك ونسيت الواقع ولا إيه ؟ محمد عمره ما بيتأخر علي محاضره الحمد لله

- ماشي هستناك ، سلام عليكم

شهبق بسعاده وقال :

- وكم ان بتقول سلام عليكم ؟ لا باين عليها كده بداية مبشره بالخير

إنتهى إسلام من محادثة صديقه وجلس علي طرف فراشه وظل يفكر طويلا في كل ماحدث ويحاول إستيعاب كل شئ ، بعد قليل نادي علي هند وحضرت إليه وقالت :

- عاوز إيه ياعم إسلام ؟

أمسكها من يدها وأجلسها بجواره ومسح علي شعرها بحنان وقال :

- أنا بحبك اوووي ياهند وبكره لينا قاعده طويله مع بعض وهنتكلم كتير اوووي ماشي ؟

رفعت حاجبها قائله بتعجب :

- إيه ياعم الحنيه اللي نزلت عليك دي ، نقعد ياخويا وماله

أزاحها من علي فراشه بمرح وقال :

- يلا إمشي بقي خلاص

إعتدلت في وقفته بغرور ومشت بخطوات ثابتة نحو الباب وكادت أن تخرج فنادي عليها إسلام مرة أخرى وقال :

- بقولك إيه يا هند ؟ هي سلمي صاحبتك مخطوبه ؟

أجابت ببراءه :

- لأ ، ليه ؟

تنهد بحماس وقال :

- طب إحجزيهالي بقي هاه

قطبت حاجبها ونظرت له بتعجب وقالت :

- نعم ياخويا !!

إبتسم ببراءه وقال :



هل شايقين إن أحداث الروايه خياليه ؟ ولا إحنا قادرين علي كل حاجه طالما معانا ربنا !!؟

أهم حاجه بقى ، هل حسيتوا كل كلمه في الروايه دي ؟ ♥

بجد كنت بكتب كل مشهد وأنا نفسي أوصل حاجه معينه وحاسه إن كلامي هيوصلكم بإذن الله ^^

وعلي فكره مفيش حاجه مستحيله وكل حاجه إتعملت في الروايه دي أنا مقتنعه بيها مليون في الميه وإحنا ممكن نحققها فعلا ، بس لو إحنا عاوزين !

لأن ببساطه " لَا يُكَلِّفُ اللَّهُ نَفْسًا إِلَّا وُسْعَهَا " ولما ربنا يأمرنا بالحاجه يبقي هو عالم إننا قادرين  
ننفذها ^^

مستنيه رأيكم كلكم بقى هاه ^^

علي صفحه الروايه علي Goodreads

وكمان علي هاشتاج #في\_الحلال

سواء في جروبات الفيس أو بروفايلكم أو أي مكان ^^

آخر طلب بقى ^^

لو حسيتوا إنكم إستفدتوا منها أي حاجه يبقي إنصحوا أصحابكم بيها ^^

هستني أرائكم ضروري ^^

دمتم بعفه ^^

صفحتي علي الفيس بوك : ☞ شخايبط لـ / رقيه طه ☞

[www.facebook.com/Rokya.Taha1](http://www.facebook.com/Rokya.Taha1)